

1915.info

Արհամարանք
Ալբերտո Մորավիա





ԱՐՀԱՄԱՐՀԱՆՔ

Գլուխ առաջին

Ամուսնութեանս առաջին երկու տարին իմ ու կնոջս հարաբերութիւնները (այժմ ես դա կարող եմ հաստատել) հիանալի էին: Ուզում եմ ասել, որ այդ երկու տարում մեր զգացմունքների կատարյալ և խոր ներդաշնակութիւնը ուղեկցվում էր այն մթագնութեամբ կամ, եթե կուզեք, բանականութեան այն լուսութեամբ, որի պայմաններում դադարում է ամեն մի դատողութիւն, և սիրած մարդու գործողութիւններն ու բնավորութիւնը գնահատելիս ենթարկվում ես միայն սիրո ձայնին: Մի խոսքով, ինձ թվում էր, թե էմիլիան ոչ մի թերութիւն չունի, և, կարծում եմ, որ այդ նույն ձևով էլ նա էր ինձ պատկերացնում: Կամ, գուցե, ես նրա թերութիւններն էի տեսնում, իսկ նա՝ իմը, բայց սիրո կատարած ինչ-որ մի հրաշագործ կերպարանափոխութեան շնորհիվ այդ թերութիւնները մեր երկուսին էլ թվում էին ոչ միայն ներելի, այլև սիրելի, կարծես դրանք ոչ թե թերութիւններ էին, այլ առաքինութիւններ, թեև արտասովոր բնույթի: Ինչպես էլ ուզում է լիներ, մենք դատողութիւններ չէինք անում մեր արժանիքների կամ թերութիւնների մասին, մենք սիրում էինք միմյանց: Այստեղ ես ուզում եմ պատմել, թե ինչպես պատահեց, որ մինչ շարունակում էի սիրել էմիլիային, ոչ մի վայրկյան չմտածելով նրա արժանիքների և թերութիւնների մասին, նա, ընդհակառակը, բացահայտեց կամ գոնե պատկերացրեց, թե բացահայտել է իմ մեջ որոշ թերութիւններ, ինձ սկսեց դատապարտել դրանց համար, իսկ հետագայում բոլորովին դադարեց նաև ինձ սիրելուց:

Որքան ավելի մեծ է երջանկությունը, այնքան ավելի քիչ է դա նկատելի: Գուցե և տարօրինակ երևա, բայց պետք է ասեմ, որ այն երկու տարին ինձ երբեմն նույնիսկ թվում էր. թե ինչ-որ ձանձրույթ եմ զգում: Ես, իհարկե, պարզապես ինձ հաշիվ չէի տալիս, թե որքան եմ երջանիկ: Ինձ թվում էր, թե անում եմ այն, ինչ բոլորն են անում. սիրում եմ իմ կնոջը, և նա էլ սիրում է ինձ, և այդ սերը ինձ թվում էր շատ բնական, նորմալ, այնպիսի մի սովորական բան, որն իրենից առանձին արժեք չի ներկայացնում, կարծես դա օդի նման մի բան է, որը մենք շնչում ենք, որից այնքան շատ կա մեր շուրջը և որը մեզ համար թանկ է դառնում միայն այն ժամանակ, երբ այլևս չի բավարարում, և մենք սկսում ենք շնչահեղձ լինել նրա բացակայությունից: Եթե մեկնում եկը այն ժամանակ ինձ ասեր, որ ես բախտավոր եմ, թերևս նույնիսկ զարմանայի: Ամենայն հավանականությամբ կպատասխանեի, որ ամենևին էլ բախտավոր չեմ, քանի որ, թեև ես կնոջս եմ սիրում, իսկ նա էլ՝ ինձ, բայց և այնպես եկող օրվա նկատմամբ ոչ մի հավատ չկա: Եվ իսկապես էլ մենք հազիվ էինք մի կերպ յուրա գնում իմ ստացած կոպեկներով, որ ես վաստակում էի որպես կինոֆեննադատ՝ ինչ-որ երկրորդական մի թերթի աշխատակցելու և ժուռնալիստական այլ կարգի հոդվածներ գրելու համար: Ապրում էինք մի կահավորված վարձու սենյակում. փողը հաճախ մեզ չէր բավականացնում ոչ միայն ամենաաննշան շոպյությունը թույլ տալու, այլև ամենածայրահեղ անհրաժեշտությունների համար: Ուրեմն, ինչպե՞ս կարող էի բախտավոր լինել: Ես հետո միայն հասկացա, որ երբեք կյանքից այնքան դժգոհ չեմ եղել, որքան այն ժամանակ, երբ, ըստ երևույթին, ես կատարելապես և անհունորեն երջանիկ էի:

Մեր ամուսնության այդ երկու տարին անցնելուց հետո էր միայն, երբ, վերջապես, մեր պայմանները լավացան. ես ծանոթացա Բատտիստա ազգանունով մի կինոպրոդյուսերի հետ և նրա համար գրեցի իմ առաջին կինոսցենարը: Դա մի աշխատանք էր, որը ես այն շրջանում դիտում էի որպես ժամանակավոր մի բան, մանավանդ որ միշտ երազում էի նշանավոր դրամատուրգ դառնալ, բայց վիճակված էր, որ հենց

այդ աշխատանքը պիտի դառնար իմ մասնագիտությունը: Սակայն այդ նույն ժամանակ իմ և էմիլիայի հարաբերությունները սկսեցին գնալ դեպի վատը: Պատմությունս սկսվում է հենց կինոսցենարիստի իմ առաջին իսկ քայլերից և կնոջս հետ ունեցած հարաբերությունների այն շրջանից, երբ գնալով դրանք սկսեցին վատանալ. երկու գրեթե միևնույն ժամանակ տեղի ունեցած իրադարձություններ, որոնք, ինչպես կտեսնենք, ուղղակիորեն կապված են միմյանց հետ:

Երբ հիշողությամբ վերադառնում եմ դեպի անցյալը, աղոտ կերպով մտաբերում եմ մի դեպք, որը այն ժամանակ ինձ նույնիսկ ուշադրության արժանի չթվաց, բայց հետագայում զգացի, որ դրան պետք է վերաբերվեի ամենայն լրջությամբ:

Ես կանգնած եմ քաղաքի կենտրոնական փողոցներից մեկի մայթին: Էմիլիան, Բատտիստան և ես հենց նոր էինք ընթրել ոեստորանում: Բատտիստան առաջարկեց այդ օրը երեկոն ավարտել իրենց տանը, և ես ու Էմիլիան ընդունեցինք նրա առաջարկը: Մենք երեքով մոտեցանք Բատտիստայի մեքենային: Դա կարմիր գույնի, վերին աստիճանի շքեղ, փոքրիկ և ընդամենը երկտեղանոց մի մեքենա էր: Բատտիստան, որն արդեն նստել էր ղեկի մոտ, մեկնվեց, բացեց մեքենայի դռնակը և ասաց. «Ցավում եմ, բայց ունեցածս ընդամենը մի տեղ է: Դուք, Մոլտենի, ուզե՞ք շուղեք, տաքսիով պետք է գաք... մենակ կամ, եթե ուզում եք, սպասեք այստեղ, ինքս կգամ ձեզ տանելու»: Էմիլիան կանգնած էր կողքիս, նրա հագին իր միակ իրիկնային՝ վիզը բաց և անթև մետաքսյա սև զգեստն էր, իսկ թևին՝ մորթե թիկնոցը: Հոկտեմբեր ամիսն էր և դեռ բավական տաք էր: Ես նայում էի նրան և, չգիտես ինչու, նրա սովորական խաղաղ ու հանգիստ գեղեցկության մեջ այդ երեկո տեսնում էի ինչոր մի նոր անհանգստություն, գրեթե տազնապ: Ես ուրախ ասում եմ.

— Իհարկե, Էմիլիա, դու Բատտիստայի հետ գնա... ես տաքսիով ձեր հետևից կհասնեմ:

Էմիլիան նայում է ինձ, ապա հակառակվող տոնով և առանց շտապելու ասում.

— Ավելի լավ չի՞ լինի, որ Բատտիստան գնա իր մեքենայով, իսկ մենք տաքսի վարձենք ու հետևենք նրան:

Այդ ժամանակ Բատտիստան գլուխը դուրս է հանում մեքենայից և կատակով բացականչում.

— Կեցցե՛ք, ուրեմն ուզում եք, որ ես մենա՞կ գնամ:

— Բանն այդ չէ... — առարկում է էմիլիան, և ես հանկարծ նորից եմ նկատում, որ նրա գեղեցիկ դեմքը, սովորաբար այնքան հարմոնիկ, անվրդով ու հանգիստ, այս անգամ մթազնած է ինչ-որ ներքին հուզմունքից և նույնիսկ մի տեսակ ծամածոված: Բայց ես արդեն ասացի.

— Բատտիստան ճիշտ է ասում, նստիր գնա նրա հետ, իսկ ես տաքսի կվարձեմ:

Այս անգամ էմիլիան զիջում է կամ, ավելի ճիշտ, ենթարկվում ու նստում մեքենան: Տեղավորվելով Բատտիստայի կողքին, դռնակը դեռ չփակած, նա նայում է ինձ, և ես նրա շփոթված հայացքում խորշանքին խառնված աղերսանք ու հանդիմանություն եմ կարդում: Դա ինձ համար բոլորովին նոր բան էր, որը ես հիշում եմ միայն հիմա՝ այս տողերը գրելիս: Բայց կարևորություն չտալով այն ամենին, ինչ տեսա նրա հայացքում, ես վճռական շարժումով, սեյֆը փակող մարդու նման շրմփոցով ծածկեցի մեքենայի ծանր դռնակը: Մեքենան հեռացավ, իսկ ես անսահման ուրախ տրամադրությամբ, սուլելով, գնացի դեպի տաքսիների մոտակա կայանը:

Բատտիստայի տունը ռեստորանից հեռու չէր: Եթե խանգարող հանգամանքներ չլինեին, ես տաքսիով այնտեղ պետք է հասնեի եթե ոչ նրանց հետ միաժամանակ, ապա գոնե նրանցից անմիջապես հետո: Բայց ահա ճանապարհի կեսին հանկարծ մի պատահար տեղի ունեցավ. խաչմերուկում իմ վարձած տաքսին ու մի մասնավոր մեքենա բախվեցին իրար: Երկուսն էլ թեթևակի վնասվեցին. տաքսու մի թևն էր ծովել ու ներկը թափվել, իսկ մյուսի կողը՝ փոս ընկել: Վարորդներն իսկույն դուրս թռան իրենց մեքենաներից և, վեճի բռնվելով, սկսեցին իրար մեղադրել: Նրանց շուրջն իսկույն մարդիկ ամբոխվեցին, վրա հասավ մի ոստիկան, մի կերպ բաժանեց նրանց, գրեց անուններն ու հասցեները: Այդ

ամբողջ ժամանակ ես մեքենայի միջից դուրս շեկա և ոչ մի-
այն շոուցաբերեցի ամենաշնչին անհամբերությունն անգամ,
այլև ընկա մի տեսակ երանության մեջ, քանի որ նախ կուշտ
կերել էի ու խմել, և երկրորդն էլ այն, որ Բատտիստան
ընթրիքի վերջում ինձ առաջարկել էր մասնակցել իր ֆիլմե-
րից մեկի սցենարի ստեղծմանը: Բայց այդ վթարն ու նրա
հետ կապված աղմկալի բացատրությունը տեեց մոտ տասը,
գուցե և տասնհինգ րոպե, և ես ուշացումով հասա պրոդյու-
սերի տունը:

Մտնելով հյուրասրահ, տեսնում եմ ոտքը ոտքին գցած
ու բազկաթոռին նստած էմիլիային, և շարժական սեղա-
նիկ-բարի առջև՝ անկյունում կանգնած Բատտիստային:
Բատտիստան ինձ ուրախ ողջունում է, իսկ էմիլիան, ընդ-
հակառակը, տրտնջուն, համարյա տանջահար ձայնով հարց-
նում է, թե որտեղ էի այսքան ժամանակ: Ես մի տեսակ
անհոգ պատմում եմ տեղի ունեցած վթարի մասին, բայց
միևնույն ժամանակ նկատում, որ պատասխանս խուսափողա-
կան է, կարծես ուզում եմ ինչ-որ բան թաքցնել. մինչդեռ
իրականում դա մի մարդու տոն էր, որն իր ասածին ոչ մի
կարևորություն չի տալիս: Սակայն էմիլիան միևնույն արտա-
սովոր ձայնով համառորեն շարունակում է իր հարցուփորձը:

— Վթա՞ր... ի՞նչ վթար:

Ես զարմացած, գուցե նույնիսկ փոքր-ինչ տագնապահար,
սկսեցի պատմել այն, ինչ տեղի էր ունեցել: Բայց այժմ էլ
ինձ թվաց, թե ես մտնում եմ ծայրահեղ մանրամասնու-
թյունների մեջ, կարծես վախենալով, որ ինձ չեն հավատա:
Մի խոսքով, զգում էի, որ ինչ-որ պատճառով սխալ դիրք
եմ բռնել՝ ինչպես սկզբում, երբ աշխատում էի լուսթյան
մատնել, այնպես էլ այժմ, երբ տրվել էի ավելորդ մանրա-
մասնություններին: Վերջապես էմիլիան դադարեցնում է իր
հարցուփորձը, իսկ Բատտիստան, ցնծալից ու սիրալիր, սե-
ղանին է դնում երեք բաժակ և ինձ հրավիրում խմելու: Ես
նստում եմ և մոտ երկու ժամ շաղակրատում ու կատակում
եմ Բատտիստայի հետ: Բատտիստան այնքան է աշխուժա-
ցած և ուրախ, որ ես գրեթե չեմ նկատում էմիլիայի ընկճված
տրամադրությունը: Մյուս կողմից էլ, էմիլիան իր անհա-

Ըարձակութեան հետևանքով այնքան է ինքնամոլորի ու լուս-
կաց, որ նրա զսպվածությունը ինձ չի զարմացնում: Միակ
բանը, որ, այնուամենայնիվ, ինձ մի փոքր տարօրինակ է
թվում, այդ այն է, որ նա ոչ մի մասնակցություն չի ունե-
նում զրույցին, գոնե հայացքով կամ ժպիտով, ինչպես անում
էր սովորաբար: Նա ոչ ժպտում է, ոչ նայում մեր կողմը,
սահմանափակվում է միայն ծխելով ու լռելյայն գինի խմե-
լով. կարծես սենյակում, իրենից բացի, ոչ ոք չկա: Այդ երե-
կոյի վերջում Բատտիստան ինձ հետ լուրջ խոսակցություն է
սկսում այն ֆիլմի մասին, որին ես պետք է մասնակցեի:
Նա ինձ պատմում է բովանդակությունը, տեղեկացնում
ֆիլմի ռեժիսորի և սցենարի վրա աշխատող իմ ընկերոջ
մասին, որից հետո հրավիրում է հաջորդ օրը անցնել իր
գրասենյակը՝ պայմանագիր կնքելու: Այդ առաջարկությունը
հաջորդող բոլորական լռությունից օգտվելով, էմիլիան տե-
ղից ելավ և ասաց, որ ինքը հոգնած է և կուղեր տուն գնալ:
Հրաժեշտ տալով Բատտիստային, մենք դուրս ենք գալիս
տնից, աստիճաններով իջնում ցած, ելնում փողոց և, առանց
որևէ խոսք փոխանակելու, շարժվում ենք դեպի տաքսիների
կայանը: Հետո նստում ենք տաքսիներից մեկը, և մեքենան
շարժվում է: Բատտիստայի անակնկալ առաջարկության ու-
րախությունը արբեցնում է ինձ, և, շարժվելով այլևս պա-
հել իմ մեջ այդ ուրախությունը, էմիլիային ասում եմ.

— Այս սցենարը լավ ժամանակին պատահեց... Չգիտեմ՝
ինչ էինք անելու... միակ ելքը մնացել էր պարտքերի տակ
մտնելը:

էմիլիան պատասխանի փոխարեն միայն հարցնում է.

— Իսկ սցենարի համար ինչքա՞ն են վճարում:

Ես գումարն ասում եմ և ավելացնում.

— Մի խոսքով, մեր հարցերը համարիր լուծված, գոնե
այս ձմեռ:

Այդ ասելով, ես բռնում եմ էմիլիայի ձեռքը և սեղմում:
Նա ձեռքը չի հեռացնում ինձնից, և մինչև տուն հասնելը
այլևս ոչ մի բառ չի խոսում:

Գլուխ երկրորդ

Այդ երեկոյից հետո աշխատանքին վերաբերող ամեն ինչ ընթանում էր հիանալի: Հաջորդ առավոտյան գնացի Բատտիստայի մոտ, կնքեցի սցենարի պայմանագիրը և ստացա ավանսի մի մասը: Որքան հիշում եմ, դա առանձնապես մեծ կարևորութիւն շունեցող սենտիմենտալ կինոկատակերգութիւնն էր, մի ժանր, որի համար, եթե հաշվի առնենք իմ բնավորութեան լրջութիւնը, ես հազիվ թե կարողանայի պիտանի լինել: Մինչդեռ աշխատանքի ընթացքում ինձ համար բոլորովին անսպասելի պարզվեց, որ իմ իսկական կոչումը հենց այդ ժանրն է: Եվ ահա նույն այդ օրը տեղի ունեցավ իմ առաջին գործնական հանդիպումը Ֆիլմի ռեժիսորի և սցենարի մյուս հեղինակի հետ:

Ես կարող եմ ստույգ ցույց տալ, թե երբ սկսվեց սցենարիստի իմ կարիերան: Դա այն երեկոն էր, երբ մենք Բատտիստայի մոտ էինք, բայց ինձ համար բավական դժվար է նույնպիսի ճշտութեամբ ցույց տալ, թե երբ սկսեցին վատանալ իմ և կնոջս հարաբերութիւնները: Այդ հարաբերութիւնների ձախողման սկիզբը, իհարկե, կարող էի համարել նույն այդ երեկոն, սակայն ես այդ հասկացա միայն այժմ, ինչպես ասում են, հետին թվով, մանավանդ որ դեռ որոշ ժամանակ էմիլիայի իմ հանդեպ ունեցած վերաբերմունքի մեջ ոչ մի փոփոխութիւն չէր նկատվում: Փոփոխութիւնը, անկասկած, տեղի ունեցավ Բատտիստայի մոտ անցկացրած երեկոյին հաջորդող մի ամսվա ընթացքում, սակայն, չեմ կարող ստույգ ասել ոչ այն, թե էմիլիայի հոգում կշեռքի մի նժարը երբ վերջնականապես քաշեց մյուսին, և ոչ էլ այն, թե ինչը կարող էր դրա դրդապատճառը հանդիսանալ: Այն ժամանակ ես ու Բատտիստան հանդիպում էինք գրեթե ամեն օր, և ես կարող էի մանրամասնորեն պատմել բազմաթիվ այլ էպիզոդներ, ինչպիսին այդ մեկն էր, որը տեղի ունեցավ այն երեկո նրա տանը: Ես խոսում եմ էպիզոդների մասին, որոնք այն ժամանակ որևէ բանով չէին առանձնանում մեր կյանքի ընդհանուր ֆոնի վրա. գոնե ինձ այդպես էր թվում: Սակայն հետագայում իմ հիշողութեան մեջ դրանցից

յուրաքանչյուրը առավել կամ պակաս շափով ձեռք բերեց իր բնորոշ գծերը, ստացավ որոշակի իմաստ: Ես կուզեի միայն մի հանգամանք նշել. այդ այն է, որ ամեն անգամ, երբ Բատտիստան մեզ իր մոտ էր հրավիրում, — իսկ դա այժմ տեղի էր ունենում շատ հաճախակի, — էմիլիան հրաժարվում էր ինձ հետ գալուց: Ճիշտ է, նրա դիմադրությունը լինում էր առանձնապես ոչ այնքան ուժեղ ու վճռական, բայց լինում էր տարօրինակ հետևողականությամբ ու համառությամբ: Էմիլիան միշտ մի պատճառ էր գտնում՝ մեզ հետ գալուց հրաժարվելու համար, մինչդեռ ես ամեն անգամ առանց դժվարության ապացուցում էի, որ նրա պատճառաբանությունները լրիվ անհիմն են, և ճգնում էի իմանալ, թե նա հակակրանք չի՞ տաժում արդյոք դեպի Բատտիստան, իսկ եթե տաժում է, ապա ի՞նչ պատճառով:

Վերջ ի վերջո նա իմ այդ հարցերին միշտ պատասխանում էր, թեև, իհարկե, ոչ առանց շփոթմունքի, որ Բատտիստայի հանդեպ նա ամենևին էլ հակակրանք չի տաժում, որ ինքը ոչ մի հիմք չունի նրա նկատմամբ այդպիսի զգացմունքներ ունենալու և որ չգալու միակ պատճառն այն է, որ այդպիսի երեկոները իրեն սոսկալի հոգնեցնում են և առհասարակ ձանձրույթ պատճառում: Այդ ընդհանուր, ոչ համոզեցուցիչ պատասխանները ինձ չէին բավարարում, և ես, առանց նահանջելու, ակնարկներ էի անում, որ այնուամենայնիվ նրա և Բատտիստայի միջև ինչ-որ մի բան է եղել, թեև Բատտիստան դրան ուշադրություն չի էլ դարձրել կամ թե չէ այդպես է ստացվել իրենից բոլորովին անկախ: Սակայն որքան ավելի շատ էի փորձում ապացուցել էմիլիային, որ նա մի տեսակ հակակրանք է զգում Բատտիստայի հանդեպ, այնքան ավելի համառ էին դառնում էմիլիայի հերքումները, մինչև որ, վերջապես, նրա սկզբնական շփոթմունքը փոխվեց համառ ու վճռական դիմադրության: Այնժամ, երբ ամբողջովին վերացան էմիլիայի՝ դեպի Բատտիստան տաժվող զգացմունքների, ինչպես և նրա՝ Բատտիստայի հանդեպ ունեցած վերաբերմունքի կասկածներս, ես էմիլիային սկսեցի բացատրել, որ օգտավետ կլիներ, եթե երեկոները երեքով միասին անցկացնեինք: Մինչև հիմա ես առանց էմիլիայի երբեք և ոչ մի տեղ չէի գնացել, և Բատ-

տիստան այդ գիտեր: Այնուհետև, Բատտիստային մեծ հա-
ճույք է պատճառում էմիլիայի ներկայությունը, մի՞թե դա չի
հաստատում այն հանգամանքը, որ ամեն անգամ ինձ հրա-
վիրելիս նա միշտ խնդրում է. «Համեցեք ձեր տիկնոջ հետ»:
էմիլիայի անսպասելի բացակայությունը, որ դժվար է ար-
դարացնել, կարող է նկատվել որպես անհարգալից վերաբեր-
մունք կամ, որ ավելի վատ է, վիրավորել Բատտիստային,
որից այժմ կախված է մեր կյանքը: Մի խոսքով, քանի որ
էմիլիան չի կարող որևէ լուրջ պատճառաբանությամբ իր
բացակայությունն արդարացնել, իսկ ես, ընդհակառակը,
կարող եմ բազմաթիվ փաստարկներ բերել նրա ներկայու-
թյան կարևորությունը հաստատելու համար, ուստի ավելի
լավ է, որ նա հաղթահարի հոգնածությունը և այդ երեկոների
ձանձրույթը: Սովորաբար էմիլիան իմ այս պատճառաբա-
նությունները լսում էր անուշադիր ու համարյա վերացած:
Թվում էր, թե նա ավելի ուշադիր զննում է իմ դեմքն ու հե-
տևում շարժումներին, քան լսում արածս դատողությունները:
Վերջ ի վերջո նա զիջում էր և լուռումունջ սկսում հագնվել:
Վերջին պահին, երբ նա արդեն պատրաստ էր լինում դուրս
գալու, ես մի անգամ ևս հարցնում էի, թե իսկապե՞ս նրա
համար այդքան տհաճ է ինձ հետ գալը: Ես այդ անում էի ոչ
թե այն պատճառով, որ կասկածում էի նրա պատասխանին,
այլ այն, որպեսզի նրա մոտ կասկածի հետք անգամ չլինի,
թե ինքը չի կարող վարվել այնպես, ինչպես ցանկանում է:
Նա կտրուկ պատասխանում էր, որ ոչ մի առարկություն չունի,
որից հետո միայն մենք դուրս էինք գալիս տնից:

Սակայն այս բոլորը ես վերականգնեցի, ինչպես արդեն
ասել եմ, միայն հետագայում, համբերությամբ պրպտելով
հիշողությունս, մտաբերելով բազմաթիվ աննշան կամ գոնե
այն ժամանակ ինձ աննշան թվացող փաստեր, որոնց ժամա-
նակին ոչ մի կարևորություն չեմ տվել: Այն ժամանակ ես
միայն հասկանում էի, որ էմիլիայի վերաբերմունքը իմ հան-
դեպ վատացել է, բայց թե ինչն է եղել դրա պատճառը,
բացատրել չէի կարողանում, ինչպես և չէի կարողանում որո-
շել, թե հարաբերությունների այդ վատացումը ինչով է ար-
տահայտվում: Այդպես դեռևս խաղաղ ու պարզ երկնքում
փոփոխված ու ճնշող օդի ծանրությունը ազդարարում է մո-

տալուտ փոթորիկ: Ես մտածեցի, որ էմիլիան ինձ այժմ սիրում է ավելի պակաս, քան սիրում էր առաջ, նկատեցի, որ նա այլևս չի ձգտում այնպես մոտ լինել ինձ, ինչպես մեր ամուսնության սկզբնական շրջանում: Սկզբնական շրջանում, երբ ասում էի. «էմիլիա, ես մի երկու ժամով տեղ եմ գնալու, կաշխատեմ որքան կարելի է շուտ վերադառնալ», նա երբեք չէր առարկում, բայց տխուր ու հնազանդ տեսքից խուլոյն երևում էր, որ իմ բացակայությունը նրան դուր չի գալիս: Այդ պատճառով հաճախ էր պատահում, երբ ես հրաժարվում էի գնալուց և մնում էի տանը և կամ էլ, եթե հնարավոր էր լինում, էմիլիային տանում էի հետս: Այդ շրջանում նա այնքան էր կապված ինձ, որ մի անգամ, երբ ինձ ուղեկցում էր կայարան, որտեղից ես կարճ ժամանակով պետք է մեկնեի Հյուսիսային Իտալիա, հրաժեշտի պահին երեսը շրջեց, որպեսզի ինձանից թաքցնի արցունքներով լի աչքերը: Ես այնպես ձևացրի, իբր ոչինչ չեմ նկատում, բայց ամբողջ ուղևորության ընթացքում ինձ տանջում էին նրա թափած այն արցունքները, որոնցից թեև ինքը ամաչում էր, սակայն չէր կարողանում զսպել: Եվ ահա այդ օրից ի վեր ես այլևս առանց նրա որևէ տեղ չէի գնում: Իսկ այժմ, երբ ասում էի, թե տեղ եմ գնում, նրա դեմքին այլևս չէր հայտնվում թեթև դժգոհություն ու թախծի նախկին ծանոթ արտահայտությունը, որն այնքան սիրելի էր ինձ: Նա սառը և հանգիստ, իսկ հաճախ նույնիսկ աչքերը գրգռեց շկտրելով, պատասխանում էր. «Լավ, ուրեմն, ընթրիքին կտեսնվենք... Աշխատիր շուշանալ»: Երբեմն ինձ նույնիսկ թվում էր, թե նա ուղղակի ցանկանում է, որ իմ բացակայությունը լինի ավելի տևական, քան այդ անհրաժեշտ էր ինձ համար: Օրինակ, եթե նրան ասում էի. «էմիլիա, գնում եմ, հինգին տանը կլինեմ», նա պատասխանում էր. «Արի, երբ ուզում ես... ես շատ գործ ունեմ անելու»:

Մի օր թեթևակի կատակելով ասացի, թե նա, ըստ երևույթին, գերադասում է, որ ես ինչքան կարելի է քիչ լինեմ տանը: Բայց էմիլիան դրան ուղղակի պատասխան չտվեց: Նա միայն ասաց, որ եթե ես այսպես թե այնպես գրեթե ամբողջ օրը զբաղված եմ, ապա ավելի լավ է, որ մենք տեսնվենք միայն ուտելիս, այդպիսով նա ինքն էլ կարող է հանգիստ

զբաղվել իր գործերով: Բայց դա ճիշտ էր միայն մի կողմից. սցենարիստի իմ աշխատանքը ինձ հարկադրում էր տանից բացակայել միայն օրվա երկրորդ կեսին, իսկ մնացած ժամանակը ես ամեն կերպ աշխատում էի անցկացնել էմիլիայի հետ: Սակայն այդ օրվա խոսակցությունից հետո սկսեցի առավոտները նույնպես տանը շմնալ:

Այն ժամանակ, երբ էմիլիան զգալ էր տալիս, որ դժգոհում է իմ բացակայությունից, ես տանից դուրս էի գնում հանգիստ ու թեթև սրտով, հոգուս խորքում այդ դժգոհությունը համարելով ապացույց այն մեծ սիրո, որ նա տածում էր իմ նկատմամբ: Բայց այն պահից ի վեր, երբ նկատեցի, որ նա ոչ միայն չի վշտանում իմ բացակայություններից, այլև գերադասում է նույնիսկ մենակ մնալ, լցվեցի մթին մի տագնապով, ինչպես նա, ով հանկարծ զգում է, թե ինչպես է հողը փախչում իր ոտքերի տակից: Այժմ ես սցենարի վրա աշխատելու համար տանից գնում էի ոչ միայն ճաշից հետո, ինչպես ասացի, այլև ճաշից առաջ, և հաճախ լոկ այն նպատակով, որպեսզի ստուգեմ էմիլիայի այդ նոր և ինձ համար այնքան դառը անտարբերությունը: Եվ հետըզհետե էմիլիան ոչ միայն դադարեց որևէ դժգոհություն դրսևորելուց, այլև, ընդհակառակը, իմ բացակայություններին սկսեց վերաբերվել միանգամայն անվրդով և նույնիսկ, ինչպես ինձ թվում էր, վատ թաքցրած թեթևությամբ: Սկզբում ես փորձում էի ինձ մխիթարել, որ երկու տարվա ամուսնական կյանքից հետո սիրուն փոխարինող այդ սառնությունը պարզապես սովորույթի անխուսափելի դրսևորում է, եթե անգամ այդ սովորույթը լցված է ամենաքնքուշ հոգատարություններով՝ չէ որ ամուսինների փոխադարձ սիրո ապահովությունը զրկում է նրանց հարաբերությունները ամեն տեսակ կրքերից: Սակայն ես զգում էի, որ այդ ամենևին էլ այդպես չէ. այո, ավելի շուտ զգում էի, քան գիտակցում այդ, քանի որ միտքը որքան էլ ուզում է տրամաբանական թվա, մեզ խաբում է ավելի հաճախ, քան անորոշ և աղոտ զգացումը: Մի խոսքով, ես զգում էի, որ էմիլիան դադարել է իմ բացակայություններից դժգոհել ոչ թե այն պատճառով, որ այդ բացակայությունները համարում էր անխուսափելի և գտնում, որ դրանք չեն կարող անդրադառնալ մեր հարա-

բերությունների վրա, այլ այն պատճառով, որ նա կամ ինձ սկսել էր սիրել ավելի քիչ, կամ ամենևին դադարել էր սիրելուց: Ես զգում էի նաև, որ կատարվել է մի բան, որը լրիվ փոխել է իմ հանդեպ նրա ունեցած մի ժամանակ այնքան արտասովոր և այնքան ջերմ զգացմունքը:

Գլուխ երրորդ

Առաջին անգամ, երբ հանդիպեցի Բատտիստային, ես գտնվում էի շափազանց ծանր, եթե շասենք՝ հուսահատական վիճակում և շգիտեի ինչպես դուրս գալ այդ դրությունից: Ամենածանրն այն էր, որ այդ ժամանակ որոշել էի մի բնակարան գնել, թեև պահանջվելիք գումարը վճարելու համար ես ոչ միայն դրամ չունեի, այլև շգիտեի, թե որտեղից կարելի է ճարել: Առաջին երկու տարին ես ու էմիլիան ապրում էինք վարձով՝ մի կահավորված մեծ սենյակում: էմիլիայի փոխարեն մի ուրիշը գուցե նույնպես շտառապեր այդպիսի ժամանակավոր վիճակից, բայց էմիլիան, համաձայնելով ապրել նման պայմաններում, ոչ միայն շոժգոհեց, այլև ինձ տվեց սիրո այն ամենամեծ ապացույցը, որը կարող է իր ամուսնուն տալ ամենանվիրված կինը: էմիլիան, ճիշտ է, տնարար կին էր, սակայն տան նկատմամբ ունեցած նրա սերը գերազանցում էր բոլոր կանանց հատուկ բնական այդ զգացմունքը, դա նման էր մի տեսակ խանդոտ ու ամենակուլ կրքի, գրեթե ազահուժյան, որը ավելի հզոր էր, քան ինքը էմիլիան, և իր արմատներով գնում էր, ըստ երևույթին, անսահմանորեն խոր ինչ-որ տեղ: էմիլիան աղքատ ընտանիքից ելած աղջիկ էր: Երբ ես ծանոթացաի նրա հետ, նա աշխատում էր որպես մեքենագրուհի: Դեպի տունն ունեցած նրա սիրո մեջ, կարծում եմ, առանց գիտակցվելու դրսևվորվում էին փշրված հույսերը այն ընչազուրկ մարդկանց, որոնք երբեք ի վիճակի չեն լինում ունենալու իրենց սեփական, թեկուզև ամենաանշուք ու համեստ անկյունը: Ես շգի-

տեմ էմիլիան հույս ուներ թե չէ՝ ինձ հետ ամուսնանալով
իրականացնել սեփական տունն ունենալու իր երազանքը: Սա-
կայն հիշում եմ այն սակավ դեպքերից մեկը, երբ տեսա,
թե նա ինչպես է լալիս (դա մեր նշանվելուց անմիջապես հե-
տո էր), երբ ստիպված խոստովանեցի, որ դեռ ի վիճակի չեմ
նրա համար ոչ տուն գնելու և ոչ էլ նույնիսկ բնակարան վար-
ձելու: Ես նրան ասացի, որ առայժմ մենք պետք է բավարար-
վենք միայն կահավորված մի սենյակով: Ճիշտ է, նա իսկույն-
ևեթ զսպեց իր արցունքները, թեև դրանց պատճառը, ինչպես
ինձ թվում էր, իր փայփայած երազանքի անորոշ ժամանա-
կով հետաձգվելու դառը ափսոսանքը չէր միայն, այլ այդ
երազանքի ուժը իր ամբողջ էությամբ, որի մեջ էմիլիան գրե-
թե կյանքի իմաստն էր տեսնում:

Այդպես առաջին երկու տարին մենք ապրում էինք մի
կահավորված սենյակում, բայց պետք է տեսնեիք, թե ինչ-
պիսի բծախնդիր մաքրություն, կարգ ու կանոն էր սահմանել
էմիլիան այդտեղ: Ինչքան հնարավոր էր, — իսկ վարձու սեն-
յակում, ինչպես հասկանալի է, այդ հնարավորությունը
խիստ սահմանափակ է, — էմիլիան ամեն կերպ փորձում էր
ստեղծել այն պատրանքը, իբր այդ ոչ թե կահավորված
վարձու սենյակ է, այլ իր սեփական բնակարանը: Եվ քանի
որ մենք զուրկ էինք սեփական կահույքից, նա աշխատում էր,
ինչ գնով էլ ուզում է լինի, տնարար ու մաքրասեր տնտեսու-
հու իր հոգին դնել ուրիշի գործածությունից մաշված այդ
կահ-կարասիների մեջ: Գրասեղանիս վրա միշտ դրված էր
լինում թարմ ծաղիկներով մի ծաղկաման, իմ թղթերը այն-
պիսի խնամքով էին կարգի բերվում ու դրվում սեղանիս, որ
թվում էր, թե ինձ հրավիրում են աշխատանքի, խոստանալով
առավելագույն շափով ապահովել աշխատանքային անդորրն
ու հարմարավետությունը: Երբեք չէր պատահում, որ թեյի
սեղանին անձեռոցիկներ և տուփով խմորեղեն դրված շի-
նեին: Երբեք չէր կարելի տեսնել, որ հանդերձանքներից մեկ-
նումեկը կամ որևէ այլ առարկա իրենց տեղերում չգտնվեին,
ընկած լինեին հատակին կամ գցած աթոռների վրա, ինչպես
այդ հաճախ լինում է այդպիսի ժամանակավոր և նեղված-
քային պայմաններում:

Սենյակը աղախնի շտապ հավաքելուց և մաքրելուց հետո

էմիլիան մի անգամ էլ ինքն էր ամեն ինչ տեղը տեղին հա-
 վաքում ու դասավորում, և այնպիսի բծախնդրությամբ, որ
 այն ամենը, ինչ ընդունակ էր փայլել ու շողշողալ, ուղղակի
 փայլում էր ու շողշողում, անկախ նրանից, թե դա ինչ էր,
 լուսամուտի մղլակի արույրե գնդիկ, թե պարկետի գրեթե
 աննկատ մի փայտիկ: Երեկոնները էմիլիան ինքն էր անկողինը
 գցում առանց աղախնի օգնության, և միշտ մահճակալի մի
 կողմում դրած էր լինում իր գիշերային թափանցիկ շապիկը,
 մյուս կողմում՝ իմ ննջազգեստը. վերմակների ծայրերը խնամ-
 քով ծալած, իսկ զույգ բարձերն էլ հարմարորեն դրած իրենց
 տեղերը: Առավոտյան նա տեղից վեր էր կենում ինձանից
 շուտ, գնում էր տանտիրոջ խոհանոցը, նախաճաշ պատրաս-
 տում և մատուցարանով բերում ինձ: Այդ ամենը նա անում
 էր առանց որևէ աղմուկ հանելու, մի տեսակ զուսպ, զգացնել
 չտալով իր գոյությունը, բայց և սրտանց ու առանց ջանք
 խնայելու, և դա վկայություն էր այնպիսի զգացմունքնե-
 րի, որոնց մասին երբեք չի խոսվում: Եվ, այնուամենայնիվ,
 շնայած նրա բոլոր այդ հերոսական ճիգ ու ջանքերին, կահա-
 վորված սենյակը մնում էր որպես կահավորված սենյակ: Այն
 պատրանքը, որ էմիլիան ամեն կերպ աշխատում էր ստեղ-
 ծել իր և ինձ համար, երբեք լիարժեք չէր լինում: Այդպիսի
 պահերին, հատկապես, երբ էմիլիային համակած էր լինում
 ծանր մի խոնջություն, նա սկսում էր տրտնջալ, ճիշտ է մի
 տեսակ մեղմ և ըստ իր բնավորության՝ հանգիստ, բայց և
 այնպես ոչ առանց նշմարելի ներքին դառնության: Այդպիսի
 դեպքերում նա ինձ հարցնում էր, թե արդյոք մինչև երբ է
 շարունակվելու մեր այդ ժամանակավոր և անկազմակերպ
 կյանքը: Ես հասկանում էի, որ էմիլիայի այդ արտաքին խա-
 ղաղության տակ թաքնված է իսկական մի վիշտ, և ինձ տան-
 ջում էր այն միտքը, որ վաղ թե ուշ պետք է մի կերպ ելք
 գտնեմ սեփական տուն ունենալու նրա այդ բաղձանքը իրա-
 կանացնելու:

Վերջապես, ինչպես ասել եմ, վճռեցի մի բնակարան
 գտնել: Բայց դա ոչ այն պատճառով, որ միջոցներ էին
 հայտնվել, որոնք մինչև հիմա չկային, այլ սոսկ նրա համար,
 որ գիտեի, թե ինչպես է տանջվում էմիլիան, և վախենում էի,
 որ մի օր նա այլևս ի վիճակի չի լինի դիմանալու այդ պայ-

մաններին: Մեր համատեղ ապրելու երկու տարիների ընթացքում ես մի քիչ փող էի տնտեսել: Եթե դրան ավելացնեի նաև այն գումարը, որը պարտք էի վերցրել, ապա հնարավոր կլիներ առաջին բաժինը մուծել: Բայց բանն այն էր, որ ես չէի զգում այն բավարարվածությունը, ինչպիսին ունենում է իր կնոջ համար բնակարան ձեռք բերող ամուսինը: Ընդհակառակը, զգում էի տանջալից մի անհանգստություն, քանի որ ամենևին չէի պատկերացնում, թե ինչ պետք է անեմ մի երկու ամիս հետո, երբ արդեն մոտենա երկրորդ մասը վճարելու ժամկետը: Ես ընկել էի այնպիսի մի հուսահատության մեջ, որ գրեթե կատաղությանմբ էի լցվել էմիլիայի դեմ, որի սեփական անկյունն ունենալու կրքոտ ու համառ ցանկությունները ինչ-որ շափով ինձ հարկադրեցին անել այդ անմիտ ու վտանգավոր քայլը:

Սակայն էմիլիայի անկեղծ ուրախությունը, երբ ես նրան հայտնեցի բնակարան գնելու մասին, և նրան անսպասելիորեն համակած ցնծությունը այն օրը, երբ մենք առաջին անգամ մտանք մեր դեռ չկահավորված բնակարանը, ժամանակավորապես ինձ ստիպեցին մոռանալ իմ բոլոր երկյուղներն ու հուզումները: Ես արդեն ասել եմ, որ դեպի տունն ունեցած սերը էմիլիայի մոտ դարձել էր ուղղակի կիրք: Ավելին կարող եմ ասել, այդ օրը ինձ թվաց, թե այդ կրքին խառնվել է նույնիսկ զգայական մի ցանկություն: Կարծես այն բանը, որ վերջ ի վերջո ես նրա համար բնակարան գնեցի, ինձ ոչ միայն բարձրացրեց նրա աչքերում, այլև դարձրեց Ֆիզիկապես ավելի մոտիկ ու հարազատ:

Մենք գնացինք մեր բնակարանը տեսնելու: Սկզբում էմիլիան ինձ հետ պարզապես շրջում էր դատարկ ու ցուրտ սենյակներում, իսկ ես նրան ասում էի, թե ինչպես կուզենայի դասավորել կահույքը: Բայց բոլոր անկյունները շրջելուց հետո, երբ մոտեցա լուսամուտին, որպեսզի ցույց տամ, թե ինչ տեսարան է բացվում մեր առաջ, էմիլիան անսպասելիորեն ամբողջ մարմնով սեղմվեց ինձ և կիսաձայն խնդրեց, որ իրեն համբուրեմ: Էմիլիայի համար, որ սովորաբար սիրային զգացմունքների դրսևորման մեջ այնքան երկչոտ էր ու զուսպ, դա մի նոր և ամենևին անսպասելի բան էր: Գրգռված այդ նորությունից ու նրա տոնից, ես համբուրեցի նրան, ինչ-

պես ինքն էր ուզում: Դա ամենակրթոտ և արբեցուցիչ համբույրներից մեկն էր, ինչպիսին մենք երբևէ փոխանակել էինք: Եվ այդ համբույրի ժամանակ ես զգացի, թե էմիլիան ինչպես է ամբողջ մարմնով սեղմվում ինձ, կարծես հրավիրելով ավելի մտերմիկ հարաբերությունների: Հետո մոլեգնածի նման շրջազգեստը հանեց ու մի կողմ շարտեց, արձակեց բլուզի կոճակները և փորը սկսեց սեղմել փորիս: Այնուհետև, նա թողեց համբուրելը, և հազիվ լսելի ձայնով, գրեթե անհասկանալի մի շշուկով, որը անհունորեն բաղձալի մեղեդու էր նման, ականջիս փսփսաց, գոնե այդպես թվաց ինձ, որ չհապաղեմ. և մարմնի ամբողջ ծանրությամբ ինձ ձգեց դեպի ներքև, հատակը: Մենք պառկեցինք փոշոտ, աղյուսապատ հատակին, այն լուսամուտի տակ, որտեղ կանգնած էինք: Սակայն էմիլիայի այդ փոթորկալից, անսանձ և արտասովոր կրակոտ գրկախառնությունների մեջ ոչ միայն սեր էի զգում դեպի ինձ, ես դրանց մեջ ամենից առաջ զգում էի սեփական օջախի հանդեպ ունեցած ճնշված կրքի պոռթկումը, որը կարծես ինքն իրեն փոխվել էր ու դարձել զգայական սեր: Դատարկ, արձագանքող սենյակներում, որոնցից դեռ փչում էր ներկերի և խոնավ սվաղների հոտը, նրա հոգու խորքում փոթորկվեց մի բան, որին մինչև այդ երբեք ի վիճակի չէին եղել արթնացնելու իմ բոլոր փառաբշանքները:

Դատարկ բնակարանը կատարած մեր այցելությունից մինչև այնտեղ փոխադրվելու օրը անցավ մի երկու ամիս, որի ընթացքում մենք զբաղված էինք բնակարանը էմիլիայի անունով ձևակերպելու հարցով. ես գիտեի, թե դա ինչ բավականություն կպատճառի նրան: Բացի դրանից, մենք գնեցինք նաև որոշ կահույք՝ ինչքան որ թույլ էին տալիս իմ սահմանափակ միջոցները: Երբ անցավ բնակարանը գնելու առնչությամբ իմ բավարարվածության առաջին զգացումը, ինչպես այդ արդեն նշել եմ, ապագան սկսեց ինձ խիստ անհանգստացնել, իսկ երբեմն էլ ուղղակի հասցնել հուսահատության: Ճիշտ է, ես այժմ արդեն բավական լավ էի վաստակում, լավ այն իմաստով, որ մենք այդ վաստակով կարող էինք ոչ միայն համեստորեն ապրել, այլև որոշ գումար տնտեսել, բայց այդ խնայողությունները շափազանց քիչ էին

բնակարանի գնման առաջիկա գումարը մուծելու համար: Իմ հուսահատությունը ավելի էր մեծանում մանավանդ այն պատճառով, որ շէի կարող սիրտս թեթևացնել գոնե այդ մասին էմիլիայի հետ խոսելով. պարզապես շէի ուզում թունավորել նրա բերկրանքը: Հիմա արդեն այն օրերը հիշում եմ որպես մի շրջան, որի ընթացքում ես գտնվում էի անընդմիջվող տազնապաների մեջ և նույնիսկ մի տեսակ պակաս էի սիրում էմիլիային: Ես շէի կարող շատաժել այն մասին, թե նա, իմանալով մեր ունալ հնարավորությունները, ինչպես չի անհանգստանում, թե ես որտեղից պետք է այդքան փողը ճարեմ: Այդ մտքերը ինձ ծայր աստիճան ապշեցնում էին, իսկ երբեմն էլ սոսկալի գրգռում, որ առանց դրանք հաշվի առնելու, էմիլիան այդ օրերին անընդհատ խանութներն էր շրջում բնակարանի կահավորանք գնելու համար, և օր շկար, որ իրեն հատուկ հանգստությամբ ինձ շհայտներ կատարած որևէ նոր գնումի մասին: Ես ինձ հարց էի տալիս, թե նա ինչպես կարող է, սիրելով ինձ, շկոահել իմ սարսափներն ու տազնապաները: Ես հասկանում էի, որ էմիլիան ամենայն հավանականությամբ մտածում է, որ եթե բնակարան եմ գնել, ապա մտահոգված կլինեմ նաև այդ բնակարանի համար անհրաժեշտ դրամը գտնելու խնդրով: Այնուամենայնիվ, նրա այդ անվրդով ու հանգիստ գոհունակությունը այն պահին, երբ ինձ համակել էին անհանգիստ մտքերը, թվում էր ոչ այլ ինչ է, եթե ոչ եսամոլություն կամ գոնե անզգայություն:

Այդ ժամանակ ես այնքան էի կլանված փող ճարելու հոգսերով, որ փոխվել էր անգամ իմ մասին ունեցած պատկերացումս: Մինչև հիմա ինձ համարում էի ինտելիգենտ, կիրթ մարդ, կոչումով դրամատուրգ. ես միշտ էլ մեծ հակում եմ ունեցել դեպի դրամատուրգիան, և թվում էր, թե ամբողջովին դրան էլ պետք է նվիրվեի: Այսպես ասած այդ բարոյական կերպարը իր ազդեցությունն էր թողնում նաև Ֆիզիկականիս վրա, այսինքն՝ ինձ ստիպում էր որոշակի ուշադրություն դարձնել նաև իմ արտաքինին, ինձ թվում էր, թե նիհարությունը, կարճատես լինելը, նյարդայնությունը, գունատությունը, անփույթ հագնվելը վկայում են երիտասարդի ապագա գրական փառքը, որի համար և ես կոչված էի: Սա-

կայն այդ օրերի դաժան հոգսերը իմ գիտակցությունից դուրս մղեցին այնքան հրապուրիչ ու խոստումնալից այդ կերպարը և նրա տեղը դրին մի այլ կերպար՝ աղքատ ու ողորմելի մի մարդու, որը խճճվել էր կրթերի ցանցում և թաղվել մանր ձախորդությունների տղմուտը: Նա շկարողացավ ընդդիմանալ կնոջ սիրուն և այդ պատճառով ստիպված եղավ ոտքը մեկնել ավելի երկար, քան ունեցած վերմական էր: Եվ ով գիտե, թե նա դեռ ինչքան պետք է տառապի փող շունենալու այդ ստորացուցիչ վիճակում: Ես իմ մեջ սկսեցի նկատել նաև ֆիզիկական փոփոխություն. այլևս ինձ չէի թվում երիտասարդ, ճանաչում գտած թատերական հանճար, այժմ ես ընդամենը երկրորդ կարգի թերթերի և ամսագրերի աշխատակցող մի քաղցած ծուռնալիստ էի և կամ էլ, որը շատ ավելի վատ է, որևէ մասնավոր ֆիրմայի կամ պետական հիմնարկության խղճուկ ծառայող, ողորմելի մի մարդ, որն իր կնոջը հուզումներ չպատճառելու համար՝ թաքցնում է նրանից իր տազնապները, ամբողջ օրը քաղաքում այս ու այն կողմ է վազվզում՝ որևէ աշխատանք գտնելու և շատ հաճախ վերադառնում է ձեռնունայն: Մի մարդ, որը գիշերները տեղից վեր է թռչում, հիշելով այն պարտքերը, որոնք նա պարտավոր է վճարել: Մի խոսքով, մեկը, որը բացի դրամից, ոչինչ չի տեսնում: Նա դարձել էր գուցե և կարեկցանք հարուցող մի կերպար, զուրկ փայլից ու արժանապատվությունից, բուլվարային ինչ-որ գրքույկի մի թշվառ ու ողորմելի հերոս. և ես սկսեցի ատել նրան, վախենալով, որ տարիների ընթացքում աստիճանաբար լրիվ այդ էակին կնմանեմ: Բայց ստացվել էր այդպես. ես չէի ամուսնացել մի կնոջ հետ, որը բաժաներ խոհերս և հասկանար իմ մտքերը, ճաշակը և ձգտումները, ես ամուսնացել էի մի անկիրթ ու հասարակ մեքենագրուհու գեղեցկության հետ, որը, ինչպես ինձ թվում էր, լի էր իր դասակարգի բոլոր նախապաշարումներով ու փառասիրությամբ: Ինձ հասկացող կնոջ հետ ես կարող էի որևէ ստուգիայում կամ կահավորված սենյակում տանել աղքատ ու անհարմարակեցիկ կյանքի բոլոր զրկանքները, սպասելով դրամատուրգիայի ասպարեզում ապագա հաջողությունների: Իսկ այժմ հարկադրված էի ձեռք բերել մի տուն, որի

մասին այնքան երազում էր իմ կինը: Հանուն այդ տան, հուսահատ մտածում էի ես, հիմա ինձ մնում է, և գուցե մեկընդմիջտ, հրաժարվել ինձ համար այնքան թանկ գրական կարիերայի փառասիրական ձգտումներից:

Այդպիսով, նյութական այդ ծանր վիճակը պատճառ դարձավ, որպեսզի ինձ համակեր թախիժն ու սեփական անզորության գիտակցումը: Ինչպես երկաթյա ձողն է կրակի մեջ երկար պահելուց հետո կակղում և ծովում, այնպես էլ ես էի զգում, որ ինձ վրա թափված հոգսերի հետևանքով իմ հոգու մետաղը նույնպես աստիճանաբար սկսում է ծովել: Ես պարզ զգում էի, որ հակառակ իմ կամքին, սկսել եմ նախանձել նրանց, ովքեր հեռու են կանգնած այդպիսի հոգսերից, ովքեր հարուստ են և արտոնյալ: Ես նկատում էի, թե ինչպես է, դարձյալ ինձանից բոլորովին անկախ, այդ նախանձին խառնվում ինչ-որ մի ոխ, որը ուղղված է ոչ թե որոշակի մարդկանց և պայմանների դեմ, այլ անսանձ կերպով ձրգտում է ընդունել որոշակի աշխարհայացքի ընդհանուր ու վերացական բնույթ: Մի խոսքով, ինձ համար այնքան ծանր այդ օրերին ես կամաց-կամաց սկսեցի նկատել, թե ինչպես են փող շունենալու հետևանքով առաջացած զայրույթն ու վիրավորանքը դառնում անարդարության դեմ ուղղված զայրույթի զգացում, ոչ միայն այն անարդարության, որը իմ դեմ էր ուղղված, այլև այն, որից տառապում են անթիվ ու անհամար ինձ նմանները: Ես ինձ հաշիվ էի տալիս, որ իմ անձնական վիրավորանքները աննկատելի կերպով դառնում են տրամադրություններ ու մտորումներ, որոնք կապված էին արդեն ոչ միայն ինձ հետ: Ես այդ նկատում էի իմ խոհերի ընթացքից, որոնք անընդմեջ ու առանց շեղվելու զարգանում էին միևնույն ուղղությամբ, նկատում էի իմ զրույցներից, որոնք անկախ իմ կամքից, անվերջ պտտվում էին միևնույն հարցի շուրջը: Այդ նույն ժամանակ ես նկատեցի նաև, որ իմ մեջ գլուխ է բարձրացնում օրրստօրե աճող մի համակրանք դեպի այն քաղաքական կուսակցությունները, որոնք հայտարարում էին, թե իրենք պայքար են մղում հենց այն հասարակության արատների ու թերությունների դեմ, որին ես մեղադրում էի ինձ այնքան տառապանքներ ու հոգսեր պատ-

ճանելու համար: Մի հասարակութուն, որը, ինչպես կարծում էի, սովի և զրկանքների է մատնում իր լավագույն որդիներին և պաշտպանության տակ առնում ու երես տալիս անպետքներին: Հասարակ և անկիրթ մարդկանց մոտ այդ ամենը սովորաբար տեղի է ունենում մի տեսակ ինքնաբերաբար, գիտակցության խեղ ու մութ անկյուններում, որտեղ ինչ-որ մի խորհրդավոր ալքիմիա եսամոլութունը դարձնում է այլասիրութուն, ատելութունը՝ սեր, սարսափը՝ արիութուն: Բայց ինձ համար, որ սովոր էի հետևել ինքս ինձ և զբաղվել ինքնավերլուծությամբ, այդ պրոցեսը այնքան պարզ էր ու տեսանելի, որ թվում էր ես հետևում եմ, թե ինչպես է դատեղի ունենում ինչ-որ մի ուրիշի մեջ: Ես անվերջ ինձ հաշիվ էի տալիս, որ իմ մղիչ ուժը լոկ նյութական և եսամոլական դրդապատճառներն են և որ ես համայն մարդկության վրա եմ տարածում այն, ինչը միայն ու միայն ինձ է վերաբերում:

Վերջապես մենք փոխադրվեցինք մեր նոր բնակարանը, և իրերի բերումով, որն այժմ ինձ թվում է ճակատագրական, դրա հաջորդ օրը ես հանդիպեցի Բատտիստային և, ինչպես պատմել եմ արդեն, իսկույնեի՞ր հրավերք ստացա՝ նրա ֆիլմերից մեկի սցենարի վրա աշխատելու: Ես արդեն ազատ շունչ քաշեցի և որոշ ժամանակ ինձ այնքան թեթևացած ու լավ էի զգում, ինչպես վաղուցվանից չէի զգացել: Ես մտածում էի, որ մի շորս կամ հինգ սցենար կավարտեմ՝ բնակարանի պատճառով գոյացած պարտքերը վճարելու համար, որից հետո նորից կնվիրվեմ ժուռնալիստիկային և իմ սրտին այնքան մոտիկ թատրոնին: Ես կրկին ու ավելի թունդ սկսեցի սիրել էմիլիային, հաճախ այդ սիրո հետ միասին զգալով խղճի տանջալից խայթեր այն բանի համար, որ ինձ թույլ եմ տվել վատ բան մտածել նրա մասին, որ նրան համարել եմ եսասեր ու անզգա: Սակայն զգացմունքների այդ պայծառացումը երկար շտեկեց: Դրանից գրեթե անմիջապես հետո իմ կյանքի երկինքը նորից սկսեց ծածկվել ամպերով: Ընդ որում, սկզբում այնտեղ հայտնվեց մի փոքրիկ ամպ, որը, այնուամենայնիվ, բավական սև էր:

Գլուխ չորրորդ

Բատտիստային ես հանդիպել էի հոկտեմբերի առաջին երկուշաբթի օրը: Դրանից մի շաբաթ հետո մենք արդեն մըտանք լրիվ կահավորված մեր բնակարանը: Այդ բնակարանը, որն այնքան հոգսերի տակ էր գցել ինձ, ճշմարիտն ասած, առանձնապես ոչ մեծ էր և ոչ էլ շքեղ: Եղած-չեղածը ընդամենը երկու սենյակ էր. մի բավական ընդարձակ հյուրասրահ, որի երկարությունն ավելին էր, քան լայնությունը, և զգալի մեծության մի ննջասենյակ: Լոգարանը, խոհանոցը և աղախնի սենյակը, բոլորն էլ շատ փոքր էին, ինչպես այդ լինում է ժամանակակից տներում: Բացի դրանցից, կար նաև անլուսամուտ մի փոքրիկ սենյակ, որը էմիլիան ուզում էր դարձնել իր հանդերձարանը: Մեր այդ բնակարանը նորակառույց մի շենքի վերջին հարկում էր, որն այնքան էր ողորկ ու սպիտակ, կարծես գիպսից լիներ: Այդ շենքը գտնվում էր մի փոքրիկ, թեթևակի դարիվար գնացող փողոցում: Փողոցի մի կողմը ամբողջ երկայնքով բարձրանում էին մեր տան նման բազմաթիվ շենքեր, իսկ մյուս կողմը ձգվում էր ինչ-որ մեկի ամառանոցի ցանկապատը, որի վրայով մեկնելով էին վիթխարի ծառերի ճյուղերը: Մեր բնակարանի առջև բացվում էր հիանալի մի տեսարան, որի վրա հրավիրեցի էմիլիայի ուշադրությունը: Տպավորությունն այնպիսին էր, որ թվում էր, թե այդ այգին, որի տեղ-տեղ նոսրացող ծառերի միջից երևում էին այգու ոլորապատույտ շավղիկները, շատրվաններն ու բացուտները, մեզանից ոչնչով բաժանված չէ ոչ փողոցով և ոչ էլ ցանկապատով, և որ ցանկության դեպքում կարող ենք ուզած պահին իջնել ու շրջել նրա մեջ:

Մենք բնակարան տեղափոխվեցինք կեսօրից հետո, ամբողջ օրը ինչ-որ գործերով էի զբաղված, որից հետո այժմ չեմ էլ հիշում, թե որտեղ կամ թե ում հետ ընթրեցինք: Հիշում եմ միայն մի բան, որ կեսգիշերին ես կանգնած էի ննջարանի եռափեղկ հայելու առաջ և անշտապ փողկապս էի արձակում: Հանկարծ հայելու մեջ նկատեցի, թե ինչպես էմիլիան մահճակալից վերցրեց բարձր և շարժվեց դեպի հյուրասրահի դուռը: Խիստ զարմացած, հարցրի.

— Այդ ի՞նչ ես անում:

Ես այդ ասացի առանց շրջվելու կամ շարժվելու տեղիցս: Դարձյալ հայելու մեջ տեսա, թե նա ինչպես կանգ առավ դռան շեմին և, շրջվելով, անտարբերությամբ ասաց.

— Դու չե՞ս նեղանա, եթե ես պառկեմ մյուս սենյակի բազմոցին:

— Այս գիշե՞ր,— շփոթված հարցրի ես, ոչինչ շհասկանալով:

— Ոչ, միշտ,— արագ վրա բերեց էմիլիան:— Ճիշտն ասած, իմ նոր տուն ցանկանալու պատճառներից մեկն էլ այս էր... Ես այլևս չեմ կարողանում բաց պատուհաններով քնել, ինչպես դու ես սիրում... Ամեն օր աքլորականչին արթնանում եմ ու այլևս չեմ կարողանում աչքերս կապնել և ամբողջ օրը քունս տանում է... Ասա, չե՞ս նեղանա... Ես կարծում եմ, որ շատ ավելի լավ կլինի, եթե առանձին-առանձին քնենք:

Ես դեռ ոչինչ հասկանալ չէի կարողանում, այդ անակնկալը առաջին րոպեին միայն թեթևակի զայրույթ առաջացրեց իմ մեջ: Մոտենալով էմիլիային, ասացի.

— Մի՞թե դա հնարավոր բան է... Մեր եղած-չեղածը ընդամենը երկու սենյակ է, որոնցից մեկում մահճակալն է, մյուսում բազկաթոռներն ու բազմոցը: Ինչի՞ համար: Բացի այդ էլ, բազմոցին պառկելը շատ ավելի անհարմարավետ է, քան մահճակալին:

— Ես ոչ մի կերպ չէի համարձակվում այդ ասել քեզ,— վրա բերեց էմիլիան, աչքերը խոնարհելով ու շնայելով ինձ:

— Այսքան ժամանակ,— առաջ տարա խոսքս,— դու երբեք այդ մասին դժգոհություն չես հայտնել... Ես կարծում էի, թե դու սովորել ես:

Էմիլիան գլուխը բարձրացրեց, նայեց ինձ և, ինչպես ինձ թվաց, գոհ եղավ, որ խոսակցությունն այդ ուղղությունը ստացավ:

— Ոչ, ոչ մի կերպ չեմ կարողանում սովորել... Միշտ էլ վատ եմ քնել... Ըստ երևույթին, հենց այդ է պատճառը, որ այսքան ներվային եմ դարձել: Վերջերս ես համարյա չէի քնում... Գոնե այնպես լիներ, որ շուտ պառկեինք քնելու...

Բայց ամեն օր մի պատճառով դա խանգարվում է... և ահա... — Ու խոսքն առանց վերջացնելու, նա գնաց մյուս սենյակը:

Ես հասա նրա հետևից և շտապ ասացի.

— Սպասիր... Եթե ուզում ես, ես հիանալի կարող եմ քնել նաև լուսամուտները փակ... շատ լավ, սրանից հետո լուսամուտները շենք բացի:

Այդ ասելով, ես զգացի, որ իմ առաջարկությունը արվեց ոչ միայն սիրող ամուսնու զիջողությամբ: Իրականում, ըստ երևույթին, ուզում էի փորձել էմիլիային: Նա գլուխն օրորեց և, թեթևակի ժպտալով, ասաց.

— Օ, ոչ... ինչո՞ւ դու պետք է այդ զոհաբերությունն անես... դու ինքդ միշտ ասում էիր, որ շունչդ կտրվում է, երբ լուսամուտները փակ են լինում... ավելի լավ է առանձին-առանձին քնենք:

— Ես քեզ հավատացնում եմ, որ դա մեծ զոհաբերություն չէ ինձ համար... Ես կսովորեմ դրան:

Էմիլիան տատանվեց, բայց և իսկույն անսպասելի վճռականությամբ վրա բերեց.

— Ոչ, ես ոչ մի զոհաբերություն չեմ ուզում... ոչ մեծ և ոչ էլ փոքր... ես հյուրասենյակում եմ քնելու:

— Իսկ եթե քեզ ասեի, որ դա ինձ դուր չի գալիս և ես ուզում եմ, որ դու ինձ հետ քնե՞ս:

Էմիլիան նորից տատանվեց: Սպա իր սովորական մեղմ տոնով ասաց.

— Տարօրինակ մարդ ես, Ռիկկարդո... Դու այդ զոհաբերությունը երկու տարի առաջ չէիր ուզում անել, երբ մենք նոր էինք ամուսնացել... Իսկ հիմա ինչ գնով էլ լինի, ուզում ես անել... Հանուն ինչի՞... Շատ ամուսիններ կան, որոնք առանձին են քնում, և, այնուամենայնիվ, սիրում են իրար... Առավոտները, երբ աշխատանքի ես գնում... քեզ համար ավելի լավ կլինի: Այլևս ինձ չես արթնացնի...

— Բայց դու ինքդ ես ասում, որ աքլորականչին միշտ արթնանում ես... Իսկ ես հո աքլորականչին տնից չեմ գնում:

— ՕՖ, ինչքա՞ն ես համառ, — համբերությունը հատած վրա բերեց էմիլիան: Եվ արդեն առանց թույլ տալու, որ առարկեմ, դուրս եկավ սենյակից:

Մենակ մնալով, ես նստեցի մահճակալին, որտեղ բարձերից մեկը արդեն չկար: Եվ հենց այդ պատկերից բաժանման ու լքման զգացում ապրեցի:

Մի պահ շփոթահար մնացի կանգնած, նայելով բաց դռներ, որով անցավ ու անհետացավ էմիլիան: Իմ գլխում անընդհատ մի հարց էր պտտվում. «էմիլիան, — հարցնում էի ինձ, — չի ուզում այլևս ինձ հետ միասին քնել այն պատճառով արդյոք, որ իսկապես նրան խանգարում է վաղորդյան լույսը, թե՞ պարզապես նա այլևս չի ուզում ինձ հետ միասին քնել»: Ես հակվում էի դեպի երկրորդ ենթադրությունը, թեև ամբողջ սրտով կուզեի հավատալ առաջինին: Ես զգում էի, սակայն, որ եթե ընդունեմ էմիլիայի բացատրությունը, ինձ մոտ կասկածներ կմնան: Ես այդ ինձ չէի խոստովանում, բայց վերջնական հարցը, որը ես ինձ տալիս էի, հետևյալն էր. գուցե էմիլիան առհասարակ դադարել է ինձ սիրելուց:

Մինչ մտքերի մեջ խորասուզված նստել էի մահճակալին ու նայում էի շուրջս, էմիլիան անվերջ գնում ու նորից էր գալիս սենյակ, բարձից հետո հյուրասենյակ տանելով երկու ծալած սավան, որը նա պահարանից հանեց, մի վերմակ և իր խալաթը: Հոկտեմբերի սկիզբն էր, եղանակները դեռ տաք էին, և էմիլիան բնակարանում այս ու այն կողմ էր գնում մի բարակ ու թափանցիկ շապիկով:

Ես մինչև հիմա դեռ չեմ նկարագրել էմիլիային և ուզում եմ այդ անել հիմա, թեկուզև այն պատճառով, որպեսզի բացատրեմ այն գիշերվա իմ զգացումները: Էմիլիան գուցեև բարձրահասակ չէր, բայց շնորհիվ այն զգացումների, որոնք առաջացնում էր իմ մեջ, նա միշտ ինձ թվում էր ավելի բարձր և, որ գլխավորն է, ավելի վեհատեսիլ, քան բոլոր այն կանայք, որոնց ես երբևէ ճանաչել եմ: Ես չեմ կարող ասել, իսկապե՞ս վայելչատես էր նա, թե՞ իմ սերն էր նրան վերագրում այդ արժանիքը: Ես հիշում եմ միայն, որ մեր հարսանիքից հետո առաջին գիշերը, երբ էմիլիան իր բարձրակրունկ կոշիկները հանեց, և ես, մոտենալով, սենյակի մեջտեղում գրկեցի նրան, խիստ զարմացա, նկատելով, որ նրա ճակատը ուղիղ իմ կրծքից է և որ մի ամբողջ գլխով բարձր եմ նրանից: Բայց հետո, երբ նա պռկեց իմ կողքին՝ մահճակալի ծածկոցի վրա, ես ապշեցի մի ուրիշ անակնկա-

լից. հիմա էլ նրա մերկ մարմինը ինձ թվաց մեծ, մի տեսակ
 լիքը, ծավալուն, թեև գիտեի, որ իրականում նա հաղթան-
 դամ կին չէ: Էմիլիան անսահման գեղեցիկ ուներ ուներ,
 հիասքանչ թևեր, սքանչելի պարանոց, ինչպիսիք երբևէ
 տեսել եմ. մի տեսակ թմբիկ էր, կլոր, անհունորեն գեղե-
 ցիկ կազմված ու շարժումների մեջ՝ ճկուն: Նա թուխ երես
 ուներ, արտահայտիչ ու գեղեցիկ քիթ, մսեղ, թարմ շրթունք-
 ներ, իսկ երբ ծիծաղում էր, այդ շուրթերից շողշողում էր
 փոքր-ինչ խոնավ, անսահմանորեն սպիտակ ատամնաշարը:
 Ոսկերանգ շագանակացու խոշոր աչքերում զգայական մի
 արտահայտութուն կար, և երբեմն, կրքոտ ինքնամոռացու-
 թյան պահերին, նրանք թվում էին մի տեսակ տարօրինակո-
 րեն շաղված ու մոլորուն: Ինչպես արդեն ասել եմ, Էմիլիան
 գեղեցիկ չէր, բայց, չգիտեմ ինչու, նա միշտ գեղեցիկ կնոջ
 տպավորութուն էր թողնում. ըստ երևույթին դա բացատրը-
 վում էր նրա ճկուն ու համաչափ իրանով, որն առանձնապես
 էր ընդգծում նրա կոնքերի ձևն ու կուրծքը կամ գուցե այն
 պատճառով, որ հոյատես կեցվածք ուներ և իրեն պահում էր
 մեծ արժանապատվությամբ և, վերջապես, գուցե նաև նրա
 երկար, ուղիղ ու գեղեցիկ ոտքերի աղջկական ուժի և հրապու-
 րիչ հմայքի շնորհիվ: Մի խոսքով, նրա մեջ մարմնավորված
 էր այն անբռնազբոսիկ նազելիութունն ու հանգիստ վեհա-
 պանծութունը, որոնք մարդուն տրվում են միայն բնության
 կողմից և գուցե հենց այդ պատճառով էլ թվում այնքան
 խորհրդավոր ու անմեկնելի:

Այդ երեկո, մինչ Էմիլիան ննջարանից հյուրասենյակ էր
 գնում-գալիս, իսկ ես դառնացած ու շփոթահար նայում էի
 նրա հետևից, շիմանալով, թե ինչ ասեմ, հայացքս Էմիլիայի
 անվրդով դեմքից սահեց ու կանգ առավ նրա մարմնի վրա,
 որի ուրվագծերը մերթ ընդ մերթ երևում էին թափանցիկ
 շապկի տակից: Հանկարծ իմ մեջ նորից գլուխ բարձրացրեց
 կասկածը այն մասին, որ Էմիլիան այլևս ինձ չի սիրում: Ինձ
 խոցեց տանջալից մի միտք, այն միտքը, որ անհնարին է մեր
 մարմինների մերձեցումը: Դա մի այնպիսի զգացում էր, որ
 ես դեռ երբեք չէի ունեցել: Այդ միտքը մի վայրկյան ինձ
 շշմեցրեց, թեև միևնույն ժամանակ չէի կարողանում դրան
 հավատալ: Սերը, իհարկե, ամենից առաջ զգացմունք է, բայց

նաև մարմինների անարտահայտելի, գրեթե հոգեկան մերձեցում: Մինչև այդ ես առանց ինձ հաշիվ տալու վայելում էի իմ սերը, ինչպես մի բնական և ինքնըստինքյան հասկանալի բան: Իսկ այժմ, երբ իմ աչքերը վերջապես բացվեցին, պարզ ու հստակ տեսա այն, ինչ մինչև հիմա շէի նկատում և հասկացա, որ այդպիսի մերձեցում մեր միջև, ըստ երևույթին, այլևս չի լինելու, ավելին՝ այլևս արդեն չկա: Եվ ինչպես նա, ով հանկարծ նկատում է, որ ինքը անդունդի եզրին է կախվել, ես ցավագին մի թախիժ զգացի, երբ մտածեցի, որ մեր մոտիկույթյունը առանց պատճառի դարձավ օտարություն, անէություն և բաժանում:

Ես կանգ առա այդ մտքերի վրա, որոնք ամեն ինչ տակնուվրա էին արել իմ մեջ, մինչդեռ էմիլիան, որը մտել էր լողարան, ըստ երևույթին, լողանում էր, ինչպես այդ կարելի էր կռահել հոսող ջրի ձայնից: Ես խստորեն զգում էի իմ անզորությունը, բայց միևնույն ժամանակ իմ մեջ արթնացել էր նաև այդ զգացումն հաղթահարելու կատաղի մի ցանկություն: Մինչև այդ պահը էմիլիային սիրում էի մի տեսակ թեթևակի և անգիտակցաբար: Նրա հանդեպ ունեցած իմ սերը կարծես ինչ-որ կախարդանքով դառնում էր շգիտակցված, փոթորկուն, ոգեշունչ մի մղում, որը, մինչև հիմա, ինչպես ինձ թվում էր, կախված էր ինձանից և միայն ինձանից: Իսկ այժմ ես առաջին անգամ հասկանում էի, որ այդ ոչ միայն կախված է նաև էմիլիայի պատասխան մղումից, այլև նրանից է ստանում իր սնունդը: Եվ նրան այդպես փոխված տեսնելով, վախենում էի, որ այլևս չկարողանամ էմիլիային սիրել նախկին անբռնազբոսիկ, թեթև ու բնական սիրով: Մի խոսքով, վախենում էի, որ մեր այդ սքանչելի մտերմության խորքը թափանցի իմ կողմից մի սառը բռնազբոսիկություն, իսկ նրա կողմից... Ես շգիտեի, թե ինչպիսին կլինի նրա վերաբերմունքը, բայց կանխազգում էի, որ իմ կողմից ցուցաբերված ամեն մի հարկադրանք նա կարող է ընդունել լավագույն դեպքում անտարբեր պասսիվությամբ:

Հենց այդ րոպեին էմիլիան հյուրասենյակ գնալու համար անցնում էր իմ կողքով: Ես, գրեթե ինձանից անկախ ցատկելով տեղիցս և բռնելով նրա թևից, ասացի.

— Այստեղ արի... Ես կուզեի քեզ հետ խոսել:

Առաջին բոլորին նա դիմադրեց ու հետ գնաց, բայց իսկույննեթ զիջեց ու նստեց մահճակալին՝ ինձանից փոքր-ինչ հեռու:

— Խոսե՞լ: Ինչի՞ մասին ես ուզում խոսել:

Զգիտեմ ինչու, հանկարծ կոկորդս մի տեսակ սեղմվեց: Գուցե դա երկշտուրությունից էր, մի զգացում, որը մինչ այդ մեր հարաբերությունների մեջ չէր եղել և որը, ինչպես թվում էր ինձ, ավելի քան որևէ այլ բան, հաստատում էր այն փոփոխությունը, որ տեղի էր ունեցել այդ հարաբերությունների մեջ:

— Այո, խոսել,— ասացի ես:— Ես այն տպավորությունն եմ ստանում, որ մեր միջև ինչ-որ բան է փոխվել:

Էմիլիան մի վայրկենական խեթ հայացք գցեց ինձ վրա և շատ հանգիստ պատասխանեց.

— Քեզ չեմ հասկանում... ինչո՞ւ պետք է փոխված լինի... Ոչինչ էլ չի փոխվել:

— Ես չեմ փոխվել, իսկ դու՝ այո:

— Ամենևին էլ չեմ փոխվել... ինչպես կայի, այնպես էլ մնացել եմ:

— Առաջ դու ինձ ավելի շատ էիր սիրում... Վշտանում էիր, երբ ես գնում էի, թողնելով քեզ մենակ... Հետո քեզ համար տհաճ չէր ինձ հետ մի անկողնում քնելը... Ընդհակառակը:

— Ա՛, ահա թե ինչն է պատճառը,— բացականչեց Էմիլիան, բայց ես նկատեցի, որ նրա ձայնի մեջ չկար նախկին համոզվածությունը:— Ես գիտեի, որ այդպիսի մի բան մտածած կլինես... Ի՞նչ ես հոգիս հանում... Ես քեզ հետ չեմ ուզում քնել պարզապես նրա համար, որպեսզի կարողանամ քնից կշտանալ, իսկ քեզ հետ պառկելիս դա չի ստացվում, ահա ամբողջ պատմությունը:

Տարօրինակ է, բայց ես հանկարծ ընդունեցի նրա այդ փաստարկները, և իմ այնքան վատ տրամադրությունը իսկույն չքացավ, կարծես հալվեց, ինչպես կրակի մոտ դրված մոմը: Էմիլիան նստած էր իմ կողքին՝ ճմրթված ու թափանցիկ իր շապիկով, որը կարծես թույլ էր տալիս իր տակից երևալու միմիայն նրա մարմնի ամենաինտիմ և ամենագաղտնի տեղերի գույներն ու ձևերը: Ես ցանկանում էի նրան,

և ինձ տարօրինակ էր թվում, թե նա ինչու չի նկատում այդ, ինչու չի լռում ու ինձ առնում իր գիրկը, ինչպես այդ անում էր առաջ, երբ հանկարծ իրար էին հանդիպում մեր հուզված ու պղտորված հայացքները: Մյուս կողմից, այդ ցանկությունը ինձ ոչ միայն այն հույսն էր ներշնչում, թե իմ մեջ կարթնանա էմիլիայի հանդեպ ունեցած իմ նախկին հակումը, այլև այն, որ էմիլիայի մոտ նույնպես այդպիսի զգացում կարթնանա իմ նկատմամբ:

— Եթե ոչինչ չի փոխվել, ուրեմն ապացուցիր,— շատ կամաց ասացի ես:

— Ես այդ ապացուցում եմ ամեն օր, ամեն ժամ:

— Ոչ, հիմա ապացուցիր:

Այս ասելով, ես ձեռքս համարյա կոպտորեն գցեցի նրա մազերին և քաշեցի, որ համբուրեմ նրան: Էմիլիան շղիմարեց, բայց վերջին վայրկյանին գլուխը թեթևությամբ այնպես թեքեց, որ շուրթերս միայն պարանոցին կպան:

— Ուրեմն, դու չե՞ս ուզում, որ քեզ համբուրեմ,— ասացի ես, բաց թողնելով նրան:

— Բանն այդ չէ,— մազերը կարգի բերելով՝ փնթփնթաց նա նույն համառ անտարբերությամբ:— Եթե իմանայի, որ համբուրելով կվերջանա, հաճույքով կթողնեի... Բայց գիտեմ, որ համբույրը իր շարունակությունն էլ է ունենալու... Իսկ հիմա արդեն ուշ է:

Էմիլիայի այդ լրջամիտ սառնությունը ինձ վիրավորեց:

— Այդպիսի բաների ուշը ո՞րն է:

Թևից բռնելով ու քաշելով իմ կողմը, ես նորից փորձեցի համբուրել նրան:

— Օ՛Ֆ, ցավացրիր,— ծվծվաց էմիլիան:

Ձեռքս հազիվ էր կպել նրան: Ես հիշեցի, թե ինչպես էի առաջ, մեր սիրո շրջանում, երբեմն ամբողջ ուժով այնպես սեղմում նրան գրկիս մեջ, որ քիչ էր մնում շունչը կտրրվի, և այնուամենայնիվ նա ծպտուն անգամ չէր հանում:

— Իսկ առաջ քեզ չէի՞ ցավացնում,— զայրացած ասացի ես:

— Ձեռքերդ կարծես երկաթից լինեն,— պատասխանեց նա,— դու այդ բոլորովին հաշվի չես առնում... հիմա երևի կապտացրիր:

Այս խոսքերը նա ասաց անտարբեր և, ինչպես նկատեցի, առանց որևէ կոկետուիթյան:

— Մի խոսքով, հիմա ի՞նչ ես ասում, թողնո՞ւմ ես համբուրեմ, թե չէ, — կոպտորեն հարցրի ես:

— Խնդրեմ, արի համբուրիր, — էմիլիան տեղից մեկնվեց և մայրաքար թեթևորեն համբուրեց ճակատս: — Իսկ հիմա թող գնամ քնեմ... Արդեն ուշ է:

Ես ոչինչ հասկանալ չէի կարողանում: Եվ նորից երկու ձեռքով ամուր գրկեցի նրա մեջքն այն տեղից, որտեղ իրանը միանում էր լայն կոնքերի հետ:

— էմիլիա, — ասացի ես, քաշելով նրան, որ հետ-հետ էր գնում, — դա այն համբույրը չէ, որ ես ուզում էի քեզանից:

Նա ինձ հետ հրեց և վճռական ու զայրացած ասաց.

— Օ՛Ֆ, թող ինձ... ցավացնում ես:

— Ճիշտ չէ, դա չի կարող ճիշտ լինել, — ասացի ես ատամներիս արանքով և ընկա նրա վրա:

Այս անգամ նա մի քանի ուժեղ շարժումներով դուրս պրծավ ձեռքիցս, տեղից կանգնեց և հանկարծ հաստատ ու վճռական, առանց որևէ ամոթի, երեսիս ասաց.

— Եթե ուզածդ այդ է, ասա թողնեմ... Բայց մի ցավացնի, տանել չեմ կարողանում, երբ ինձ հետ կոպիտ են վարվում:

Քիչ էր մնացել շունչս կտրվի: Այս անգամ էմիլիայի ձայնը սառն էր, գործնական, այդ ձայնի մեջ զգացմունքի հեռավոր ակնարկ անգամ չկար: Մի պահ քար կտրեցի տեղումս: Ես նստել էի մահճակալին, ձեռքերս կցել իրար ու գլուխս խոնարհել: Նրա ձայնը նորից հասավ իմ ականջին.

— Եթե իսկապես ուզում ես, արի... Ուզո՞ւմ ես:

Առանց գլուխս բարձրացնելու, ես կամաց ասացի.

— Այո, ուզում եմ:

Այդ ճիշտ չէր, այժմ ես այլևս նրան չէի ուզում: Սակայն ուզում էի նրա մեջ խեղդել խորթության այդ նոր, տարօրինակ զգացումը: Ես լսեցի, թե ինչպես նա ասաց. «Լավ», — հետո սենյակի միջով անցավ իմ հետևը և, պտույտ տալով մոտեցավ մահճակալին: «Նա ընդամենը պետք է մի շապիկ հանի», — մտածեցի ես և հիշեցի, որ առաջ այդպիսի պահին էմիլիային նայում էի կախարդված աչքերով,

ինչպես հեքիաթի ավազակը, որը, արտասանելով մոգական խոսքը, տեսնում է, թե ինչպես է քարայրի դուռը դանդաղորեն հետ գնում, նրա հայացքի առաջ բացելով զարմանահրաշգանձերի փայլը: Բայց այս անգամ շուգեցի նայել: Հասկանում էի, որ այժմ արդեն ես նրան կնայեի ուրիշ աչքերով, կնայեի ոչ թե մանկական վճիտ, թեև կրքոտ աչքերով, այլ այնպիսի աչքերով, ինչպիսիք նրանց դարձրել էր էմիլիայի անտարբերությունը՝ ազահ, վիրավորական և՛ նրա, և՛ ինձ համար:

Ես մնացել էի տեղումս նույն ձևով նստած. խոնարհած գլխով, ձեռքերս իրար կցած ու դրած ծնկներիս միջև: Փոքր-ինչ հետո ես լսեցի մահճակալի զսպանակների կամացուկ ճոճոցը: էմիլիան մտել էր անկողին ու փովել ծածկոցի վրա: Նորից ճոճոցի ձայն եկավ, ըստ երևույթին էմիլիան էր տեղը հարմարեցնում: Հետո կրկին լսվեց նրա այդ նոր, սարսափելի ձայնը.

— Դե վեր կաց, արի... էլ ի՞նչ ես սպասում:

Ես շարժվեցի, նույնիսկ տեղիցս շարժվեցի... Սակայն բռնորովին անսպասելի հարց տվի ինձ, արդյո՞ք մեր հարաբերությունները միշտ էլ հենց այսպես շեն եղել: Այո, իսկույն պատասխանեցի ինքս ինձ, գուցե մի քիչ ավելի կամ մի քիչ պակաս, բայց հիմնականում այսպես են եղել: էմիլիան միշտ էլ հանվում էր ու պառկում մահճակալին: Ուրիշ կերպ ինչպե՞ս կարող էր լինել: Բայց միևնույն ժամանակ ամեն ինչ ուրիշ կերպ էր լինում: Առաջ երբեք չկար այդ անհոգի, սառը, պասսիվ զիջողությունը, որը այժմ զգացվում էր ոչ միայն էմիլիայի ձայնի, այլև մահճակալի զսպանակների արձակած ճոճոցի և ճմրթված վերմակի խշխշոցի մեջ: Առաջ ամեն ինչ կատարվում էր փոխադարձ զգացմունքի ոգևորող սրբնթացության, շփտակցվածության, արբեցության փոթորկալից պայմաններում: Մեկ-մեկ, երբ միտքդ զբաղված է լինում որևէ կարևոր հարցով, պատահում է, որ ձեռքիդ եղած բանը, — գիրք, խոզանակ, կոշիկ, — ինչ-որ տեղ ես դնում, իսկ հետո զուր տեղը ժամերով փնտրում, մինչև որ գտնում ես այնպիսի մի աներևակայելի տեղում, որ մտքովդ էլ չէր անցնի՝ պահարանի վրա, սենյակի ամենահեռավոր անկյունում կամ էլ սեղանի դարակում: Ահա այդպես ինձ հետ պա-

տահում էր առաջ՝ սիրո պահերին: Ամեն ինչ միշտ կատարվում էր աներևակայելի արագ, արբեցածուծյան և կախարդական ինքնամոռացման պայմաններում ես հանկարծ ինձ գտնում էի էմիլիայի գրկում և համարյա երբեք չէի հիշում, թե ինչպես այդ կատարվեց, ինչ տեղի ունեցավ այն րոպեի միջև, երբ մենք շատ հանգիստ, առանց որևէ ցանկություն ունենալու նստած էինք իրար դեմ, և այն րոպեի, երբ մեր մարմինները հյուսվում էին իրար: Այժմ էմիլիայի մոտ լրիվ բացակայում էր այդ ինքնամոռացությունը, այդ նույն պատճառով ինքնամոռացություն չկար նաև ինձ մոտ: Այժմ ես կարող էի նրան նայել միայն սառը աչքերով, իսկ նա էլ իր հերթին կարող էր այդպես նայել ինձ: Այն զգացողությունը, որը իմ վրդովված գիտակցության մեջ պատկերանում էր ավելի ու ավելի պարզորոշ, հանկարծ որոշակի կերպարի բնույթ ստացավ. իմ առջևում այլևս կանգնած չէր այն կինը, որին ես սիրում էի և որը սիրում էր ինձ, իմ դիմաց կանգնած էր փոքր-ինչ անհամբեր ու անփորձ մի պոռնիկ, որը պատրաստվում էր սառը անտարբերությամբ մտնել իմ գիրկը, հուսալով, որ այդ կլինի կարճատև և ոչ հոգնեցուցիչ: Մի պահ այդ կերպարը ուրվականի նման հառնեց իմ աչքերի առաջ, ապա ինձ թվաց, որ նա կարծես անցավ իմ կողքով և ձուլվեց իմ թիկունքում՝ մահճակալին պառկած էմիլիայի հետ: Այդ նույն րոպեին ես ոտքի ելա և առանց շրջվելու ասացի.

— Պետք չէ... էլ չեմ ուզում... Ես ինքս կգնամ այնտեղ քնելու... Դու մնա այստեղ:— Եվ ոտքերիս ծայրերի վրա մոտեցա հյուրասենյակ տանող դռանը:

Դիվան-մահճակալը պատրաստված էր, սավանները գցած էին և ծայրերը հետ ծալած, վերմակի վրա թևքերը տարածած փոված էր էմիլիայի գիշերանոցը: Ես վերցրի այդ գիշերանոցը, հատակին դրած գիշերային շատերը, խալաթը, որ էմիլիան դրել էր բազկաթոռին և, վերադառնալով ննջարան, դրանք դրի աթոռներից մեկի վրա: Այս անգամ ես չկարողացա ինձ զսպել և նայեցի էմիլիային: Նա դեռ պառկած էր նույն դիրքով, ինչ դիրք ընդունել էր այն ժամանակ, երբ ինձ ասաց. «Դե վեր կաց, արի»: Պառկած էր լրիվ մերկ, ձեռքի մեկը գլխի տակ դրած, երեսը շրջած իմ կողմը, աչքերը լայն բացած, որոնք նայում էին անտար-

բեր ու ոչինչ շտեմնող հայացքով, իսկ մյուս ձեռքը մարմնի վրայով ձգված, հանգչում էր ցայլքի վրա: Այս անգամ նա արդեն պոռնիկ չէր, այլ ցնորային մի կերպար, որը համակված էր անհնարինի հանդեպ ունեցած կարոտի շնչով: Էմիլիան պառկած էր ինձանից ընդամենը մի քանի քայլի վրա, բայց այնքան էր թվում հեռու, որ կարծես ուրիշ աշխարհի էակ լիներ, աշխարհի, որը դուրս էր շոշափելի իրականության և զգացմունքների սահմաններից:

Գլուխ հինգերորդ

Այն երեկո, իհարկե, ես արդեն նախազգացի, որ ինձ համար սկսվում է դժվարություններով լեցուն կյանքի մի շրջան, բայց, տարօրինակ է ասել, ես էմիլիայի վերաբերմունքից չարի այն եզրակացությունները, որոնք սպասվում էին: Կասկածից վեր էր, էմիլիան ցուցաբերեց սառնություն ու անտարբերություն, իսկ ես գերադասեցի ավելի շուտ մերժել այդ սերը, քան ընդունել այդ ձևով, բայց, շնայած դրան, ես էմիլիային սիրում էի, իսկ սերը օժտված է մի մեծ հատկությունամբ. նա ոչ միայն գիտե հուսալ, այլև մոռանալ: Հաջորդ օրը, նույնիսկ չգիտեմ ինչպես, նախընթաց երեկոյի դեպքը, որ հետագայում այնքան նշանակալից դարձավ ինձ համար, իմ աչքում կորցրեց արդեն գրեթե իր ամբողջ նշանակությունը. խորթության ծանր զգացումն արդեն ցնդեց անցավ, իր տեղը զիջելով սովորական գժտվածությունը: Կյանքում միշտ հեշտությունամբ է մոռացվում այն, ինչը մարդ չի ուզում հիշել: Մյուս կողմից էլ, ինչպես կարծում եմ, տեղի ունեցածը մոռանալուն նպաստեց նաև ինքը էմիլիան, որը մի քանի օր հետո, թեև, իհարկե, դեռ շարունակում էր առանձին քնել, արդեն չմերժեց իմ սերը: Ճիշտ է, այս անգամ էմիլիան իրեն պահեց նույն ձևով սառը և պասսիվ, որոնք առաջին վայրկյանին իմ մեջ բողոքի և զայրույթի զգացում առաջացրին, բայց, ինչպես հաճախ է լինում, այն, ինչ անընդունելի էր առաջին երեկոն, մի քանի օր հետո սկսեց ինձ թվալ ոչ

միայն ընդունելի, այլև հաճելի: Մի խոսքով, առանց ինձ հաշիվ տալու, ես ոտքս դրի այն սայթաքուն հողին, որտեղ խաբկանքներ տենչացող հողու խուսափանքների և սոփեստության շնորհիվ նախընթաց օրվա սառնությունը հաջորդ օրը դիտվում է որպես ջերմաշունչ սեր: Առաջին իրիկունը ես այն համոզմունքին էի, որ էմիլիան իլեն պահում է պոռնիկի նման, բայց նրանից հետո կես շաբաթ էլ չէր անցել, և արդեն համաձայն էի սիրել ու տիրանալ նրան թեկուզև որպես պոռնիկի: Քանի որ հոգուս խորքում, ըստ երևույթին, վախենում էի, թե էմիլիան ինձ այլևս չի սիրում, ապա շնորհակալ էի նրանից նույնիսկ այդ սառնության և չհանդուրժող անտարբերության համար, կարծես հենց այդպիսին էլ պետք է լինեին մեր ամուսնական հարաբերությունները:

Ես դեռ շարունակում էի ապրել այն պատրանքով, թե էմիլիան առաջվա նման սիրում է ինձ, կամ ավելի ճիշտ, աշխատում էի երբեք առաջ չքաշել մեր սիրո հարցը: Եվ չնայած դրան, ինձ ոչ մի րոպե չէին լքում այն կասկածները, որ մեր հարաբերությունները փոխվել էին: Դրա վկայությունն այն էր, որ իմ աշխատանքին սկսել էի ուրիշ կերպ նայել: Ես ժամանակավորապես հրաժարվել էի թատրոնի հանդեպ ունեցած իմ երազանքներից և նվիրվել կինոյին սոսկ նրա համար, որպեսզի բավարարեմ էմիլիայի սեփական տուն ունենալու տենչանքը: Քանի դեռ վստահ էի, որ էմիլիան ինձ սիրում է, սցենարիստի աշխատանքը այնքան էլ ծանր չէր թվում, բայց այն երեկո տեղի ունեցած դեպքից հետո հանկարծ սկսեցի նկատել, որ դա խիստ ձանձրացնում է, դժգոհություն ու զզվանք է պատճառում ինձ: Փաստորեն, ինչպես արդեն ասել եմ, ես համաձայնեցի այդ աշխատանքն անել, ինչպես որ հանուն էմիլիայի սիրո կանեի պատահած ամեն մի աշխատանք, եթե դա նույնիսկ ամենևին անշնորհակալ ու իմ հետաքրքրություններից ավելի հեռու էլ լիներ: Իսկ այժմ, երբ այլևս սեր գոյություն չուներ, այդ աշխատանքն ինձ համար կորցրել էր իր նշանակությունը և իմ աչքում դարձել ընդամենը անմիտ և անիմաստ մի ստրկություն:

Այստեղ ես ուզում եմ մի քանի խոսք ասել սցենարիստի արհեստի մասին գոնե այն պատճառով, որպեսզի ավելի պարզ լինի, թե ինչ էի զգում այն ժամանակ: Ինչպես հայտնի

է, սցենարիստը նա է, ով շատ ավելի հաճախ մի ուրիշ սցենարիստի և ռեժիսորի աշխատակցութեամբ սցենարներ է գրում, այսինքն՝ ստեղծում է մի հենք, որից հետագայում ծնունդ է առնում ֆիլմը: Սցենարի գործողութեան զարգացմանը համապատասխանաբար նրա մեջ ցույց են տրվում գործող անձերի շարժումներն ու ռեպլիկները, ինչպես և նկարահանող մեքենայի տարբեր տեսակի շարժումները: Ուրեմն, սցենարը միևնույն ժամանակ և պիես է, և կինեմատոգրաֆիական մշակում, և ռեժիսորական պլան: Այսպիսով, թեև ֆիլմ ստեղծելու գործում սցենարիստի դերը շատ կարևոր է և այդ իմաստով ռեժիսորից անմիջապես հետո երկրորդ տեղն է գրավում, այնուամենայնիվ, մինչև այսօր կինոյում գոյութիւն ունեցող տրագիցիայի հետևանքով սցենարիստը համարվում է երկրորդական անձնավորութիւն և միշտ մնում է ստվերում: Եթե արվեստը գնահատենք արտահայտութեան անմիջականութեան տեսակետից, իսկ ուրիշ կերպ չի էլ կարելի գնահատել, ապա սցենարիստը այն արվեստագետն է, որը իր ամբողջ հոգին դնում է ֆիլմի մեջ, շտանալով որևէ թիֆթարանք ու հոգեկան բավարարվածութիւն այն զգացումից որ ֆիլմում նա ինքն իրեն արտահայտել է: Այսպիսով, շնայած նրա աշխատանքը ստեղծագործական աշխատանք է, բայց և այնպես նա ընդամենը գյուտեր, հնարանքներ, տեխնիկական, հոգեբանական և գրական զգացմունքներ մատակարարող է: Իսկ հետագայում այդ ամբողջ նյութը իր կարողութեան ու տաղանդի համապատասխան մշակելն ու ֆիլմում իրեն արտահայտելը ռեժիսորի գործն է: Այսպիսով, սցենարիստը այն մարդն է, որը միշտ մնում է ստվերում: Այն մարդը, որը զոհաբերում է իր լավագույն արջունը ուրիշների հաջողութեան համար, ու թեև ֆիլմի ճակատագիրը երկու երրորդով նրանից է կախված, այնուամենայնիվ, նա երբեք չի տեսնում իր անունը ազգագրերում, որտեղ մեկ առ մեկ նշում են ռեժիսորի, դերասանների և արտադրողի անունները: Ճիշտ է, հաճախ սցենարիստը իր այս երկրորդական արհեստի մեջ կարող է հասնել բարձր վարպետութեան և հիանալի վարձատրվել, բայց նա երբեք հնարավորութիւն չունի ասելու. «Այս ֆիլմը ես եմ ստեղծել... Այս ֆիլմում ես ինձ եմ արտահայտել... Այս ֆիլմը ես եմ...»: Այդ կարող է

ասել միայն ռեժիսորը, որը և Ֆիլմի տակ միակ ստորագրողն է: Իսկ սցենարիստը պետք է բավարարվի իր կատարած աշխատանքի համար ստացած դրամով, որը վերջ ի վերջո, անկախ այն բանից, նա ուզում է այդ, թե չէ, դառնում է նրա գործունեության միակ և իսկական նպատակը: Այդպիսով, սցենարիստին մնում է միայն վայելել կյանքը, եթե, իհարկե, նա ընդունակ է դրան, այն փողերով, որոնք նրա թափած աշխատանքի միակ արդյունքն են, և անընդհատ մի սցենարից անցնել մյուսին, կատակերգությունից անցնել ողբերգության, արկածային ֆիլմից՝ մելոդրամային, անցնել առանց ընդմիջելու, առանց կանգ առնելու, գրեթե նույն ձևով, ինչ ձևով որոշ դայակներ են անընդհատ անցնում մի երեխայից մյուսին, նրանք չեն էլ հասցնում կապվել մեկին, երբ նորից ստիպված հրաժեշտ են տալիս նրան ու գնում մի ուրիշին դաստիարակելու, իսկ դրա արդյունքը լինում է այն, որ նրանց թափած շարշարանքը մնում է երեխայի մորը, որը և երեխային իրենք կոչելու միակ իրավատերն է:

Սակայն բացի այդ, այսպես ասած, հիմնական և անփոփոխ թերություններից, սցենարիստի արհեստը ունի նաև այլ տհաճ կողմեր, որոնք փոխվում են, նայած ֆիլմի որակին ու ժանրին, աշխատակիցների բնավորությանը, թեև դրանցից նրանք ամենևին էլ չեն դառնում ավելի հաճելի: Ի տարբերություն ռեժիսորի, որը վայելում է պրոդյուսերի կողմից իրեն սված ազատությունը, սցենարիստը կարող է միայն համաձայնել աշխատելու առաջարկված նյութի վրա կամ մերժել այն, իսկ համաձայնելու դեպքում էլ իրավունք չունի իր համար աշխատակիցներ ընտրելու. նա ընտրվում է, ոչ թե ընտրում: Պատահում է այնպես, որ պրոդյուսերի անձնական համակրանքի, շահի, քմահաճության կամ պարզապես որևէ պատահականության պատճառով սցենարիստը հարկադրված է լինում աշխատել իր համար տհաճ, հակակրելի մարդկանց հետ, որոնք գիտելիքներով ու կուլտուրայով իրենից ցածր են կանգնած, որոնց բնավորությունը, շարժումները գրգռում ու զայրացնում են նրան: Սցենարի վրա համատեղ աշխատելը նույն բանը չէ, ինչը, ասենք, գրասենյակում կամ ֆաբրիկայում համատեղ աշխատելն է, որտեղ ամեն մեկը իր գործն է անում՝ անկախ իր կողքի աշխատողից, և որտեղ անձնական

փոխհարաբերությունները կարող են հասցվել մինիմումի
 կամ նույնիսկ լրիվ վերացվել: Համատեղ աշխատել սցենարի
 վրա նշանակում է՝ ապրել ուրիշների հետ առավոտից մինչև
 երեկո միննուշն կյանքով, նշանակում է սեփական խելքը,
 զգացմունքները, հոգին միացնել մյուս աշխատակիցների
 խելքին, զգացմունքներին, հոգուն ու ձուլել նրանց հետ, մի
 խոսքով, դա նշանակում է մի երկու-երեք ամսվա ընթաց-
 քում, քանի դեռ շարունակվում են սցենարի աշխատանքները,
 քո և մյուսների միջև ստեղծել կեղծ և արհեստական մտեր-
 մություն, որի միակ նպատակը սցենար ստեղծելն է, հետևա-
 պես, նաև, ինչպես արդեն ասել եմ, դրամ վաստակելը: Այդ
 մտերմությունը ամենավատթարագույն տեսակի մտերմու-
 թյուն է, սոսկալի հոգնեցուցիչ, նյարդայնացնող, անսահման
 ձանձրալի, ինչպիսին կարելի է միայն երևակայել, որովհետև
 նրա հիմքում ոչ թե ընկած է լուռ ու լարված աշխատանքը,
 ինչպես այդ լինում է գիտնականների մոտ, երբ նրանք հա-
 մատեղ որևէ փորձ են կատարում, այլ վերջ շունեցող խո-
 սակցությունները: Սովորաբար ռեժիսորը իր աշխատակից-
 ներին հավաքում է վաղ առավոտյան, քանի որ այդ պահան-
 ջում է ֆիլմը արտադրելու համար սահմանված խիստ կարճ
 ժամկետը, և վաղ առավոտից մինչև ուշ երեկո սցենարիստ-
 ների արածը անվերջ խոսելն է. այդ խոսակցությունը մեծ
 մասամբ աշխատանքին է վերաբերում, բայց հաճախ ձանձ-
 րանում կամ հոգնում են և զվարճության համար փոխում խո-
 սակցության նյութը և շաղակրատում են ինչի մասին ասես:
 Մեկը անպարկեշտ անեկդոտներ է պատմում, մի ուրիշը շա-
 րադրում է քաղաքական հայացքները, մի երրորդը վերլու-
 ծում է այս կամ այն ընդհանուր ծանոթի վարքագիծը, ոմանք
 խոսում են դերասանների կամ դերասանուհիների մասին,
 իսկ ոմանք էլ իրենց հոգսերի ու ցավերի մասին են պատմում:
 Մինչդեռ սենյակը, որտեղ կատարվում է աշխատանքը, բեր-
 ներերան լցվում է սիգարետի ծխով, սեղանների վրա, սցե-
 նարի թղթերի կողքին կուտակվում են սուրճի գավաթները,
 իսկ սցենարիստները, որոնք առավոտյան այդտեղ էին եկել
 արդուկած շորերով, մաքուր, սանրված, ամեն ինչ տեղը-տե-
 ղին, երեկոյան նրանց կարելի է տեսնել մազախոփվ, քրրտ-
 նած, առանց պիջակի և գզգզված, ավելի վատ, քան կարող

էին լինել որևէ անզգա և համառ կնոջ դիմադրութիւնը կոտորելուց հետո:

Սովորույթ դարձած անհոգի ավտոմատիզմը, որով արտադրվում է ֆիլմը, տաղանդը բռնաբարելու պես մի բան է. այդտեղ ավելի շուտ գործում են համառութիւնն ու շահախնդրութիւնը, քան ոգևորութիւնն ու զգացմունքը: Իհարկե, լինում է նաև այնպես, որ ֆիլմը գեղարվեստական բարձր արժանիքներ է ունենում, որ ռեժիսորն ու մյուս աշխատակիցները կապված են լինում իրար հետ վաղեմի բարեկամական կապերով և փոխադարձ հարգանք են տալով միմյանց հանդեպ, մի խոսքով, այնպես է լինում, որ աշխատանքը ընթանում է այն իդեալական պայմաններում, ինչպիսին կարելի է հանդիպել մարդկային գործունեութեան, նույնիսկ ամենաանշնորհակալ գործունեութեան ամեն մի բնագավառում: Սակայն այդպիսի բարենպաստ համընկումները նույնքան հազվադեպ են, որքան հազվադեպ են լավ ֆիլմերը:

Երկրորդ սցենարի համար պայմանագիրն ստորագրելուց հետո, որն այլևս ոչ թե Բատտիստայի հետ էր, այլ մի ուրիշ պրոդյուսերի, ես հանկարծ զգացի, որ արիութիւնն ու ցանկութիւնը ինձ միանգամից լքեցին: Աճող զայրույթով ու զրգվանքով ես սկսեցի զգալ այդ աշխատանքի այն բոլոր տհաճ կողմերը, որոնց մասին հենց նոր պատմում էի: Դեռ անկողնում էի, երբ բացվող օրը ինձ սկսեց թվալ ամայի անապատ, որն այրվում էր կինեմատոգրաֆիայի տանջահար ոգևորութեան դաժան արևի ներքո: Ոտքս դեռ նոր էի դրել ռեժիսորի առանձնասենյակը, երբ նա ինձ իսկույն դիմավորեց հետևյալ հարցով. «Հը, գիշերն ի՞նչ ես մտածել: Լուծո՞ւմ գտել ես, թե չէ»: Այդ հարցն ինձ վրդովում էր ու զզվանք պատճառում: Աշխատանքի ժամանակ նույնպես ամեն ինչ իմ մեջ զայրույթ էր առաջացնում. ամեն տեսակ սրախոսութիւններն ու կատակները, որոնցով ռեժիսորներն ու սցենարիստները, ինչպես ասել եմ, աշխատում էին աշխուժացնել իրենց երկար ու բարակ վեճերը, իմ աշխատակիցների հիմարութիւններն ու բժամատութիւնները կամ պարզապես այն տարածայնութիւնները, որոնք առաջ էին գալիս սցենարի վրա աշխատելու պրոցեսում, ավելին, նույնիսկ իմ մտահղացումներին ու լու-

ծումներին վերաբերող ռեժիսորի գովասանքները ինձ դառնացնում էին ու վիշտ պատճառում, քանի որ, ինչպես ասել եմ, ինձ թվում էր, թե իմ մեջ եղած ամենալավը տալիս եմ ինչ-որ մի բանի, որի հետ ես ոչ մի առնչություն չունեմ և որում ունեցած իմ մասնակցությունը ակամայից է: Ինձ համար ամենաանտանելի բանը հենց այդ գովասանքներն էին: Ամեն անգամ, երբ ռեժիսորը այդ մասնագիտության մարդկանցից շատերին յուրահատուկ երեսպաշտությամբ ու շտեպություններ բազկաթոռից վեր էր ցատկում և բացականչում. «Կեցցե՛ս: Իսկապես հանճա՛ր ես», — ես վշտացած մտածում էի. «Չէ որ ես կարող էի դա օգտագործել իմ դրամաներից կամ կատակերգություններից մեկնումեկի մեջ»: Բայց, շնայած կինոյի աշխատանքի հանդեպ ունեցած իմ զզվանքին, այնուամենայնիվ, ես չէի կարողանում սցենարիստի իմ պարտականություններին անտարբեր վերաբերվել, և հենց դա էր տարօրինակ ու դառը հակասությունը: Սցենարները մի քիչ նման են հին քառածի լծվածքին, որտեղ կային ուժեղ, բանուկ, կառքը քաշող ձիեր, և ձիեր, որոնք ձևացնում էին, թե քաշում են, իսկ իրականում միայն դատարկ վազ էին տալիս: Ուրեմն, շնայած իմ վրդովմունքին և աշխատանքի նկատմամբ ունեցած դժգոհությանս, այնուամենայնիվ ես այն ձին էի, որը միշտ քաշում է: Ես շուտով նկատեցի, որ մյուս երկուսը՝ ռեժիսորը և սցենարի վրա ինձ հետ աշխատող իմ կուլեգան, որևէ դժվարության հանդիպելիս սպասում են, որ ես մեջտեղ դուրս գամ իմ լուծումներով և կառքը տանեմ առաջ: Ոչ թե մրցության ոգին էր ինձ մղում այդ անել, այլ պարտքի և ազնվության գիտակցումը, որն ավելի ուժեղ է, քան նրան հակադրվող որևէ կամք. ինձ վճարում են, ուրեմն պարտավոր եմ աշխատել: Բայց ամեն անգամ ինքս ինձնից ամաչում էի և խղճի այնպիսի խայթ զգում, կարծես շնչին կոպեկներով վաճառել էի մի բան, որը անսահմանորեն թանկ էր, և որը, համենայն դեպս, կարող էի օգտագործել շատ ավելի լավ ձևով:

Ինչպես ասել եմ, կինոյում աշխատելու բոլոր այս տհաճ կողմերը ես նկատեցի Բատտիստայի հետ պայմանագիր կրկնաբեկուց երկու ամիս հետո միայն: Չգիտեմ, թե ինչու այդ ամենը չէի նկատում սկզբնական շրջանում, և ինչու պետք է

այդքան ժամանակ անցներ, որպեսզի ես դրանք տեսնեի: Բայց զզվանքի և անբավարարվածության այն զգացումը, որը իմ հոգում արթնացնում էր նախկինում այնքան ինձ հրապուրող այդ աշխատանքը, գնալով ավելի էր ուժեղանում, և ես աստիճանաբար սկսեցի դա կապել իմ և էմիլիայի միջև ստեղծված հարաբերությունների հետ: Վերջ ի վերջո հասկացա, որ կինոյի աշխատանքը իմ մեջ զզվանք է առաջացնում այն պատճառով, որ էմիլիան այլևս ինձ չի սիրում կամ, համենայն դեպս, ուզում է ցույց տալ, որ չի սիրում: Ես հասկացա, որ համարձակ ու վճռական ձեռնամուխ եղա սցենարների աշխատանքին, քանի դեռ համոզված էի, որ էմիլիան ինձ սիրում է: Իսկ այժմ, երբ այլևս այդ համոզմունքը չունեի, համարձակությունն ու վճռականությունը լքեցին ինձ, իսկ կինոյում աշխատելը սկսեց թվալ ստրկություն, տաղանդի ոչնչացում, ժամանակի կորուստ:

Գլուխ վեցերորդ

Այդ շրջանում, ուրեմն, ես ապրում էի ինչպես մի մարդ, որը տառապում է ինչ-որ սոսկալի հիվանդությամբ, բայց բժշկի մոտ գնալու ոչ մի վճռականություն չի ցուցաբերում: Կարճ ասած, աշխատում էի այնքան էլ շատածել ոչ էմիլիայի իմ հանդեպ ունեցած վերաբերմունքի, և ոչ էլ իմ աշխատանքի մասին: Ես գիտեի, որ մի օր ստիպված կլինեմ լուրջ կերպով մտահոգվել թե՛ մեկով և թե՛ մյուսով և քանի որ զգում էի դրա անխուսափելիությունը, ամեն կերպ աշխատում էի հետաձգել այդ, ինչքան հնարավոր է: Այն, ինչի վրա ես արդեն կասկածում էի, ինձ ստիպում էր ոչ միայն խուսափել նման մտքերից, այլև առանց գիտակցելու նույնիսկ սոսկալ: Իմ և էմիլիայի փոխհարաբերությունները շարունակվում էին նույն ձևով, ինչպես այն ժամանակ, երբ առաջին անգամ զգացի, որ իրերի այդ դրությունը անտանելի է: Բայց այժմ, վախենալով ավելի վատթարից, ես աշխատում էի համոզել ինձ, թեև առանց որևէ հաջողության, որ դրանք

սովորական նորմալ հարաբերություններ են. ցերեկը անտարբեր, դատարկ, խուսափողական զրույցներ, գիշերը՝ ժամանակ առ ժամանակ սեր, որը ես նրա գլուխն էի կապում ոչ առանց դժվարությունների ու դաժանության, և որը նա ընդունում էր այնքան սառը և անտարբեր: Այդ շրջանում աշխատում էի եռանդով և նույնիսկ համառությամբ, թեև դժկամորեն և ավելի ու ավելի վճռական դարձող նողկանքով: Եթե այն ժամանակ քաջություն ունենայի ստեղծված դրության մեջ կողմնորոշվելու, շեմ կասկածում, որ կհրաժարվեի և՛ կինոյում ունեցածս աշխատանքից, և՛ էմիլիայի սիրուց, քանի որ կհամոզվեի, ինչպես հետագայում համոզվեցի, որ մեկը մյուսի հետ սերտորեն կապված է: Սակայն այդ քաջությունը ես չունեցա: Հստ երևույթին, ինձ մոտ այն պատրանքն էր, թե ժամանակի ընթացքում ամեն ինչ ինքն իրեն կլուծվի՝ առանց իմ կողմից որևէ ջանք գործադրելու: Իսկապես էլ, ժամանակի ընթացքում ամեն ինչ լուծվեց, բայց ոչ այնպես, ինչպես ինքս կուզեի: Այսպիսով, էմիլիայի համար իմ սերն էր տհաճ, իսկ ինձ համար՝ իմ աշխատանքը: Օրերը անցնում էին ճնշիչ ու տանջող սպասումների մեջ:

Սցենարը, որը ես պատրաստում էի Բատտիստայի համար, մոտենում էր արդեն գրեթե իր ավարտին: Հենց այդ օրերին էր, երբ Բատտիստան ինձ ակնարկեց, թե ինքը կուզեր, որպեսզի ես մասնակցեմ մի նոր աշխատանքի, որը շատ ավելի լուրջ է լինելու, քան այս մեկը: Ինչպես և բոլոր պրոդյուսերները, Բատտիստան նույնպես շտապողական ու անկայուն մարդ էր: Ոտքի վրա արած նրա ակնարկները երբեք, ընդհանրապես ասած, արտահայտություններից այն կողմ չէին գնում, ինչպես, օրինակ, այսպիսի հայտարարություններն էին. «Մոլտենի, հենց որ վերջացնեք այս սցենարը, իսկույն ձեռնամուխ կլինենք մի ուրիշին... որը շատ ավելի մեծ արժեք կներկայացնի» կամ «Մոլտենի, պատրաստ եղեք, այս մի քանի օրը... ես ձեզ նոր բան եմ առաջարկելու», կամ էլ թե չէ փոքր-ինչ ավելի որոշակի. «Ոչ մեկի հետ պայմանագիր չկնքեք, Մոլտենի, տասնհինգ օրից հետո ես եմ ձեզ հետ պայմանագիր կնքելու»: Այդպիսով, ես իմացա, որ այնքան էլ ոչ հետաքրքիր այս սցենարից հետո Բատտիստան պատրաստվում է ինձ հանձնարարել մի ուրիշ՝ ավելի կարևոր սցե-

նար, որի համար, ինքնըստինքյան հասկանալի է, վճարը շատ ավելի բարձր կլինի, քան այս էր: Խոստովանում եմ, որ, շնայած այդ կարգի աշխատանքի նկատմամբ ունեցած իմ անվերջ աճող նողկանքին, առաջին բանը, որ բնազդորեն մըտքովս անցավ, դա բնակարանն էր և այն դրամը, որը դեռ պետք է վճարեի: Ահա այդ էր պատճառը, որ Բատտիստայի առաջարկությունը ինձ ուրախացրեց: Վերջին հաշվով, այդպես է կինոսցենարիստի աշխատանքը. եթե նույնիսկ այդ գործը չես էլ սիրում, ինչպիսին իմ դեպքն էր, միևնույն է, դարձյալ ամեն մի նոր առաջարկություն ընդունում ես շնորհակալությամբ, իսկ երբ ոչ մի նոր առաջարկություն չի արվում, սկսում ես հուզվել ու մտածել, թե քեզ բանի տեղ չեն դնում:

Բայց և այնպես էմիլիային ոչ մի բան չասացի Բատտիստայի արած նոր առաջարկության մասին և չասացի երկու պատճառով. նախ այն, որ ես դեռ չգիտեի՝ կընդունեմ այդ առաջարկությունը, թե չէ, և երկրորդ, որ իմ աշխատանքը, ինչպես արդեն տեսնում էի, այլևս չէր հետաքրքրում էմիլիային, ուստի գերադասում էի ոչինչ չասել, որպեսզի ավելորդ անգամ նա չհաստատեր իմ նկատմամբ ունեցած անտարբերությունն ու սառնությունը, որոնց մինչև այժմ էլ ես դեռ համառորեն շարունակում էի կարևորություն չտալ: Մյուս կողմից էլ, այդ երկու բանը՝ Բատտիստայի նոր առաջարկությունը և էմիլիայի իմ նկատմամբ ունեցած սառնությունը, ես ազոտ կերպով իրար էի կապում: Ուստի և վստահ չէի, թե իրերի այնպիսի պայմաններում, երբ էմիլիան այլևս ինձ չի սիրում, կարո՞ղ եմ ընդունել այդ նոր աշխատանքը: Եթե նա ինձ սիրեր, իհարկե, նրան կասեի Բատտիստայի առաջարկության մասին, իսկ նրան ասելը ինձ համար նշանակում էր արդեն համաձայն լինել:

Այդ օրերին մի առավոտ ես տնից դուրս եկա և գնացի այն ռեժիսորի մոտ, որի հետ աշխատում էի առաջին, այսինքն՝ Բատտիստայի հանձնարարած սցենարի վրա: Ես գիտեի, որ նրա մոտ գնում եմ վերջին անգամ, քանի որ մինչև ավարտելը ընդամենը մի քանի էջ էր մնացել: Այդ գիտակցությունը ինձ ուրախացնում էր. վերջապես այդ ծանր աշխատանքը ավարտվում է, և ես նորից ի վիճակի կլինեմ գո-

նե օրվա կեսը նվիրել այն գործին, որն ինձ համար հաճելի է: Բացի դրանից, ինչպես սովորաբար լինում է սցենարի վրա աշխատելիս, երկու ամիսը լրիվ բավական եղավ, որպեսզի հակահրանքով լցվեմ այդ ֆիլմի սյուժեափ և նրա հերոսների հանդեպ: Ես գիտեի, որ շուտով գործ եմ ունենալու նոր սյուժեափ և նոր հերոսների հետ, որոնք իրենց հերթին նույնպես շատ շուտով անտանելի են դառնալու ինձ համար: Բայց առայժմ գոնե սրանից գլուխս կազատեի, և այդ հեռանկարը բավական էր, որպեսզի ես ինձ նշանակալից կերպով թեթևացած զգայի:

Առաջիկա ազատագրման հույսը ինձ այնպես ոգևորեց, որ ես այն առավոտ աշխատեցի արտասովոր թեթևությամբ ու պայծառ մտքով: Սցենարը լրիվ վերջացնելու համար մնում էր մի երկու-երեք աննշան ուղղում անել, որոնց վրա, այնուամենայնիվ, արդեն մի քանի օր էր, ինչ անօգուտ գլուխ էինք ջարդում: Սակայն ոգևորության պահին ինձ հաջողվեց բանավեճին ճիշտ ուղղություն տալ և մեկը մյուսի հետևից հաղթահարել մնացած դժվարությունները: Այսպիսով, մի երկու ժամից հետո պարզվեց, որ սցենարը արդեն լրիվ պատրաստ է: Այդպես լինում է լեոնիվեր բարձրանալիս, երբ հոգնությունից տանջահար կորցնում ես լեոնակատարն հասնելու վերջին հույսդ և մեկ էլ հանկարծ կատարն այդ հայտնվում է ինչ-որ մոտիկ մի շրջադարձի հետևում: Ես գրեցի նախադասություն և զարմացած բացականչեցի.

— Հենց այստեղ էլ կարելի է վերջացնել:

Մինչ ես այդ գրում էի սեղանի մոտ նստած, ռեժիսորը անընդհատ հետ ու առաջ էր քայլում իր առանձնասենյակում: Ապա նա մոտեցավ ինձ, ուսերիս վրայով նայեց առաջս դրած թղթին և նույնիսկ զարմացած, կարծես չհավատալով աչքերին, վրա բերեց.

— Իրավացի ես, հենց այդտեղ էլ կարելի է վերջացնել:

Ես թղթի վրա գրեցի «վերջ» բառը, թղթապանակը փակեցի և վերկացա:

Մի պահ մենք երկուսս էլ լուռ նայում էինք սեղանին, որտեղ դրված էր արդեն ավարտված սցենարով թղթապանակը, նայում էինք ինչպես երկու խոնջացած և ուժասպառ ալպինիստներ, որոնք ծանր շարժարանքների գնով հասնելով որևէ

լճակի կամ ժայռի, կանգնել ու զննում են: Այնուհետև ուժի-
սորն ասաց.

— Ավարտեցինք: Վերջապես, — կրկնեց նա նորից, —
վերջապես ավարտեցինք:

Ռեժիսորի ազգանունը Պազետտի էր: Դա մի երիտասարդ,
շիկահեր, կոշտ ու կոպիտ, շոր, մանրախնդիր և մի տեսակ
լպստած մարդ էր, որն ավելի շուտ երկրաչափության ուսուցչի
կամ հաշվետարի էր նման, քան արվեստագետի: Պազետտին
մոտավորապես իմ տարիքին էր, բայց, ինչպես սովորաբար
լինում է սցենարի վրա աշխատելիս, մեր միջև ստեղծված
հարաբերություններն այնպիսին էին, ինչպիսին լինում են
վերադասի և ստորադասի միջև. ուժիսորը միշտ ավելի մեծ
հեղինակություն ունի, քան մնացած մյուս աշխատակից-
ները:

Փոքր-ինչ լռելուց հետո Պազետտին իրեն հատուկ փոքու՞
ու սառը հումորով ասաց.

— Պետք է ասել, որ դու, Ռիկկարդո, նման ես այն ձիե-
րին, որոնք զգում են ախոռը... Եվ համոզված էի, որ ամենա-
քիչը դեռ մի շորս օր շարշարվելու ենք... Մինչդեռ ընդամենը
երկու ժամում հաշիվը մաքրեցինք... Հոնորար ստանալու հե-
ռանկարը քեզ լավ ոգևորեց:

Չնայած իր սահմանափակությանն ու գրեթե աներևակա
յելի բխամտությանը, Պազետտին, այնուամենայնիվ, ինձ
համար հակակրելի մարդ չէր: Իմ և նրա միջև ստեղծված հա-
րաբերությունների պայմաններում մենք ինչ-որ չափով լրաց-
նում էինք միմյանց. նա երևակայություն և ջղեր շունեցող
մարդ էր, բայց գիտակցում էր իր հնարավորություններն ու
նրանց սահմանները, իսկ դրանք միջակության մակարդակից
չէին անցնում, ես էլ, ընդհակառակը, մի մարդ եմ, որ գիտեմ
շուտ բռնկվել, և ամբողջովին ջղերից ու երևակայությունից
եմ կազմված:

— Ինչ խոսք, — պատասխանեցի ես, ընդօրինակելով նրա
ասելու ձևը և ամեն ինչ կատակի վերածելով: — Ճիշտ է ս
ասում, հոնորարի հեռանկարը:

Սիգարետը վառելով, Պազետտին շարունակեց.

— Բայց մի կարծիր, թե սրանով էլ ամեն ինչ վերջա-
ցավ... մենք սցենարի դեռ սևագրությունն ենք միայն վեր-

շացրել... դեռ պետք է բոլոր երկխոսությունները վերանայենք... Այնպես որ դափնիների վրա մի ննջիր:

Ես մի ավելորդ անգամ համոզվեցի, որ Պազետտին, ինչպես միշտ, օգտագործում է գրեթե նույն մաշված ու սովորական դարձած արտահայտությունները: Ապա աչքս թաքուն գցեցի ժամացույցիս և, տեսնելով որ արդեն համարյա մեկն է, ասացի.

— Հանգիստ եղիր... Եթե փոփոխություններ մտցնելու կարիք լինի, ես քո տրամադրության տակ եմ:

Պազետտին գլուխն օրորեց.

— Խաչը իմն է, զորությունը ես գիտեմ... Որպեսզի դու շատես, ես Բատտիստային կասեմ, որ հոնորարիդ վերջին մասը դեռ չվճարի:

Նա իր աշխատակիցներին անընդհատ խթանելու ձև ուներ, և դա աշխատանքները թեև կատակի նման, բայց միևնույն ժամանակ նաև խիստ տիրական ձևով, որը վերին աստիճանի զարմանալի երևույթ էր այդքան երիտասարդ մի մարդու համար: Նա այդ անում էր՝ անցնելով կշտամբանքից գովասանքների, շողոքորթությունից՝ խիստ նկատողությունների, խնդրանքներից՝ հրամանների: Այդ իմաստով նա կարող էր համարվել նույնիսկ շատ լավ ռեժիսոր, քանի որ ռեժիսորության երկու երրորդը ենթակաների աշխատանքը խելամիտ օգտագործելու կարողության մեջ է:

Ինչպես միշտ, թույլ տալով Պազետտինին խոսել ինչքան սիրտն ուզում է, ես ասացի.

— Ոչ, դու այնպես արա, որ ես ամբողջ հոնորարն ստանամ, իսկ ես քեզ խոսք եմ տալիս լինել քո տրամադրության տակ՝ հենց որ կարիք լինի որևէ ուղղում մտցնելու:

— Բայց քո ինչի՞ն է պետք այդքան փողը, — հարցրեց նա կոպիտ ծաղրանքով: — Երբեք այնպես չի լինում, որ դու փողի կարիք չունենաս... Չնայած ոչ սիրուհիներ ունես, ոչ երեխաներ և ոչ էլ դումար ես խաղում:

— Ես պետք է գնա՞մ բնակարանի դիմաց վճարեմ, — լրջացած պատասխանեցի ես ու աչքերս խոնարհեցի՝ բավական վրդովված նրա անբաղաճավարի հարցից:

— Դեռ շա՞տ ունես վճարելու:

— Համարյա ամբողջը:

— Գրագ կգամ, որ կինդ քեզ ուղղակի տանջում է դրա համար: Ինձ թվում է, թե նրա ձայնն եմ լսում. «Ռիկկարդո, շմոռանաս բնակարանի պարտքի մասին, աշխատիր վճարել»:

— Այո, կինս է,— ստեցի ես:— Բայց դու ինքդ լավ գիտես, թե կանայք ինչպիսին են... նրանց համար ամենակարևոր բանը տունն է:

— Ո՞ւմ ես այդ ասում:

Եվ Պազետտին սկսեց պատմել իր կնոջ մասին, որը շատ նմանում էր իրեն, և որին, որքան ես հասկացա, շգիտես ինչու, նա տարօրինակութուններով լեցուն մարդ էր համարում՝ վերին աստիճանի կամակոր և ընդունակ ամենաաներևակայելի արարքների, մի խոսքով, իսկական կին: Ես այնպիսի տեսք էի ընդունել, որ իբր լարված իրեն եմ լսում, իսկ իրականում մտածում էի բոլորովին ուրիշ բաների մասին:

— Այդ բոլորը լավ է, իհարկե,— անսպասելիորեն եզրափակեց Պազետտին,— բայց ձեզ՝ սցենարիստներիդ, ես լավ եմ ճանաչում. բոլորդ էլ մի սանրի կտավ եք... փողն առնելուց հետո նայիր, թե պիտի գտնես... Չէ, չէ, ոչ մի դեպքում, ես Բատտիստային կասեմ, որ հոնորարը դեռ չվճարի:

— Այդպիսի բան չանես, Պազետտի, խնդրում եմ:

— Դե լավ, դեռ կտեսնեմ... Բայց մեծ հույսեր չդնես վրաս:

Ես նորից թաքուն աչքս գցեցի ժամացույցիս: Պազետտին հնարավորութուն էի տվել պարծենալու իր իրավունքներով ու իշխանությամբ, և նա պարծեցավ, այժմ արդեն կարող էի հեռանալ:

— Էհ,— սկսեցի ես,— շատ գոհ եմ, որ սցենարը ավարտված է կամ, ավելի ճիշտ, ինչպես դու ես ասում, սևագրութունը վերջացած է... Կարծում եմ, որ հիմա արդեն կարող եմ գնալ:

— Ամենևին էլ ոչ,— բացականչեց նա բարեհոգի աշխուժությամբ,— մենք պետք է խմենք Ֆիլմի հաջողության կենացը... Սատանան տանի... Սցենարը վերջանալուց հետո ես քեզ այդպես բաց թողնողը չեմ...

— Եթե խոսքը խմելուն է վերաբերում,— ասացի հնազանդորեն,— ես պատրաստ եմ:

— Ուրեմն, գնանք... Կարծում եմ, որ կինս գոհ կլինի մեզ հետ խմելու համար:

Գրանսենյակից դուրս գալուց հետո ես նրան հետևեցի դառարկ, նեղ և ճերմակ մի միջանցքով, որտեղից խոհանոցի և բարուրաշորերի ուժեղ հոտ էր փչում: Պազետտին ինձ մտցրնելով մի հյուրասենյակ, ձայն տվեց.

— Լուիզա, ես ու Մուլտենին սցենարը ավարտեցինք... Հիմա ֆիլմի հաջողության կենացն ենք խմելու:

Սինյորա Պազետտին բազկաթոռից ելավ՝ մեզ ընդառաջ գալու համար: Դա փոքրամարմին, մեծ գլխով, սև մազերով երիզված՝ ձվաձև ու խիստ գունատ դեմքով մի կին էր: Նա խոշոր, բայց գունաթափ և անարտահայտիչ աչքեր ուներ, որոնք կեդանանում էին միայն այն ժամանակ, երբ ամուսինը ներկա էր լինում: Այդպիսի դեպքերում նա հավատարիմ շան նման երբեք հայացքը չէր հեռացնում ամուսնու երեսից: Իսկ երբ ամուսինը չէր լինում, նստում էր աչքերը փառքած և պատկերում իրեն իբրև խոհեմության մարմնացում: Չնայած նուրբ էր ու փոքր-մոքր, բայց և այնպես ամուսնական շորս տարիների ընթացքում աշխարհ էր բերել շորս երեխա:

— Այսօր մենք մի լավ խմելու ենք, — մի տեսակ քաշվող ուրախությամբ ասաց Պազետտին: — Հիմա ես կոկտեյլ կը պատրաստեմ:

— Բայց ոչ ինձ համար, Ջինո, — նախազգուշացրեց սինյորա Պազետտին, — դու լավ գիտես, որ ես չեմ խմում:

— Մենք ինքներս կխմենք:

Ես նստեցի ծաղկավոր կտորով ծածկած փայտե մի բազկաթոռի վրա, որը կարմիր աղյուսով շարած բուխարու առջևում էր գտնվում: Նման մի բազկաթոռի էլ նստեց սինյորա Պազետտին, միայն բուխարու մյուս կողմում: Նայելով շուրջրս, ես նկատեցի, որ այդ սենյակը նման է իր տիրոջը: Դա կեղծ գեղջկական ոճով մի սովորական սենյակ էր, մաքուր, տեղը տեղին հավաքած, բայց միևնույն ժամանակ նաև մի տեսակ ողորմելի, թվում էր, թե դա մի բժախնդիր հաշվապահի կամ հաշվետարի տուն է: Ես ստիպված անընդհատ շուրջս էի նայում, քանի որ սինյորա Պազետտին ոչ մի անհրաժեշտություն չէր զգում ինձ որևէ խոսք ուղղելու: Նա բոլորովին ան-

շարժ նստել էր իմ դիմացը, աչքերը խոնարհել, ձեռքերը դրել գոգր: Ես տեսա, թե ինչպես Պազետտին գնաց սենյակի խորքը, մոտեցավ անճոռնի մի պահարանի, որտեղ տեղադրված էին ռադիորնդունիչն ու բարը¹, լղարիկ ծնկներով շոքեց և վճռական, բայց անվարժ շարժումներով դուրս հանեց այնտեղից երկու շիշ, որոնցից մեկը վերմուտ էր, մյուսը՝ ջին, երեք բաժակ և շեյկեր: Նա դրանք բոլորը տեղավորեց մի մատուցարանում և բերեց դրեց բուխարու դիմաց գտնվող սեղանին: Ես նկատեցի, որ շշերից ոչ մեկին ձեռք չէր տրված, նրանք անարատ էին և զմուռսով կնքված. ինչպես երեվում էր, Պազետտին հաճախ չէր իրեն թույլ տալիս խմել այն կոկտեյլը, որից հիմա ուզում էր պատրաստել: Շողշողուն շեյկերը նույնպես բոլորովին նոր էր թվում: Պազետտին ասաց, որ ինքը գնում է սառույց բերելու և դուրս եկավ:

Երկար ժամանակ մենք լուռ էինք: Վերջապես սոսկ լուռ-թյունը խզելու համար ես ասացի.

— Սցենարը ավարտեցինք, վերջ ի վերջո:

Սինյորա Պազետտին, առանց աչքերը վեր բարձրացնելու, ասաց.

— Այո, Ջինոն ինձ արդեն ասել է:

— Ես համոզված եմ, որ դա լավ ֆիլմ է լինելու:

— Դրանում ես էլ եմ համոզված, այլապես Ջինոն հազիվ թե համաձայներ հանձն առնել:

— Դուք բովանդակությունը գիտե՞ք:

— Այո, Ջինոն ինձ պատմել է:

— Ձեզ դո՞ւր է գալիս:

— Եթե Ջինոյին դուր է գալիս, ուրեմն դուր է գալիս նաև ինձ:

— Դուք մի՞շտ եք ամեն բանում համաձայն լինում միմյանց հետ:

— Ես ու Ջինոն: Միշտ:

— Իսկ ձեր երկուսից ո՞վ է ղեկավարողի դերում:

— Բնական է, Ջինոն:

Ես նկատեցի, որ նա ամեն կերպ աշխատում է յուրաքանչյուր անգամ բերան բացելիս Ջինոյի անունը տալ: Ես

¹ Խմիչքների պահարան:

խոսում էի առանց որևէ լրջության, գրեթե կատակելով, մինչ-
դեռ նա ինձ միշտ պատասխանում էր ամենայն լրջությամբ:

Պազետտին վերադարձավ, ձեռքին բերելով սառույց լըց-
րած մի փոքրիկ դուլլ և ասաց.

— Ռիկկարդո, կինդ քեզ հեռախոսի մոտ է կանչում:

Ինչս էլ շգիտեմ ինչու, սիրտս մի տեսակ նվազեց, և հան-
կարծ նորից համակեց ինձ սովորական թախծի զգացումը:
Ես մեքենայաբար տեղիցս վեր կացա և ուզեցի գնալ դռան
կողմը, սակայն Պազետտին իսկույն վրա բերեց.

— Հեռախոսը խոհանոցում է... Բայց եթե ուզում ես, այս-
տեղից էլ կարող ես պատասխանել... Կարելի է միացնել նաև
այստեղի հեռախոսը:

Եվ իսկապես, հեռախոսը դրված էր բուխարու մոտ գտնը-
վող մի փոքրիկ սեղանի վրա: Ես վերցրի լսափողը, որտեղից
իսկույն ականջիս հասավ էմիլիայի ձայնը.

— Ներիր ինձ, բայց այսօր դու պետք է մի ուրիշ տեղ կե-
րակրվես... Ես գնում եմ մորս մոտ ճաշելու:

— Իսկ ինչո՞ւ շուտ շէիր ասում:

— Չէի ուզում աշխատանքդ խանգարել:

— Կավ, — ասացի ես, — ռեստորանում կճաշեմ:

— Կտեսնվենք երեկոյան, ցտեսություն:

Նա լսափողը ցած դրեց, և ես շրջվեցի Պազետտիի կող-
մը:

— Ռիկկարդո, դու տանը շե՞ս ճաշելու, — հարցրեց Պա-
զետտին:

— Չէ, ռեստորան եմ գնալու:

— Ուրեմն, մնա մեզ հետ ճաշելու... Իհարկե, ստիպված
կլինես գոհանալ նրանով... ինչ մենք ունենք: Բայց մեծ հա-
ճույք պատճառած կլինես:

Չգիտեմ ինչու, ռեստորանում մենակ ճաշելու միտքը իմ
մեջ արթնացրեց ափսոսանքի տխուր մի զգացում, ըստ երե-
վույթին ես կանխապես վայելում էի այն բերկրությունը, որը
պետք է ունենայի՝ սցենարի աշխատանքներն ավարտելու
մասին էմիլիային հայտնելիս: Գուցե և ես այդ շանեի, իմա-
նալով, ինչպես արդեն ասել եմ, որ էմիլիային այլևս չեն հե-
տաքրքրում իմ արածները, բայց առաջին պահին ես են-
թարկվեցի այն հին սովորույթին, որը բնորոշ էր մեր նախ-

կին հարաբերությունների համար: Պազեստիի հրավերքը ինձ ուրախացրեց: Ես այդ հրավերքն ընդունեցի անհամար շնորհակալություններով:

Այդ ընթացքում Պազեստին արդեն երկու շիշն էլ բացել էր և խառնուրդի շափերը որոշող դեղագործի նման շափանոթի մեջ ջին ու վերմուտ էր լցնում, որը ավարտելուց հետո վերցրեց և բոլորը միասին լցրեց շեյկերի վրա:

Սինյորա Պազեստին սովորականի նման աչքը ամուսնուց չէր կտրում: Երբ Պազեստին շեյկերը մի լավ թափահարելուց հետո սկսեց բաժակները կոկտեյլ լցնել, սինյորա Պազեստին ասաց.

— Ինձ համար մի մատից ավելի չլցնես, խնդրում եմ... Դու էլ, Ջինո, աշխատիր քիչ խմել... հանկարծ վատ շոգաս:

— Ամեն օր հո սցենար չե՞նք ավարտում:

Պազեստին մեր երկուսի բաժակները լցրեց մինչև եզրերը, իսկ երրորդը, կնոջ խնդրանքով, լցրեց ընդամենը մի ումպ: Մենք երեքով էլ բաժակները բարձրացրինք և շրջակացրինք:

— Թող այսպիսի հարյուրավոր սցենարների կենացը լինի,— ասաց Պազեստին և, կոկտեյլը հազիվհազ շրթունքներին մոտեցնելուց հետո, նորից բաժակը դրեց սեղանին:

Ես իմ բաժակը մի շնչով խմեցի: Սինյորա Պազեստին մի քանի փոքրիկ կում արեց ու, տեղից կանգնելով, ասաց.

— Դնամ տեսնեմ, խոհարարուհին ի՞նչ է անում... Ներեցեք ինձ:

Նա գնաց: Պազեստին նստեց նրա տեղը՝ ծաղկանախշ բազկաթոռին, և մենք սկսեցինք զրույց անել դեսից-դենից: Ավելի ճիշտ, խոսում էր միայն ինքը՝ Պազեստին և այն էլ հիմնականում սցենարի մասին, իսկ ես, հավանություններ տալով նրա ասածներին ու գլուխս տմբտմբացնելով, նստել ու կոկտեյլ էի խմում: Պազեստիի բաժակը մնացել էր այնպես, ինչպես լցված էր, նա նույնիսկ բաժակի կեսն էլ չէր խմել, իսկ իմը ես երեք անգամ արդեն դատարկել էի: Զգիտեմ ինչու, այժմ ինձ զգում էի վերին աստիճանի դրժբախտ և խմում էի, հուսալով, որ հարբածության հետևանքով այդ զգացումը կանցնի: Սակայն ոգելից խմիչքները ես լավ եմ տանում, իսկ Պազեստիի պատրաստած կոկտեյլը շատ

Թույլ էր և ջուր խառնած: Այնպես որ իմ խմած այդ երեք թե շորս բաժակը միայն տրամադրութունս է՛լ ավելի փշացրեց: Հանկարծ ես ինձ հարցրի. «Ինչո՞ւ եմ ինձ այսքան դժբախտ զգում»: Եվ իսկույն հիշեցի, որ իմ սիրտը նվաղեց այն րոպեին, երբ մի փոքր առաջ հեռախոսով ես լսեցի էմիլիայի այնքան սառը, այնքան լրջմիտ և այնքան անտարբեր ձայնը, որը բոլորովին տարբերվում էր սինյորա Պազետտիի ձայնից, երբ նա արտաբերում էր մոզական Զինո անունը: Բայց և այնպես ես չկարողացա կենտրոնանալ այդ մտքի վրա, որովհետև հենց այդ նույն վայրկյանին ներս մտավ սինյորա Պազետտին և հայտարարեց, որ մենք արդեն կարող ենք մտնել ճաշասրահ:

Պազետտիի ճաշասրահը նման էր նրա և՛ աշխատասենյակին, և՛ հյուրասրահին. նույն աչք ծակող փոքր-ինչ քմահաճ էժանագին փայտյա շներկված կահույքն էր, գունավոր հախճապակյա սպասքը. շշերն ու բաժակները կանաչ գույնի հաստ ապակուց էին, սփռոցն ու անձեռոցիկները ծղոտյա: Մենք նստել էինք այդ փոքրիկ սենյակում, որի մեծ մասը սեղանն էր զբաղեցնում. այնպես որ խոհարարուհին ափսեները ձեռքին մեր մոտով անցնելիս, ամեն անգամ ստիպված էր լինում մեկնումեկիս տեղաշարժ անել:

Անխոս ու լուռ մենք սկսեցինք ճաշել: Այնուհետև աղախինը փոխեց մեր ափսեները և ես՝ խոսակցութուն բացելու համար, Պազետտիին ինչ-որ հարց տվի նրա ապագա պլանների մասին: Նա ինձ պատասխանեց իր սովորական սառը ձայնով և ինչպես միշտ՝ ստույգ ու սահուն. մտավոր համետութունը և երևակայության լրիվ բացակայութունը զգացվում էին ոչ միայն բառերի ընտրության, այլև ձայնի ամենանուրբ երանգավորման մեջ: Ես լուռ էի, շիմանալով ինչ ասել, քանի որ Պազետտիի ծրագրերը ինձ չէին հետաքրքրում, իսկ եթե նույնիսկ հետաքրքրեին էլ, միևնույն է, նրա միալար և անհամ ձայնը բավական կլիներ, որպեսզի դրանք դառնային անհետաքրքիր ու ձանձրալի: Իմ հայացքը անվերջ ցատկում էր մի առարկայից մյուսին, շգտնելով ոչ մի հետաքրքիր բան, որի վրա արժենար կանգ առնել, և վերջապես կանգ առավ Պազետտիի կնոջ դեմքին, որը, կզակը ձեռքին հենած և սովորականի նման պլշած, անբխիթ իր ամուս-

նուն էր նայում: Ես նայեցի սինյորա Պազետտին, և ինձ ապ-
 շեցրեց նրա դեմքի արտահայտությունը. աչքերում շողշո-
 դում էր ինքնամոռաց մի սեր, որին խառնված էր անսահման
 հիացմունք, անհուն երախտագիտություն, մարմնական հրա-
 պուրանք և գրեթե մելամաղձոտ երկչոտություն: Այդ ինձ
 խիստ զարմացրեց և նույնիսկ առեղծվածային թվաց, քանի
 որ Պազետտին, որը այնքան անգույն, այնքան շոր, այնքան
 միջակ մի մարդ էր, բացարձակորեն զուրկ այն բոլոր հատ-
 կություններից, որոնք սովորաբար դուր են գալիս կանանց,
 շէր կարող երբեք այսպիսի լուրջ ուշադրության առարկա լի-
 նել: Բայց հետո մտածեցի, որ վերջին հաշվով ինչպիսի
 տղամարդ էլ ուզում է լինի, միշտ էլ գտնվում է մի կին, որը
 նրան գնահատում է և սիրում, հետևապես, սխալ է, երբ
 դատում ես ուրիշների զգացմունքների մասին, ելնելով քո շա-
 փանիշներից: Ես համակրանք զգացի դեպի սինյորա Պազետ-
 տին՝ տեսնելով ամուսնու հանդեպ ունեցած նրա այդ նվիր-
 վածությունը և ուրախացա իր՝ Պազետտի համար, որի հան-
 դեպ, շնայած նրա միջակությանը, ինչպես արդեն ասել եմ,
 ես մի տեսակ հեզնական բարյացակամություն էի զգում:
 Սակայն երբ իմ ծանր խոհերը արդեն ցրվել էին, և հայացքս
 թափառում էր բոլորովին այլ տեղերում, հանկարծ մի միտք
 կամ, ավելի ճիշտ, վայրկենական մի զգացում անցավ իմ
 գիտակցության միջով. «Այս կնոջ աչքերը լցված են դեպի
 ամուսինը տածած սիրով... Եվ Պազետտին գոհ է և՛ իրենից, և՛
 իր աշխատանքից, որովհետև կինը սիրում է իրեն... Մինչդեռ
 վաղուց է, ինչ էմիլիան ինձ չի սիրում, նա երբեք այլևս ինձ
 չի սիրի»:

Այդ միտքը ինձ այնպիսի մի խոր, գրեթե ֆիզիկական
 ցավ պատճառեց, որ ես նույնիսկ դեմքս ծոմոեցի: Սինյորա
 Պազետտին անհանգստացած հարցրեց, թե չլինի ատամիս
 տակ ճիլ է ընկել: Ես նրան հավաստիացրի, որ ոչ մի կոշտ
 միս չկա: Ապա ձևացնելով, որ իբր լսում եմ Պազետտին,
 որն իր ապագա ծրագրերի մասին էր պատմում, փորձեցի
 վերլուծել ինձ համակած ցավի պատճառը, որը մի կողմից
 այնքան սուր էր, բայց և միևնույն ժամանակ այնքան մութ
 և անվերծանելի: Ես հասկացա, որ վերջին ամսվա ընթաց-
 քում ամեն կերպ ճզնում էի ընտելանալ այն անտանելի

դրութեանը, որի մեջ գտնվում էի, բայց որը փաստորեն այդպէս էլ ինձ չհաջողվեց. այլևս այդպես չի կարող շարունակվել, ես չեմ կարող էմիլիայի հետ ապրել, եթե նա ինձ չի սիրում, և կատարել այն աշխատանքը, որն անտանելի է դարձել լոկ այն պատճառով, որ էմիլիան անսեր ու սառն է վերաբերում ինձ: Ես հանկարծ ինքս ինձ ասացի. «Այլևս այս ձևով ապրել չեմ կարող... ես պետք է մեկընդմիջտ բացատրեմ էմիլիայի հետ... իսկ եթե անհրաժեշտ լինի, բաժանվել նրանից և թողնել կինոյի աշխատանքը»:

Թեև ես այդ մասին մտածում էի հուսահատ վճռականութեամբ, բայց ոչ մի կերպ չէի հավատում կատարվածին. ես դեռ ամբողջովին համոզված չէի ոչ նրանում, որ էմիլիան այլևս ինձ չի սիրում, և ոչ էլ նրանում, որ էմիլիայից հեռանալու, կինոյի աշխատանքը թողնելու և միայնակ ապրելու լուծ կգտնեմ իմ մեջ: Այլ կերպ ասած, ես համակվել էի անվստահութեան ինձ համար բոլորովին նոր ու տանջող մի զգացումով, ինչը իմ գիտակցութեանը այժմ արդեն անվիճելի էր համարում:

Ինչո՞ւ էմիլիան այլևս ինձ չի սիրում: Ինչը նրան հասցրեց այդ անտարբերութեանը: Իմ սիրտը վշտից սեղմվում ու մըրմըրում էր, ես կանխատեսում էի, որ այդ ընդհանուր ենթադրութեաններից առաջինի ճշմարտացիութեան մեջ լրիվ համոզվելու համար, մի բան, որ ինքնըստինքյան անսահմանորեն տանջալից է, հարիք կզգացվի ավելի կոնկրետ ապացույցների, որոնք շատ ավելի տառապանքներ կպատճառեն: Մի խոսքով, ես համոզված էի, որ էմիլիան այլևս ինձ չի սիրում, բայց չգիտեի ոչ դրա պատճառը և ոչ էլ այն, թե դա ինչպես պատահեց: Վերջնականապես դրանում համոզվելու համար պետք էր բացատրվել նրա հետ, պետք էր ամեն ինչ վերլուծել, ուսումնասիրել, անհրաժեշտ էր հետազոտութեան երկաթյա բարալիկ և անողորմ ձողիկը մխրձել այն վերքի մեջ, որը եթե մինչև այսօր աշխատում էի շնկատել: Այդ մըտքից սարսափեցի, բայց, չնայած դրան, հասկանում էի, որ ամեն ինչը լրիվ հետազոտելուց հետո միայն ես կարող եմ իմ մեջ քաջութեան գտնել էմիլիայից բաժանվելու, այսինքն՝ անելու այն, ինչ հուսահատութեան ըրպեններին հուշում էր ինձ սիրտս:

Առանց գիտակցելու, թե ինչ եմ անում, շարունակում էի ուտել, խմել և լսել Պազետտիին: Փառք աստծո, վերջապես ճաշը ավարտվեց: Մենք նորից տեղափոխվեցինք հյուրասենյակ, և ես ստիպված եղա ենթարկվել բուրժուական հյուրասիրության բոլոր ձևականություններին, ինչպիսիք են սուրճը մեկ-երկու կտոր շաքարի հետ, լիկյորը՝ քաղցր կամ ոչ քաղցրը, որից ընդունված է հրաժարվել, ավելորդ ու անմիտ խոսակցություններ, որոնք արվում են ժամանակն անցկացնելու համար: Վերջապես երբ զգացի, որ արդեն կարելի է հրաժեշտ տալ, վեր կացա: Սակայն հենց այդ րոպեին տնային դաստիարակչուհին ներս բերեց Պազետտիի ավագ դստերը, որպեսզի ամենօրյա զբոսանքից առաջ ցույց տա նրան ծնողներին: Դա մի թուխ աղջիկ էր, երեսը գունատ, շատ խոշոր աչքերով, ոչնչով աչքի չընկնող, մի խոսքով այնպիսին, ինչպես իր ծնողներն էին: Հիշում եմ, երբ նայում էի, թե մայրն ինչպես է գրկում ու փաղաքշում նրան, հանկարծ մտածեցի. «Իսկ ես երբեք սրանց նման երջանիկ չեմ լինի... Ես և էմիլիան երբեք երեխա չենք ունենա»։ Եվ այդ միտքը իսկույննեթ ծնեց մի այլ միտք, որը ավելի էր դառը. «Որքա՞ն է այս ամենը ողորմելի, տափակ, յուրօրինակությունից զուրկ... Ես նմանում եմ այն բոլոր ամուսիններին, որոնց կանայք դադարել են իրենց սիրելուց... Ես նախանձով եմ լցվում պատահական զույգի հանդեպ, որոնք շոյում են իրենց երեխային... Նման զգացմունքներ կառաջանային իմ տեղը եղած ուզածդ տղամարդու մեջ»։

Այդ մահաբեր միտքը վերջնականորեն անտանելի դարձրեց ինձ համար հուզիչ այն տեսարանը, որին հարկադրված էի ներկա գտնվել: Ես բավական կոպիտ ասացի, որ գընում եմ:

Պազետտին, ծխամորճն ատամների արանքում պահած, ինձ ուղեկցեց մինչև դուռը: Ես զգացի, որ իմ գնալը զարմացրեց և վիրավորեց սինյորա Պազետտիին, որը, գուցեև սպասում էր, թե ես կհուզվեմ մայրական սիրո ուսանելի տեսարանից:

Գլուխ յոթերորդ

Երկրորդ սցենարի աշխատանքը սկսվում էր ժամը շոր-
սին, դեռ մեկուկես ժամ կար իմ տրամադրության տակ:
Գուրս գալով փողոց, գրեթե բնազդով ես շարժվեցի տան
կողմը: Գիտեի, որ էմիլիան տանը լինել չի կարող, քանի որ
զնացել էր մոր մոտ ճաշելու, բայց մոլորված ու տազնապա-
հար, ես չէի ուզում հավատալ, թե այդ կարող է ճիշտ լինել,
և հույս ունեի, որ նրան տանը կգտնեմ: Եթե իսկապես տանը
լինի, ասում էի ինքս ինձ, ես համարձակ կմոտենամ նրան,
անկեղծորեն կխոսեմ հետը և կպահանջեմ, որ նա որոշակի
բացատրություն տա: Ես գիտեի, որ այդ բացատրությունից են
կախված ոչ միայն իմ և էմիլիայի փոխհարաբերությունները,
այլև իմ աշխատանքը: Մակայն այժմ, այդքան ողորմելի խո-
րամանկություններից ու կեղծավորություններից հետո, ինձ
թվում էր, որ ինչպիսի դժբախտություն էլ ուզում է թող լի-
նի, միայն թե վերջ տրվի այս դրությանը, որն ինձ համար
զնալով դառնում էր ավելի պարզ և ավելի անտանելի: Հնա-
րավոր է, որ ես ստիպված լինեի բաժանվել էմիլիայից, հրա-
ժարվել Բատտիստայի երկրորդ սցենարի վրա աշխատելուց,
ավելի լավ, թող այդպես լինի: Ճշմարտությունը, ինչպիսին
էլ ուզում է այն լինի, այժմ ինձ թվում էր անսահմանորեն
ավելի ընդունելի, քան կեղծիքի և իմ իսկ հանդեպ տածած
կարեկցանքի այս անորոշ և ստորացուցիչ դրությունը:

Երբ հասա մեր փողոցը, նորից ինձ համակեց ծանոթ
անվճռականությունը. իհարկե, էմիլիան տանը չէր, և մեր
նոր բնակարանում, որը ինձ այժմ արդեն ոչ միայն օտար էր
թվում, այլև ուղղակի թշնամական, ես ինձ զգալու էի շատ
ավելի միայնակ ու դժբախտ, քան որևէ հասարակական
վայրում: Մի պահ որոշեցի թեքել ճանապարհս և զնալ
որևէ սրճարան այդ մեկուկես ժամը այնտեղ անցկացնելու:
Մակայն նույն վայրկյանին ճակատագրական կերպով հի-
շեցի Բատտիստային մի օր առաջ տված իմ խոստումը.
ես ասել էի, որ զանգահարի ինձ և պայմանավորվի, թե երբ
ենք հանդիպելու: Դա շատ կարևոր հանդիպում էր ինձ հա-
մար, քանի որ Բատտիստան պետք է վերջապես կոնկրետ

առաջարկութիւնն աներ նոր սցենարի համար և ինձ ներկայացնէր ռեժիսորին: Ահա այդ պատճառով էլ ես նրան խոսք էի տվել, որ, ինչպես միշտ, այդ ժամին տանը կլինեմ: Ճիշտ է, ես ինքս կարող էի սրճարանից զանգահարել նրան, բայց նախ համոզված չէի, որ նա տանը կլինի, քանի որ Բատտիստան հաճախ էր ռեստորանում ճաշում, և ապա, ինչպես ասացի, գտնվելով այդ մոլորյալ վիճակի մեջ, ինձ մի պատրվակ էր պետք, որպեսզի նորից տուն վերադառնամ: Եվ Բատտիստայի զանգահարելը հենց իմ որոնած պատրվակն էր:

Այդպիսով, անցա շքամուտքը, մտա վերելակի խցիկը, դուռը փակեցի և սեղմեցի վերջին հարկի կոճակը, որտեղ ես էի բնակվում: Բայց մինչև վերելակը ինձ բարձրացնում էր, սկսեցի մտածել, որ փաստորեն ես իրավունք չունեմ պայմանավորվել Բատտիստայի հետ՝ մեր հանդիպման համար, քանի որ դեռ վերջնականապես համոզված չեմ՝ կրնդունե՞մ նրա նոր առաջարկութիւնը, թե ոչ: Ամեն ինչ կախված էր էմիլիայի հետ ունեցած իմ բացատրութիւնից: Ես գիտեի, որ եթե էմիլիան որոշակի կերպով ինձ ասի, որ այլևս ինձ չի սիրում, ես ոչ միայն կհրաժարվեի այդ նոր սցենարի աշխատանքից, այլև առհասարակ ամբողջ իմ կյանքում երբեք ոչ մի սցենար ձեռքս չէի վերցնի: Բայց չէ որ էմիլիան տանը չէր: Եվ երբ Բատտիստան զանգահարի, ես անկեղծորեն չեմ կարող նրան ասել. համաձայն եմ քննարկել նրա հետ այդ առաջարկութիւնը, թե ոչ: Բռնել մի գործ սոսկ նրա համար, որպեսզի հետո հրաժարվել նրանից, ինձ թվում էր իմ կյանքում եղած բոլոր անհեթեթութիւններից ամենաանհեթեթը: Հենց այդ գիտակցութիւնը միայն բավական էր նողկանք զգալու, և ինձ համակեց գրեթե հիստերիկ կատաղության մի զգացում: Ես միանգամից կանգնեցրի վերելակը և սեղմեցի առաջին հարկի կոճակը: Ավելի լավ, ասացի ինքս ինձ, շատ ավելի լավ կլինի, եթե Բատտիստան զանգահարի, և ես տանը չլինեմ: Հենց այսօր երեկոյան կբացատրվեմ էմիլիայի հետ: Իսկ վաղը պատասխան կտամ պրոդյուսերին:

Վերելակի խցիկը շարունակում էր իջնել. նրա մաքուր ու շողշողուն ապակիների հետևում մեկը մյուսին հաջորդելով երևում ու շքանում էին հարկաբաժինները: Ես այդ դիտում էի

նույնպիսի տազնապալի հուսահատությամբ, ինչպիսի հուսաբեկությամբ ձուկն է նայում այն ավազանի արագորեն իջնող ջրին, որի մեջ ինքն է ապրում: Վերջապես վերելակը կանգ առավ, և ես ձեռքս մեկնեցի, որպեսզի դուռը բացեմ: Բայց հանկարծ իմ գլխում մի այլ միտք ծագեց և կասեցրեց մտադրությունս. ճիշտ է, էմիլիայի հետ ունենալիք բացատրությունից է կախված Բատտիստայի առաջարկած նոր աշխատանքի ճակատագիրը, իսկ եթե այս երեկո էմիլիան ապացուցի և հաստատի, որ ինձ սիրո՞ւմ է: Ես վտանգի շե՞մ ենթարկվի արդյոք այդ դեպքում: Չէ՞ որ իմ տանը շինելը կարող է վրդովել Բատտիստային, որի հետևանքով կկորցնեմ աշխատանքս: Պրոդյուսերներին ես լավ եմ ճանաչում իմ սեփական փորձով, նրանք կամակոր են, ինչպես բոլոր փոքրիկ բռնակալները: Այդպիսի մի աննշան բանը կարող է լրիվ բավական լինել, որպեսզի Բատտիստան փոխի իր մտադրությունը և հրավիրի մի ուրիշ սցենարիստի: Այդ մտքերը անասելի արագությամբ սլանում էին իմ հիվանդ երևակայության միջով, արթնացնելով իմ մեջ սեփական ողորմելիության դառը գիտակցություն: «Իսկապես որ դու ողորմելի մարդ ես, — ասում էի ինքս ինձ, — տանջահար մերթ դեպի փողն ունեցած ծարավից և մերթ սիրուց, դու ոչ մի կերպ չես կարողանում կատարել քո ընտրությունը և որևէ հաստատվճիռ կայացնել»:

Ով գիտե, թե ես դեռ ինչքան այդպես մոլոր ու հոգետատան կմնայի վերելակի խցիկում, եթե հանկարծ նրա դուռը շրացեր բազմաթիվ գնումներով բեռնավորված երիտասարդ մի կին: Իմ անշարժ ու ձգված կերպարանքը իր առջև տեսնելով, նա ճիշ արձակեց, իսկ այնուհետև, երբ արդեն սթափվեց, ինքն էլ մտավ խցիկը և հարցրեց, թե որ հարկն եմ բարձրանալու: Ես պատասխանեցի նրան: «Իսկ ինձ պետք է երկրորդը», — ասաց նա, սեղմելով կոճակը: Վերելակի խցիկը նորից սկսեց բարձրանալ:

Վերելակից դուրս գալով մեր հարկի հարթակը, ես զգացի հոգեկան մեծ թեթևություն: Սակայն նույն այդ վայրկյանին մտածեցի. «Ես այս ի՞նչ վիճակում եմ, որ ինձ այսպես եմ պահում: Ո՞ւր եմ հասել: Այս ի՞նչ օրն եմ ընկել»: Այդ մտքերով տարված, մոտեցա մեր բնակարանին, մեքենայո-

րեն բացեցի դուռը, մտա ներս, դուռը նորից փակեցի և գնացի հյուրասենյակ: Հանկարծ տեսա էմիլիային. նա՛ խալաթը հագին, պառկել էր բազմոցին և ինչ-որ ամսագիր էր կարդում: Նրա կողքին, փոքրիկ սեղանի վրա դրված էին ճաշի մնացորդներով ափսեները: էմիլիան տանից տեղ չէր գնացել, նա չէր ճաշել մոր մոտ, մի խոսքով, էմիլիան ինձ խաբել էր:

Ըստ երևույթին, ես սոսկալի տեսք ունեի, որովհետև, նայելով ինձ, էմիլիան իսկույն հարցրեց.

— Այդ ի՞նչ է... քեզ ի՞նչ է պատահել:

— Չէ՞ որ դու ասացիր մորդ մոտ ես ճաշելու, այդ ինչպե՞ս է, որ տանն ես,— հարցրի ես խեղդվելով:— Դու ինձ ասացիր, որ տանը չես լինելու:

— Իմ ասելուց հետո մայրս զանգահարեց և հայտնեց, որ չգնամ,— շատ հանգիստ պատասխանեց էմիլիան:

— Իսկ ինչո՞ւ այդ մասին ինձ տեղյակ չպահեցիր:

— Մայրս ինձ այդ ասաց ամենավերջին րոպեին... Ես մտածեցի, որ դու Պազետտիների մոտից գնացած կլինես:

Ես իսկույն որոշեցի, որ էմիլիան ստում է, չգիտեմ նույնիսկ ինչու: Բայց զգալով, որ ես չեմ կարող այդ ապացուցել ոչ միայն նրան, այլև ինքս ինձ, լռեցի և նույնպես նստեցի բազմոցին: Փոքր-ինչ հետո, նա առանց ինձ նայելու, թերթեց ամսագիրը և հարցրեց.

— Իսկ դու ի՞նչ էիր անում:

— Պազետտիները ինձ հրավիրեցին ճաշել իրենց մոտ:

Այդ րոպեին կողքի սենյակում հեռախոսը զանգեց: Ես մտածեցի. «Բատտիստան է... հիմա կասեմ նրան, որ որոշել եմ այլևս սցենարներով չզբաղվել... Թող գրողի ծոցը գնան... Պարզ է, որ այս կինը ինձ բոլորովին չի սիրում»:

— Գնա տես ով է... երևի քեզ են կանչում,— ասաց ինձ էմիլիան իր սովորական անտարբերությամբ:

Ես վեր կացա և գնացի:

Հեռախոսը կողքի սենյակում դրված էր փոքրիկ պահարանի վրա: Նախքան լսափողը վերցնելը, ես աչքս գցեցի մահճակալին և նրա գլխատեղը տեսա միայնակ դրված բարձր: Ես զգացի, որ վճիռս դառնում է անսասան. վերջ ամեն ինչին, նախ՝ կհրաժարվեմ սցենարից, իսկ այնուհետև՝ կհեռանամ

նաև էմիլիայից: Ես լսափողը վերցրի, բայց Բատտիստայի ձայնի փոխարեն իմ ականջին հասավ զոքանչիս ձայնը.

— Ռիկկարդո, էմիլիան տա՞նն է,— հարցրեց նա:

— Ոչ, տանը չէ... — առանց գիտակցելու պատասխանեցի ես, — նա ասաց, որ գալու է ձեզ մոտ ճաշելու... և դուրս է եկել... Ես կարծում էի, նա ձեզ մոտ է:

— Բայց չէ որ ես նրան զանգահարեցի և ասացի, որ այսօր չգա, քանի որ այսօր աղախնի ազատ օրն է, — զարմացած վրա բերեց զոքանչս: Այդ ընդմեջ ես աչքերս բարձրացրի հեռախոսից և բաց դռան միջով տեսա բազմոցին պառկած էմիլիային, որը ինձ էր նայում: Նրա սևեռուն հայացքը այնքան զարմանք չէր արտահայտում, որքան զզվանք ու սառը արհամարհանք: Ես հասկացա, որ մեր երկուսից ստախոսը ես եմ, և որ էմիլիան կռահում է, թե ինչու եմ ստում: Ես ինչ-որ բան մոթմոթացի հեռախոսափողի մեջ, երբ հրաժեշտ էի տալիս զոքանչիս, իսկ մի վայրկյան հետո, կարծես սթափվելով, հանկարծ բղավեցի.

— Չէ, սպասեք... էմիլիան հենց այս ընդմեջ ներս է մտնում... Ես հիմա նրան կկանչեմ հեռախոսի մոտ: — Այդ ասելով, ես միևնույն ժամանակ գլխով արի նրան, որպեսզի մոտենա:

Նա վեր կացավ բազմոցից, գլուխը կախ անցավ սենյակի միջով և, մոտենալով հեռախոսին, առանց ինձ նայելու կամ շնորհակալություն հայտնելու, վերցրեց լսափողը: Ես գնացի հյուրասենյակ: Զղային և անհամբեր մի շարժումով նա ինձ հասկացրեց, որ դուռը ծածկեմ: Ես կատարեցի նրա կարգադրությունը, և, շփոթահար նստելով բազմոցին, սպասեցի:

էմիլիան երկար խոսեց: Ես համբերությունս կորցրած տանջվում էի, թե երբ կվերջացնի, և ինձ նույնիսկ թվում էր, թե նա այդ անում է դիտավորյալ: Թեև գիտեի, որ նրա հեռախոսային զրույցները մոտ հետ միշտ էլ երկար են լինում: էմիլիան խիստ կապված էր մոտ հետ. նա մի այրի կին էր և բացի այդ աղջկանից ուրիշ ոչ ոք չուներ: Կարծում եմ, որ էմիլիան մորը հայտնում էր իր բոլոր գաղտնիքները:

Վերջապես դուռը բացվեց, և հայտնվեց էմիլիան: Ես լուռ և անշարժ մնացի իմ տեղում, նրա դեմքի արտասովոր մոայլությունից կռահելով, որ զայրույթով է լցված իմ դեմ:

Եվ իսկապես էլ, սեղանից ափսեները հավաքելով, նա իսկույն ասաց.

— Դու ինչ է, խելագարվե՞լ ես... ինչը քեզ ստիպեց նրան ասել, որ ես տանը չեմ:

Նրա տոնից վիրավորված, ես բերանս անգամ չբացեցի:

— Որպեսզի ստուգես ես ճիշտ եմ ասում, թե չէ՞,— շարունակեց էմիլիան:— Որպեսզի իմանաս իսկապե՞ս, արդյոք, մայրիկն ինձ նախազգուշացրել է, որ չի կարող ինձ հետ ճաշել:

— Հնարավոր է, որ այդ է պատճառը,— վերջապես, ստիպելով ինձ, պատասխանեցի ես:

— Ես քեզ խնդրում եմ, այլևս այդպիսի բաներ չանես... ես երբեք չեմ ստում... և առհասարակ քեզանից թաքցնելու ոչինչ չունեմ... իսկ այդ կարգի բաներ պարզապես տանել չեմ կարողանում:

Այդ բոլորը նա ասաց խիստ վճռական, ապա, վերցնելով սկուտեղը, որի վրա ափսեներն ու բաժակներն էին դրված, սենյակից դուրս գնաց:

Մենակ մնալով, ես մի պահ գրեթե զգացի հաղթանակի դառը գոհացման պես մի բան: Ուրեմն, ճիշտ է. էմիլիան այլևս ինձ չի սիրում: Ուրիշ ժամանակ նա, իհարկե, այդ ձևով ինձ հետ չէր խոսի: Նա այդ բոլորը ինձ կասեր մեղմ քնքշությամբ ու հմայիչ զարմանքով. «Մի՞թե դու կարող էիր մտածել, որ ես քեզ խաբում եմ», և հետո ուրախ կքրքջար՝ ինչպես մանկական ներելի շարաճճիության վրա, եթե շասենք ավելին, որ կարող էր նույնիսկ զգացնել տալ, թե այդ իր համար խիստ հաճելի է. «Հը, դու իսկապե՞ս ես խանդում... և չգիտե՞ս, որ ես բացի քեզանից ուրիշ ոչ ոքի չեմ սիրում»: Եվ այդ ամենը կվերջանար գրեթե մայրական մի համբույրով, նրա նրբին ու երկար մատները կշոյեին ճակատս, կարծես նրա համար, որպեսզի հեռացնեն ինձնից ամեն տեսակ հոգսերն ու տագնապալի մտքերը: Սակայն ճշմարիտ է նաև այն, որ ուրիշ ժամանակ երբեք իմ մտքով չէր էլ անցնի վերահսկել նրա գործողությունները և մանավանդ՝ կասկածել նրա ասածների իսկությանը: Ամեն ինչ փոխվել էր. և՛ նրա սերը, և՛ իմ: Եվ ինչպես երևում է, շարունակում էր փոխվել, գնալով դեպի ավելի ու ավելի վատը:

Սակայն մարդը միշտ հույսով է ապրում, նույնիսկ այն ժամանակ, երբ համոզված է, որ այլևս հուսալու ոչինչ չկա. ես ապացույց ունեի, որ էմիլիան այլևս ինձ չի սիրում և, այնուամենայնիվ, իմ մեջ ինչ-որ կասկածներ էին մնացել կամ, ավելի ճիշտ, մնացել էր այն հույսը, թե ես ճիշտ չեմ մեկնաբանել, մի դեպք, որը փաստորեն ոչ մի կարևորութուն չունի: Եվ հանկարծ ինքս ինձ ասացի, որ կարիք չկա դեպքերը արագացնելու, որ ես պետք է էմիլիային ստիպեմ խոստովանել, որ նա ինձ այլևս չի սիրում: Չէ՞ որ միայն ինքը՝ էմիլիան կարող էր ինձ տալ այն ապացույցները, որոնք մինչև հիմա ես չունեի... Այսպիսի մտքերը մեկը մյուսի հետևից անցնում էին իմ գլխով, մինչ, բազմոցին նստած, սևեռուն հայացքով նայում էի դատարկ տարածությանը: Բայց այդ ժամանակ դուռը բացվեց, և նորից հայտնվեց էմիլիան: Նա դարձյալ մոտեցավ բազմոցին, պռոկեց իմ հետևը և կրկին ձեռքն առավ ամսագիրը:

Ես, առանց նրան նայելու, ասացի.

— Շուտով Բատտիստան է ինձ զանգահարելու, նա ուզում է մի նոր սցենար առաջարկել... շատ լուրջ սցենար է:

— Է, գո՞հ ես, — ականջիս հասավ նրա հանդարտ ձայնը:

— Այդ սցենարով, — շարունակեցի ես, — կարող եմ շատ փող աշխատել... համենայն դեպս այնքան, որ հնարավոր կլինի բնակարանի հերթական երկու գումարն էլ միանգամից վճարել:

Այս անգամ էմիլիան ոչինչ չասաց: Ես շարունակեցի.

— Մյուս կողմից, այդ սցենարը խիստ կարևոր է նաև ինձ համար... Եթե ես այդ անեմ, ուրեմն, ինձ նորից պատվերներ կտան... խոսքը մեծ ֆիլմի մասին է:

Վերջապես էմիլիան մի տեսակ ցրված, ինչպես գիրք ընթերցող մարդը, որը խոսում է, աչքերը էջից առանց կրտրելու, հարցրեց.

— Ի՞նչ ֆիլմի:

— Չգիտեմ, — պատասխանեցի ես: Ապա, քիչ լռելուց հետո, փոքր-ինչ փքուն ավելացրի. — բայց ես որոշել եմ հրաժարվել:

— Իսկ ինչո՞ւ: — Նրա ձայնը առաջվա պես հանգիստ էր և անտարբեր:

Ես տեղիցս կանգնեցի, մի պտույտ արի բազմոցի շուրջը և նստեցի էմիլիայի դիմաց: Նա ամսագիրը ձեռքին կարդում էր, բայց տեսնելով, որ նստեցի իր դիմաց, վայր դրեց և նայեց ինձ:

— Որովհետև,— ասացի ես անկեղծությամբ,— ինչպես գիտես, ես ատում եմ այդ աշխատանքը և ձեռնամուխ եմ եղել միայն հանուն քո սիրո... Որպեսզի վճարենք այն բնակարանի գինը, որը դու այնքան թանկ ես գնահատում կամ գոնե ցույց ես տալիս, որ գնահատում ես... Բայց այժմ ես հաստատ գիտեմ, որ դու ինձ չես սիրում այլևս... Եվ այդ բոլորը արդեն գուր է:

էմիլիան, աչքերը լայն բացած, ինձ էր նայում, նա ոչինչ չասաց:

— Դու այլևս ինձ չես սիրում,— շարունակեցի ես,— և ես սրանից հետո այդպիսի աշխատանք չեմ անի... Իսկ ինչ բնակարանին է վերաբերում... ինչ արած, գրավ կդնեմ կամ կվաճառեմ... Մի խոսքով, ես այլևս այսպես շարունակել չեմ կարող, ինձ թվում է, արդեն ժամանակն է քեզ այդ մասին, հայտնելու... Այժմ դու այդ գիտես... Հիմա ուր որ է Բատտիստան կզանգահարի, և ես նրան գրողի ծոցը կուղարկեմ:

Ես արդեն բացվել էի: Այժմ վրա էր հասել բացատրվելու այն պահը, որից այնքան սարսափում էի և միևնույն ժամանակ այնպես բաղձում: Այդ միտքը ինձ մեծ թեթևություն բերեց, և ես համարձակ ու անկեղծ նայեցի էմիլիային՝ սպասելով նրա պատասխանին:

էմիլիան մինչև պատասխան տալը փոքր-ինչ լռեց: Հստերևույթին նրա համար անսպասելի էր իմ այդքան խիստ ու կոպիտ բացատրությունը: Վերջապես, աշխատելով ժամանակ շահել, նա խուսափողական հարցրեց.

— Բայց ի՞նչն է քեզ հիմք տալիս մտածելու, որ ես այլևս քեզ չեմ սիրում:

— Ամեն ինչը,— պատասխանեցի ես կրքոտ զայրույթով:

— Օրինակ:

— Նախ և առաջ ասա, այդ ճի՞շտ է, թե՞ ոչ:

էմիլիան համառորեն իրենն էր պնդում.

— Ոչ, դու ասա, թե ի՞նչն է քեզ հիմք տալիս այդպես մտածելու:

— Ամեն ինչը,— կրկնեցի ես:— Քո խոսելու ձևը, այն, թե ինչպես ես նայում ինձ, ինչպես ես վարվում ինձ հետ... Ամեն ինչը... Մի ամիս է, որ նույնիսկ առանձին ես քնում... Իսկ առաջ դու այդ շէիր ուզում:

Էմիլիան անվճռական նայում էր, շիմանալով ինչ ասել, բայց հանկարծ նկատեցի, թե ինչպես նրա աչքերում շող-շողաց վայրկենապես կայացած վճռի հուրը: Ահա նա հենց այս վայրկյանին վճռեց, մտածեցի ես, վճռեց, թե ինչպես պետք է վարվի ինձ հետ, և այդ որոշումից նա ոչ մի քայլ հետ չի կանգնի՝ ինչ էլ որ ասելու կամ անելու լինի:

Վերջապես մեղմորեն ասաց.

— Ես քեզ հավատացնում եմ, կարող եմ նույնիսկ երդվել, որ շեմ կարողանում լուսամուտը բաց քնել... Իմ քնելու տեղը պետք է մութ լինի և աճաղմուկ... Երդվում եմ քեզ:

— Բայց չէ՞ որ ես քեզ առաջարկեցի լուսամուտը փակել:

— Ախր...— Էմիլիան տատանվում էր,— ես ստիպված եմ քեզ ասել, որ դու հանգիստ քնել չգիտես:

— Այսի՞նքն:

— Խոռացնում ես:— Նա թեթևակի ժպտաց և անմիջապես ավելացրեց:— Գիշեր չկար, որ դու քո խոխոցով ինձ շարթնացնեիր... Ահա այդ էր պատճառը, որ ես որոշեցի առանձին քնել:

Նրա պատճառաբանությունից՝ թե խոռացնում եմ, ես մի տեսակ շփոթվեցի: Բայց մյուս կողմից էլ դժվարությամբ էի հավատում դրան. ես քնել էի նաև ուրիշ կանանց հետ, բայց նրանցից և ոչ մեկը ինձ այդպիսի բան չէր ասել:

— Եվ հետո, դու ինձ շեմ սիրում,— ասացի ես,— քանի որ ամուսնուն սիրող կինը...— այդտեղ ամոթից ես փոքր-ինչ տատանվեցի,— այնպես չի տրվում իր ամուսնուն, ինչպես դու ես տրվում վերջին ժամանակներս:

Էմիլիան իսկույննեթ առարկեց դրան, և նրա ձայնում ես ձանձրույթ ու գրգռվածություն զգացի:

— Ես ուղղակի շեմ հասկանում, թե դու ի՞նչ ես ուզում... ամեն անգամ, ինչքան էլ ցանկություն ես հայտնել, ես երբեք շեմ առարկել... Եղե՞լ է, որ երբևէ մերժեմ քեզ:

Պետք է ասել, որ երբ մեր երկուսի միջև խոսք էր բացվում նման հարցերի շուրջ, ամաչողն ու կարմրողը միշտ էլ

ես էի լինում: էմիլիան, որ սովորաբար զուսպ էր ու համեստ, ինտիմ մոտիկուսթյան պահերին թվում էր, թե ոչ ամոթի զգացում ունի, ոչ շփոթմունքի: Ավելին, ինձ միշտ զարմացնում ու հրապուրում էր այն, որ նա միշտ այդ գործողությունից առաջ կամ հետո այնքան պարզ ու բնական միամբարտությամբ խոսում էր զգայական սիրո մասին, խոսում էր անկեղծ, անսահմանորեն անկաշկանդ, առանց որևէ բան թաքցնելու և շինծու ամոթի զգացման:

— Մերժելը չես մերժել, չէ,— կիսաբերան ասացի ես,— բայց...

էմիլիան հարձակողական դիրք բռնած շարունակեց.

— Դեռ չի եղել այնպես, որ դու ցանկություն ունենաս, և ես շտրվեմ քեզ... Դու այն տղամարդկանցից չես, ովքեր բավարարվում են միայն այդ բանն անելով... Դու գիտես ինչպես մոտենալ...

— Կարծո՞ւմ ես,— հարցրի ես գրեթե շոյված:

— Այո,— ասաց նա շոր և առանց երեսիս նայելու:— Իսկ եթե քեզ շսիրեի, քո հենց այդ լավ մերձենալը անգամ ինձ այնպես կզզվացներ, որ երբեք մոտ չէի թողնի... Կինը միշտ էլ կարող է որևէ պատրվակ գտնել մերժելու համար, ճի՞շտ է:

— Շատ լավ,— ասացի ես,— դու տրվում ես ինձ, դու երբեք ինձ չես մերժել... Բայց այն ձևը, որով դու այդ բոլորն անում ես, այն չէ, ինչպես լինում է սիրող կնոջ մոտ:

— Իսկ ես ինչպե՞ս եմ անում:

Ես պետք է պատասխանեի. «Դու պոռնիկի նման ես վարվում, որը հնազանդորեն ենթարկվում է հաճախորդին և ցանկանում, որ այդ գործը վերջանա ինչքան կարելի է շուտ... ասա թե ինչպես ես անում»: Բայց հանուն նրան տաժած հարգանքի, ինչպես և հարգելով ինձ, գերադասեցի լռել: Եվ վերջին հաշվով, դա ի՞նչ օգուտ կարող էր տալ: Նա կպատասխաներ, որ ես իրավացի չեմ ու, թերևս, կոպիտ տեխնիկական ճշգրտությամբ սկսեք հիշեցնել ինձ իր որոշ զգայական բռնկումները, որոնց մեջ կար ամեն ինչ— փորձառություն, հագուերդ ստանալու ճիգեր, կրքոտություն, տարփալից մոլեգնումներ, ամեն ինչ, բացի քնքշությունից և իսկական, անարտահայտելի ինքնամոռաց սիրուց: Եվ ես չէի կարող որևէ բանով առարկել դրան: Էլ շասենք այն, որ այդպիսի

ծանր վիրավորանք հասցնելով նրան, ես արդեն ինքս անցած կլինեի անիրավացի կողմը:

Տեսնելով, որ իմ այնքան ցանկացած բացատրությունը ոչ մի արդյունք չունեցավ, ես հուսահատությամբ ասացի.

— Մի խոսքով, ինչպիսի պատճառներ էլ ուզում է լինի, ես մի բանում համոզված եմ, դա այն է, որ դու ինձ այլևս չես սիրում, ուրիշ ոչինչ:

Նախքան պատասխանելը կամ տեղից շարժվելը էմիլիան նորից նայեց ինձ: Թվում էր, իմ դեմքի արտահայտությունից նա ուզում է հասկանալ, թե ինչպես պետք է պահի իրեն: Ես դեռ վաղուց էի նկատել էմիլիայի մեջ բնորոշ մի գիծ. երբ նա չէր կարողանում վճռականություն հանդես բերել այնպիսի բաների նկատմամբ, որոնք իր սրտով չէին, նրա գեղեցիկ թուխ դեմքը, որն այնքան խաղաղ էր և այնքան համաշափ, իսկույնները մի տեսակ ծամածովում էր. այտերից մեկը, թրվում էր, թե սմբում է, բերանը դեմքի կենտրոնից փախչում էր մի կողմ, աչքերը շաղված ու խավար այնպես էին կորչում ակնաբներում, որ կարծես զմուսած լինեին: Ինչպես ասացի, ես գիտեի նրա այդ հատկությունը. այդ կատարվում էր ամեն անգամ, երբ նա ստիպված էր լինում իր համար տհաճ մի որոշում ընդունել կամ անել մի բան, որն իր կամքին հակառակ էր:

Հանկարծ էմիլիան ամբողջ թափով նետվեց իմ կողմը ու գրկեց վիզս:

— Ռիկկարդո, ինչո՞ւ ես ասում այդ բոլորը... — վրա բերեց նա այնպիսի ձայնով, որ ինձ ամբողջովին կեղծ թրվաց: — Ես քեզ սիրում եմ... և սիրում եմ նույնքան, ինչքան առաջ էի սիրում:

էմիլիայի ջերմ շունչը հպվեց իմ ականջին, նա սկսեց շոյել ճակատս, քունքերս, մազերս, ապա գրկելով գլուխս, քաշեց դեպի իրեն և ամուր-ամուր սեղմեց կրծքին:

Ես մտածեցի, որ նա ինձ այդպես գրկել է լոկ ինձանից իր դեմքը թաքցնելու համար, որ, ըստ երևույթին, խիստ լարված ու մտահոգ էր, ինչպես այն մարդու դեմքը, որն իրեն հարկադրում է անել այն, ինչը հակառակ է իր կամքին ու ցանկությանը: Միրո հուսահատ կարոտով դեմքս սեղմած հավասար շնչառությունից ելևէջող նրա կիսամերկ կրծքին, ես, այ-

նուամենայնիվ, մտածեցի. «Այս բոլորը ձևեր են... Բայց չի կարող պատահի, որ որևէ խոսքով կամ ինտոնացիայով էմիլիան շմատնի իրեն»:

Եվ փոքր-ինչ սպասելուց հետո ես լսեցի նրա զգուշավոր հարցը.

— Իսկ ի՞նչ կանեիր, եթե իրոք, քեզ շսիրեի:

«Ես իրավացի եմ,— մտածեցի դառը հաղթանակով,— էմիլիան իրեն մատնեց: Նա ուզում է իմանալ, որպեսզի ըստ այնմ կշռադատի և որոշի, թե ինչ կարող եմ անել ես, եթե ինքը հայտնի ճշմարտությունը: Ես, առանց շարժվելու և գլուխս բարձրացնելով նրա ջերմ կրծքից, ասացի.

— Ես այդ արդեն քեզ ասել եմ... Նախ կհրաժարվեմ Բատտիստայի առաջարկած նոր աշխատանքից:— Ես ուզեցի ավելացնել. «Ապա քեզանից կբաժանվեմ»: Բայց համարձակություն չունեցա այդ ասելու հենց այն պահին, երբ իմ այտը սեղմված էր նրա կրծքին, իսկ նրա ձեռքը շոյում էր իմ ճակատը: Ես փաստորեն դեռ հույսս չէի կտրել, որ էմիլիան ինձ սիրում է և վախենում էի, որ իսկապես էլ մենք կբաժանվենք, եթե այդ ասեմ նույնիսկ ենթադրաբար:

Այդպես ամուր ինձ պահած իր գրկում, էմիլիան ասաց.

— Բայց ես սիրում եմ քեզ... և այս բոլորը դատարկ ու անմիտ խոսակցություն է... Հիմա գիտե՞ս ինչ կանես... Հենց որ Բատտիստան զանգի, դու կպայմանավորվես նրա հետ և կգնաս առաջարկած աշխատանքը կվերցնես:

— Իսկ ես ինչո՞ւ պետք է այդպես անեմ, երբ դու ինձ այլևս չես սիրում,— զայրույթով բղավեցի ես:

Այս անգամ էմիլիան պատասխանեց լուրջ և հանդիմանող տոնով.

— Ես քեզ սիրում եմ, բայց մի ստիպիր, որ այդ անընդհատ կրկնեմ... Ես ուզում եմ մնալ մեր այս բնակարանում... Եթե քեզ դուր չի գալիս այդ աշխատանքը, ես բան չունեմ ասելու... իսկ եթե ուզում ես հրաժարվել սոսկ այն պատճառով, որ ես իբր քեզ այլևս չեմ սիրում և չեմ գնահատում այս բնակարանը, ապա իմացիր, որ սխալվում ես:

Մի պահ ես այնպես հուսադրվեցի, որ թվաց, թե էմիլիան չի ստում: Միևնույն ժամանակ, վերլուծելով այդ ամենը, եկա այն եզրակացության, որ գոնե այսօր նա ինձ

համոզեց դրանում: Բայց այժմ ես հուսահատորեն ուզում էի ավելի շատ քան իմանալ, ուզում էի լիովին համոզված լինել: Կարծես կռահելով իմ այդ ցանկությունը, էմիլիան հանկարծ ինձ բաց թողեց իր գրկից և շշնջաց.

— Համբուրի ինձ, ուզո՞ւմ ես:

Ես տեղիցս կանգնեցի և, նախքան համբուրելս, մի պահ նայեցի նրան: Ինձ ապշեցրեց նրա դեմքի անսահման խոնջությունը, մանավանդ որ այդ դեմքը այսօր թախծոտ էր և անվճռական ավելի, քան երբևէ: Կարծես խոսելով ինձ հետ, փաղաքշելով ու գրկելով ինձ, նա կատարում էր մարդկային ուժից վեր մի գործ, իսկ այժմ էլ պատրաստվում էր մի ուրիշը կատարելու՝ համբուրելու, որը թվում էր ավելի դատան է լինում և ավելի դժվարին:

Բռնելով էմիլիայի կզակից, ես շուրթերս մոտեցրի նրա շրթունքներին: Հենց այդ ընթացին հեռախոսը զնգաց:

— Բատտիստան է,— ասաց էմիլիան և թեթևացած դուրս պրծնելով իմ գրկից, վազեց կողքի սենյակը:

Բազմոցի վրայից, ուր մնացի նստած, բաց դռան միջով տեսա, թե ինչպես էմիլիան վերցրեց լսափողը և ասաց.

— Այո... այստեղ է, այս ընթացին ես նրան տամ ձեզ... Ինչպե՞ս եք:

Մի փոքրիկ հարցուփորձից հետո էմիլիան հեռվից գլխով արեց ինձ ու ասաց.

— Մենք հենց նոր ձեր և ձեր նոր ֆիլմի մասին էինք խոսում:

Այնուհետև, ևս մի քանի խորհրդավոր խոսքեր փոխանակելուց հետո, էմիլիան շատ հանգիստ ասաց.

— Այո, շուտով կտեսնվենք... իսկ այժմ Ռիկկարդոյին եմ տալիս:

Ես տեղիցս վեր կացա և, սենյակի երկարությամբ անցնելով մոտեցա հեռախոսին ու վերցրի լսափողը: Ինչպես և ենթադրում էի, Բատտիստան ինձ հաղորդեց, որ վաղը կեսօրին ինձ սպասելու է իր գրասենյակում: Ես ասացի, որ կգնամ: Ապա, ևս մի քանի բառ փոխանակելուց հետո լսափողը ցած դրի: Ես միայն այդ ժամանակ նկատեցի, որ էմիլիան իմ խոսելու ընթացքում ննջարանից դուրս է եկել: Մտածեցի, որ նա գնացել է, քանի որ հասավ իր նպատակին,

ստիպելով ինձ խոսք տալ՝ Բատտիստային հանդիպելու, այժմ արդեն ոչ իր ներկայութեան և ոչ էլ փաղաքշանքների անհրաժեշտութիւնը չկար:

Գլուխ ութերորդ

Հաջորդ օրը որոշված ժամին ես գնացի Բատտիստայի մոտ: Նրա գրասենյակը տեղավորված էր մի անտիկ դղյակի ամբողջ ներքևի հարկում, դղյակ, որը նախկինում պատկանել էր ինչ-որ պատրիկների ընտանիքի, իսկ այժմ, ինչպես և արվում է սովորաբար, այդ դղյակում տեղ էին գտել բազմաթիվ բաժնետիրական ընկերութիւններ:

Որմնանկարած կամարներով ու պատերով մեծ և ընդարձակ սրահները Բատտիստան սովորական փայտյա միջնորմներով կտրել-դարձրել էր բազմաթիվ փոքրիկ սենյակներ և կահավորել դրանք գրասենյակային գործնական կահույքով: Այնտեղ, ուր մի ժամանակ կախված էին եղել առասպելական ու բիբլիական սյուժեներով անտիկ նկարներ, այժմ կինոֆիլմերի վառ ու խայտաբղետ գույներով հսկայական ազդագրեր էին: Ամենուրեք փակցված էին կինոդերասանների և դերասանուհիների լուսանկարներ, պատկերազարդ ամսագրերից պոկած թերթեր, Ֆեստիվալներում ստացած ու շրջանակների մեջ դրած վկայականներ և նման շատ ուրիշ զարդեր, որոնց կարելի է տեսնել ուզածդ կինոֆիլմայի շենքերում: Ընդունարանում, գունաթափ որմնանկարների ֆոնի վրա թագավորող մետաղյա վիթխարի կանաչագույն սեղանի հետևյալում երեք թե շորս քարտուղարուհիներ ընդունում էին հաճախորդներին: Բատտիստան, որ վերջին տարիներին միջակ, բայց շատ դրամաբեր ֆիլմերի արտադրութեամբ մեծ անուն էր հանել, դեռ երիտասարդ պրոդյուսեր էր: «Տրիումֆ-ֆիլմ» կոչվող նրա ֆիլման այն ժամանակ համեմատաբար ամենահայտնիներից էր:

Այդ ժամին ընդունարանը արդեն լեփ-լեցուն էր, և ես իմ ձեռք բերած փորձի շնորհիվ առաջին իսկ հայացքից կարող էի անսխալ ասել, թե հաճախորդներից ով ինչ է: Նրանցից

մի քանիսը սցենարիստներ էին, որոնց ես ճանաչեցի աշխատանքով ծանրաբեռնված մարդու նրանց հոգնած դեմքերից, անութների տակ սեղմված թղթապանակներից և հագուստի ձևվից, որը միևնույն ժամանակ և՛ նրբաճաշակ էր, և՛ անիույթու թափթփված, մեկը կինոյի ինչ-որ նախկին ադմինիստրատոր էր, որ շատ նման էր կալվածքի կառավարիչի կամ անասնավաճառի, երկու թե երեք աղջիկներ կային, որոնք երազում էին դառնալ կինոդերասանուհիներ կամ ավելի ճիշտ՝ անխոս դերակատարներ, նրանք երիտասարդ էին, գեղեցիկ, նույնիսկ հույժ վայելչակազմ, բայց որոնց կինոն արդեն հասցրել էր փշացնել. այդ երեւում էր նրանց ոչ բնական շարժումներից. շափից դուրս ներկված երեսներից. խիստ քմահաճ զգեստներից, որոնց մեջ ոչ մի պարզութուն չկար։ Վերջապես կային նաև մի քանի անորոշ անձնավորություններ, որոնք միշտ անպակաս են լինում պրոդյուսերների ընդունարաններում. գործազուրկ դերասաններ, ձախորդ սցենարիստներ, ամեն տեսակ մուրացկաններ։ Բոլոր այդ մարդիկ կամ կեղտոտ խճանկար հատակի վրա այս ու այն կողմ էին գնում-գալիս, կամ, ընդկողմանած պատերի երկայնքով շարված ոսկեզօծ բազկաթոռներին, հորանջում էին, ծխում և կիսաձայն զրուցում։ Քարտուղարուհիները կամ խոսում էին անհամար հեռախոսներով, կամ անշարժ նստում վիթխարի սեղանի առաջ և մի բթացած, ձանձրույթից ապակիացած ու ոչինչ շտեմնող աչքերով նայում էին իրենց առջևի դատարկությանը։ Բոպեն մի անգամ սուր, ականջ ծակող ձայնով մի զանգ էր զնգզնգում։ Այդպիսի դեպքերում քարտուղարուհիները վայրկենապես սթափվում էին և ազդարարում որևէ մի ազգանուն։ Հանկարծ ներկաներից մեկը տեղից ցատկում էր և վազելով անհետանում ոսկեզօծ սպիտակ դռան հետևում։

Ես հայտնեցի ազգանունս և նույնպես գնացի ընդունարանի վերջը՝ անկյուններից մեկում նստելու։ Իմ տրամադրությունը այսօր նույնքան վատ էր, որքան և անցած օրը, բայց այսօր ինձ բոլորովին հանգիստ էի զգում։ Էմիլիայի հետ խոսելուց անմիջապես հետո ես որոշակիորեն համոզվեցի, որ նա ինձ խաբել է, ասելով, թե սիրում է ինձ։ Սակայն այս անգամ մի քիչ հուսահատությունից դրդված և մի քիչ էլ այն

բանից, որ անպայման ուզում էի ստիպել նրան լրիվ և անկեղծ բացատրություն տալ ինձ, մի բան, որ մինչև հիմա ես դեռ չէի ստացել, որոշել էի գոնե ժամանակավորապես վճռական գործողությունների շղիմել: Կարճ ասած, ես չէի հրաժարվել Բատտիստայի առաջարկած նոր աշխատանքից, թեև շատ լավ հասկանում էի, որ այժմ դա արդեն աննպատակ է, ինչպես և, վերջին հաշվով, աննպատակ է նաև ամբողջ իմ կյանքը: Այնուհետև, մտածում էի ես, հենց որ ինձ հաջողվի էմիլիայից դուրս կորզել ճշմարտությունը, իսկույն կհեռանամ աշխատանքից ու կթքեմ ամեն ինչի վրա: Որոշ իմաստով հարցի այս ամենեին էլ ոչ խաղաղ լուծումը ինձ նույնիսկ ավելի շատ էր դուր գալիս, քան այն վճիռը, որի մասին ես մտածում էի առաջ: Սկանդալն ու նյութական վնասը ավելի շատ կրնդգծեին իմ հուսահատ վիճակը և անվճռականության ու փոխադարձ զիջումներին վերջ տալու իմ հաստատ ցանկությունը:

Ինչպես արդեն ասացի, ես միանգամայն հանգիստ էի: Բայց դա մի հանգստություն էր, որը գալիս է հույությունից անտարբերությունից: Անհայտ դժբախտության կանխազգացումից մարդ իրեն մի տեսակ անհանգիստ է զգում, շնայած հոգու խորքում մինչև վերջին րոպեն էլ հույսը չի կրտրում, որ այդ նախազգացումը կարող է նաև խաբուսիկ լինել: Իսկ անխուսափելի դժբախտությունը, ընդհակառակը, մարդու մեջ որոշ ժամանակ առաջ է բերում ճնշող ու դժնդակ մի հանգստություն: Ես ինձ շատ հանգիստ էի զգում, բայց գիտեի, որ այդ հանգստությունը խիստ վաղանցիկ է. առաջին փուլը, այսինքն՝ կասկածների փուլը, արդեն վերջացած էր, գոնե ինձ այդպես էր թվում, շուտով սկսվելու էր ծանր տառապանքների, անջատման և զղջումների փուլը: Ես այդ հաստատ գիտեի: Սակայն գիտեի նաև, որ այդ երկու փուլերի միջև ընկել է մեռյալ մի հանդարտություն, որը շատ նման է նոր և ավելի կատաղի փոթորկին նախորդող խաբուսիկ անդորրի:

Ուրեմն, մինչ սպասում էի Բատտիստայի կանչին, իմ գլխում այն միտքը ծագեց, որ մինչև հիմա ես միայն աշխատել եմ իմանալ՝ էմիլիան ինձ սիրում է, թե ոչ: Իսկ այժմ, ինչպես ինձ թվում էր, արդեն համոզվեցի, որ նա ինձ չի

սիրում: Ուրեմն, որոշեցի ես, գրեթե զարմացած իմ այդ հայտնագործությունից, անհրաժեշտ է, որ միտքս շրջեմ մի նոր հարցի վրա, այսինքն՝ պարզեմ, թե էմիլիան ինչո՞ւ է դադարել ինձ սիրելուց: Որովհետև, եթե ես պարզեմ այդ պատճառը, ապա ինձ համար շատ ավելի հեշտ կլինի ստիպել նրան դրա բացատրությունը տալու:

Ես պետք է ասեմ, որ այդպիսի հարցը առաջին վայրկյանին ինձ անմտություն թվաց: Դա պարզապես անհնարին էր, անհեթեթ. էմիլիան երբեք չէր կարող ինձ այլևս շահրելու որևէ պատճառ ունենալ: Թե որտեղից էր գալիս իմ այդ համոզմունքը, ես չէի կարող ասել, ինչպես չէի կարող ասել նաև այն, թե այնուամենայնիվ ինչո՞ւ նա ինձ այլևս չի սիրում, հակառակ այն բանին, որ էմիլիան, ինչպես այդ թվում էր ինձ, ոչ մի պատճառ չուներ, որպեսզի դադարեր ինձ սիրելուց: Իմ զգացմունքների և բանականության միջև եղած հակասությունը մի պահ ինձ մոլորության մեջ զցեց: Վերջ ի վերջո, ինչպես երկրաչափական որոշ թեորեմներ լուծելիս են անում, ես ինձ ասացի՝ «ենթադրենք մի րոպե, որ պատճառ կա, որը և չի կարող չլինել, և տեսնենք, թե ինչն է այդ պատճառը»:

Ես նկատել եմ, որ մարդու մեջ ինչքան ավելի շատ է լինում կասկածը, այնքան ավելի հաճույքով է նա ձեռքը դրում մտքի կեղծ տրամաբանական փաստարկին, հույս ունենալով բանականության օգնությամբ պարզել այն, ինչը պղտորում ու մթազնում է զգացմունքը: Այն պահին, երբ բնազդը ինձ այնքան հակասական պատասխաններ էր տալիս, ես սիրում էի դետեկտիվ վեպերի խուզարկուների նման դիմել տրամաբանական վերլուծությանը: Որևէ մեկին սպանել են: Անհրաժեշտ է գտնել այն պատճառը, որը հանգեցրել է այդ սպանությանը: Իմանալով պատճառը, հեշտությամբ կարելի է գտնել նաև ոճրագործին... Ուրեմն, մտածում էի ես, երկու տեսակ պատճառներ կարող են լինել. առաջինները կարող են կապված լինել էմիլիայի հետ, երկրորդները՝ ինձ հետ: Առաջին պատճառները, ինչպես ես իսկույնևեթ որոշեցի, կարելի էր միավորել միայն մի պատճառի մեջ. էմիլիան այլևս ինձ չի սիրում, որովհետև սիրում է ուրիշին:

Վայրկենական մտորումից հետո ինձ թվաց, որ այդ են-

Թաղրությունից առանց այլևայլության կարելի է հրաժարվել: Վերջին ժամանակներս էմիլիայի վերաբերմունքի մեջ ոչ միայն չկային այնպիսի երևույթներ, որ ինձ մտածել տային, թե նրա կյանքի մեջ մտել է մի ուրիշ տղամարդ, այլև, ընդհակառակը, հենց այդ վերջին ժամանակների ընթացքում էր, որ նա դարձել էր ավելի ինքնամփոփ ու ինձ կապված: Ես գիտեի, որ էմիլիան ամբողջ օրը նստած է լինում տանը, ժամանակն անցկացնելով ընթերցանությամբ, մոր հետ հեռախոսային զրույցներ վարելով կամ էլ տան մեջ գործ անելով: Իսկ բոլոր տեսակ զվարճանքները՝ կինո, զբոսանք, ընթրիք ուստորանում, համարյա թե բացարձակորեն կախված էին ինձանից: Իհարկե, մեր ամուսնությունից անմիջապես հետո նրա կյանքը ավելի հետաքրքիր էր և ինչ-որ շափով ավելի աշխարհիկ. այդ այն շրջանն էր, երբ նա դեռ կապ էր պահպանում իր աղջիկ ժամանակվա ընկերուհիների հետ: Բայց շատ շուտով նրանք բոլորն էլ անհետացան, և էմիլիայի կյանքը այնքան սկսեց կապվել իմի հետ ու դառնալ իմից կախյալ, որ ես երբեմն նույնիսկ ամաչում էի: Այդ կախվածությունը ամենևին չթուլացավ նույնիսկ այն ժամանակ, երբ թուլացել էր արդեն իմ հանդեպ ունեցած նրա սերը: էմիլիան ինձ մի ուրիշով փոխարինելու, առավել ևս ինձ իր կյանքից դուրս քշելու ոչ մի փորձ չէր անում: Թեև արդեն չէր սիրում ինձ, բայց դարձյալ առաջվա նման սպասում էր, թե երբ կվերադառնամ աշխատանքից, և նրա այնքան հազվադեպ զվարճանքները կապված էին լինում միայն ու միայն ինձ հետ: Ավելին, նրա այդ անսեր կախվածության մեջ ինչ-որ վեհ և տխուր մի բան կար, նա նմանում էր այն կնոջը, որի կոչումը հավատարմության մեջ է, և այդ հավատարմությունը նա պահպանում է նույնիսկ այն ժամանակ, երբ դրա համար այլևս ոչ մի հիմք չկա: Մի խոսքով, թեև նա այլևս ինձ չէր սիրում, բայց կասկածից վեր էր նաև այն, որ նրա կյանքում, բացի ինձանից, կա մի ուրիշը:

Վերջապես կար մի այլ դիտավորություն ևս, որն ինձ ստիպում էր բացասել էմիլիայի մի ուրիշին սիրելու հանդամանքը: Ես էմիլիային ճանաչում էի կամ համարում, որ ճանաչում եմ շատ լավ: Ես գիտեի, որ նա ընդունակ չէ ստելու, և դրա պատճառը ամենից առաջ նրա կոպիտ և ան-

տանելի անկեղծութունն էր: Յուրաքանչյուր կեղծիք նախ-
քան նողկալի լինելը նրա համար ամենից առաջ ձանձրալի էր
և հոգնեցուցիչ: Եվ վերջապես երևակայության գրեթե լրիվ
բացակայությունը նրան թույլ չէր տալիս վստահորեն խո-
սելու այնպիսի երևույթների մասին, որոնք իրականում տեղի
չէին ունեցել և կոնկրետ կերպով գոյություն չունեին: Հաշվի
առնելով նրա այդ բնավորությունը, ես համոզված էի, որ
եթե նա սիրահարված լիներ մի ուրիշին, ավելի լավ ոչինչ
չէր գտնի, քան իսկույնեթ այդ մասին ինձ տեղյակ պա-
հելն է, և այն էլ այնպիսի անգիտակից ու դաժան կոպտու-
թյամբ, ինչպիսին հատուկ է քաղքենիական միջավայրին,
որտեղից և նա դուրս էր եկել: Էմիլիան կարող էր լինել
լուակյաց և ինքնամոլո, ինչպիսին էր այժմ, քանի որ իմ
հանդեպ ունեցած նրա զգացմունքները փոխվել էին, բայց
նրա համար վերին աստիճանի դժվար կլիներ, եթե ոչ ան-
հնարին, երկդիմի կյանք վարել՝ ինչ-որ ամուսնական ան-
հավատարմություն թաքցնելու համար, այսինքն՝ դերձակու-
հիների և դերձակների հետ հանդիպումներ հնարել, ասել,
թե գնացել էր հարազատների կամ ընկերուհիների մոտ, ուշ
տուն գալիս պատճառաբանել թատրոնները կամ էլ քաղա-
քային տրանսպորտը, ինչպես որ սովորաբար անում են կա-
նայք: Ոչ, իմ հանդեպ ունեցած նրա սառնությունը ամենևին
էլ ջերմ ու կրքոտ սեր չէր նշանակում մի ուրիշի նկատմամբ:
Եվ եթե պատճառ կար, իսկ այդ չլինել չէր կարող, ապա այդ
պետք էր որոնել ոչ թե նրա, այլ իմ կյանքում:

Ես այնքան էի տարվել այդ մտքերով, որ չէի նկատել,
թե ինչպես է քարտուղարուհիներից մեկը մոտեցել ինձ: Նա
ժպտալով կանգնել էր իմ դիմաց և կրկնում էր.

— Սինյոր Մոլտենի... դոկտոր Բատտիստան սպասում է
ձեզ:

Վերջապես ես սթափվեցի և, ժամանակավորապես ընդ-
հատելով մտքերս, արագ ներս մտա պրոդյուսների առանձ-
նասենյակը:

Բատտիստան նստած էր ընդարձակ մի դահլիճի խորքում
դրված կանաչագույն մետաղյա գրասեղանի մոտ, նման քար-
տուղարուհիների այն վիթխարի սեղանին, որը համարյա ամ-
բողջովին բռնել էր ընդունարանը:

Թեև ես արդեն բավական խոսել եմ Բատտիստայի մասին, բայց և այնպես մինչև հիմա դեռ չեմ նկարագրել նրան, և կարծում եմ, որ այդ անելը անօգուտ չէր լինի:

Այսպես, ուրեմն, Բատտիստան այն մարդկանցից էր, որոնց աշխատակիցներն ու ենթակաները հետևից հաճելի մականուններ են պարգևում. Անասուն, Միմոս, Հայվան, Գորիլլա: Չեմ կարող շասել, որ այդ մականունները խիստ համապատասխանում էին նրա արտաքին տեսքին, բայց, չնայած դրան, երբեք իմ մտքով չի անցել այդ անուններով կոչել նրան. ես այդ բացատրում եմ մի կողմից նրանով, որ առհասարակ նողկում եմ ամեն տեսակ մականուններից և ոչ ոքի, ով էլ ուզում է լինի, մականունով չեմ կանչում, իսկ մյուս կողմից էլ նրանով, որ դրանցից և ոչ մեկը, ինչպես ես կարծում եմ, չէր առնչվում Բատտիստայի այնքան ընդգծված բնավորության հետ, մի մարդ, որի միտքը արտակարգ խորամանկ էր, եթե չենք ուզում սուր անվանել այն, և միշտ արթուն, թեև թաքնված արտաքին կոպտության դիմակի տակ: Իհարկե, Բատտիստան շատ մեծ անասուն էր՝ օժտված կենսական վիթխարի մի ուժով. բայց այդ ուժը դրսևորվում էր ոչ միայն նրա անսահման ախորժակի մեջ, այլև գործարարական հատկությունների, որոնք հաճախ անսահման նուրբ էին և ծառայում էին հենց այդ ախորժակին հագուրդ տալու համար:

Բատտիստան միջահասակ մարդ էր, բայց լայնաթիկունք, կոնքերը նեղ և կարճ ոտքերով: Հենց այդ արտաքինն էլ նրան հսկայական կապկի տեսք էր տալիս, որին նա պարտական էր իմ ակնարկած մականունները: Նրա դեմքին նույնպես կապկային ինչ-որ բան կար. դա հետ սանրած մազերի հետևանքով ճակատի երկու կողմերում առաջացած ճաղատությունն էր, թավ, շարժուն հոնքերը, մանր աչքերը, կարճ, լայն քիթը, մեծ, բայց գրեթե անշուրթ ու դանակի նման բարալիկ բերանը, և ծնոտը, որը փոքր-ինչ առաջ էր ցցված: Բատտիստան փոքր շուներ, նրա ունեցածը միայն ստամոքս էր, որի հետևանքով էլ կուրծքը թվում էր խիստ ցցված: Նա մկանուտ ձեռքեր ուներ, որոնք դաստակներից սկսած ամբողջովին ծածկված էին սև մազերով: Մի անգամ ամռանը, երբ մենք միասին ծովափում էինք, ես նկատեցի,

որ նույնպիսի մազերով ծածկված են նաև նրա մեջքն ու կուրծքը: Այդքան կոպիտ արտաքին ունեցող այդ մարդը խոսում էր մեղմ, շողոքորթ, համոզիչ ձայնով և օտարերկրացու թեթև առողջանությամբ, քանի որ ծնվել էր Արզենտինայում: Այդ անսպասելի և ապշեցուցիչ ձայնի մեջ ևս նրա այն խորամանկության ու ճարակության դրսևորումն էի տեսնում, որի մասին քիչ առաջ արդեն ասացի:

Բատտիստան իր առանձնասենյակում մենակ շէր: Նրա գրասեղանի մոտ նստած էր նաև մի ուրիշը, որին նա ինձ ներկայացրեց Ռայնգոլդ ազգանունով: Ես շատ լավ գիտեի Ռայնգոլդի ով լինելը, թեև առաջին անգամ էի հանդիպում նրան: Ռայնգոլդը գերմանացի կինոռեժիսոր էր, որն իր հայրենիքում մինչև Ֆաշիստների տիրապետությունը մեծ հաջողություններ ունեցող մի քանի «աղմկող» Ֆիլմեր էր ստեղծել: Իհարկե, Ռայնգոլդը Պաբստի կամ Կանգի մասշտաբները չուներ, բայց և այնպես մեծ արժանիքների տեր խոշոր ռեժիսոր էր, որը երբեք զուտ առևտրական նպատակներ հետապնդող Ֆիլմեր չէր դնում: Ռայնգոլդն ուներ իր սեփական, գուցե վիճելի, բայց և միանգամայն լուրջ և որոշակի էսթետիկական հայացքներն ու սկզբունքները: Հիտլերի իշխանության գլուխն անցնելուց հետո Ռայնգոլդի մասին ոչ ոք ոչինչ չէր լսել: Ոմանք ասում էին, որ նա իբր աշխատել է Հոլլիվուդում, բայց, չնայած դրան, վերջին տարիների ընթացքում Իտալիայում չէր ցուցադրվել գոնե մի Ֆիլմ, որի տակ գրված լիներ նրա անունը: Եվ ահա նա հանկարծ հայտնվել էր Բատտիստայի գրասենյակում:

Մինչ Բատտիստան մեզ ինչ-որ բան էր պատմում, ես հետաքրքրասիրությամբ զննում էի Ռայնգոլդին: Դուք երբևէ որևէ հին փորագրության վրա տեսել եք Գյոթեի դեմքը: Ահա հենց այդպիսին էր նաև Ռայնգոլդինը, նույնքան ազնվատես, համաչափ և օլիմպիական: Ինչպես և Գյոթեինը, նրա գլուխը նույնպես զարդարում էր արծաթին տվող մազերի մաքուր ու շողշողուն լուսապսակը: Մի խոսքով, նրա գլուխը նման էր հանճարեղ մարդու գլխի: Սակայն ավելի ուշադիր զննելուց հետո ես նկատեցի, որ Ռայնգոլդի այդ վեհությունն ու ազնվատեսությունը որոշ չափով զուրկ են բնականությունից. նրա դիմագծերը, որոնք խոշոր էին և միևնույն ժամա-

նակ ծակոտկենն ու մի տեսակ թեթև, գրեթե նման էին ստվարաթղթե դիմակի, որը այնպիսի տպավորութիւն էր թողնում, կարծես տակը դատարկ լիներ, ինչպես այն հրեշավոր մեծ դեկորատիվ գլուխներինը, որոնք դիմակահանդեսներին իրենց վրա են դնում թզուկները: Ռայնգոլդը թեթևակի խոնարհելով գլուխը, տեղից վեր կացավ և գերմանական խիստ բծախնդրութեամբ կտտացնելով կրունկները, սեղմեց իմ ձեռքը: Ես նկատեցի, որ նա կարճահասակ մարդ է, թեև շատ թիկնեղ, որ թվում էր, թե ուզում է ընդգծել նրա արտաքին վեհութիւնը: Ես նկատեցի նաև այն, որ ձեռք տալիս Ռայնգոլդը շատ սիրալիր ժպտաց իր կիսալուսնյա ժպիտով, ցույց տալով երկու շարք խիստ համաչափ և շափազանց սպիտակ ատամներ, որոնք, չգիտեմ ինչու, ինձ արհեստական թվացին: Սակայն կրկին իր տեղը նստելուց անմիջապես հետո նրա երեսից իսկույններէ այդ ժպիտը անհետ շքացավ, ինչպես լուսինն է շքանում ամպի հետևը ծածկվելիս: Այժմ նրա դեմքը մի տեսակ մռայլ և տհաճ արտահայտութիւն ստացավ, սկսեց թվալ հավակնոտ և խստապահանջ:

Բատտիստան, ըստ սովորութեան, խոսքը հեռվից սկսեց: Նա, ցույց տալով Ռայնգոլդին, ասաց.

— Ես ու Ռայնգոլդը Կապրիի մասին էինք խոսում... իսկ դուք, Մոլտենի, Կապրիին ծանոթ եք:

— Շատ քիչ, — պատասխանեցի ես:

— Ես Կապրիում մի ամառանոց ունեմ, — շարունակեց Բատտիստան: — Հենց նոր Ռայնգոլդին պատմում էի, թե ինչ հիանալի տեղ է Կապրին... Դա մի վայր է, որտեղ նույնիսկ ինձ նման գործարար մարդն անգամ մի քիչ բանաստեղծ է դառնում:

Դա Բատտիստայի ամենագործածական ձևերից մեկն էր, նա սիրում էր ի ցույց դնել գեղեցիկով և վեհով հիանալու իր հատկութիւնները, մի խոսքով, նա սիրում էր ցույց տալ, որ ինքը հիանում է այն ամենով, ինչը իդեալականի ոլորտից է: Բայց ինձ ամենից շատ ապշեցնում էր այն, որ այդ հիացմունքը լինում էր թեև անկեղծ, բայց ոչ անշահախնդիր:

Փոքր-ինչ լռելուց հետո գրեթե սեփական իսկ ասածից հուզված, Բատտիստան նորից շարունակեց:

— Փարթամ ու շոայլ բնութիւն, հիասքանչ երկինք, հա-

վիտենապես կապույտ ծով... և ծաղիկներ, ծաղիկներ, որ կողմը նայես: Ինձ թվում է, Մուլտենի, որ եթե ես ձեզ նման գրող լինեի, անպայման կուզեի Կապրիում ապրել, որպեսզի ներշնչվեի... տարօրինակ է, որ նկարիչները, փոխանակ Կապրիի պեյզաժները նկարելու, մեզ այնպիսի զգվելի բաներ են մատուցում, որ երբեմն գլուխ չես հանում, թե ինչ են ուզում ասել... Կապրիում նկարները ուղղակի, այսպես ասած, պատրաստ են... Բավական է, որ մարդ նստի բնապատկերի առաջ ու սկսի արտանկարել...

Ես ոչինչ չասացի: Բայց աչքի պոչով նայեցի Ռայնգոլդին և տեսա, որ նա հավանութուն տվող հայացքով գլխով է անում: Նրա երեսի ժպիտը նորից էր հիշեցնում անամպ երկրներում գտնվող լուսնի մանգաղը: Բատտիստան շարունակեց.

— Ես միշտ մտածել եմ, գոնե մի ամիս առանց որևէ աշխատանքի և գործերի մասին հոգալու ապրել այնտեղ, բայց դա ոչ մի կերպ ինձ չի հաջողվում... Մենք այստեղ՝ քաղաքում, բնությանը հակառակ կյանք ենք վարում... մարդը ստեղծված չէ նրա համար, որպեսզի ապրի գրասենյակում, այս թղթապանակների մեջ... և իսկապես էլ, Կապրիի ժողովուրդը շատ ավելի երջանիկ տեսք ունի, քան մենք... Պետք է տեսնեք, թե նրանք ինչպես են երեկոները դուրս գալիս զբոսնելու... պատանիներ, աղջիկներ, բոլորը ժպտուն, հանգիստ, գեղեցիկ, ուրախ... Եվ դա շնորհիվ այն բանի, որ նրանց կյանքում մեծ ու կարևոր գործեր չեն լինում, իսկ նրանց ձգտումներն ու հետաքրքրությունները փոքր են, աննշան... այո, երանի նրանց...

Փոքր-ինչ լռելուց հետո Բատտիստան նորից շարունակեց.

— Ինչպես ասացի, ես Կապրիում մի ամառանոց ունեմ, բայց, դժբախտաբար, երբեք այնտեղ չեմ ապրում... Այդ ամառանոցը գնելու օրից մինչև այսօր ես ընդամենը մի երկու ամիս հազիվ մնացած լինեմ այնտեղ... Նոր Ռայնգոլդին հենց այդ էի ասում, որ իմ ամառանոցը ամենահարմար տեղն է սցենարի վրա աշխատելու համար... նախ և առաջ ձեզ կներշնչի ինքը բնատեսարանը... Իսկ մյուս կողմից էլ, ինչպես

ես արդեն ասացի Ռայնգոլդին, այդ բնատեսարանը լրիվ համընկնում է Ֆիլմի սյուժեի հետ:

— Մինչոր Բատտիստա, — ասաց Ռայնգոլդը, — աշխատել կարելի է ամենուրեք... Իհարկե, Կապրին կարող է ավելի օգտակար լինել... Եթե, ինչպես կարծում եմ, բնական պայմաններում նկարահանումներ անելու լինենք Նեապոլի ծոցում:

— Միանգամայն ճիշտ է... Բայց Ռայնգոլդն ասում է, որ ինքը գերադասում է հյուրանոցում ապրել: Նա ունի իր սովորույթները, իսկ մյուս կողմից էլ, երբեմն նա սիրում է մտածել ու աշխատանքը կատարել առանձին, երբ ոչ ոք չի խանգարում իրեն: Իսկ դուք, Մուտենի, ինձ թվում է, որ կարող եք ապրել ամառանոցում, ձեր տիկնոջ հետ միասին... Սանավանդ որ ինձ մեծ հաճույք պատճառած կլինեք... Վերջապես կիմանամ, որ մարդ է ապրում... Ամառանոցը բոլոր հարմարություններն ունի, իսկ ինչ տան գործերն անող որևէ կին գտնելուն է վերաբերում, դա ոչ մի դժվարություն չի ներկայացնում:

Ինչպես միշտ, ես իսկույն էմիլիայի մասին մտածեցի: Եվ մտածեցի նաև այն մասին, որ Կապրիում՝ այդպիսի գեղեցիկ ամառանոցում մնալը կարող է թերևս շատ հարցեր լուծել: Ճշմարիտ եմ ասում, չգիտեմ ինչու, ես հանկարծ այն զգացումն ու համոզմունքն ունեցա, որ դա կարող է լուծել իմ բոլոր խնդիրները:

— Շնորհակալ եմ, — ջերմ անկեղծությամբ ասացի ես Բատտիստային: — Ես էլ եմ կարծում, որ Կապրին շատ հարմար է սցենար գրելու համար... և ես ու կինս մեծ հաճույքով կապրենք ձեր ամառանոցում:

— Հիանալի է, եղավ, — ասաց Բատտիստան և ձեռքը այնպես բարձրացրեց, որ կարծես ուզում էր առնել շնորհակալությունների հեղեղի առաջը, որը ես մտադրություն էլ չունեի արտահայտելու: — Պայմանավորվեցինք: Դուք կգնաք Կապրի, ես էլ ձեզ հյուր կգամ... իսկ հիմա եկեք մի քիչ Ֆիլմից խոսենք:

«Վաղուց պիտի խոսեինք», — մտածեցի ես և ուշադրությամբ նայեցի Բատտիստային: Այժմ արդեն ինձ տանջում էր զղջումի մի զգացում, թե ես ինչու այդքան հապճեպ ըն-

դունեցի նրա հրավերքը: Չգիտեմ ինչու, բայց բնագրով զգում էի, որ էմիլիան հավանություն չի տա իմ ցուցաբերած շտապողականությանը: Ես պետք է նրան ասած լինեի, որ ինձ անհրաժեշտ է այդ մասին դեռ մտածել և խորհրդակցել կնոջս հետ, — փոքր-ինչ վրդովված հանդիմանեցի ինքս ինձ: Իսկ այն ջերմությունը, որ ցուցաբերեցի այդ հրավերքն ընդունելիս, ինձ թվաց ոչ միայն անտեղի, այլ նույնիսկ ամոթալի:

— Մի հարցում մենք բոլորս համաձայն ենք, — շարունակեց Բատտիստան, — դա այն է, որ կինոյում պետք է ինչոր մի նոր բան գտնել... Հետպատերազմյան շրջանն արդեն անցել է, այժմ զգացվում է նոր ֆորմուլայի անհրաժեշտություն... օրինակ, վերցնենք նեոռեալիզմը. դրանից բոլորն արդեն բավական հոգնել են... Վերլուծելով այն պատճառները, որոնց հետևանքով նեոռեալիստական ֆիլմերը ձանձրույթ են պատճառում, գուցե մենք կարողանանք հասկանալ, թե ինչպիսին պետք է լինի նոր ուղղությունը:

Ինչպես արդեն ասել եմ, ես գիտեի, որ Բատտիստան այն մարդկանցից չէ, որոնք սիրում են հարցերը բացեիբաց դնել: Նա ցինիկ չէր, կամ գոնե, աշխատում էր այդպիսին չերևալ: Ի տարբերություն մյուս պրոդյուսերների, Բատտիստան շատ հազվադեպ էր խոսում դրամական մուտքերի մասին: Շահույթի հարցը, որ նրա համար ոչ միայն պակաս, այլ գուցե ավելի մեծ կարևորություն ուներ, քան ուրիշների, Բատտիստան միշտ ստվերում էր թողնում: Եթե որևէ ֆիլմի սյուժե նրան թվում էր, թե համապատասխան եկամուտ չի բերի, Բատտիստան ուրիշների նման չէր ասում. «Այս սյուժեով մի կոպեկ փող չես վաստակի»: Ոչ, նա ասում էր. «Այս սյուժեն այսինչ կամ այնինչ պատճառով ինձ դուր չի գալիս»: Իսկ այդ բերած պատճառներն էլ միշտ լինում էին կամ էսթետիկական, կամ բարոյական կարգի: Բայց ինչպես էլ ուզում է լիներ, վերջին փորձաքարը միշտ էլ մնում էր շահույթը: Կինոարվեստում եղած գեղեցիկի և բարոյականի մասին տարվող բազմաթիվ բանավեճերից և այն ամենից հետո, ինչը ես Բատտիստայի ծխածածկույթն էի համարում, միշտ ընտրությունը ընկնում էր առևտրական տեսակետից ամենաշահութաբեր վարիանտի լուծման վրա: Այդ էր պատ-

ճառը, որ Բատտիստայի այդքան կրկնվող երկար ու բարդ դատողությունները՝ լավ և վատ, բարոյական և անբարոյական ֆիլմերի վերաբերյալ վաղուց արդեն իմ մեջ ոչ մի հետաքրքրություն չէին հարուցում:

Ես անվերջ սպասում էի, մինչև որ նա ոտք դնի հաստատուն հողի վրա, իսկ այդ հաստատուն հողը նրա համար միշտ և անփոփոխորեն մնում էր տնտեսական շահը: Ես այս անգամ նույնպես մտածեցի. «Իհարկե, Բատտիստան չի ասի, թե պրոդյուսերները նեոռեալիստական ֆիլմերից ձանձրացել են, որովհետև վերջիններս այլևս օգուտ չեն բերում: Ապա մի լսենք, թե ինչ է ասելու»... Եվ իսկապես էլ, նա մի վայրկյան միայն մտածեց և իսկույն շարունակեց.

— Իմ կարծիքով, նեոռեալիստական ֆիլմերը բոլորին էլ որոշ չափով ձանձրացրել են, որովհետև դրանք առողջ ֆիլմեր չեն:

Այս ասելուց հետո նա կանգ առավ: Ես խեթ-խեթ նայեցի Ռայնգոլդին. նա նույնիսկ աչքն էլ չթարթեց: Բատտիստան, որ իր այդ լուսթյամբ ուզում էր ընդգծել «առողջ» բառը, սկսեց բացատրել.

— Երբ ես ասում եմ նեոռեալիստական ֆիլմերը առողջ ֆիլմեր չեն, դրանով ուզում եմ ասած լինել, որ նրանք չեն օգնում ապրելուն, մարդուն չեն գոտեպնդում, չեն զորեղացնում նրա հավատը կյանքի նկատմամբ... Նեոռեալիստական ֆիլմերը ընկճում են մարդուն, դրանք հոռետեսական, մոայլ ֆիլմեր են... էլ չեմ ասում այն, որ այդ ֆիլմերը Իտալիան ներկայացնում են որպես ծակաչք երկիր՝ ի մեծ ուրախություն այն օտարերկրացիների, որոնք շահագրգռված են մտածելու, թե Իտալիան իսկապես էլ այդպիսին է: Եթե նույնիսկ դա էլ մի կողմ թողնենք, որը ինքնըստինքյան բավական կարևոր հանգամանք է, ապա չի կարելի անտեսել, որ նեոռեալիստական ֆիլմերը չափազանց շատ են շեշտում կյանքի բացասական կողմերը, մատնացույց անում այն ամենը, ինչ ստոր է և նողկալի, ինչ կեղտոտ է և աննորմալ մարդկային կյանքում... Մի խոսքով, դրանք հոռետեսական, վատառողջ ֆիլմեր են, ֆիլմեր, որոնք մարդկանց անընդհատ հիշեցնում են նրանց դժվարությունները և ոչ թե օգնում դրանք հաղթահարել:

Ես նայում էի Բատտիստային և շէի կարողանում հասկանալ, արդյո՞ք նա ասում է այն, ինչ մտածում է, թե պարզապես ձևացնում է: Նրա ասածների մեջ ինչ-որ մի անկեղծություն կար: Գուցե դա ընդամենը այն մարդու անկեղծությունն էր, որը հեշտությամբ համաձայնում է հավատալ այն բանին, ինչը իրեն օգուտ է, գուցե, բայց այնուամենայնիվ ինչ-որ անկեղծություն կար:

Բատտիստան շարունակում էր: Նրա ձայնի երանգը թվում էր ոչ թե մարդկային է, այլ մի տեսակ գրեթե մետաղային, անգամ եթե աշխատում էր, որ այդ ձայնը սիրալիր հնչի:

— Ռայնգոլդը մի առաջարկություն արեց, որը ինձ շատ հետաքրքիր է թվում... Նա նշեց, որ այս վերջին տարիներին մեծ հաջողություն են ունենում Աստվածաշնչի սյուժեներով գրված ֆիլմերը... Դրանք հենց այն նկարներն են, որոնք ամենից շատ են դրամ բերել:

Բատտիստան դա նշեց մի տեսակ մտածկոտ, որպես փակագծերի մեջ ասված մի փաստ, որին նա ինքը շէր ուզի որևէ կարևորություն տալ:

— Իսկ ի՞նչն է պատճառը... Պատճառը, իմ կարծիքով այն է, որ Աստվածաշունչը աշխարհում երբևէ գրված բոլոր գրքերից ամենաառողջն է... Հա, ուրեմն, Ռայնգոլդն ասաց, որ անգլոսաքսերը Աստվածաշունչ ունեն, իսկ մենք էլ՝ Միջերկրական ծովի կուլտուրայի մարդիկ, ունենք Հոմերոս... Ճի՞շտ է:

Նա խոսքն ընդհատելով, այնպես շրջվեց դեպի Ռայնգոլդը, որ կարծես ուզում էր հարցնել, թե ճի՞շտ է արդյոք հաղորդել նրա խոսքերը:

— Միանգամայն ճիշտ է, — հաստատեց Ռայնգոլդը, և նրա ժպտացող երեսին իսկույն թեթև տազնապի մի արտահայտություն հայտնվեց:

— Ձեզ՝ միջերկրականցիներիդ համար, — Բատտիստան շարունակեց մեջբերում անել Ռայնգոլդի ասածներից, — Հոմերոսը նույնն է, ինչ որ Աստվածաշունչը անգլոսաքսերի համար... Ուրեմն, ինչո՞ւ մենք մի ֆիլմ չստեղծենք, օրինակ, «Ողիսականի» մոտիվներով:

Լոուիժյուն տիրեց: Ես շշմել էի և, ցանկանալով ժամանակ շահել, ինձ վրա ճիգ գործադրելով, հարցրի:

— Ամբողջ «Ողիսակա՞նը», թե՞ «Ողիսականից» որևէ էպիզոդ:

— Մենք այդ հարցն արդեն քննարկել ենք, — իսկույն վրա բերեց Բատտիստան, — և եկել ենք այն եզրակացութեան, որ ավելի լավ կլինի, եթե վերցնենք ամբողջ «Ողիսականը»... Բայց դա կարևոր չէ... Կարևորը բուրրովին ուրիշ բան է, — ձայնը բարձրացնելով, շարունակեց նա: — Նորից ընթերցելով «Ողիսականը», ես վերջապես հասկացա, թե ինչ եմ այսքան ժամանակ որոնել առանց ինձ հաշիվ տալու: Ես որոնել եմ այն, ինչը չի կարելի գտնել նեոռեալիստական ֆիլմերում: Այն, ինչը, օրինակի համար, ես երբեք չեմ գտել վերջերս ինձ առաջարկած ձեր և ոչ մի սյուժեում, Մուլտենի... Մի խոսքով, այն, ինչը զգալով հանդերձ, ես չեմ կարողանում բացատրել ինչպես հարկն է և ինչը մեզ կինոարվեստում նույնքան է պետք, որքան և կյանքում պոեզիան:

Ես դարձյալ նայեցի Ռայնգոլդին: Նա շարունակում էր ժպտալ առաջվա նման: Բայց այս անգամ ժպտում էր ամբողջ երեսով մեկ և, հավանություն տալով, գլուխը տմբտրմբացնում: Ես ինձանից անկախ և շատ շոր ասացի.

— «Ողիսականում», ինքնըստինքյան հասկանալի է, պոեզիա ինչքան ասես կա... Բանը այդ պոեզիան ֆիլմի մեջ անցկացնելն է:

— Ճիշտ է, — ասաց Բատտիստան և, սեղանից մի քանոն վերցնելով, ուղղեց իմ կողմը: — Ճիշտ է... հենց դրա համար էլ դուք գոյություն ունեք, Ռայնգոլդր և դուք, Մուլտենի... Ես գիտեմ, որ այնտեղ պոեզիա կա... իսկ ձեր երկուսի գործը հենց այդ պոեզիան այնտեղից դուրս բերելն է:

— «Ողիսականը» մի ամբողջ աշխարհ է, — ասացի ես, — այնտեղից կարելի է դուրս բերել ինչ ուզում ես... Բայց մարդ պետք է իմանա, թե որ տեսանկյունից է անհրաժեշտ մտենալ նրան:

Այժմ Բատտիստան թվում էր խիստ զարմացած, որ իր առաջարկությունն իմ մեջ ոչ մի էնտուզիազմ չառաջացրեց: Նա վերին աստիճանի լարված նայեց ինձ, կարծես ցանկա-

նալով իր համար պարզել, թե ինչ դիտավորություն է թաք-
նրված իմ այդ սառնություն տակ: Այնուհետև դրա պարզա-
բանումը հետաձգելով, ըստ երևույթին, մի որոշ ժամանա-
կով, նա տեղից վեր կացավ, անցավ սեղանի կողքով և,
զլուխը բարձր պահած, ձեռքերը խրած շալվարի գրպանները,
սկսեց սենյակում անցուդարձ անել: Մենք շրջվեցինք՝ նրան
նայելու: Սենյակում հետուառաջ քայլելով, Բատտիստան
ասում էր.

— Այն, ինչը ինձ ամենից առաջ ցնցեց «Ողիսականում»,
դա Հոմերոսի պոեզիայի տեսարանայնությունն է... Տեսա-
րանայնություն ասելով ես նկատի ունեմ այն, ինչը անա-
ռարկելիորեն դուր է գալիս հասարակությանը... Վերցնենք,
օրինակի համար, թեկուզև Նավզիկայի էպիզոդը... Այն
պատկերը, որտեղ շքնաղ ու մերկ աղջիկները շփշփացնում
են ջրում՝ թփի հետևը թաքնված Ողիսևսի աչքի առաջ... Ահա
և ձեզ «կողացող գեղեցկուհիների» տեսարանից մի վա-
րիանտ... Կամ թե չէ վերցրեք Պոլիֆեմին, միաշքանի այդ
ճիվաղին, հսկային այդ, հեքիաթային այդ հրեշին... Չէ որ
դա իսկական Կինգ-Կոնգ է, մինչպատերազմյան կինոյի ամե-
նատարածված գործող անձերից մեկը, որը ցնցող հաջողու-
թյուններ էր ունենում... Հապա Կիրկե՞ն իր ապարանքում...
չէ՞ որ դա Անտինեան է «Ատլանտիդայից»... Ահա սրանք
ենք մենք կոչում տեսարանայնություն... Եվ այդ տեսարան-
ները, ինչպես ասացի, ոչ թե լոկ տեսարաններ են, այլև
պոեզիա...

Խիստ գրգռված ու սքանչացած Բատտիստան կանգ առավ
մեր առջև և հանդիսավորությամբ արտասանեց.

— Ահա թե ես ինչպես եմ պատկերացնում «Տրիումֆ-
ֆիլմի» արտադրած «Ողիսականը»:

Ես ոչինչ չասացի, հիանալի հասկանալով, որ պոեզիան
իմ և Բատտիստայի համար բոլորովին տարբեր հասկացու-
թյուններ են:

Ես հասկանում էի, որ ըստ նրա պոեզիայի այդպիսի
ըմբռնման, «Տրիումֆ-ֆիլմի» արտադրած «Ողիսականը» լի-
նելու է Հոլիվուդի բիբլիական սյուժեներով արված ֆիլ-
մերի ընդօրինակությունը. այսինքն ֆիլմ, որտեղ լինելու են
հրեշներ, մերկ կանայք, գայթակղիչ տեսարաններ, տարիանք

և վերամբարձ շքեղութուն: Վերջին հաշվով, ասում էի ինքս ինձ, Բատտիստայի ճաշակը փաստորեն դեռ դ'Անունցիոյի ժամանակի իտալական պրոդյուսերների ճաշակն է: Եվ ինչպե՞ս կարող էր տարբեր լինել:

Բատտիստան, նորից պտույտ տալով գրասեղանի շուրջը, նստեց իր տեղը և ինձ հարցրեց.

— Հը, ի՞նչ կարող եք ասել, Մոլտենի:

Կինոյի աշխարհին ծանոթ յուրաքանչյուր մարդ գիտե, որ կան այնպիսի ֆիլմեր, որոնց սցենարից դեռ մի բառ էլ չգրված, համոզված կարելի է ասել, որ կավարտվեն ու կներկայացվեն: Սակայն դրանց կողքին կան նաև այնպիսի ֆիլմեր, որոնց մասին նույնիսկ պայմանագիր կնքելուց և սցենարի հարյուրավոր էջեր գրելուց հետո էլ չի կարելի ասել, որ կհասնեն իրենց ավարտին: Մինչ Բատտիստան խոսում էր, պրոֆեսիոնալ սցենարիստի հոտառությամբ ես իսկույն կեթ զգացի, որ նրա «Ողիսականը» հենց այն ֆիլմերից է, որոնց մասին շատ է խոսվում, բայց որոնք այդպես էլ դուրս չեն գալիս էկրանի վրա: Ինչի՞ց եկա այդ եզրակացությանը: Ես դժվարանում եմ բացատրել, գուցե նրանից, որ այդ ֆիլմը ինձ չափազանց հավակնոտ թվաց, գուցե նաև այն տպավորության պատճառով, որը ինձ վրա թողեց Ռայնգոլդի արտաքինը, որ այնքա՞ն վեհատես էր նստած ժամանակ և այնքա՞ն փոքր, երբ ոտքի ելավ: Ես զգում էի, որ, ինչպես և Ռայնգոլդը, ֆիլմն ունենալու է հիանալի սկիզբ և ողորմելի վերջավորութուն, արդարացնելով ծովահարսերի մասին եղած հայտնի արտահայտութունը. «desinit in piscem»¹: Իսկ Բատտիստան ինչո՞ւ էր ուզում այդպիսի ֆիլմ ստեղծել: Ես գիտեի, որ նա շատ զգուշավոր և ոխակից հեռու մնացող մարդ է: Հավանական է, ինչպես ես կարծում էի, նա հույս է դրել, օգտագործելով Հոմերոսի անունը, «Ողիսականի» միջոցով, որը Ռայնգոլդի արտահայտությամբ միջերկրականցիների Աստվածաշունչն է, մեծ փողեր վաստակել, գուցե նաև Ամերիկայից: Սակայն մյուս կողմից էլ գիտեի, որ ֆիլմի շոուցադրվելու դեպքում Բատտիստան, որ այդ տեսակետից ոչնչով չէր տարբերվում մյուս պրոդյուսերներից, որևէ պա-

¹ Ամեն ինչ ձկան պոչով է վերջանում (լատ.):

տրրվակ կգտներ՝ իմ թափած աշխատանքը անվճար թողնելու համար: Միշտ այդպես է լինում. եթե Ֆիլմը հաջողութուն չի ունենում, պրոդյուսերը մեծ մասամբ առաջարկում է հետաձգել արդեն ավարտված սցենարի վճարը մինչև հաջորդ Ֆիլմի արտադրութունը, և խեղճ սցենարիստը չի համարձակվում առարկութեան որևէ խոսք ասել: Այդ պատճառով էլ ես մտածեցի, որ ամեն կերպ պետք է աշխատեմ պայմանագիր կնքել և, որ կարևորն է, ստանալ պայմանագրային կանխավճարը: Դրան հասնելու համար միայն մի ձև կար. վկայակոչել բոլոր դժվարութունները և այնպես անել, որ Բատտիստան անպայման զգա իմ աշխատակցելու անհրաժեշտութունը: Եվ ես շատ շոր ասացի.

— Իմ կարծիքով, դա հիանալի միտք է:

— Այնուամենայնիվ, չի երևում, որ դուք դրանից ոգևորված եք:

— Ես վախենում եմ, որ դա իմ ժանրը չլինի... — ավելորդ անկեղծությամբ պատասխանեցի ես, — և վեր լինի ուժերիցս:

— Իսկ ինչո՞ւ... — երևում էր, որ Բատտիստան վրդովվում է: — Դուք միշտ ասում էիք, որ կցանկանայիք լուրջ Ֆիլմի վրա աշխատել... իսկ այժմ, երբ ես ձեզ այդ հնարավորութունը տալիս եմ, դուք հետ եք քաշվում:

— Գիտեք ինչ, Բատտիստա, — աշխատեցի բացատրել նրան, — իմ հակումները հոգեբանական Ֆիլմերի կողմն են... իսկ դա, եթե ես ձեզ ճիշտ եմ հասկացել, պետք է որ մաքուր տեսարանային Ֆիլմ լինի... ինչպես բիբլիական սյուժեներով ստեղծված ամերիկյան Ֆիլմերն են:

Բատտիստան շհասցրեց ինձ պատասխանել. հենց այդ նույն րոպեին բոլորովին անսպասելիորեն խոսակցութեան մեջ մտավ Ռայնգոլդը:

— Սինյոր Մոլտենի, — ասաց նա իր սովորական կիսալուսնային ժպիտը երեսին և իսկույն նմանվեց այն դերասանին, որը արհեստական բեղեր է կպցնում իրեն: Ապա փոքր-ինչ ձգվելով առաջ, շատ հարգալից, գրեթե շողոքորթող տոնով շարունակեց: — Սինյոր Բատտիստան հիանալի ներակայացրեց մեր մտահղացումը... Նա շատ ճիշտ պատկերացում տվեց այն Ֆիլմի մասին, որը ես ուզում եմ ստեղ-

ծել ձեր օգնութեամբ: Սակայն սինյոր Բատտիստան այդ բոլորը ասաց որպես պրոդյուսեր, իր ուշադրութիւնը կենտրոնացնելով ամենից առաջ տեսարանային էլեմենտների վրա: Բայց եթե ձեր հակումները դեպի հոգեբանական սյուժեներն են, ուրեմն դուք առանց այլևայլութեան պետք է աշխատեք այս ֆիլմի վրա, քանի որ այս ֆիլմը հենց Ողիսեսի և Պենելոպեի հոգեբանական փոխհարաբերութիւնների մասին է... Ես ուզում եմ ֆիլմ ստեղծել մի մարդու մասին, որը սիրում է իր կնոջը, բայց չի սիրվում նրանից:

Ես մի տեսակ շփոթվեցի, մանավանդ այն պատճառով, որ Ռայնգոլդի արհեստական ժպիտով լուսավորված դեմքը այնպես մոտեցավ իմին, որ թվաց, թե փակեց նահանջի բոլոր ճանապարհները: Ես պետք է իսկույն կեթ պատասխան տայի: Եվ ահա հենց այն րոպեին, երբ ուզում էի առարկել, թե «Բոլորովին էլ ճիշտ չէ ձեր այն կարծիքը, թե Պենելոպեն չի սիրում Ողիսեսին», ռեժիսորի վերջին խոսքերը «մի մարդու մասին, որ սիրում է իր կնոջը, բայց չի սիրվում նրա կողմից», հանկարծ ինձ հիշեցրին էմիլիայի և իմ միջև եղած փոխհարաբերութիւնները: Մի՞թե ես հենց այն մարդը չեի, որը սիրում է իր կնոջը, բայց չի սիրվում նրա կողմից: Եվ այդ նույն րոպեին ինչ-որ մի խորհրդավոր ասոցիացիայով իմ հիշողութեան մեջ հանկարծ հառնեց մի բան, որը, ինչպես կարծում էի ըստ երևույթին, կարող էր պատասխան տալ իմ այն հարցին, որ տալիս էի ինքս ինձ ընդունարանում նստած ժամանակ, երբ սպասում էի Բատտիստայի մոտ մտնելու համար. ինչո՞ւ էմիլիան այլևս ինձ չի սիրում:

Այժմ, երբ ես այս բոլորը պատմում եմ, կարող է թվալ, թե դա տևել է երկար, մինչդեռ իրականում այդ հիշողութիւնն իմ գիտակցութեան միջոցով սուրաց և անցավ ընդամենը մի ակնթարթում: Այսպես, ուրեմն, մինչ Ռայնգոլդը ինձ էր մոտեցնում իր ժպտուն երեսը, ես հանկարծ ինձ տեսա կահավորված բնակարանի հյուրասենյակում նստած և սցենարը թելադրելիս: Սցենարի թելադրութիւնը մոտենում էր իր ավարտին, արդեն մի քանի օր էր, ինչ շարունակվում էր նրա մեքենագրութիւնը, բայց, շնայած դրան, ես դեռ չեի կարող ասել մեքենագրուհին լավիկն է, թե ոչ: Մի շատ աննշան դեպք միայն բացեց իմ աչքերը: Երբ նա մեքենայի

ստեղներին էր խփում ինչ-որ մի նախադասութիւն վերջաց-
նելու համար, ես նրա ուսի վրայով նայեցի մեքենագրվող
թերթին և նկատեցի, որ մի սխալ է արել: Թեքվելով առաջ,
փորձեցի ուղղել այդ սխալը և մատով սկսեցի խփել մե-
քենայի ստեղներին՝ սխալված բառը ճիշտ գրելու համար:
Բայց այդ անելիս ես ինձանից անկախ կպա նրա ձեռքին և
նկատեցի, որ դա մեծ և ուժեղ ձեռք է, բոլորովին անհամա-
տեղելի նրա փոքրիկ ու նուրբ մարմնի հետ: Բայց նա ձեռքը
հետ չբաշեց: Ես մեքենագրեցի ևս մի բառ և այս անգամ,
գուցե և ոչ առանց դիտավորութեան, նորից հավեցի նրա
մատներին: Հետո նայեցի երեսին և տեսա, որ ինքն էլ փո-
խադարձաբար ինձ է նայում, և ոչ թե հենց այնպես, այլ մի
տեսակ սպասողական և նույնիսկ հրավիրող հայացքով: Բո-
լորովին անսպասելի, կարծես հենց նոր էի նրան տեսնում,
ես զգացի, որ լավիկն է: Նա մտեղ շրթունքներով փոքրիկ
բերան ուներ, քմահաճ քիթ, սև խոշոր աչքեր և խիտ ու
փարթամ մազեր, որոնք հետ էին սանրած: Սակայն գունատ
ու նուրբ դեմքին դժգոհութեան ու վրդովմունքի մի արտա-
հայտութիւն կար: Վերջապես, մի առանձնահատկութիւն
ևս. երբ նա դեմքը մի տեսակ ծամածռելով ասաց. «Ներե-
ցեք, իմ ուշադրութիւնը մի պահ շեղվեց», — ինձ ապշեցրեց
նրա որոշակիորեն տհաճ ձայնի սուր, շոր տեմբորը: Ուրեմն,
նայելով այդ աղջկան, ես նկատեցի, որ նա ոչ միայն աչքերը
չփախցրեց, այլև ավելի ագրեսիվ սևեռեց ինձ վրա: Ըստ
երևույթին, դա որոշ շափով պղտորել էր իմ մտքերը կամ,
համենայն դեպս, այնպիսի փոփոխութիւն էր առաջացրել իմ
դեմքին, որ այդ պահից ի վեր մի քանի օր շարունակ մենք
անընդհատ իրար էինք նայում: Ավելի ճիշտ, նա էր անվերջ
նայում, ընդ որում, նայում էր անամոթ ու լիրբ հայացքով:
Երբ ես աչքերս փախցնում էի, նրա հայացքը հետապնդում էր
իմ աչքերին, երբ մեր աչքերը հանդիպում էին, նա աշ-
խատում էր այլևս բաց շթողնել իմ հայացքը, իսկ երբ իրեն
էի նայում, նա հայացքով սուզվում էր իմ աչքերի մեջ:
Ինչպես և լինում է, սկզբնական շրջանում նա ինձ մեկ-մեկ
էր նայում, իսկ գնալով այդ հայացքները դարձան ավելի ու
ավելի հաճախակի: Վերջապես, շիմանալով ինչ ձևով խու-
սափել նրանցից, ես սկսեցի տեքստը թելադրել՝ նրա թիկուն-

քում այս ու այն կողմ քայլելով: Բայց այդ համառ պշրուհի
 դտավ խոչընդոտը շրջանցելու ձևը. նա սկսեց ինձ նայել դի-
 մացի պատին կախած մեծ հայելու մեջ: Այնպես որ, ամեն
 անգամ, հենց որ ես հայացքս վեր էի բարձրացնում, իսկույն
 հայելու մեջ հանդիպում էի նրա աչքերին, որոնք սևեռված
 ինձ էին նայում: Վերջապես այն, ինչ նա ցանկանում էր, որ
 կատարվի, կատարվեց. մի օր ես սովորականի նման նրա
 ուսի վրայով խոնարհվեցի՝ ինչ-որ սխալ ուղղելու, և երբ աչ-
 քերս բարձրացրի, մեր հայացքները հանդիպեցին իրար, բայց
 կարճատև մի համբույրով մի պահ միացան նաև մեր շուրթե-
 րը: Բնորոշն այն էր, որ այդ համբույրից անմիջապես հետո
 նա ասաց. «Օհ, վերջապես... այլապես ես արդեն սկսել էի
 մտածել, թե դու այդպես էլ սիրտ չես անի ինձ համբուրել»: Մի
 խոսքով, նա այժմ համոզված էր, որ ես արդեն իր բոի մեջ
 եմ, այնքան էր համոզված, որ նույնիսկ հոգ շտարավ շա-
 րունակել այդ համբույրները և ձեռնամուխ եղավ գործին:
 Զղջման և շփոթմունքի մի զգացում համակեց ինձ. ոչ մի
 կասկած չկար, որ այդ աղջիկը ինձ դուր է գալիս, այլապես
 երբեք նրան չէի համբուրի, բայց կասկածից վեր էր նաև
 այն, որ ես նրան չէի սիրում: Փաստորեն համբուրեցի,
 մղված իմ տղամարդկային փառասիրությունից, որին շոյում
 էր նրա այնքան հանդուգն համառությունը: Այժմ նա արդեն
 մեքենագրում էր առանց ինձ նայելու և աչքերը վեր բարձ-
 րացնելու: Ես նայում էի նրա գունատ և կլոր դեմքին, սև
 խիտ մազերի դեզին, և նա գնալով ավելի ու ավելի էր ինձ
 գեղեցիկ թվում: Այնուհետև, ըստ երևույթին դիտավորյալ,
 նա նորից ինչ-որ սխալ արեց, և ես, ցանկանալով ուղղել
 այդ սխալը, կրկին խոնարհվեցի նրա ուսի վրայով: Նա հե-
 տևում էր իմ յուրաքանչյուր շարժումին: Բայց հենց որ երեսս
 մոտեցավ իրենին, նա արագ շրջվեց, ձեռքերը փաթաթեց
 վզիս և, քաշելով ինձ դեպի իրեն, բերանը սեղմեց իմ շուր-
 թերին: Այդ պահին դուռը բացվեց և ներս մտավ էմիլիան:
 Ես կարծում եմ, որ ոչ մի անհրաժեշտություն չկա պատ-
 մելու այն մանրամասնությունների մասին, որոնք տեղի ու-
 նեցան դրանից հետո: Էմիլիան իսկույն դուրս գնաց, իսկ
 ես շտապելով աղջկան ասացի. «Մինչորինա, այսօր աշխա-
 տանքը վերջացած է... գնացեք տուն», և գրեթե վազելով ինձ

գցեցի էմիլիայի սենյակը: Ես սպասում էի խանդի տեսարանի, մինչդեռ երբ ներս մտա, էմիլիան շատ կարճ ասաց. «Գոնե շուրթերիդ ներկը սրբեիր»: Ես շրթունքներս սրբեցի, նստեցի էմիլիայի կողքին և սկսեցի արդարանալ, պատմելով նրան ճշմարտությունը: Նա լսեց ինձ մի տեսակ անորոշ և թերահավատ, բայց ըստ էության ներողամտորեն և վերջում ասաց, որ եթե իսկապես սիրում եմ այդ մեքենագրուհուն, ապա պետք է իրեն ասեի, և ինքն առանց այլևայլության ինձ ապահարզան կտար: Բայց նա այդ ասաց առանց վրդովմունքի կամ նեղանալու, մի տեսակ տխուր մեղմությամբ, կարծես լուռ խնդրում էր, որպեսզի ես հերքեմ այդ: Վերջապես իմ անհամար բացատրություններն ու հուսահատ վիճակը (ես ուղղակի սարսափած էի այն մտքից, թե էմիլիան կարող է ինձ լքել) համոզեցին նրան, և նա փոքր-ինչ համառելուց հետո խոստացավ ներել ինձ: Հենց այդ նույն օրը, ճաշից հետո, էմիլիայի ներկայությամբ զանգահարեցի մեքենագրուհուն և հայտնեցի, որ այլևս նրա ծառայության կարիքը չունեմ: Աղջիկը փորձեց պայմանավորվել ինձ հետ որևէ տեղ հանդիպելու, բայց ես պատասխանեցի նրան խուսափողաբար և այն օրից ի վեր այլևս նրան չեմ տեսել:

Ինչպես արդեն ասել եմ, կարող է թվալ, թե այս հիշողությունը երկար է տևել, բայց իրականում դա կատարվեց կայծակի արագությամբ. հանկարծ դուռը բացվեց, և հայտնվեց էմիլիան հենց այն վայրկյանին, երբ ես մեքենագրուհուն համբուրում էի: Ապա նաև ակնթարթային այն միտքը, թե ինչպես չեմ հաշվի առել այդ: Ոչ մի կասկած չի կարող, մտածում էի ես, որ ամեն ինչ հետևյալ կերպ է եղել. էմիլիան ձևացրել է այնպես, իբրև այդ դեպքին կարևորություն չի տալիս, իսկ իրականում, գուցե և առանց գիտակցելու, սկսել է հոգու խորքում տանջվել: Հետագայում, այդ դեպքը մտաբերելիս, նա իր հիշողության շուրջը անվերջ փաթաթում և ամրացնում էր աճող հիասթափության կծիկը: Այդպիսով, այն համբույրը, որը ինձ համար լոկ վայրկենական մի թուլություն էր, նրա հոգում, հոգեբույժների լեզվով ասած, այնպիսի մի վնասվածք էր առաջացրել կամ վերք, որը

ժամանակի ընթացքում ոչ միայն չէր սպիացել, այլև, ընդհակառակը, գնալով ավելի էր գրգռվել ու խորացել:

Հստ երևույթին, մինչ ես այս ամենի մասին մտածում էի, իմ դեմքի արտահայտությունը այնքան էր դարձել ցրրված, որ հանկարծ, կարծես խտացած մշուշի միջից, ինձ հասավ Ռայնգոլդի ձայնը.

— Դուք ինձ լսո՞ւմ եք, սինյոր Մուլտենի:

Մշուշը վայրկենապես ցրվեց, ես իսկույն սթափվեցի և իմ առաջ տեսա ռեժիսորի ժպտացող դեմքը:

— Ներեցեք, — ասացի ես: — Միտքս ուրիշ տեղ էր... Ես մտածում էի հենց ձեր ասածի մասին. մի մարդ, որը սիրում է իր կնոջը, բայց չի սիրվում նրա կողմից... սակայն... — չիմանալով ինչ ասել, ես առարկեցի նրան գլուխս եկած առաջին իսկ մտքով. — բայց չէ որ պոեմում Ոդիսևսը սիրված է Պենելոպեի կողմից... ավելին, որոշ իմաստով, ամբողջ պոեմը հենց Պենելոպեի դեպի Ոդիսևսն ունեցած սիրո վրա է խարսխվում:

— Դա հավատարմությունն է, սինյոր Մուլտենի, և ոչ թե սեր... — ժպտալով հերքեց իմ առարկությունը Ռայնգոլդը: — Պենելոպեն հավատարիմ է Ոդիսևսին, բայց մենք չգիտենք, թե նա ինչ աստիճան է սիրում նրան... և ինչպես ձեզ հայտնի է, երբեմն կարելի է լինել անսահման հավատարիմ և, այնուամենայնիվ, չսիրել... Դեռ ավելին, որոշ դեպքերում հավատարմությունը ինքնասիրության վրեժի, փոխհատուցման մի ձև է... Հավատարմություն և ոչ թե սեր:

Ռայնգոլդի այդ խոսքերը նորից ինձ ապշեցրին: Ես դարձյալ մտածեցի էմիլիայի մասին, ինքս ինձ հարցնելով, թե ես չէի՞ գերադասի արդյոք նրա դավաճանությունը և դրան հաջորդող զղջումները հավատարմությունից ու անտարբերությունից: Անկասկած, կգերադասեի: Եթե էմիլիան ինձ դավաճաներ, իսկ հետո իմ առաջ իրեն մեղավոր զգար, ինձ ավելի վստահ կզգայի նրա հետ: Սակայն հենց նոր ես ինքս ինձ ցույց տվի, որ էմիլիան ինձ չէր դավաճանել, որ, ընդհակառակը, ես էի եղել նրան դավաճանողը: Նորից մտքերս ինձ տարել էին իրականությունից, երբ հանկարծ սթափվեցի Բատտիստայի ձայնից.

— Մի խոսքով, Մուլտենի, ուրեմն պայմանավորվեցինք, դուք աշխատելու եք Ռայնգոլդի հետ:

— Այո, պայմանավորվեցինք,— ճիզեր գործադրելով, պատասխանեցի ես:

— Հիանալի է, գոհունակությամբ ասաց Բատտիստան,— այդ դեպքում այսպես անենք. վաղը առավոտյան Ռայնգոլդը մեկնելու է Փարիզ, որտեղ և մի շաբաթ կմնա: Դուք, Մուլտենի, այդ մի շաբաթվա ընթացքում կգրեք «Ողիսականի» սցենարը և կներկայացնեք ինձ... Հենց որ Ռայնգոլդը Փարիզից վերադառնա, դուք միասին կգնաք Կապրի և անմիջապես ձեռնամուխ կլինեք Ֆիլմի աշխատանքներին:

Այդ եզրափակիչ խոսքերից հետո Ռայնգոլդը տեղից կանգնեց, որին ինքնաբերաբար հետևեցի և ես: Գիտեի, որ ինձ անհրաժեշտ էր խոսել ինչպես պայմանագրի, այնպես էլ կանխավճարի մասին, եթե չէի ուզում, որ Բատտիստան փորձանք բերի գլխիս: Բայց ինձ հանգիստ չէին տալիս էմիլիայի շուրջը պտտվող մտքերը, իսկ ավելի շատ՝ Հոմերոսի ռայնգոլդյան մեկնաբանությունները, որոնք այնքան տարօրինակ կերպով նման էին իմ անձնական կյանքի փաստերին: Այնուամենայնիվ, երբ արդեն մոտենում էինք դռանը, ես ծամածրմեղով հարցրի նրան.

— Իսկ պայմանագիր՞րը:

— Պայմանագիրը պատրաստ է,— բոլորովին անսպասելի բարեհոգությամբ պատասխանեց Բատտիստան,— իսկ պայմանագրի հետ պատրաստ է նաև կանխավճարը... Ձեզ, Մուլտենի, անհրաժեշտ է ընդամենը անցնել գրասենյակ՝ մեկն ստորագրելու, մյուսը ստանալու համար:

Այդ անակնկալը ինձ խիստ զարմացրեց: Ես սպասում էի, որ, ինչպես այդ լինում էր մյուս սցենարների վրա աշխատելիս, Բատտիստան ամեն կերպ կաշխատի այնպես անել, որպեսզի հոնորարս իջեցնի և հետաձգի վճարը: Բայց ահա, հակառակ իմ բոլոր սպասումների, նա ինձ վճարում է անմիջապես և առանց քաշքշուկի: Մինչ մենք երեքով գնում էինք կողքի դահլիճ, որտեղ Բատտիստայի գրասենյակն էր տեղավորված, ես ինձ չկարողացա զսպել և ասացի.

— Շնորհակալ եմ, Բատտիստա... Գիտեք, ուղղակի փողի խիստ կարիք ունեի:

Եվ շրթունքս կծեցի. ամենից առաջ այնքան էլ ճիշտ չէր, թե ես կարիքի մեջ էի, իսկ երկրորդն էլ, եթե նույնիսկ դրամի կարիք կար, ապա ոչ այնքան խիստ, ինչքան ենթադրվում էր իմ այդ նախադասությունից: Բացի դրանից, ես զգացի, ինքս էլ չգիտեմ ինչու, որ այդ ասելու կարիքը բուրրովին չկար: Բատտիստան դա ավելի հեռուն տարավ:

— Ես կռահում էի, սիրելիս,— ասաց նա, հովանավորողի նման և հայրաբար թփթփացնելով ուսս,— և ինչ որ պետքն էր, արի:

Գրասենյակում, դիմելով քարտուղարներից մեկին, որը նստած էր գրասեղանի առաջ, Բատտիստան կարգադրեց.

— Սա սինյոր Մուլտենին է... պայմանագիրը և կանխավճարը:

Քարտուղարը, որ արդեն ոտքի էր կանգնել, իսկույն բացեց թղթապանակներից մեկը և դուրս հանեց այնտեղից պատրաստի մի պայմանագիր, որին կցած էր կանխավճարի ստացման ստորագրությունը: Ռայնգուլդի ձեռքը սեղմելուց հետո Բատտիստան նորից թփթփացրեց իմ ուսը, աշխատանքիս հաջողություն ցանկացավ և կրկին գնաց իր աշխատասենյակը:

— Սինյոր Մուլտենի,— դիմեց ինձ Ռայնգուլդը, իր հերթին մոտենալով ինձ և մեկնելով ձեռքը,— մենք կտեսնվենք, հենց որ Փարիզից վերադառնամ... Այդ ընթացքում դուք «Ողիսականի» լիբրետոն կվերջացնեք, կներկայացնեք սինյոր Բատտիստային և նրա հետ միասին կքննարկեք:

— Լավ,— ասացի ես, փոքր-ինչ զարմացած նայելով նրան, քանի որ ինձ թվաց, թե նա հասկացավ ու բարեկամաբար գլխով արեց ինձ:

Ռայնգուլդը նկատեց իմ զարմացած հայացքը և, հանկարծ բռնելով թևիցս, բերանը մոտեցրեց ականջիս ու փսփսալով ասաց.

— Հանգիստ եղեք... չվախենաք... Թող Բատտիստան ինչ ուզում է ասի... Մենք հոգեբանական ֆիլմ կստեղծենք... Միայն հոգեբանական:

Ես նկատեցի, որ Ռայնգուլդը «հոգեբանություն» բառը արտասանում է գերմանական առոգանությամբ: Հետո նա ժրպտաց, ձեռքս սեղմեց, ապա կտրուկ գլուխ տվեց և կրունկ-

ները կտկտացնելով դուրս գնաց: Ես նայում էի նրա հետևից,
երբ հանկարծ քարտուղարի ձայնը սթափեցրեց ինձ.

— Սինյոր Մուտենի... չե՞ք բարեհաճի արդյոք այստեղ
ստորագրել...

Պլուխ իններորդ

Ընդամենը ժամը յոթն էր, երբ ես վերադարձա տուն:
Չայն տվի էմիլիային, բայց պատասխան չստացա, բնակա-
րանը դատարկ էր: Նա տանից դուրս էր եկել և ընթրիքից
շուտ հազիվ թե վերադառնար: Ես հիասթափված էի և որոշ
իմաստով վշտացած նրա բացակայությունից. ուզում էի
առանց այս ու այն կողմ գցելու նստել ու հետը խոսել մեքե-
նագրուհու հետ պատահած դեպքի մասին: Ես համոզված էի,
որ մեր գծավածուից հիմնական պատճառը այդ համբույրն
է եղել և, մի նոր համարձակությունս ու հավատով լցված,
հույս ունեի, որ մի քանի խոսքով կբացատրեմ այդ թյուրի-
մացության պատճառը, ապա նոր կհայտնեմ «Ողիսականի»
սցենարի համար կնքած պայմանագրի, կանխավճարն ստա-
նալու և Կապրի մեկնելու հաճելի նորությունները: Թեև գի-
տեի, որ նրա հետ տեղի ունենալիք բացատրությունը ընդա-
մենը մի երկու ժամով է հետաձգվում, բայց, այնուամենայ-
նիվ, ոչ միայն մի տեսակ ջղային ու հիասթափված էի, այլև
գրեթե դրա մեջ մի վատ նշան էի տեսնում: Այդ ժամանակ ես
վստահ էի իմ ուժերի վրա, իսկ մի երկու ժամից հետո, ով
գիտեր, կարո՞ղ էի արդյոք նույնքան համոզիչ ապացուցել
այն, ինչը կհաջողվեր հիմա: Ինչպես տեսնում եք, շնայած
ինձ այնպես էի ձևացնում, թե իբրև, վերջ ի վերջո, գտել
եմ կծիկի խճճված թելի ծայրը կամ էմիլիայի ինձ շիրեղու
իսկական պատճառը, բայց և այնպես հոգուս խորքում այդ
համոզմունքը չունեի: Եվ էմիլիայի տանը շինելը բավական
էր, որպեսզի իսկույն իմ տրամադրությունը փշանար ու ես
տազնապով լցվեի:

Դժկամ, ջղայնացած, մտացրիվ գնացի աշխատասեն-

յակս և մեքենայաբար սկսեցի գրապահարանում փնտրել «Ողիսականը»՝ Պինդեմոնտեի թարգմանությամբ: Ապա գրտնելով գիրքը, նստեցի գրասեղանիս մոտ, մեքենայի մեջ թուղթ դրի և, վառելով սիգարետս, պատրաստվեցի շարադրել «Ողիսականի» կարճ բովանդակությունը: Ինձ թվում էր, թե աշխատանքը ինձ հանգստություն կբերի կամ գոնե կօգնի, որպեսզի մոռանամ ինձ հուզող տագնապը. առաջ ես երբեմն դիմում էի այդ միջոցին: Ուրեմն, բացելով գիրքը, ես դանդաղ ընթերցեցի առաջին երգը: Այնուհետև թերթի վերեվում մեքենագրեցի վերնագիրը՝ «Ողիսականի» կարճ բովանդակությունը» և փոքր-ինչ ցածից սկսեցի շարադրանքը. «Տրոյական պատերազմը վաղուց արդեն վերջացած է: Բոլոր հույն հերոսները, որոնք մասնակցել են այդ պատերազմին, այժմ արդեն վերադարձել են իրենց տները: Բոլորը, բացի Ողիսեսից, որը դեռ հեռու է գտնվում հայրենի կղզուց և իր հարազատներից»: Սակայն հասնելով այդ տեղը, ես կասկածելով կանգ առա, մտածելով. նշե՞լ արդյոք իմ կարճ շարադրանքի մեջ աստվածների խորհուրդը, որտեղ քննարկվում էր հենց Ողիսեսի Իթակե վերադառնալու հարցը: Իմ կարծիքով, աստվածների այդ խորհուրդը կարևոր պահ էր, քանի որ դա պոեմի մեջ մտցնում է ճակատագրի անխուսափելիության, ունայնության և միևնույն ժամանակ մարդկային հերոսական ճիգերի և ազնվության իմաստը: Դուրս գցել աստվածների այդ խորհուրդը, նշանակում է մի կողմ նետել պոեմի ամբողջ վերնաշխարհը, բացասել ամեն մի աստվածային միջամտություն, հրաժարվել այնքան սիրելի և այնքան պոետական աստվածների պատկերումից: Բայց կասկածից վեր էր, որ Բատտիստան չի ցանկանա նույնիսկ լսել այդ աստվածների մասին, որոնք նրան ոչ այլ ինչ են թվալու, եթե ոչ անմիտ դատարկաբաններ, մտահոգված այնպիսի հարցերի լուծումով, որոնք հիանալի կարող էին լուծել նաև իրենք՝ գործող անձինք: Իսկ ինչ Ռայնգոլդին է վերաբերում, ապա հոգեբանական ֆիլմի կապակցությամբ նրա արած կասկածելի ակնարկությունը ոչ մի լավ բան չէր կանխագուշակում աստվածների համար. պսիխոլոգիզմը, ինքնըստինքյան հասկանալի է, բացասում էր ճակատագրի հասկացողությունն ու աստվածային միջամտությունը: Կա-

վագույն դեպքում, ճակատագրի անխուսափելիությունը նա դիտում է մարդկային հոգու խորքում, այսպես կոչված ենթագիտակցության մթին անկյուններում: Այդ պատճառով էլ աստվածներն ավելորդ են, նրանք ոչ բեմական էֆեկտ ունեն և ոչ էլ հոգեբանական են... Ես այդ բոլորի մասին մտածում էի մի տեսակ հոգնած ու խառնաշփոթ մտքերով: Ժամանակ առ ժամանակ, նայում էի առջևս դրված գրամեքենային և ինքս ինձ ասում, որ պետք է շարունակեմ աշխատանքը, բայց, այնուամենայնիվ, շարունակելն ինձ չէր հաջողվում, ես մատս անգամ չէի կարողանում շարժել: Մտքերի մեջ խորասուզված՝ ես անշարժ նստել էի գրասեղանիս առաջ և հայացքս հառել դիմացիս դատարկությունը: Իրականում այնքան չէի խորհում, որքան ճգնում էի իմաստավորել այն բոլոր հակասական և տհաճ զգացումները, որոնք թախիժ ու սառնություն էին լցրել իմ մեջ: Սակայն ես այնքան էի ընկրճված, այնպիսի մի խոնջություն էր իջել վրաս ու համակել ինձ այնպիսի խուլ մի վրդովմունք, որ ինքս անգամ չէի կարողանում որոշել, թե ինչ է կատարվում իմ հոգու խորքում: Եվ հանկարծ, ինչպես բոլորովին անսպասելի պղպջակի ձևով անդորրված լճի մակերեսն է դուրս ելնում ով գիտե ինչքան ժամանակ ջրի տակ ինչ-որ տեղ մնացած օդը, այդպես էլ իմ գլխում մի միտք ծագեց. «Այժմ ես պետք է «Ողիսականը» այնպիսի կինեմատոգրաֆիական ոչնչացնող կրճատումների ենթարկեմ... ինչպիսի կրճատումների ենթարկվում են սովորաբար գեղարվեստական ստեղծագործությունները էկրանացման ժամանակ... իսկ երբ սցենարը արդեն պատրաստ լինի, այս գիրքը նորից կվերադառնա իր պահարանը, կմտնի մյուս գրքերի շարքը, որոնք ինձ նույնպես ծառայություն են մատուցել ուրիշ սցենարներ գրելիս... Եվ մի քանի տարի հետո, երբ ես դարձյալ փնտրեմ որևէ գիրք, որպեսզի նորից այլանդակեմ մի ուրիշ սցենարի համար, կրկին իմ աչքը կընկնի «Ողիսականին», և ես ինձ կասեմ. «Հա՛ա՛, սա այն գիրքն է, որը տարիներ առաջ ես Ռայնգոլդի հետ դարձնում էի սցենար... Բայց որից բան դուրս չեկավ... բան դուրս չեկավ այն ժամանակ, երբ մենք ամիսներ շարունակ առավոտից մինչև իրիկուն ամեն օր խոսում էինք Ողիսակսի, Պենելոպեի, կիկլոպների, Կիրկեի և ծովահարսերի մա-

սին... և բան դուրս չեկավ, որովհետև... որովհետև փող չկար»։ Այս մտքի վրա ես մի ավելորդ անգամ զգացի, թե ինչպես է իմ մեջ նորից գլուխ բարձրացնում խորին մի նողկանք դեպի այն արհեստը, որով ես զբաղվում էի հարկադրաբար։ Եվ նորից սուր ցավով նկատեցի, որ այդ նողկանքը ծնունդ է առնում իմ այն հաստատ համոզմունքից, որ էմիլիան այլևս ինձ չի սիրում։ Մինչև հիմա ես աշխատում էի էմիլիայի համար, միայն ու միայն էմիլիայի, իսկ երբ զգացի, որ նա արդեն դադարել է ինձ սիրելուց, իմ աշխատանքն ինձ համար դարձավ բոլորովին աննպատակ։

Չեմ կարող ասել, թե ինչքան ժամանակ էի այդպես անշարժ և աթոռին գամված մնացել, գրամեքենան դրած առջև և հայացքս սևեռած լուսամուտին։ Վերջապես լսեցի, թե ինչպես հեռվում մուտքի դուռը շրխկաց, իսկ փոքր-ինչ հետո հյուրասենյակից ականջիս հասան ոտնաձայներ։ Ես հասկացա, որ էմիլիան վերադարձել է, սակայն տեղիցս շարժվեցի։ Քիչ անց բացվեց իմ աշխատասենյակի դուռը, և էմիլիան հետևիցս հարցրեց.

— Դու այստե՞ղ ես։ Այդ ի՞նչ ես անում։ Աշխատո՞ւմ ես։ Ես շրջվեցի։

էմիլիան կանգնել էր շեմքին, գլխարկը դեռ չէր հանել, իսկ ձեռքին մի փաթեթ կար։ Ես առանց երկար մտածելու, իսկույն կեթ այնպիսի թեթևությամբ պատասխանեցի, որ այդքան կասկածներից ու մտորումներից հետո նույնիսկ ինքս դարձաքա.

— Չէ, չեմ աշխատում... պարզապես մտածում էի ընդունե՞մ, թե՞ չընդունեմ Բատտիստայի համար նոր սցենար գրելու առաջարկը։

էմիլիան դուռը ծածկեց, մոտեցավ ինձ և ոտքի վրա մնաց սեղանի մոտ կանգնած։

— Բատտիստայի մո՞տ էիր։

— Այո։

— Համաձայնության չեկա՞ք... Քի՞չ է տալիս։

— Չէ, տալը բավական շատ է տալիս... և համաձայնության արդեն եկել ենք։

— Այն դեպքում ի՞նչ ես մտածում... Դուցե սյուժե՞ն քեզ դուր չի գալիս։

— Չէ, սյուժեն լավն է:

— Ի՞նչ սյուժե է:

Նախքան պատասխանելը, ես մի պահ նայեցի նրան՝ էմիլիան սովորականի նման մտացրիվ ու անտարբեր էր թվում. երևում էր, որ նա ինձ հետ խոսում է ելնելով իր պարտականութունից:

— «Ողիսականն է», — կարճ պատասխանեցի ես:

էմիլիան փաթեթը դրեց սեղանին, ձեռքը վեր տարավ, զգուշաբար վերցրեց գլխարկը, ապա թեթևորեն ցնցեց գլուխը, որպեսզի մազերը խոփվ տա: Սակայն նրա դեմքին ոչ մի արտահայտություն չկար, իսկ հայացքը առաջվա նման ցրված էր. նա կամ չհասկացավ, որ խոսքը նշանավոր պոեմի մասին է, կամ էլ այդ վերնագիրը, որը, ըստ երևույթին, ամենահավանականն էր, անծանոթ շլինելով հանդերձ, այնուամենայնիվ, նրան ոչինչ չէր ասում:

— Ուրեմն, բանն ինչո՞ւմն է, — հարցրեց նա, գրեթե համբերությունը կորցրած, — քեզ դուր չի՞ գալիս:

— Ես քեզ ասացի, որ դուր է գալիս:

— Այդ այն «Ողիսականը» չէ՞, որ դպրոցներում անցնում են: Իսկ ինչո՞ւ չես ուզում վերցնել:

— Որովհետև այդ գործով առհասարակ այլևս չեմ ուզում զբաղվել:

— Բայց չէ՞ որ հենց այսօր առավոտյան ես դու քո համաձայնությունը տվել:

Այստեղ ես հանկարծ զգացի, որ վրա է հասել նոր և այս անգամ արդեն վճռական բացատրության ժամը: Ես տեղիցս ցատկեցի, ձեռքս գցեցի նրա թևին և ասացի.

— Գնանք մյուս սենյակ, ես քեզ հետ խոսելիք ունեմ:

էմիլիան վախեցավ, բայց գուցե ոչ այնքան իմ ասելու եղանակից, որքան թևը կոպտորեն բռնելուց և ջղաձիգ սեղմումից:

— Քեզ ի՞նչ է պատահել... հո չե՞ս գժվել:

— Ոչ, չեմ գժվել, գնանք մյուս սենյակ, խոսենք:

Այդ ասելով, ես քարշ տվի էմիլիային, որը ամեն կերպ դիմադրում էր ինձ, դուրս տարա իմ աշխատասենյակից, բացեցի հյուրասենյակի դուռը, հրեցի նրան և գցեցի բազկաթոռներից մեկի վրա.

— Նստիր այստեղ:

Ես ինքս իմ հերթին նույնպես նստեցի նրա դիմաց և ասացի.

— Հիմա արդեն կխոսենք:

Էմիլիան դեռ վախեցած ու անվստահ ինձ էր նայում:

— Դե խոսիր, ես քեզ լսում եմ:

Ես սառը և անկիրք ձայնով սկսեցի.

— Հիշո՞ւմ ես, երեկ քեզ ասացի, որ ես այդ սցենարը գրելու ցանկությունն չունեմ, քանի որ վստահ չեմ, թե դու ինձ սիրում ես... իսկ դու պատասխանեցիր, որ ինձ սիրում ես և խորհուրդ տվիր շհրաժարվել այդ գործից... Ճի՞շտ է:

— Այո, ճիշտ է:

— Շատ լավ,— հայտարարեցի ես վճռականորեն,— իսկ ես գտնում եմ, որ դու ստում ես... չեմ կարող ասել ինչու, գուցե կարեկցանքից դրդված, գուցե քո օգուտի համար...

— Ի՞նչ օգուտի մասին է խոսքը,— զայրույթով ընդհատեց նա ինձ:

— Այն օգուտի,— բացատրեցի ես,— որ կարող ես մնալ այս բնակարանում, որը քեզ այնքան դուր է գալիս:

Էմիլիայի մոտ առաջացած ռեակցիան իր խստությամբ ինձ ապշեցրեց: Նա տեղից կանգնեց և համարյա բղավելով հարցրեց.

— Այդ ո՞վ է քեզ ասել... ինձ համար այս բնակարանը ոչ մի կարևորություն չունի... բացարձակորեն ոչ մի... ես պատրաստ եմ թեկուզ այս րոպեին նորից վերադառնալ վարձու տրվող կահավորված սենյակ... Երևում է, որ ինձ լավ չես ճանաչում... Ամենևին էլ ինձ պետք չէ քո բնակարանը...

Էմիլիայի խոսքերը ինձ այնպիսի սուր ցավ պատճառեցին, ինչպիսին կարող է զգալ մի մարդ, որը տեսնում է, թե ինչպես են արհամարհանքով մերժում իր տված այն նվերը, որի համար նա այնքան մեծ զոհաբերություններ է արել: Բացի այդ բոլորից, բնակարանը, որի մասին արդեն էմիլիան խոսում էր այդպիսի արհամարհանքով, իր մեջ ամփոփում էր վերջին երկու տարիների իմ կյանքը. այս բնակարանի սիրույն էր, որ ես թողեցի ինձ համար այնքան սիրելի իմ աշխատանքը, մերժեցի բոլոր իմ ցանկությունները, որոնք այն-

քան թանկ էին ինձ համար: Գրեթե ինքս իմ ականջներին չհավատալով, թույլ, հազիվ լսելի ձայնով հարցրի նրան.

— Քեզ համար ոչ մի կարևորություն չունի՞:

— Ոչ, բացարձակապես ոչ մի,— նրա ձայնը գրեթե դողում էր ինչ-որ անհասկանալի կատաղությունից ու արհամարհանքից,— ոչ մի... հասկացա՞ր... ոչ մի:

— Բայց երեկ դու ասում էիր, որ կուզենայիր այս բնակարանում մնալ:

— Ես ասում էի քեզ հաճույք պատճառելու համար... կարծում էի, որ քեզ համար դա շատ թանկ է:

Ես զարմանքից մոլորվեցի. ուրեմն, այդ ես, թատերական իմ լավագույն կարողություններն ու ձգտումները զոհաբերողս, ես, որ իսկապես երբեք իմ կյանքում ոչ մի կարևորություն չեմ տվել նման բաների, ինքս եմ ամեն բանից վեր ու թանկ գնահատում բնակարանը: Կռահելով, որ էմիլիան ինձ համար անհայտ ինչ-որ պատճառով սկսում է անբարեխղճորեն հետս վիճել, ես մտածեցի, որ ոչ մի իմաստ չունի բորբոքել նրա զայրույթը, առարկելով նրան և հիշեցնելով այն, ինչը առաջ նա այնքան բաղձում էր, իսկ այժմ մերժում է այդպիսի համառությունը: Ասեմք, բնակարանը միայն մի շնչին մաս էր կազմում, կարևորն այստեղ բոլորովին ուրիշ բան էր:

— Արի բնակարանը հանգիստ թողնենք,— ասացի ես աշխատելով տիրապետել ձայնիս և պահպանել հաշտվողական ու խելամիտ մի տոն,— ես բնակարանի մասին չէ, որ ուզում էի խոսել քեզ հետ, այլ քո իմ հանդեպ ունեցած զգացմունքների մասին... Դու երեկ, շգիտեմ ինչ պատճառով, ասում էիր, ասելով, որ իբր, ինձ սիրում ես... դու խաբում էիր, և հենց դա է պատճառը, որ ես չեմ ուզում կինոյում աշխատել... որովհետև միայն ու միայն քեզ համար էր, որ ես կատարում էի այդ աշխատանքը... Իսկ եթե դու ինձ այլևս չես սիրում, ուրեմն այդ աշխատանքը շարունակելու կարիքը չունեմ:

— Բայց ո՞վ է քեզ ասել, թե ես խաբում եմ: Դու ի՞նչ հիմք ունես այդպես կարծելու:

— Ոչ մի հիմք և բոլոր հիմքերը... Մենք երեկ այս մասին արդեն խոսել ենք և նորից կրկնելու ցանկություն չու-

նեմ... դա այնպիսի մի բան է, որ չի բացատրվում, դա միայն զգացվում է... և ես զգում եմ, որ դու այլևս ինձ չես սիրում...

Էմիլիան իրենից անկախ մի շարժում արեց, և խոսակցուիթյան ընթացքում առաջին անգամ նրա խոսքերը հնչեցին անկեղծուիթյամբ.

— Ինչո՞ւ ես ուզում ամեն ինչ իմանալ,— տխուր ու հոգնած ձայնով հարցրեց նա հանկարծ, նայելով դեպի լուսամուտը:— Ինչի՞ համար... թող անցնի գնա... Այդպես ավելի լավ կլինի մեր երկուսի համար էլ:

— Ուրեմն,— ձեռք չէի քաշում ես,— դու ընդունում ես, որ ես կարող եմ իրավացի՞ լինել:

— Ես ոչինչ չեմ ընդունում... ես ուզում եմ միայն հանգիստ մնալ... հանգիստ թող ինձ:— Այդ վերջին խոսքերում գրեթե լացի ձայն զգացվեց: Եվ նա իսկույն վրա բերեց.— իսկ հիմա ես գնում եմ... գնում եմ շորերս փոխեմ:

Նա ոտքի ելավ և շարժվեց դեպի դուռը: Բայց ես, ձեռքս գցելով նրա դաստակին, իսկույն կանգնեցրի: Դա ինձ համար արդեն սովորական դարձած շարժում էր, որը ես օգտագործել էի նաև առաջ. նա տեղից կանգնում էր և ասում, որ ինքը արդեն պետք է գնա, իսկ ես, երբ նա անցնում էր առջևիցս, ձեռքս գցում էի ու բռնում նրա երկար ու նրբին դաստակը: Բայց այն ժամանակ ես նրան բռնում և թույլ չէի տալիս գնալու, որովհետև հանկարծ իմ մեջ ցանկուիթյուն էր արթնանում, իսկ նա, զգալով այդ, հնազանդորեն կանգ էր առնում և սպասում իմ հաջորդ գործողուիթյանը: Ես գրկում էի նրա ոտքերը, դեմքս սեղմում զգեստներին, ապա քաշում ու նրստեցնում էի ծնկներին: Այդ ամենը, որոշ դիմադրուիթյունից ու փաղաքշանքներից հետո, վերջանում էր խելահեղ գրկախառնուիթյուններով, որը տեղի էր ունենում հենց այնտեղ, որտեղ գտնվում էինք, կողքներիս բազկաթոռին կամ բազմոցի վրա: Սակայն այս անգամ իմ դիտավորուիթյունը բուլորովին ուրիշ էր, որը ես չէի կարող շնչել առանց խորին դառնուիթյան: Էմիլիան չըմբոստացավ, ձեռքիցս դուրս պրծնելու ճիգեր չգործադրեց, նա կանգնեց իմ կողքին և, վերից վար նայելով, հարցրեց.

— Մի խոսքով, չի՞ կարելի արդյոք իմանալ, թե դու ի՞նչ ես ուզում ինձանից:

— Ճշմարտությո՞ւն:

— Դու զոռով ուզում ես, որ մեր հարաբերությունները անպայման փշանան... ահա թե ինչ է քո ուզածը:

— Ուրեմն, դու համոզված ես, որ այդ ճշմարտությունը ինձ հաճույք չի՞ պատճառի:

— Ես ոչինչ էլ համոզված չեմ:

— Դու ինքդ ասացիր, որ մեր հարաբերությունները կփրչանան:

— Ես դա հենց այնպես ասացի, մի բան ասած լինելու համր... Իսկ հիմա թող գնամ:

Սակայն ձեռքիցս դուրս պրծնելու փորձ չէր անում, նույն-իսկ չէր շարժվում, պարզապես սպասում էր, որ ինքս բաց թողնեմ իրեն: Ես մտածում էի, որ ինձ համար շատ ավելի գերադասելի կլինի թերևս որևէ կատաղի բռնկում, քան այս սառը և արհամարհական համբերությունը: Գրեթե հույս ունենալով, որ նրա մեջ կարող եմ մի ինչ-որ ջերմ զգացում արթնացնել, ես դիմեցի իմ նախկին ձևին, բաց թողի ձեռքերը և ոտքերը գրկեցի, ինչպես անում էի մի ժամանակ՝ սերվայելելուց առաջ: Էմիլիայի հագին երկար ու բազմաթիվ ծալքերով շատ լայն մի շրջազգեստ կար: Իմ ձեռքերի տակ այդ շրջազգեստը կպավ նրա գեղեցիկ, ուղիղ, մկանուտ և ձիգ ոտքերին, ինչպես իջեցրած առագաստն է նավակայմին կրպչում: Հանկարծ իմ մեջ նրան տիրանալու անհաղթահարելի մի ցանկություն առաջացավ, որը, այնքան ինքնաբուխ լինելով հանդերձ, ուղեկցվում էր անիրագործելիության այնպիսի մի պարզ գիտակցությամբ, որից նույնիսկ ցավ զգացի: Աչքերս վեր բարձրացնելով, ես ասացի.~

— Էմիլիա, ի՞նչ ես թաքցնում ինձանից:

— Ոչ մի բան... Իսկ հիմա թող գնամ:

Ես երկու ձեռքով ավելի ամուր գրկեցի նրա ոտքերը, երեսս սեղմելով գոգին: Սովորաբար, երբ ես այդպես էի անում, զգում էի, թե ինչպես է ինձ համար այնքան սիրելի նրա մեծ ձեռքը իջնում իմ գլխին և անշտապ ու քնքշորեն շոյում մազերս: Դա նրա փոխադարձ հուզմունքի և համաձայնության նշանն էր: Սակայն այս անգամ նրա ձեռքը մնաց անտարբեր

ու անշարժ կախված: էմիլիայի այդ վերաբերմունքը, որ այն-
քան տարբերվում էր նախկինից, ուղղակի խոցեց իմ սիրտը:
Ես բաց թողի նրան, բայց կրկին բռնելով ձեռքը, բղավեցի.

— Ոչ, դու չես գնա... դու պետք է ինձ ճշմարտությունն
ասես... Հենց այս րոպեին... Դու այստեղից չես գնա, մինչև
ինձ չասես ճշմարտությունը:

էմիլիան կանգնել ու շարունակում էր վերից վար նայել
ինձ: Ես նրա դեմքը չէի տեսնում, բայց ինձ թվում էր, թե
զգում եմ իմ խոնարհված գլխին հառած նրա անվճռական
հայացքը: Վերջապես նա ասաց.

— Էհ, ինչ արած, եթե այդքան ուզում ես... Ես ցանկա-
նում էի, որ ամեն ինչ այսպես էլ շարունակվեր... ինչպես
հիմա... բայց քո ուզածն այն է, որ ես անպայման ճշմար-
տությունն ասեմ... ինքդ ես այդ ուզում, ուրեմն լսիր... իսկա-
պես, ես այլևս քեզ չեմ սիրում... ահա քեզ ճշմարտու-
թյունը:

Կարելի է երևակայությամբ պատկերացնել անհամար
տհաճ հեռանկարներ և համոզված լինել, որ իրականում հենց
այդպես էլ նրանք կկատարվեն: Սակայն երբ մեր այդ ենթա-
դրությունները կամ, ավելի լավ է ասենք, մեր համոզվա-
ծությունը հաստատվում է, դա մենք այնքան անսպասելի ենք
համարում և ընդունում ցավագին, որ թվում է, թե այդպիսի
բան մեր մտքով երբեք չէր էլ անցել: Փաստորեն ես վաղուց
արդեն գիտեի, որ էմիլիան այլևս ինձ չի սիրում: Բայց երբ
այդ լսեցի նրա բերանից, թվաց, թե արյունը երակներիս
մեջ կանգ առավ: էմիլիան այլևս ինձ չի սիրում. այս բառերը,
որոնք մտովի այնքան եմ կրկնել, այժմ, երբ ելնում էին
նրա շուրթերից, ստացել էին բոլորովին նոր իմաստ: Հիմա
դրանք արդեն փաստ էին և ոչ թե ենթադրություն, որը իր
հերթին նույնպես գրեթե հաստատ համոզմունք էր: Նրանք
այժմ ձեռք էին բերել այնպիսի կշիռ, դարձել էին այնքան
ծավալուն, ինչպիսին երբեք չէին եղել իմ պատկերացմամբ:
Ես արդեն լավ չեմ հիշում, թե ինչպես ընդունեցի էմիլիայի
այդ խոստովանությունը: Հնարավոր է, որ երբ ականջիս հա-
սան նրա այդ խոսքերը, ես ցնցվեցի, ինչպես սառը ցնցուղ
ընդունող մարդը. թեև նա գիտե, որ վրան թափվող ջուրը
սառն է լինելու, այնուամենայնիվ շիթերի տակն ընկնելիս

այնպես է ցնցվում, կարծես իր համար բոլորովին անսպասելի էր: Հետո աշխատեցի տիրապետել ինձ և շկորցնել բանականությունս, ապա ինչքան կարող էի մեղմ ասացի նրան.

— Արի այստեղ... նստիր և ինձ բացատրիր, թե ի՞նչն է պատճառը, որ այլևս ինձ չես սիրում:

Հմիլիան հնազանդորեն նորից նստեց, բայց այս անգամ արդեն բազմոցին և փոքր-ինչ զայրույթով պատասխանեց.

— Բացատրելու ոչ մի բան չկա... քեզ այլևս չեմ սիրում, ահա այն ամենը, ինչ կարող եմ ասել:

Ես զգում էի, որ ինչքան շատ եմ աշխատում բանական երևալ, այնքան ավելի է մսիս մեջ մխրճվում անասելի ցավ պատճառող փուշը: Ճգնանքով առաջացրած ժպիտը երեսիս՝ ես ասացի.

— Համենայն դեպս, համաձայնիր, որ դու պարտավոր ես ինձ որևէ բացատրություն տալու... Չէ՞ որ ծառայից անգամ հրաժարվելիս նրան բացատրում են պատճառը:

— Ես քեզ այլևս չեմ սիրում, ուրիշ ասելիք չունեմ:

— Բայց ինչո՞ւ... Չէ՞ որ դու ինձ սիրում էիր:

— Այո, սիրում էի... և շատ... բայց հիմա այլևս չեմ սիրում:

— Շա՞տ էիր սիրում:

— Այո, շատ, բայց հիմա ամեն ինչ վերջացած է:

— Իսկ ինչո՞ւ: Չէ՞ որ դա մի պատճառ պետք է ունենա:

— Գուցե և կա... Բայց ես չեմ կարող բացատրել... Ես միայն գիտեմ, որ քեզ այլևս չեմ սիրում:

— Բավական է նույն բանը այդքան կրկնես, — ինձանից անկախ ասացի ես, ձայնս բարձրացնելով:

— Դու ինքդ ես ինձ կրկնել տալիս... Դու չես հասկանում իմ ասածը, և ես ստիպված եմ անընդհատ նույնը կրկնել:

— Այժմ արդեն հասկացա:

Կոություն տիրեց: Հմիլիան հիմա արդեն մի սիգարետ էր վառել և, ծխելով, նայում էր ցած: Ես գլուխս կախել էի և առել ափերիս մեջ: Վերջապես ասացի.

— Իսկ եթե ես ասեմ պատճառը, դու կխոստովանե՞ս:

— Ես ինքս չգիտեմ պատճառը:

— Բայց եթե ես ասեմ, դու գոնե կխոստովանե՞ս դա է, թե ոչ:

— Լավ, ասա տեսնենք:

Խոցված նրա անտարբեր տոնից և այն ցանկությունից, որով նա աշխատում էր որքան կարելի է շուտ ազատել գլուխը այդ խոսակցությունից, ես ուզում էի բղավել. «Չհամարձակվես այդ ձևով խոսել ինձ հետ»:— Բայց զսպեցի ինձ և, աշխատելով պահպանել իմ նախկին խոհեմ տոնը, սկսեցի.

— Դու հիշո՞ւմ ես այն աղջկան, որը մի քանի ամիս առաջ մեր տուն էր գալիս՝ սցենարը մեքենագրելու... այն մեքենագրող աղջկան... դու ներս մտար այն ժամանակ, երբ մենք համբուրվում էինք... դա իմ կողմից մի հիմար թուլություն էր... բայց երդվում եմ քեզ, որ այդ համբուլը առաջինն ու վերջինն է եղել... Դրանից հետո ես նրան այլևս չեմ էլ հանդիպել... Դե հիմա անկեղծորեն ասա ինձ, մի՞թե այդ համբուլը շեղավ քո ինձնից հեռանալու պատճառը... Ճշմարիտն ասա... այդ համբուլից հետո՞ չէր, որ դու սկսեցիր այլևս ինձ չսիրել:

Այդ ասելիս ես ուշադրությամբ նայում էի էմիլիային: Սկզբում նրա դեմքին ինչ-որ զարմանքի արտահայտություն երևաց, հետո նա բացասաբար այնպես օրորեց գլուխը, որ կարծես իմ ենթադրությունը սկզբից մինչև վերջը անհեթեթություն էր: Հետո ես շատ պարզորոշ տեսա, թե ինչպես գլխում ծագած ինչ-որ մտքից նրա դեմքի արտահայտությունը միանգամից փոխվեց:

— Էհ, ասենք թե այդ համբուլն էր պատճառը... իսկ հիմա, երբ դու այդ իմացար, քեզ արդեն լա՞վ ես զգում, հանգստացա՞ր:

Ես իսկույն կեթ զգացի, որ պատճառը ամենևին էլ այդ համբուլը չի եղել, ինչպես նա էր այժմ աշխատում համոզել ինձ:

Պարզ երևում էր, որ առաջին վայրկյանին էմիլիային պարզապես զարմանք էր պատճառել իմ ենթադրությունը, որը այնքան հեռու էր ճշմարտությունից, և ապա, վայրկենապես իրեն հաշիվ տալուց հետո նա եկել էր այն եզրակացության, որ իրեն ձեռնտու է այդ հարցում համաձայնել ինձ հետ: Ես անմիջապես մտածեցի, որ էմիլիայի ինձ այլևս չսիրելու պատճառը պետք է որ շատ ավելի լուրջ լինի, քան իրենից ոչինչ չներկայացնող այդ համբուլը: Ըստ երևույթին, դա

մի պատճառ էր, որը նա չէր ուզում բացել իմ առջև սոսկ այն բանի համար, որ իմ հանդեպ նրա տաժաժ հարգանքը դեռ ամբողջովին չէր մեռել: Ես գիտեի, որ էմիլիան վատ ու շարամիտ կին չէ և չի սիրում որևէ մեկին վիրավորել: Ինչպես երևում էր, մեր գժտության իսկական պատճառը նա ինձ համար վիրավորական էր համարում:

Ես շատ մեղմորեն ասացի.

— Ճիշտ չէ, պատճառը ամենևին էլ համբույրը չէ:

էմիլիան զարմացավ.

— Իսկ ինչո՞ւ... Չէ որ ես ասացի, որ դա է:

— Ոչ, համբույրը չէ պատճառը... պատճառը ինչ-որ ուրիշ բան է:

— Չեմ հասկանում, դրանով ինչ ես ուզում ասել:

— Դու այդ հիանալի հասկանում ես:

— Ոչ, չեմ հասկանում, ազնիվ խոսք, չեմ հասկանում:

— Իսկ ես ասում եմ, որ հասկանում ես:

էմիլիան մի պահ համբերությունից դուրս եկավ, բայց այդ իսկույն թաքցնելով, իրեն հատուկ գրեթե մայրական հանդիմանանքով ասաց.

— Ախր դու ինչո՞ւ ես ուզում այդ բոլորն իմանալ... Ի՞նչ ձեռի մարդ ես դու... ինչո՞ւ ես ամեն ինչ այդքան քչփորում... ինչի՞դ է պետք:

— Ես ուզում եմ ճշմարտությունն իմանալ, ինչպիսին էլ ուզում է լինի դա... Ամենավատ ճշմարտությունն ինձ համար ավելի գերադասելի է, քան կեղծիքը... Բացի դրանից, եթե դու ինձ ճշմարտությունը շասես, ով գիտե, թե ես ինչեր կարող եմ մտածել... մտքովս կարող է հազար ու մի բան անցնել:

Նա մի պահ լուռ և ոչ սովորական հայացքով ինձ նայեց:

— Ինչի՞դ է պետք այդ բոլորը... — նորից շարունակեց նա, — խիղճդ հանգիստ է, վերջացավ գնաց:

— Ի՞մ խիղճը, իհարկե, հանգիստ է:

— Այդ դեպքում էլ քեզ ի՞նչ մնացածը:

— Ուրեմն, ճի՞շտ է... — ձեռք չէի քաշում ես, — ուրեմն, ինչ-որ մի շատ վատ բա՞ն կա:

— Ես այդպիսի բան չասացի... ես ասացի միայն, որ

Եթե քո խիղճը հանգիստ է, ուրեմն մնացածը քեզ չի կարող
անհանգստութիւն պատճառել:

— Իմ խիղճը հանգիստ է, դա ճիշտ է... Բայց այդ ոչինչ
չի նշանակում... Երբեմն խիղճը նույնպես խաբում է:

— Բայց ոչ քոնը, ճիշտ է՞,— էմիլիան այդ ասաց շատ
նուրբ հեզնանքով, որը, այնուամենայնիվ, իմ աչքից շվրի-
պեց և թվաց ավելի վիրավորական, քան իր անտարբերու-
թիւնը:

— Իմը նույնպես:

— Դե լավ, ես գնում եմ,— անսպասելիորեն ասաց
էմիլիան,— ուրիշ բան չունե՞ս ասելու:

— Ոչ, դու չես գնա, մինչև ինձ ճշմարտութիւնը չասես:

— Ես արդեն քեզ ասացի ճշմարտութիւնը, դա այն է, որ
ես այլևս քեզ չեմ սիրում:

Ես չէի կարծում, թե այդ մի քանի բառերը այդքան խորը
կխոցեն իմ սիրտը: Եվ ամբողջովին սփրթնած ողբագին
աղերսանքով ասացի էմիլիային.

— Ես արդեն խնդրել եմ քեզ, որ այլևս այդ չասես... դա
ինձ ահավոր ցավ է պատճառում:

— Դու ինքդ ես ինձ ստիպում անընդհատ կրկնել... դա
ինձ նույնպես մեծ հաճույք չի պատճառում:

— Ինչո՞ւ ես ուզում, որ ես հավատամ, թե դու ինձ այլևս
չես սիրում այդ համբույրի պատճառով,— շարունակեցի ես,
հետևելով մտքերիս ընթացքին,— ի՞նչ է իրենից ներկայաց-
նում համբույրը, ոչինչ... դա պարզապես մի թեթևամիտ աղ-
ջիկ էր, որին այն օրից հետո ես այլևս չեմ էլ տեսել... դու
այս բաները շատ լավ ես հասկանում ու գիտես... ո՛չ, ճշմար-
տութիւնն ուրիշ է, այն է, որ դու այլևս ինձ չես սիրում:—
Այժմ ես արդեն ոչ թե խոսում էի, այլ վանկ-վանկ արտա-
սանում բառերը, աշխատելով գոնե մի կերպ արտահայտել
իմ խառնիճաղանջ ու մթին կռահումները,— իսկ չես սիրում,
որովհետև ինչ-որ բան է պատահել... մի այնպիսի բան, որը
փոխել է իմ նկատմամբ ունեցած քո վերաբերմունքը... կամ
ավելին, մի բան, որը նախ՝ փոխել է տվել քո վերաբերմուն-
քը, իսկ հետո՝ նաև քո զգացմունքները:

— Պետք է ասել, որ դու բավականին խելոք ես,— ան-
կեղծորեն դարմացած ու համարյա գովեստով ասաց էմիլիան:

— Ուրեմն, ասածս ճիշտ է:

— Ես շասացի, որ ճիշտ է... ասացի, որ բավականին խելոք ես:

Ես անընդհատ որոնումներ էի անում և զգում էի, որ ճշմարտությունը արդեն, ինչպես ասում են, լեզվիս ծայրին է:

— Մի խոսքով, նախքան ինչ-որ բան պատահելը, դու իմ մասին լավ կարծիքի էիր, — ձեռք չէի քաշում ես, — իսկ հետո փոխեցիր կարծիքդ, սկսեցիր վատ մտածել, որի պատճառով էլ դադարեցիր ինձ սիրելուց, այդպե՞ս է:

— Կարող է պատահել, որ հենց այդպես էլ եղել է:

Վայրկենական զայրույթը համակեց ինձ: Ես զգացի, որ իմ խոհեմությունը կեղծ է: Ի՞նչ խոհեմության մասին էր խոսքը. ես տառապում էի, տառապում էի սուր ցավով... Հուսահատություն, կատաղություն. ամեն ինչ խառնվել էր իրար, ես կործանված էի... Մի՞թե այս բոլորից հետո կարող էր խոհեմություն լինել: Ես չեմ կարող ասել, թե ինչ տեղի ունեցավ ինձ հետ այն րոպեին: Առանց ինձ հաշիվ տալու, թե ինչ եմ անում, ոտքի ցատկելով, բղավեցի.

— Դու չկարծես, թե ես այստեղ եմ եկել դատարկաբանության համար: — Եվ նետվելով դեպի էմիլիան, ձեռքս զցեցի նրա կոկորդին և, տապալելով բազկաթոռի վրա, ուղղակի երեսին բղավեցի.

— Ասա ճշմարտությունը... ասա այս րոպեիս, թե չէ...

Իմ տակին թպրտում էր նրա մեծ և սքանչելի մարմինը, որ ես այնքան սիրում էի: Նա ամբողջովին կարմրել էր ու մի տեսակ ուռել, ըստ երևույթին, ես նրա կոկորդը սեղմում էի ամբողջ ուժով: Հանկարծ զգացի, որ կատաղության մոլուցքից կուրացած, ուզում եմ նրան խեղդել:

— Ասա ինձ, վերջ ի վերջո, ճշմարտությունը, — կրկնելով այդ խոսքերը, ես մատներս է՛լ ավելի պրկեցի ու կրկնակի ուժով սեղմեցի նրա կոկորդը: Հանկարծ իմ գլխում մի միտք փայլատակեց. «Հիմա ես կսպանեմ նրան... բայց ավելի լավ է մեռնի, քան լինի իմ թշնամին»:

Ես զգացի, որ նա ճիզեր է գործ դնում ծնկով հարված հասցնելու փորիս, իսկապես էլ այդ հաջողվեց նրան. և այդ հարվածն այնքան էր կատաղի և ուժեղ, որ շունչս միանգամից կտրվեց: Այդ հարվածը ինձ նույնքան ցավ պատճառեց,

որքան և այն խոսքերը, երբ նա ասաց. «Ես այլևս քեզ չեմ սիրում»: Իսկապես որ դա թշնամու հարված էր, որը ամեն կերպ աշխատում է իր հակառակորդին որքան կարելի է մեծ ցավ պատճառել: Բայց նույն վայրկյանին ես զգացի, որ իմ մոլուցքը և նրան խեղդելու կատաղի ցանկությունը անցնում է: Նրան խեղդող ձեռքերս ես փոքր-ինչ թուլացրի և, դուրս պրծնելով, նա այնպիսի մի ուժով հրեց ինձ, որ քիչ մնաց բազմոցից ցած գլորվեի: Ես դեռ չէի հասցրել սթափվել, նա կատաղությամբ բղավեց իմ երեսին.

— Ես արհամարհում եմ քեզ... ասա թե որն է քո հանդեպ ունեցած իմ զգացմունքը, և ասա այն պատճառը, որի հետևանքով ես այլևս քեզ չեմ սիրում... Ես արհամարհում եմ քեզ և քո ամեն մի շփումից զզվանք եմ զգում... Ահա թե որն է ճշմարտությունը... Ես քեզ արհամարհում եմ... նողկում եմ քեզանից:

Ես տեղիցս վեր կացա: Աչքս կանգ առավ սեղանին դրված բյուրեղապակյա հսկայական ու ծանր մոխրամանի վրա: Նույն վայրկյանին նրան մեկնվեց նաև ձեռքս: Հմիլիան, ըստ երևույթին, կարծեց, թե ես ուզում եմ իրեն սպանել և, սարսափահար, ձեռքերով ծածկեց երեսն ու ճշաց: Սակայն իմ պահապան հրեշտակը օգնեց ինձ: Զգիտեմ ինչպես, կարողացա տիրապետել ինձ. մոխրամանը նորից դրի սեղանին և սենյակից դուրս եկա:

Գլուխ տասներորդ

Ինչպես արդեն ասել եմ, Հմիլիան կարգին կրթություն չէր ստացել: Նա ընդամենը տարրական դպրոցն էր ավարտել և մի քանի տարի սովորել էր միջնակարգ դպրոցում: Դրանից հետո սովորելը թողել էր և ձեռք բերել մեքենագրող-սղագրուհու մասնագիտություն: Տասնվեց տարեկան հասակից նա արդեն աշխատում էր ինչ-որ փաստաբանի գրասենյակում: Ճիշտ է, ինչպես ասում են, նա լավ ընտանիքից էր, այսինքն՝ մի ընտանիքից, որը անցյալում բավական հարուստ

է եղել և ինչ-որ կարողութիւններ է ունեցել Հոռմի շրջակայքում: Սակայն նրա պապը անհաջող առևտրական գործերից անանկացել էր, իսկ հայրը մինչև կյանքի վերջը մնացել էր ֆինանսների մինիստրութիւնում, որպէս շաքաչին պաշտոնյա: Այդպիսով, էմիլիան մեծացել էր աղքատութեան մեծ, և ինչպէս դաստիարակութեամբ, այնպէս էլ մտածելակերպով նրան կարելի էր համարել հասարակ մի կին: Ինչպէս հասարակ կանանցից շատերը, էմիլիան միշտ հույսը դնում էր իր առողջ դատողութեան վրա և այնքան խորն ու հաստատուն էր հավատում այդ դատողութեանը, որ երբեմն դա կարող էր հասնել հիմարութեան կամ գոնե սահմանափակութիւն թվալ: Սակայն ունենալով միայն ու միայն այդ առողջ դատողութեան զենքը, նա հանկարծ ինձ համար բոլորովին անհասկանալի հրաշքով երբեմն հիանալի և շատ ճիշտ դատողութիւններ էր անում, տալիս էր սուր և դիպուկ բնորոշումներ ու գնահատութիւններ, ինչպէս այդ կարողանում են անել հասարակ մարդիկ, մանավանդ որ նրանց գլուխը լցված չէ հազար ու մի տեսակ պայմանականութիւններով և նախապաշարումներով: Շատ բան էմիլիան ասում էր միայն այն պատճառով, որ դրանք մտածել էր ամենայն լրջութեամբ, անկեղծ և վերին աստիճանի շիփ-շիտակ: Եվ իսկապէս էլ, նրա խոսքերի մեջ հնչում էր ճշմարտութեան պարզ ու հստակ ձայնը: Սակայն շգիտակցելով իր դատողութիւնների ամբողջ ճշմարտութիւնը, նա դրանք չէր համարում բավականաչափ համոզեցուցիչ և իրեն հատուկ համեստութեամբ ամեն կերպ աշխատում էր դրանք հաստատող փաստարկներ բերել:

Այդ էր պատճառը, որ այն օրը, երբ բղավեց վրաս՝ թե «ես քեզ արհամարհում եմ», ես իսկույն համոզվեցի, որ եթե այդ խոսքերը ելնեին մի ուրիշ կնոջ շուրթերից, կարող էին ոչ մի արժեք չունենալ, բայց քանի որ դա ասում էր էմիլիան, ապա ուրեմն համապատասխանում է իր իսկական նշանակութեանը. էմիլիան իսկապէս էլ ինձ արհամարհում էր, բայց ես ոչինչ անել այլևս չէի կարող: Եթե էմիլիայի բնավորութիւնը ինձ նույնիսկ ծանոթ էլ չլիներ, միևնույն է, այդ խոսքերն ասելու նրա տոնը իմ մեջ ոչ մի կասկած չէր թողնի. այդպէս մարդն արտասանում է այն բառը, որը մինչ այդ, գուցե, երբեք նրա շուրթերից դուրս չի եկել, բայց երբ հան-

գամանքները հարկադրում են, գրեթե ինքնաբերաբար այն իսկույն դուրս է թռչում բառապաշարի ամենամուխ անկյուններից: Այդպիսի բաներ երբեմն կարելի է լսել գյուղացու շուրթերից, որ բազմաթիվ աղավաղված, մաշված և բարբառային բառերի կողքին հանկարծ օգտագործում է մի այնպիսի փայլուն արտահայտություն, որը իր բարոյական դատողության հստակության ու դիպուկության տեսակետից գուցե և չզարմացներ, եթե ելներ մի կրթված մարդու շուրթերից, բայց քանի որ դա արտասանողը գյուղացի է, պարզապես ապշեցնում է և թվում անհավատալի: «Ես արհամարհում եմ քեզ». այդ շորս բառը, որ այնպիսի դառնությամբ ես նշեցի, հնչում էին միանգամայն նույն ձևով, ինչպես բովանդակությամբ այնքան տարբեր մի ուրիշ շորս բառ, ոչ նա ինձ ասել էր առաջին անգամ սեր բացատրելիս. «Ես սիրում եմ քեզ»:

Ես այնքան էի համոզված այդ շորս բառի անկեղծությանն ու ճշմարտացիությանը, որ առանձնասենյակումս մնալով մենակ, սկսեցի այս ու այն կողմ քայլել, չկարողանալով անգամ կենտրոնանալ գոնե մի վայրկյան՝ որևէ բան մտածելու համար: Հուզմունքից ձեռքերս դողում էին, աչքերս շուրջ ու թափառում էին սենյակում, և ես չգիտեի ինչ անել: Էմիլիայի արտասանած այդ շորս բառը թվում էր փշերի նման մխրձվել էին իմ էության մեջ և, յուրաքանչյուր բոպե ավելի խորը գնալով, ինձ սոսկալի սուր և հետզհետե ավելի սաստկացող ցավ էին պատճառում: Սակայն բացի այդ սաստկացող ու տանջող ցավից, որ ես զգում էի այնքան որոշակի, ուրիշ ոչինչ ի վիճակի չէի ոչ զգալու և ոչ էլ հասկանալու: Ամենից շատ ես, իհարկե, տառապում էի այն գիտակցությունից, որ Էմիլիան ինձ այժմ ոչ միայն չի սիրում, այլև արհամարհում է: Բայց դրա հետ միասին ես ի վիճակի չէի գտնել մի պատճառ, թեկուզև ամենաաննշան, որը կարող էր արհամարհանք առաջացնելու առիթ հանդիսանալ: Ես մի կողմից զգում էի անարդարացիորեն ինձ հասցրած վիրավորանքի սուր ցավը, իսկ մյուս կողմից վախենում, մտածելով, որ գուցե իսկապես էլ Էմիլիան ինձ վիրավորել է ոչ առանց հիմքի, որ նրա իմ հանդեպ ունեցած արհամարհանքը հիմնըված է ինչ-որ օբյեկտիվ փաստերի վրա, որոնք թեև ինձ հա-

մար այնքան էլ տեսանելի չեն, բայց և այնպես ուրիշները տեսնում են ամենայն պարզությամբ: Մինչև հիմա ես ինձ համարում էի մի մարդ, որը լավ թե վատ, արժանի է հարգանքի, թող որ այդ հարգանքը խառնված լիներ ինչ-որ շափով կարեկցանքի հետ, ոչինչ չունեմ ասելու, մանավանդ որ ինձ առանձնապես հաջողակ մարդ համարել չեմ կարող, որին բախտը հաճախ ժպտում է, բայց որ ես կարող էի արժանի լինել արհամարհանքի, դա երբեք մտքովս անգամ չի անցել: Եվ ահա էմիլիայի այդ արտահայտությունը իմ մեջ լրիվ ոչնչացրեց այն պատկերացումը, որ ունեցել եմ իմ նկատմամբ, հարկադրելով առաջին անգամ կասկածելու, որ ես ինձ այնքան էլ լավ չեմ ճանաչում և իրավունք չունեմ ինքս իմ մասին դատողություններ անելու, որ ես հրապուրված եմ եղել ինձնով և միշտ մոլորվել եմ ինձ վերաբերող դատողությունների մեջ:

Վերջապես ես գնացի լոգասենյակ, գլուխս խրեցի ջրի ծորակի տակ, և սառը ջրի շիթերը հանգստացրին ինձ: Թվում էր, էմիլիայի խոսքերից ուղեղս այնպես է բռնկվել ու այրվում բոցերի մեջ, որ կարծես դյուրավառ նյութից լիներ: Ես լվացի երեսս, սանրվեցի, կապեցի փողկապս և ապա վերադարձա հյուրասենյակ: Սակայն պատուհանի մոտ գտնվող որմնախորշում բացած սեղանի տեսքը ինձ վրդովեցրեց: Մի՞թե այդ բոլորից հետո մենք կարող էինք սովորականի նման միասին սեղան նստել ուտելու այն սենյակում, որտեղ դեռ լսվում էր ինձ այնքան խոր վիրավորող ու ցնցող խոսքերի արձագանքը: Հենց այդ նույն րոպեին էմիլիան դուռը բացեց և արդեն իր սովորական անվրդով ու հանգիստ դեմքով ներս մտավ: Ես առանց նրան նայելու ասացի.

— Այսօր տանը ճաշելու ցանկություն չունեմ... աղախնին հայտնիր, որ մենք դուրս ենք գնում և շուտ հագնվիր... գնում ենք ռեստորան...

— Բայց չէ որ ճաշն արդեն պատրաստ է... — փոքր-ինչ զարմացած պատասխանեց էմիլիան, — հետո ի՞նչ պետք է անենք, թափե՞նք:

— Բավական է... — բղավեցի ես կատաղությամբ, — թափիր, ինչ ուզում ես արա, միայն թե շուտ հագնվիր, մենք տանը չենք ճաշելու:

Ես այդ ասում էի առանց նրա երեսին նայելու, և լսեցի թե ինչպես է մոթմոթում. «Սա ինչ ձև է»: Ապա դուրս եկավ, հետևից ծածկելով դուռը:

Մի քանի րոպեից հետո մենք տանից դուրս եկանք:

Նեղլիկ փողոցում, որի երկու կողմից պատշգամբավոր ճակատներով ժամանակակից ամառանոցներն էին ձգվում, նման մեր ապրած տանը, բազմաթիվ շքեղ մեքենաների շարքում մեզ էր սպասում նաև իմ փոքրիկ սակավաուժ ավտոմոբիլը, որը մեր բնակարանի նման վերջերս էի գնել և վճարի մնացած մասը հուլյս ունեի մարել սցենարների դիմաց իմ ապագա ստանալիքների հաշվին: Մեքենան ընդամենը մի քանի ամիս էր, ինչ ձեռք էի բերել, այդ պատճառով էլ դեռ չէր անցել գրեթե մանկական այն սնա:փառության զգացումը, որը սկզբնական շրջանում կարող է առաջ բերել այնպիսի մի հարմարավետություն, ինչպիսին մեքենան է: Սակայն այն երեկոյան, երբ մենք կողք-կողքի, բայց առանց իրար երեսի նայելու և լուռ գնում էինք դեպի մեքենան, ես մտածեցի. «Ահա ևս մի քան, հանուն որի, ինչպես և հանուն բնակարանի, ես զոհաբերեցի իմ բոլոր ձգտումները... և այդ զոհաբերությունը այժմ ոչ ոքի այլևս պետք չէ»: Եվ իսկապես էլ, ես այդ րոպեին զգացի այն պարզ ու անհեթեթ հակասությունը, որը գտնվում էր այդ փառահեղ, ամեն ինչով նոր ու թանկարժեք փողոցի, երրորդ հարկից իր լուսամուտներով մեզ նայող մեր բնակարանի, մի քանի մետր այն կողմը մեզ սպասող մեքենայի և իմ դժբախտության միջև, որի հետևանքով ավելորդ ու անպետք էին թվում այն ամենը, ինչ մենք ձեռք էինք բերել:

Նստելով դեկի մոտ, ես սպասեցի, որ էմիլիան նույնպես տեղավորվի, որից հետո ձեռքս մեկնեցի, որպեսզի դռնակը փակեմ: Այդ գործողությունը կատարելիս սովորաբար ես ձեռքով թեթևակի կաշում էի էմիլիայի ծնկներին կամ թե չէ, փոքր-ինչ թեքվելով, շուրթերս նրա այտին էի հպում: Սակայն այս անգամ, համարյա ինձանից անկախ, ես խուսափեցի նրան կաշելուց: Մեքենայի դռնակը թրխկոցով փակվեց, և մենք մի րոպե մնացինք լուռ ու անշարժ նստած: Հետո էմիլիան հարցրեց.

— Ո՞ւր ենք գնում:

Ես մի վայրկյան մտածելուց հետո իսկույն պատահական
մի տեղի անուն տվի.

— Գնում ենք Վիա Ապպիա:

Էմիլիան զարմանքով ասաց.

— Բայց հիմա Վիա Ապպիա գնալու համար դեռ շուտ է...
Նախ տարվա այս եղանակին ցուրտ կլինի, իսկ մյուս կողմից
էլ հիմա այնտեղ ոչ ոք չի լինի:

— Դա կարևոր չէ... ոչ ոք չի լինի, բայց մենք կլինենք:

Էմիլիան լռեց, իսկ ես մեքենան արագ քշեցի Վիա
Ապպիայի կողմը: Դուրս գալով մեր թաղամասից, կտրեցի
անցա քաղաքի կենտրոնը և ուղևորվեցի Վիա դեի Տրիոնֆի
ու Վիալե Պասսեջատա Արկելոջիկա ճանապարհով: Ահա վեր-
ջապես երևաց քաղաքի մամուռածածկ քարերով պարսպապա-
տը, իսկ նրանից այն կողմ՝ բանջարանոցները, պարտեզնե-
րը և Վիա Ապպիայի սկզբին գտնվող, ծառերի մեջ թաքնը-
ված ամառանոցները: Ահա և կատակոմբների մուտքը, լու-
սավորված երկու աղոտ լապտերներով: Էմիլիան իրավացի էր.
Վիա Ապպիա գնալը դեռ շուտ էր: Ռեստորանի ներսում, որի
պատերը երեսապատված էին հասարակ ու կոպտատաշ քա-
րերով, ուր որպես զարդարանք կախված կամ դրված էին մեծ
սափորներ, դամբարան պատկերող մարմարե սալաբեկորներ
և հուշատախտակներ, բացի դատարկ սեղաններից ու պարապ
մատուցողներից ուրիշ ոչ ոքի չտեսանք: Մենք միակ հաճա-
խորդներն էինք, և ես ակամա մտածեցի, որ ռեստորանային
այդ դատարկ ու ցուրտ սրահում, շրջապատված բազմաթիվ
մատուցողների ձանձրույթ պատճառող ուշադրությամբ, մենք
ոչ միայն չենք կարող լուծել մեր հարաբերությունների խըն-
դիրը, այլև ավելի կխճճենք: Այնուհետև ես հիշեցի, թե մենք
ինչպես էինք երկու տարի առաջ, մեր սիրո ամենալավ շրջա-
նում, հաճախ գալիս այստեղ ընթրելու և հանկարծ գլխի ըն-
կա, թե ինչու այդ զզվելի և մոռյլ եղանակին ես բազմաթիվ
ռեստորաններից ընտրեցի դատարկ ու ամայի հենց այս մեկը:

Մի կողմից ճաշացուցակը ձեռքին մեր առաջ կանգնել էր
մատուցողը, իսկ մյուս կողմից, գինեցուցակը բռնած բար-
մենն էր խոնարհվել: Ես ձեռնամուխ եղա ճաշի պատվեր-
ներին և հոգատար ու նրբակիրթ ամուսնու նման փոքր-ինչ

Թեքվելով դեպի էմիլիան, սկսեցի նրան կերակուրներ առաջարկել: Առանց աչքերը բարձրացնելու, էմիլիան միավանկ պատասխաններ էր տալիս. «Այո... ոչ... լավ»: Ես պատվիրեցի նաև մի շիշ թանկ գինի, թեև էմիլիան դեմ էր և ասում էր, որ ինքը չի խմելու: «Ինքս կխմեմ», — ասացի ես: Բարձրներ համաձայնողաբար ժպտաց և մատուցողի հետ միասին հեռացավ:

Ես շեմ ուզում այստեղ նկարագրել մեր ճաշը իր բոլոր մանրամասնություններով, ուզում եմ միայն պատմել իմ հոգեվիճակի մասին, որը թեև այն երեկո ինձ համար բոլորովին նոր էր, բայց վիճակված էր, որ հետագայում իմ և էմիլիայի հարաբերությունների համար դառնար սովորական:

Ասում են, որ մեզ հաջողվում է ապրել առանց մեծ դժվարության և էներգիա ծախսելու մեր ձեռք բերած ավտոմատիզմի հետևանքով, որի շնորհիվ մեր շարժումների մեծ մասը կատարվում է անգիտակցաբար: Միայն մի քայլ անելու համար, ասում են, որ մենք շարժման մեջ ենք դնում անհամար քանակությամբ մկաններ, սակայն շնորհիվ ավտոմատիզմի, մենք այդ անում ենք աներևակայելի հեշտությամբ: Այդ նույն բանը տեղի է ունենում նաև ուրիշների հետ ունեցած մեր հարաբերությունների մեջ: Այնքան ժամանակ, քանի դեռ կարծում էի, թե էմիլիան ինձ սիրում է, մեր հարաբերությունները ղեկավարում էր ինչ-որ բախտավոր մի ավտոմատիզմ, և գիտակցության լույսով լուսավորվում միայն իմ վարքի արտաքին կողմը, իսկ մնացածը սուղված էր լինում շգիտակցված, սիրով ներծծված սովորույթի խավարում: Սակայն այժմ, երբ սիրո խաբկանքը արդեն ցնդել էր, ես նկատեցի, որ ամեն կերպ ուզում եմ հասկանալ իմ բոլոր, նույնիսկ ամենաաննշան գործողությունները: Գինի էի առաջարկում նրան, թե աղ էի տալիս, նայում էի նրան, թե փախցնում նրանից հայացքս, բոլոր շարժումներս գիտակցված էին, և յուրաքանչյուր շարժում ցավ էր պատճառում ինձ, լցնում հոգիս անզորության աղոտ գիտակցությամբ և հուսահատություն բերում վրաս: Թվում էր, թե ես ոտից գլուխ կապանքների մեջ եմ, ամբողջովին խլացած ու կաթվածահար: Ամեն մի շարժման ժամանակ ես ինձ հարց էի տալիս, արդյոք լա՞վ եմ անում, թե՛ վատ: Մի խոս-

Քով, կորցրել էի ամեն տեսակ վստահութիւնն: Բայց եթե բոլորովին կողմնակի մարդկանց մտերմութիւնը կորցնելիս կարելի է հուսալ, թե հնարավոր է կրկին վերականգնել այն, ապա այդպիսի մտերմութիւնը էմիլիայի հետ կդառնար լուրջ անցյալի մեկընդմիջտ թաղված հիշողութիւններ. ես այլևս ոչինչ հուսալ չէի կարող:

Այդպես, մենք նստել էինք լուռ, և մեր միջև իշխող լռութիւնը ժամանակ առ ժամանակ խանդարվում էր հենց այնպես ասած, կարևորութիւն չունեցող ինչ-որ արտահայտութեամբ. «Գինի ուզո՞ւմ ես: Հաց տա՞մ: Միս դնե՞մ»: Ես կուզեի այստեղ նկարագրել միայն մեզ համար հասկանալի այդ լռութեան բնույթը, քանի որ հենց այդ երեկո էր, որ այն առաջին անգամ հաստատվեց մեր միջև, որպեսզի հետագայում այլևս մեզ չլքի: Դա մի անտանելի լռութիւն էր, որի հիմքում ընկած էր իմ և էմիլիայի միջև առաջացած երկպառակութիւնը, մի լռութիւն, որը բաղկացած էր այն ամենից, ինչ ես կցանկանայի նրան ասել, բայց ուժ և կարողութիւն չկար այդ անելու: Ասել, որ այդ լռութիւնը թշնամական էր, ճիշտ չէր լինի: Փաստորեն մեր մեջ ոչ մի թշնամանք չկար, համենայն դեպս իմ կողմից դա լրիվ բացակայում էր: Մեր միջև եղած միակ բանը այն էր, որ մենք բացատրվելու համար անգոր էինք: Ես զգում էի, որ ուզում եմ էմիլիայի հետ խոսել, որ նրան ասելու շատ բան ունեմ, բայց միևնույն ժամանակ հասկանում էի, որ խոսքերը այժմ որևէ նշանակութիւն ունենալ չեն կարող, և որ ես հիմա հազիվ թե կարողանամ գտնել անհրաժեշտ տոնը: Ահա թե որն էր իմ լռութեան պատճառը: Սակայն ես ինձ անկաշկանդ ու հանգիստ չէի զգում, ինչպես այն մարդը, որը լուռ է սոսկ այն պատճառով, որ խոսելու ցանկութիւն չունի: Ընդհակառակը, ինձ փոթորկում ու խիստ անհանգստացնում էր խոսելու ցանկութիւնը: Ես կարող էի նրան շատ բան ասել, բայց բացատրվելու հնարավորութիւն չունենալը ինձ հանգիստ չէր տալիս, իսկ շասված խոսքերը թպրտում ու զարնվում էին գիտակցութեանս, ինչպես բանտի երկաթյա վանդակներին: Բայց դա դեռ բոլորը չէր, կային նաև ուրիշ հանգամանքներ, ես զգում էի, որ այդ անտանելի լռութիւնը, այնուամենայնիվ, ինձ համար ամենալավ ելքն է: Եթե ես խախտեի այն թեկուզև

ամենազգուշ և սիրալիր ձևով, ապա դրա փոխարեն կարող էի լսել այնպիսի խոսքեր, որոնք ինձ համար կլինեին շատ ավելի տհաճ և անտանելի, իհարկե, եթե դա առհասարակ հնարավոր լիներ, քան այն լռությունը, որ մենք պահպանում էինք:

Սակայն ես դեռ լուռ մնալու սովոր չէի: Մենք կերանք առաջինը, հետո՝ երկրորդը և այդ ընթացքում ոչ մի խոսք չփոխանակեցինք: Իսկ երբ արդեն միջոց մատուցեցին, ես այլևս չդիմացա և հարցրի.

— Ինչո՞ւ չես խոսում:

էմիլիան իսկույն պատասխանեց.

— Որովհետև ասելու բան չունեմ:

Ես ոչ տխուր էր երևում, ոչ էլ թշնամանքով լցված, և նրա այդ խոսքերը նույնպես ճշմարիտ էին: Ես մի տեսակ խրատական տոնով շարունակեցի.

— Քիչ առաջ դու ինձ այնպիսի մի բան ասացիր, որը անպայման բացատրության կարիք է զգում:

էմիլիան նույն անկեղծ տոնով պատասխանեց.

— Դու մոռացիր իմ ասածները... հաշվիր, որ երբեք դրանք չես էլ լսել:

— Ինչո՞ւ պետք է մոռանամ,— հարցրի ես մի տեսակ հուսադրված:— Ես կմոռանայի, եթե հաստատ իմանայի, որ ճիշտ չես ասել... Եթե համոզված լինեի, որ զայրույթի պահին բերնիցդ թռած խոսքեր են:

էմիլիան այս անգամ ոչինչ չասաց: Եվ հույսը նորից գլուխ բարձրացրեց իմ մեջ: Գուցե հենց այդպես էլ եղել է. տեսնելով իմ դաժան կոպտությունները, ուղղակի զայրույթից ասել է՝ ես քեզ արհամարհում եմ:

— Դե խոստովանիր, որ այսօրվա քո ասած խոսքերը ճիշտ չէին...— զգուշորեն համառում էի ես,— ասա, որ այդ խոսքերը բերնիցդ հենց այնպես են դուրս թռել, որ զայրույթիդ պահին քեզ թվացել է, թե դու ինձ ատում ես, և դա սոսկ ինձ վիրավորանք հասցնելու համար ես ասել:

էմիլիան նայեց իմ երեսին և նորից լռեց: Ինձ թվաց, ես նկատեցի, թեև, կարող է պատահել, սխալվում էի, որ նրա խոշոր, թուխ աչքերը մի վայրկյան արցունքով լցվեցին: Գո-

տեպնդված, ես մեկնվեցի և, ամուր բռնելով սփռոցի վրա դրած նրա ձեռքը, ասացի.

— Էմիլիա... ուրեմն դրանք ճիշտ չէին:

Այս անգամ նա ձեռքը այնպիսի ուժով հետ քաշեց, որ թվաց, ոչ միայն ձեռքը փախցրեց, այլև հետ քաշվեց ամբողջ մարմնով.

— Ոչ, ճիշտ էին:

Ինձ ապշեցրեց նրա միանգամայն անկեղծ, թեև տխուր, պատասխանը: Թվում էր, Էմիլիան հասկանում է, որ բավական էր այդ ժամանակ դիմել կեղծիքի, որպեսզի ամեն ինչ նորից, գոնե ժամանակավոր կամ արտաքնապես, իր հունով ընթանար: Ես պարզ տեսա, որ նա մի պահ նույնիսկ ունեցավ կեղծելու այդ գայթակղությունը: Բայց վայրկենական մտորումից հետո հրաժարվեց: Ես իմ ներսում մի նոր, ավելի սուր ցավ զգացի և, գլուխս կախելով, ատամներս սեղմած ասացի.

— Բայց դու հասկանո՞ւմ ես, այնպիսի բաներ կան, որ չի կարելի ոչ ոքի հենց այնպես, առանց հիմք ունենալու, ասել... Ոչ ոքի... մանավանդ սեփական ամուսնուն:

Էմիլիան լուռ էր, նա միայն բարձրացրեց հայացքը և գրեթե սարսափով ինձ նայեց. ըստ երևույթին, իմ դեմքը զայրույթից ծամածովել էր: Վերջապես նա պատասխանեց.

— Դու ինքդ պահանջեցիր, ես էլ քեզ պատասխանեցի:

— Բայց դու պետք է բացատրություն տաս...

— Այսի՞նքն:

— Դու պետք է բացատրես, թե ինչու... թե ինչո՞ւ ես արհամարհում ինձ:

— Ոչ, դա երբեք ես քեզ չեմ ասի... եթե նույնիսկ մեռնելուս րոպեին էլ լինի:

Ինձ ապշեցրեց նրա արտասովոր վճռական տոնը: Սակայն իմ զարմանքը կարճ տևեց: Ես այնպես էի կատաղած, որ ի վիճակի չէի մտածելու:

— Ասա, — պնդեցի ես, նորից բռնելով նրա ձեռքը, բայց այս անգամ արդեն ոչ քնքշորեն, — դե ասա... ինչո՞ւ ես ինձ արհամարհում:

— Ես քեզ արդեն ասացի, որ դա երբեք քեզ չեմ ասի:

— Ասա, եթե ոչ՝ կջարդեմ:

Վատաղությունից ինձ կորցրած, ես նրա մատներն սկսեցի կոտրտել: Էմիլիան մի պահ զարմացած ինձ նայեց, հետո սոսկալի ցավից սեղմեց ատամները, և նրա դեմքին իսկույն հայտնվեց այն արհամարհանքը, որի մասին մինչև հիմա նա միայն խոսքերով էր ասում:

— Վերջ տուր,— կոպտորեն ասաց նա:— էլի՞ ես ուզում ինձ ցավ պատճառել:

Ես իմ ուշադրությունը դարձրի այդ «էլիի» վրա. դրանով նա, ըստ երևույթին, ակնարկում էր ինչ-որ ուրիշ տանջանքներ, որոնց նախկինում ես նրան ենթարկել էի: Զգացի, որ շունչս կտրվում է:

— Վերջ տուր... Մի՞թե շեռտ ամաչում... բոլոր մատուցողները մեզ են նայում:

— Ասա, ինչո՞ւ ես ինձ արհամարհում:

— Հիմարություններիդ վերջ տուր. բաց թող:

— Ասա, ինչո՞ւ ես ինձ արհամարհում:

— Բաց թող, քեզ ասում եմ:

Նա այնպես ուժեղ թափ տվեց ու ազատեց իր ձեռքը, որ բաժակներից մեկը թռավ ընկավ հատակին: Լավեց փշրվող բաժակի ձայնը, էմիլիան վեր կացավ ու քայլեց դեպի դուռը, բարձրաձայն ինձ ասելով.

— Ես քեզ սպասում եմ մեքենայի մեջ... վճարիր ու արի:

Նա դուրս եկավ, իսկ ես անշարժացած մնացի տեղս նրստած, մի տեսակ ստորացված ոչ այնքան ամոթից (իսկապես էլ, ինչպես էմիլիան ասաց, բոլոր այդ պարապ-սարապ մատուցողները անընդհատ մեզ էին նայում և ոչ մի բառ կամ շարժում բաց չէին թողել), որքան նրա այդ նոր վարքագծի պատճառով: Մինչև հիմա նա երբեք այդ ձևով ինձ հետ չէր խոսել, երբեք այդպես ինձ չէր վիրավորել: Բացի դրանից, այդ «էլին» դեռ շարունակում էր հնչել իմ ականջներում, որպես մի նոր և տհաճ հանելուկ, որը նույնպես լուծման կարիք ուներ: Այդ երբ և ինչպես էի նրան ինչ-որ տառապանք պատճառել, որի համար այդպես բողոք էր հայտնում՝ ընդգծելով այդ «էլին»: Վերջապես ես կանչեցի մատուցողին, վճարեցի հաշիվը և դուրս եկա ռեստորանից:

Ամպամած եղանակը, որ դեռ առավոտից սկսած մթնոլորտ էր, արդեն վերջնականապես փոխվեց բարակ ու միալար

անձրևի: Փոքր-ինչ հեռվում, մութ խավարի մեջ ես նկատեցի էմիլիայի կերպարանքը: Նա կանգնած էր մեր մեքենայի կողքին, որի դռնակները ես փակել էի և բանալին դրել գրպանս: Մեքենայի մեջ մտնելու հնարավորություն չունենալով, նա կանգնել էր մաղող անձրևի տակ և հանգիստ ու անվրդով ինձ էր սպասում:

— Ներիր, մոռացել էի, որ դռնակները բանալիով փակել եմ,— ասացի ես թույլ ու անհաստատ ձայնով, որին նա միանգամայն հանգիստ պատասխանեց.

— Ոչինչ, անձրևը վարար չէ:

Հնազանդորեն արտասանած այս խոսքերը նորից իմ մեջ հաշտության ինչ-որ հույս արթնացրին, թեև այդպիսի բան սպասելը իմ կողմից լրիվ խելագարություն էր: Մի՞թե այդպիսի հանգիստ ու քնքուշ ձայնով ինձ հետ խոսողը կարող էր արհամարհել ինձ: Ես բացեցի մեքենայի դռնակը և նրստեցի իմ տեղը, էմիլիան նույնպես մտավ, նստեց կողքիս: Մոտորը գործի գցելով, ես հանկարծ մի տեսակ ուրախ, գրեթե աշխույժ հարցրի նրան.

— Դե ասա, տեսնենք, էմիլիա, ո՞ւր ես ուզում գնանք:

— Ես ինչ գիտեմ... ուր ուզում ես,— պատասխանեց նա, առանց գլուխը շրջելու և ուղիղ նայելով առջևը:

Ես քաշեցի արագության լծակը, և մեքենան տեղից շարժվեց: Ինչպես ասացի, այժմ, չգիտեմ որտեղից, ինձ համակել էր ուրախ ու անկաշկանդ մի տրամադրություն: Ինձ գրեթե թվում էր, որ եթե հիմա ամեն ինչ կատակի տամ, լրջորեն չվերաբերվեմ կատարվածին և բորբոքված կիրքը փոխարինեմ թեթև ու անբռնազբոսիկ տրամադրությամբ, ինձ կհաջողվի կարգի բերել էմիլիայի հետ խափանված իմ հարաբերությունները: Ես չգիտեի, թե ինչ էր այդ բոպեին ինձ պատահել, հնարավոր է, որ դա պարզապես հուսահատությունն էր շատ թունդ գինու նման ընկել գլուխս: Ես մի տեսակ ուրախ և միտումնավոր կատակով ասացի.

— Արի, ուր պատահի, այնտեղ էլ գնանք, թող ինչ լինում է լինի:

Զգում էի, որ արտասանելով այդ խոսքերը, ես շատ ծիծաղելի եմ, ինչպես կաղ մարդը, որը փորձում է գեղեցիկ պարաֆալլ անել: Բայց էմիլիան չպատասխանեց, և ես նո-

րից տրվեցի ինձ համակող տրամադրությանը: Չգիտեմ ինչու, ինձ թվում էր, թե իմ այդ ուրախ տրամադրությունը անսպասելի ծով է, մինչդեռ շուտով պարզվեց, որ ընդամենը մի վեհերոտ և սակավաշուր առվակ է: Այժմ ես մեքենան վարում էի Վիա Ապպիայով: Մեր առջևում ձգվող նրա լույսի շողերում, անձրևի հազարավոր փայլփլող թելերի միջով խավարից մերթ նոճիներ էին հայտնվում, մերթ կարմիր աղյուսի ինչ-որ կույտեր, մերթ սպիտակ մարմարյա արձաններ և մերթ էլ մեծ և անհավասար քարերով սալարկած հին հոռմեական մի ճանապարհ: Բավական գնալուց հետո ես բուրրովին անսպասելի, անբնական ու կեղծ ոգևորությամբ ասացի.

— Արի մի անգամ կյանքում մոռանանք մեր ով լինելը, պատկերացնենք, որ մենք երկու ուսանող ենք, որոնք մարդկային հայացքներից հեռու մի անդորրավետ անկյուն են փնտրում՝ հանգիստ սրտով սիրո հաճույքներին տրվելու համար:

Էմիլիան այս անգամ նույնպես ոչ մի պատասխան չտվեց, իսկ ես, քաջալերված նրա լռությունից, ճանապարհը մի որոշ տարածություն կտրելուց հետո, մեքենան միանգամից արգելակեցի ու կանգ առա: Այժմ անձրևը հեղեղի նման թափվում էր, և մեքենայի հողմապակու վեր ու վար անող խոզանակները շէին հասցնում սրբել առատորեն թափվող ջրի հոսանքը:

— Մենք երկու ուսանողներ ենք,— նորից անվստահ ասացի ես,— իմ անունը Մարիո է, իսկ քոնը՝ Մարիա... Վերջապես մենք խաղաղ մի տեղ ենք գտել... Ճիշտ է, անձրևոտ է, բայց ոչինչ... Չէ որ մեքենայի մեջ հիանալի է... համբուրիր ինձ:

Այդ ասելով, ես հարբածի վճռականությամբ մի ձեռքով գրկեցի նրա ուսերը և, քաշելով դեպի ինձ, փորձեցի համբուրել:

Չգիտեմ, թե ես ինչ հույսով այդ արի. ռեստորանում տեղի ունեցածից հետո պետք է հասկանայի, թե ինչ կարող էր ինձ սպասել այդպիսի ցանկության դեպքում: Սկզբում էմիլիան աշխատեց որքան կարելի է մեղմ ու սիրալիր դուրս պրծնել իմ գրկից, բայց տեսնելով, որ ես իրեն ոչ միայն

բաց շեմ թողնում, այլև, կզակից բռնած, աշխատում եմ երեսը շրջել իմ կողմը, ամբողջ ուժով կոպտորեն ինձ հետ հրեց.

— Խելագարվե՞լ ես, ինչ է... Թե՞ հարբած ես:

— Ոչ, հարբած չեմ, — փնթփնթացի ես, — թող մի անգամ համբուրեմ:

— Մտքովս էլ չի անցնում, — պատասխանեց նա անկեղծ զայրույթով և նորից հետ հրեց ինձ: Եվ մի պահ լռելուց հետո իսկույն վրա բերեց. — Իսկ հետո էլ զարմանում ես, երբ ասում եմ, որ արհամարհում եմ քեզ... ինչպե՞ս ես քեզ թույլ տալիս... այն էլ նրանից հետո, ինչ կատարվեց մեր մեջ:

— Բայց չէ որ ես քեզ սիրում եմ:

— Իսկ ես չեմ սիրում:

Ես զգացի իմ ծիծաղելի վիճակը, որ անտանելի ցավ էր պատճառում ինձ: Ավելին, իմ վիճակը ոչ միայն ծիծաղելի էր, այլև անելանելի: Սակայն ես դեռ մտադիր չէի ինձ պարտված ճանաչել:

— Ինչ ուզում ես արա, դու ինձ պետք է թողնես, որ քեզ համբուրեմ, — մոնչացի ես, աշխատելով ձայնիս տղամարդկային կոպտություն տալ և նետվեցի նրա վրա:

Այս անգամ էմիլիան ոչինչ չասաց, նա միայն բացեց մեքենայի դռնակը, և ես ընկա դատարկ նստատեղին: Դուրս պրծնելով մեքենայից, էմիլիան սկսեց ճանապարհով վազել առաջ, ուշադրություն չդարձնելով հեղեղի նման տեղացող անձրևին:

Ընկնելով դատարկ նստատեղին, ես մի պահ ապուշ կըտրեցի: Հետո, ինքս ինձ հայհոյելով ու հիմար անվանելով, նույնպես դուրս թռա մեքենայից:

Անձրևը հեղեղի նման ցած էր թափվում: Ոտքս դեռ գետնին չէի դրել, մինչև կոճերս թաղվեցի ջրի մեջ: Դա սոսկալի կատաղեցրեց ինձ, միաժամանակ առաջացնելով իմ մեջ ողորմելիության մի սուր զգացում: Զայրույթից մոլեգնած, ես բղավեցի.

— Էմիլիա... արի այստեղ... արի, այլևս ձեռք չեմ տա, կարող ես հանգիստ լինել:

— Եթե դու վերջ չտաս, ես ոտքով կգնամ Հոոմ, — լավեց նրա պատասխանը խավարի միջից, որ, այնուամենայնիվ, այնքան էլ հեռու չէր:

— Արի այստեղ, — ասացի ես դողդողացող ձայնով, — խոստանում եմ այն ամենը, ինչ ցանկանում ես:

Անձրևը նույն ձևով շարունակվում էր թափվել: Նրա շիթերը օձիքիցս ներս էին հոսում, տհաճորեն սառեցնելով ծոծրակս ու վիզս: Անձրևի ջուրը նույնպիսի առատությամբ թափվում էր նաև ճակատիցս ու քունքերիցս: Մեքենայի ցուլապատերները լուսավորում էին ճանապարհից ընդամենը մի փոքրիկ կտոր, որտեղ հին հռոմեական ինչ-որ ավերակ էր երևում և մի բարձրաբուն ու սև նոճի, որի կատարը մթին երկինքն էր մխրձվել: Սակայն ինչքան էլ լարեցի տեսողությունս, դարձյալ էմիլիային տեսնել չկարողացա: Ես անհանգստացած, նորից ձայն տվի նրան.

— էմիլիա... էմիլիա... — Եվ իմ ձայնը գրեթե փոխվեց լացի:

Վերջապես նա խավարից դուրս եկավ և, մտնելով այն տարածության մեջ, որը լուսավորված էր մեքենայի ցուլապատերներով, հարցրեց.

— Ուրեմն, խոստանո՞ւմ ես, որ այլևս ինձ ձեռք չես տա:

— Այո, խոստանում եմ:

Նա մոտեցավ, նստեց մեքենան և իսկույն ավելացրեց.

— Ի՞նչ կատակներ են սրանք... Ոտից գլուխ ջուր եմ դարձել... Մազերս կարծես ջուրը խրած հանած լինեն... Վաղը ստիպված եմ լինելու վարսավիրանոց գնալ:

Առանց որևէ խոսք ասելու, ես նույնպես նստեցի մեքենան, և իսկույն շարժվեցինք:

էմիլիան փոշտաց, մի վայրկյան հետո նրա փոշտոցը նորից կրկնվեց, հետո փոշտաց երրորդ, ապա չորրորդ անգամ: Նա փոշտում էր այնքան հնչեղ ու մի տեսակ արհեստական, որ թվում էր, դրանով ինձ ուզում է հասկացնել, թե իմ պատճառով ինքը հարբուխ է ընկել: Բայց ես շտրվեցի այդ պրովոկացիային. ես մեքենան այժմ վարում էի, ինչպես երազում: Դա սոսկալի մի երազ էր, որտեղ իմ անունը իսկապես որ Ռիկկարդո էր, իսկ իմ կնոջ անունը՝ էմիլիա, ես սիրում էի նրան, իսկ նա արդեն դադարել էր ինձ սիրելուց. դեռ ավելին, նա այժմ արհամարհում էր ինձ:

Գլուխ տասնամեկերորդ

Հաջորդ առավոտյան ես արթնացա ամբողջովին թույլ ու ջարդված, խորին զզվանքով լցված դեպի այն ամենը, ինչ ինձ սպասում էր այդ և դրան հաջորդող օրերին և առհասարակ դեպի այն ամենը, ինչ տեղի էր ունենալու ապագայում: Հմիլիան ննջասենյակում դեռ քնած էր, իսկ ես, մեկնված հյուրասենյակի կիսախավարում գտնվող բազմոցին, աստիճանաբար հիշողությանս մեջ վերականգնում էի այն սոսկալի իրականությունը, որ քնի հետևանքով մոռացվել էր: Նախ և առաջ, մտածում էի ես, ինձ անհրաժեշտ է որոշել ընդունե՞լ «Ողիսականի» սցենարի աշխատանքը, թե ոչ, հետո՝ վերջնականապես իմանալ, թե ինչո՞ւ է Հմիլիան ինձ արհամարհում, և երրորդը, երբ այդ ամենը պարզված կլինի, գրտնել նաև Հմիլիային վերադարձնելու միջոցը:

Ես արդեն ասացի, որ ինձ հոգնած, ջարդված և վերին աստիճանի թույլ էի զգում: Իմ կյանքի կենսական նշանակություն ունեցող այդ երեք հարցերը, որոնք ձևակերպել էի գրեթե բյուրոկրատական ճշտությամբ, ինչպես իսկույն-ևեթ նկատեցի, փաստորեն ոչ այլ ինչ էին, եթե ոչ պատրանք ստեղծելու մի ճիգ, որով ուզում էի ինձ հավատացնել, թե իմ մեջ եռանդ ու մտքի պայծառություն կա, որոնցից իրականում ես այնքան հեռու էի: Գեներալը, քաղաքական գործիչը, որևէ գործարար մարդը — բոլորն էլ աշխատում են այս ձևով կարճ ու հստակ որոշել իրենց առջևում գտնվող և լուծման ենթակա պրոբլեմները, հասցնելով դրանք թափանցիկության աստիճանի պարզության ու անկյանք սխեմաների, որոնց վճռելը ոչ մի բարդություն չի պարունակում իր մեջ: Սակայն ես այդ կարգի մարդ չէի, ընդհակառակը: Ես զգում էի, որ այն եռանդն ու մտքի պայծառությունը, որ մի ժամանակ ձևացնում էի իբրև թե ունեմ, անմիջապես լրիվ կչքանա, հենց որ փորձեմ մտքերից գործի անցնել:

Համենայն դեպս, ես գիտակցում էի, որ այդ թերությունը ինձ մոտ անվիճելի է: Նույնիսկ այն ժամանակ, երբ աչքերս փակ պառկած էի բազմոցի վրա, դ ւմ էի, որ բավական է այդ երեք հարցերին որևէ պատասխան ձևակերպելու

փորձ անեմ, որպեսզի երևակայությունս իսկույննեթ կտրվի
 ունալ իրականությունից և սկսի սավառնել երազանքների
 դատարկ երկնքում: Այդ երազանքների մեջ ինձ թվում էր,
 թե «Ողիսականից» սցենար ստեղծելը պարզապես այնպիսի
 մի դատարկ բան է, որը իրենից ոչ մի դժվարություն չի ներ-
 կայացնում, որ ես արդեն ստացել եմ էմիլիայի բացատրու-
 թյունը և պարզել իմ հանդեպ ունեցած նրա արհամարհանքի
 ամբողջ պատճառը, որը թեև առաջին հայացքից այնքան
 սարսափելի է թվում, բայց իրականում ծնունդ է ընդամենը
 մի դատարկ թյուրիմացության, և, վերջապես, որ ես արդեն
 հաշտվել եմ էմիլիայի հետ: Բայց մտածելով այդ ամենի
 մասին, այնուամենայնիվ, զգում էի, որ դրանք ստեղծված
 դրությունից հաջողակ դուրս պրծնելու մի երազանք է, եր-
 ջանիկ լուծում գտնելու մի հույս, իսկ իրականում այդ ցան-
 կալի դրության և ստեղծվածի միջև ընկած էր մի այնպիսի
 անդունդ, որը ես ոչ մի կերպ ի վիճակի չէի լցնել և մանա-
 վանդ լցնել մի այնպիսի բանով, որը գոնե նվազագույն շա-
 փով հաստատու տեական լիներ: Մի խոսքով, ես ձգտում էի
 այդ հարցերը լուծել՝ ելնելով իմ լավագույն ցանկություննե-
 րից, սակայն շգիտեի, թե ինչ ճանապարհով կարելի է հասնել
 դրան:

Բազմոցին պառկած ես ննջում էի և, ըստ երևույթին,
 հենց այդպես էլ քունս տարել էր: Հանկարծ նորից արթ-
 նացա և, աչքերս բացելով, տեսա, որ էմիլիան խալաթը հա-
 գին նստած է ոտքերիս մոտ: Հյուրասենյակի փայտաշերտ
 վարագույրները իջեցված էին, որի պատճառով սենյակը դեռ
 սուղված էր կիսախավարի մեջ: Բազմոցի կողքին դրված
 սեղանի վրա էր միայն, որ մի փոքրիկ լապտեր էր վառվում:
 Ես շէի իմացել, թե երբ է էմիլիան ներս մտել, վառել լապ-
 տերը և նստել կողքիս:

Տեսնելով նրան խալաթը հագին, անկաշկանդ ու տնավա-
 րի նստած ինձ մոտ, ես հիշեցի, թե ինչպես էի այն երջանիկ
 օրերին արթնանում և մի պահ անձնատուր եղա պատրանք-
 ներին: Պառկած տեղիցս բարձրանալով, նստեցի ու շփոթա-
 հար թոթովանքով հարցրի.

— էմիլիա, դու ինձ սիրո՞ւմ ես:

Նա մի պահ լռելուց հետո ասաց.

— Լսիր ինչ եմ ասում, ես քեզ հետ խոսելիք ունեմ:

Ինձ թվաց, թե արյունս երակներիս մեջ սառեց: Քիչ էր մնացել ասելի, որ ես խոսելու ոչ մի ցանկություն չունեմ, որ թող նա ինձ հանգիստ թողնի, որպեսզի կարողանամ քնել... Բայց այդ բոլորի փոխարեն իսկույն հարցրի.

— Ի՞նչ խոսելիք:

— Մեր երկուսին վերաբերող:

— Ոչ մի խոսելիք էլ չկա, — պատասխանեցի ես, աշխատելով տիրապետել ինձ և ցույց շտալ հանկարծակի անհանգրստությունս: — Դու ինձ այլևս չես սիրում... նույնիսկ ավելին, ինձ արհամարհում ես... ահա և ամբողջ խոսելիքը:

— Ոչ, ես ուզում էի քեզ ասել, — անշտապ արտասանեց էմիլիան, — որ հենց այսօրվանից գնում եմ մորս մոտ... Ես ուզում էի մինչև նրան զանգահարելը քեզ զգուշացնել... Ուրիշ ոչինչ... այժմ դու արդեն իմացար:

Իսկապես էլ, դա ինձ համար բոլորովին անսպասելի էր, թեև ընդամենը մի օր առաջ տեղի ունեցածից հետո դա և՛ տրամաբանական էր, և՛ ենթադրելի: Այն, որ էմիլիան կարող է ինձ լքել ու հեռանալ, որքան էլ այդ տարօրինակ թվա, երբեք իմ մտքով չէր անցել: Ես մինչև հիմա կարծում էի, որ իմ հանդեպ ունեցած նրա անգթությունն ու դաժանությունը առանց այն էլ բոլոր շափերն անցել են: Բայց ահա, ինձ համար բոլորովին անսպասելի այդ սահմանը նա մի թռիչքով կտրում և անցնում էր: Ես համարյա անհասկանալի մոթմը թացի.

— Դու ինձ թողնո՞ւմ ես:

— Այո:

Ես մի պահ լռեցի, հետո հանկարծ գործելու անհաղթահարելի մի ցանկություն զգացի, քանի որ այլևս ի վիճակի չէի տանելու սիրտս խոցող ահավոր ու սուր ցավը: Ես բազմոցից հենց ննջազգեստով ցատկեցի հատակին և նետվեցի դեպի լուսամուտը, կարծես ուզում էի բարձրացնել փայտաշերտ վարագույրները՝ սենյակը լուսավորելու համար, բայց հետո հետ դարձա և ամբողջ ձայնով բղավեցի.

— Ոչ, դու չես կարող այստեղից գնալ... Ես չեմ ուզում:

— Երեխայություն մի արա, — ասաց նա խրատական տոնով, — միակ բանը, որ մնում է մեզ, դա բաժանվելն է...

մեր երկուսի միջև այլևս իրար կապող ոչինչ չկա, գոնե ինձ քեզ կապող ես ոչինչ չեմ տեսնում... այդպես մեր երկուսի համար էլ ավելի լավ կլինի:

Ես ուղղակի չեմ հիշում, թե ինչ արի նրա այդ խոսքերից հետո. կամ ավելի ճիշտ, հիշում եմ միայն ինչ-որ արտահայտություններ և ինչ-որ շարժումներ: Ըստ երևույթին, ես այն ժամանակ խոսել ու շարժվել եմ, ինչպես խելագարը, առանց գիտակցելու ոչ ասածներս և ոչ էլ արածներս: Հիշում եմ, թե ինչպես էի ննջազգեստը հագիս, մազերս ամբողջովին գզգզված, հսկայական քայլերով պտույտ տալիս սենյակում, մերթ աղաչելով էմիլիային, որ նա ինձ չլքի, մերթ բացատրելով իմ վիճակը, և մերթ էլ այնպես խոսելով ինքս ինձ հետ, կարծես մենակ լինեի: «Ողիսականի» սցենարը, բնակարանը, մեր պարտքի վճարամասերը, իմ զոհված թատերական երազանքները, դեպի էմիլիան ունեցած իմ սերը, Բատտիստան ու Ռայնգոլդը, իմ կյանքի հետ առնչվող բոլոր հեռանկարներն ու անձնավորությունները, մի խոսքով ամեն, ամեն ինչ այնպես խառնվեց իրար և թափվեց իմ շուրթերից, որպես անկապ ու հապճեպ մի մենախոսություն, կարծես գեղադիտակի մեջ լցրած խայտաբղետ ապակիներ լինեին, որոնց ինչ-որ մի ձեռք կատաղի ուժով ցնցել ու իրար էր խառնել: Սակայն միևնույն ժամանակ ես զգում էի, որ դա ընդամենը ողորմելի մի խաղ է, սլատրանքային մի երևույթ, նման գեղադիտակից թափած այն գույնզգույն ապակիների առանձին կտորներին, որոնք ընդունակ չեն որևէ պատկեր արտահայտելու: Այդ գեղադիտակը շարդվել էր այժմ, և նրա խայտաբղետ ապակու կտորները ցրիվ էին եկել գետնով մեկ ու մնացել ընկած իմ աչքերի առաջ: Հանկարծ ինձ համակեց բոլորի կողմից լքված լինելու մի սուր զգացում: Մենության գիտակցումից ես սարսափեցի, նա ճնշում էր ինձ և ոչ միայն խանգարում մտածելուն, այլև արգելակում նույնիսկ շնչառությունս: Ես ամբողջ իմ էությամբ զայրույթով փոթորկվել ու ծառս էի եղել կնոջիցս բաժանվելու և դրան հաջորդող մենության մտքից: Սակայն միևնույն ժամանակ զգում էի նաև, որ շնայած զայրույթս ամբողջովին անկեղծ էր, բայց և այնպես խոսքերս հնչում էին ոչ համոզիչ: Եվ իսկապես էլ, այն վայրկյաններին, երբ իմ բանականությունը ծածկող

մոլորութեան ու սարսափի մշուշը անցնում էր, ես նորից էի տեսնում բազմոցի վրա միևնույն տեղը նստած էմիլիային, որը հանգիստ ու անվրդով ինձ պատասխանում էր.

— Ինքդ դատիր, Ռիկկարդո, միակ բանը, որ մենք կարող ենք անել, այդ է, ուրիշ ելք չկա:

— Բայց ես չեմ ուզում, — վերջին անգամ կրկնեցի ես, կանգնելով նրա առաջ, — չեմ ուզում:

— Ինչո՞ւ չես ուզում: Ապա լուրջ մտածիր:

Զգիտեմ ինչ պատասխանեցի: Հետո նորից անցա սենյակի մյուս ծայրը և, ձեռքերս դեպի գլուխս տանելով, սկսեցի մազերս պոճոկել: Բայց նույն րոպեին հասկացա, որ այդ վիճակում ոչ միայն ընդունակ չէի էմիլիային որևէ բան համոզելու, այլև մտքերս արտահայտելու, ինչպես պետք է: Ճիգ ու ջանք գործադրելով, ես կարողացա մի կերպ տիրապետել ինձ, նորից մոտեցա ու նստեցի բազմոցին և, գլուխս կախելով ու առնելով ափերիս մեջ, հարցրի.

— Եվ երբ ես ուզում այստեղից գնա՞լ:

— Հենց այսօր:

Այդ ասելուց հետո նա տեղից կանգնեց և, առանց ինձ վրա ուշադրութիւն դարձնելու, որ դեռ նստած էի՝ գլուխս կախ ու ափերիս մեջ առած, դուրս եկավ սենյակից: Ես չէի սպասում, թե նա կարող է գնալ, ինչպես և առաջ մտքովս շէր անցնում այն, ինչ նա արեց ու ասաց: Մի պահ ապուշ կտրած մնացի տեղս նստած, չհավատալով կատարվածին: Իսկ հետո, աչքս գցելով սենյակին, մի տարօրինակ ու սարսափելի զգացում ունեցա, անշատումն արդեն տեղի էր ունեցել, սկսել էր արդեն իմ կյանքի մենավոր շրջանը: Սենյակը նույնն էր, ինչպես և մի քանի րոպե առաջ, ևրբ էմիլիան նստած էր բազմոցին: Բայց, այնուամենայնիվ, ես զգում էի, որ այն արդեն բոլորովին փոխվել է: Թվում էր, թե սենյակի ծավալը հեռացել է, և այդ միտքը գլխիցս դուրս շէր գալիս: Սենյակը այլևս այն չէր, ինչպիսին ինձ թվում էր մինչ այդ, երբ գիտեի, որ էմիլիան այդ պատերի ներսում է, այլ բոլորովին մի ուրիշը, որը տեսնելու էի ով գիտե դեռ ինչքան ժամանակ, լցված այն գիտակցութեամբ, որ էմիլիան ոչ ապրում է այդտեղ և ոչ էլ երբևէ ապրելու է: Կրկնութիւնն զգացվում էր ամենուրեք. մթնոլորտում, յու-

րաքանչյուր առարկայի մեջ, և տարօրինակն այն է, որ այդ զգացումը ոչ թե ինձնից էր գնում դեպի իրերը, այլ թվում էր, թե իրերից է գալիս ինձ: Այդ բոլորը ես այնքան շէի գիտակցում, որքան զգում էի իմ ցավոտ և խուճապահար հոգու ինչ-որ մթին ու հեռավոր խորքերում: Ես զգացի, որ լաց եմ լինում. հանկարծ բերանիս անկյունի մոտ երեսս խուտուտ եկավ, ձեռքս տարա դեպի այտս է, մատս դնելով այդ տեղը, զգացի, որ թաց է: Ես խոր հառաչեցի և, այլևս չկարողանալով ինձ զսպել, սկսեցի սրտանց հեկեկալ: Հետո վեր կացա տեղիցս և հենց այդպես ննջազգեստով ու երեսս արցունքից թրջված, հյուրասենյակից դուրս եկա:

Ցերեկային լույսով ողողված ննջարանում, որտեղ հյուրասենյակի կիսախավարից հետո լույսը ինձ համար նույնիսկ կուրացուցիչ թվաց, էմիլիան նստել էր չհավաքած անկողնու վրա և խոսում էր հեռախոսով: Ես փսկույն գլխի ընկա, որ խոսակցությունը մոր հետ է: Ինձ թվաց, որ նա մի տեսակ շփոթահար ու մոլորված է: Ես նույնպես նստեցի և, գլուխս կրկին ափերիս մեջ առնելով, նորից սկսեցի հեկեկալ: Ես ինքս էլ նույնիսկ առանձնապես լավ շէի հասկանում, թե ինչու եմ այդպես հեկեկում. գուցե լալիս էի ոչ միայն այն պատճառով, որ կյանքս կործանվում էր, այլ ինչ-որ մի վաղեմի ցավից, որը ոչ մի առնչություն չուներ ոչ էմիլիայի և ոչ էլ ինձ լքելու նրա որոշման հետ: Էմիլիան, լսափողը ականջին սեղմած, շարունակում էր լսել: Ըստ երևույթին մայրը երկար ու բարակ ինչ-որ բան էր բացատրում նրան: Արցունքների միջից ես տեսա, թե ինչպես նրա դեմքին ամպից դաշտն ընկած սև ստվերի նման հանկարծ դառը հիասթափության ու վշտի մի արտահայտություն հայտնվեց: Վերջապես նա ասաց.

— Լավ, լավ, հասկացա, այդ մասին այլևս չխոսենք:— Այդտեղ էմիլիան նորից ընդհատեց մոր երկար ու բարակ ճառը: Բայց այս անգամ նրա համբերությունը այլևս շտարավ մինչև վերջ լսել մոր ասածները և, միանգամից կտրելով նրա խոսքը, ասաց.

— Հա, լավ, արդեն ասացիր, բավական է, հասկացա, ցտեսություն:

Մայրը էլի ինչ-որ բան էր ուզում ասել, բայց էմիլիան,

առանց այդ հաշվի առնելու, կրկնեց իր «ցտեսությունը» և
ցած դրեց լսափողը, թեև նրա մեջ դեռ լսվում էր մոր ձայ-
նը: Այնուհետև նա տեղից կանգնեց և, ինչպես երազում,
ոչինչ շտեմնող հայացքով նայեց ինձ: Ես բնազդով բռնեցի
նրա ձեռքից և թոթովեցի.

— Մի՛ գնա... աղաչում եմ քեզ... մի՛ գնա:

Երեխաները լացի են դիմում, ծառայեցնելով այն որպես
շրջապատի վրա բարոյական ճնշում գործ դնելու ծայրահեղ
փաստարկ կամ միջոց: Այդպես են անում նաև կանայք, ինչ-
պես և առհասարակ բոլոր թուլակամ և փոքրոգի մարդիկ:
Այն պահին, ըստ երևույթին, ես լալիս էի անկեղծ սրտով,
լալիս էի ինչպես երեխան կամ կինը, կամ որևէ թույլ մի
արարած և, չգիտեմ ինչու, հույս էի տածում, թե իմ ար-
ցունքները կհամոզեն էմիլիային, որպեսզի նա ինձ չլքի:
Ճիշտ է, այդ պատրանքը մի փոքր ինձ մխիթարում էր, սիրտ
էր տալիս, սակայն միևնույն ժամանակ նա իմ մեջ այն
զգացումն էր առաջացնում, թե այդ անում եմ շողոքոր-
թաբար և սոսկ այն դիտավորյալ նպատակով, որպեսզի, ծա-
ռայեցնելով արցունքներս, վրեժխնդիր լինեմ նրան: Հան-
կարծ ես ամաչեցի և, շապասելով էմիլիայի պատասխանին,
վեր կացա և դուրս գիացի ննջարանից:

Մի քանի րոպե անց իմ հետևից հյուրասենյակ եկավ նաև
էմիլիան: Այդ ընթացքում հասցրել էի բավական հան-
դարտվել, աչքերս արդեն սրբել էի և ննջազգեստի վրայից
հագել խալաթս: Բազկաթոռի մեջ ընկած, ես ինքնաբերաբար
մի սիգարետ էի դրել բերանս և ուզում էի վառել, թեև ծխելու
ոչ մի ցանկություն չունեի: Էմիլիան նույնպես նստեց և իս-
կույն ասաց.

— Հանգիստ կաց... մի վախենա... չեմ գնում:

Սակայն այդ խոսքերը նա ասաց մի տեսակ հոգնած,
թույլ, վշտաբեկ ու հուսահատ ձայնով: Նա նստել էր աչքերը
կախ գցած և, ըստ երևույթին, ինչ-որ բան էր մտածում: Ես
նկատեցի, որ նրա բերանի անկյունները դողդողում են, իսկ
ձեռքերը ջղայնորեն պոճոկում խալաթի օձիքը, որ անհույս
մոլորության ու շփոթմունքի նշան էր: Հետո հանկարծ դա-
ժանությամբ ավելացրեց.

— Մայրս չի ուզում, որ իր մոտ գնամ... ասում է, որ իմ

սենյակը վարձով է տվել ինչ-որ մեկին... երկու հոգի առանց
այն էլ արդեն ապրում էին իր մոտ, հիմա էլ երրորդն է ավե-
լացել, այնպես որ ամբողջ տունը լցվել է մարդկանցով... և
հետո շի հավատում, որ այս բոլորը լուրջ է... ասում է, որ
ես, ինչպես պետք է, մտածեմ... այնպես որ չգիտեմ, թե ուր
գնամ... ես ոչ ոքի պետք չեմ... և ստիպված քեզ մոտ եմ
մնում:

Էմիլիայի ասածները, որոնք իրենց անկեղծությամբ սու-
կալի դաժան էին, դանակի նման մխրձվեցին սիրտս: Ինձ
թվում է, այդ խոսքերի վրա ես սարսափելի ցնցվեցի, ինչպես
կրծքիս հասցրած հարվածից և, չկարողանալով ինձ զսպել,
հուզմունքից բացականչեցի.

— Ինչո՞ւ ես այդ ձևով ինձ հետ խոսում... ստիպված
եմ... ինչո՞ւ ես ստիպված... ես ի՞նչ եմ արել քեզ... ինչո՞ւ
ես այդքան ինձ ատում:

Այժմ արդեն լալիս էր նա ինքը, թեև ձեռքով փակում էր
երեսը և աշխատում այդ ցուլց շտալ:

— Դու ուզում էիր, որ ես չգնամ,— գլուխը թափ տալով
ասաց նա,— շատ լավ... ես մնում եմ... Հիմա պետք է որ
գոհ լինես, ճի՞շտ է:

Ես բազկաթոռից վեր կացա, նստեցի դիվանի վրա՝ էմի-
լիայի կողքին և գրկեցի նրան, բայց իսկույն զգացի, որ նա
աննկատելիորեն դիմադրում և ուզում է դուրս պրծնել գրր-
կիցս:

— Իհարկե, ուզում եմ, որ մնաս,— պատասխանեցի
ես,— բայց ոչ թե այս ձևով... ստիպված... ես ի՞նչ եմ արել
քեզ, էմիլիա, ինչո՞ւ ես դու ինձ հետ այդպես խոսում:

— Եթե ուզում ես, կգնամ... կգնամ վարձով կապրեմ...
միայն թե սկզբում որոշ ժամանակ դու ինձ օգնես... Ես
դարձյալ կգնամ մեքենագրուհի կաշխատեմ... հենց որ աշ-
խատանք գտա, այլևս քեզանից ոչինչ չեմ խնդրի:

— Ի՞նչ ես ասում,— գոռացի ես,— ես ուզում եմ, որ դու
մնաս... բայց ուզում եմ, էմիլիա, որ դու մնաս ոչ հարկա-
դրաբար, ոչ այն պատճառով, որ դու ուրիշ ելք չունես:

— Ինձ հարկադրողը դու չես,— լացը շարունակելով,
պատասխանեց նա,— կյանքն է:

Ես նրան սեղմում էի իմ գրկում և անընդհատ նորից ու նորից ուզում էի հարցնել, թե արդյոք ինչո՞ւ է դադարել ինձ սիրելուց, ինչո՞ւ է սկսել նույնիսկ արհամարհել ինձ, ի՞նչ է պատահել արդյոք, ես ի՞նչ եմ արել իրեն: Սակայն նրա արցունքներն ու մոլորյալ վիճակը ինձ որոշ շափով նույնիսկ հանգստացրին: Ես մտածեցի, որ հիմա այդպիսի հարցեր առաջ քաշելու ժամանակը չէ, որ այդպիսի հարցերը ինձ ոչ մի արդյունքի չեն հասցնի, և որ ճշմարտությունն իմանալու համար այժմ անհրաժեշտ է դիմել ուրիշ՝ ավելի զգուշավոր ու մեղմ միջոցների: Ես բավական ժամանակ սպասում էի, իսկ էմիլիան, երեսը շրջած հակառակ կողմը, շարունակում էր լուռ արտասվել: Վերջապես առաջարկեցի նրան.

— Գիտես ինչ, էմիլիա, արի վերջ տանք այս բոլոր վեճերին ու բացատրություններին... դրանք ոչ մի լավ բանի չեն հանգեցնի, բացի իրար ցավ պատճառելուց... Ես այլևս ոչինչ չեմ ուզում հարցնել քեզ, գոնե առայժմ... ավելի լավ է լսիր, թե ինչ եմ ասում. ինչպես գիտես, ես արդեն համաձայնություն եմ տվել գրել «Ողիսականի» սցենարը... Բայց Բատտիստան ուզում է, որ մենք գործի վրա աշխատենք նեպոլի ծովածոցում, որտեղ նկարահանվելու է բնական տեսարանների մեծ մասը... Ահա այդ պատճառով որոշել ենք գնալ Կապրի... այնտեղ ես քեզ խոսք եմ տալիս հանգիստ թողնել... շնայած, եթե ուզեմ էլ, չեմ կարող խանգարել. ես ամբողջ օրը ռեժիսորի հետ աշխատելու եմ, և քեզ հետ կտեսնվեմ ամենաշատը միայն ճաշի և ընթրիքի ժամերին... Կապրին սքանչելի տեղ է, շուտով ամառային լողասեզոնը կսկսվի... հոգնածությունդ կանցնի, կլողանաս, դուրս կգաս գրոսանքների, ջղերդ կհանգստանան, վերջապես, առանց շտապելու, կմտածես քեզ վերաբերող հարցերի մասին և որոշում կկայացնես, թե ինչ ես անելու: Վերջին հաշվով, մայրդ իրավացի է. քեզ անհրաժեշտ է լրջորեն մտածել այդ մասին... որից հետո, երբ մի երեք-չորս ամիս արդեն անցած կլինի, ինձ կհաղորդես քո որոշումը և այն ժամանակ, այո, միայն այն ժամանակ, մենք նորից կսկսենք մեր խոսակցությունը:

էմիլիան դեռ նստած էր, երեսը նույն ձևով ինձանից շրջ-

ջած, թվում էր, նա բոլորովին չի ուզում ինձ տեսնել: Հետո գրեթե ամբողջովին հանգիստ ինձ հարցրեց.

— Իսկ ե՞րբ պետք է մեկնել:

— Հենց հիմա... այսինքն մի տասն օրից հետո... հենց որ ռեժիսորը Փարիզից վերադառնա:

Թեև էմիլիան մինչև հիմա դեռ իմ գրկում էր, ու ես ուզում էի ինձ սեղմված նրա կլոր ու փափուկ կուրծքը, այնուամենայնիվ, չէի համարձակվում համբուրել նրան: Փաստորեն նա ոչնչով չէր արձագանքում իմ գգվանքին, դեռ ավելին, նա այդ դիտում էր որպես մի տառապանք: Բայց շնայած դրան, ես, այնուամենայնիվ, ուզում էի ինձ հավատացնել, որ նրա այդ պասսիվությունը ոչ միայն դեռ լրիվ անտարբերություն չի նշանակում, այլև իր մեջ ձգման, հրապուրանքի ինչ-որ սկզբունք է պարունակում: Քիչ հետո էմիլիան նույն հանգիստ, բայց, իհարկե, նաև ընդդիմացող տոնով հարցրեց.

— Իսկ կապրիում որտե՞ղ ենք ապրելու: Հյուրանոցո՞ւմ: Կարծելով որ մեծ հաճույք կպատճառեմ, ես շատ ուրախ պատասխանեցի.

— Ոչ, մենք հյուրանոց չենք գնա... Հյուրանոցները սոսկալի ձանձրալի են... Մենք այնտեղ ապրելու շատ ավելի լավ տեղ ունենք, քան հյուրանոցներն են... Բատտիստան մեզ առաջարկում է իր ամառանոցը... Մինչև սցենարի վերջացնելը նա ամբողջապես մեր տրամադրության տակ է լինելու:

Ես իսկույն զգացի, ինչպես և մի քանի օր առաջ, երբ շափազանց հապճեպ իմ համաձայնությունը տվի Բատտիստայի առաջարկությանը, որ էմիլիան՝ իրեն հայտնի ինչ-որ պատճառով հավանություն չի տալիս դրան: Եվ իսկապես էլ, նա անմիջապես դուրս պրծավ իմ գրկից և, միանգամից քաշվելով բազմոցի մյուս ծայրը, հարցրեց.

— Բատտիստայի ամառանո՞ցը... և դու արդեն տվե՞լ ես քո համաձայնությունը:

— Կարծում էի, որ դա քեզ մեծ հաճույք կպատճառի, — աշխատեցի արդարանալ ես, — ամառանոցը անհամեմատ ավելի լավն է, քան հյուրանոցը:

— Դու արդեն համաձայնվե՞լ ես:

— Այո, ես կարծում էի դա լավ կլինի:

— Մենք այնտեղ ունեցողի հե՞տ ենք ապրելու:

— Չէ, Ռայնգոլդը հյուրանոցում է բնակվելու:

— Բատտիստա՞ն է գալու:

— Բատտիստա՞ն, — հարցրի ես մի տեսակ աղոտ կերպով զարմացած այդ հարցից: — Կարծում եմ, որ մեկ-մեկ կգա... բայց կարճ ժամանակով, Week-end¹-ներին, մեկ կամ երկու օրով... որպեսզի տեսնի, թե ինչպես է ընթանում աշխատանքը:

Այս անգամ էմիլիան ոչինչ չասաց. նա ձեռքը տարավ խալաթի գրպանը, հանեց թաշկինակը և քիթը մաքրեց: Թաշկինակը հանելիս նրա խալաթը լայնորեն բացվեց մերկացնելով փորն ու ոտքերը: Նա նստել էր ոտքը ոտքին գցած, որոնք այնպես էին սեղմվել իրար, կարծես դիտմամբ իր մերկությունից ամաչելու պատճառով էր այդպես նստել: Սակայն այդ կեցվածքը, միևնույն է, չէր կարող թաքցնել նրա սպիտակ, երիտասարդ ու ճկուն մարմինը, որի առաջ անգոր են բոլոր տեսակ մերժումները: Էմիլիան, ինքն այդ չգիտակցելով, կարծես ուզում էր ինձ հրապուրել դեպի իրեն: Հանկարծ իմ մեջ խենթ ու անհաղթահարելի մի ցանկություն արթնացավ, և մի պահ երևակայեցի, որ կարող եմ իսկույն առնել նրան գիրկս և տիրանալ:

Սակայն ես հասկանում էի, որ ինչքան էլ ուզում է ուժեղ լինի իմ ցանկությունը, միևնույն է, անհնարին է այդ իրագործել: Մինչ նա թաշկինակով իր քիթն էր մաքրում, ես գրեթե գաղտագողի նայում էի նրան, վախենալով, որ կարող է նկատել իմ հայացքը և ամոթանք տալ: Այդ մտքի վրա ես ինքս հանդիմանեցի ինձ. այս ո՞ւր եմ հասել արդյոք, որ ինչպես արգելված մի բանի, թաքուն եմ նայում կնոջս մերկ մարմնին, նմանվելով այն տղաներին, որոնք լողափի խցիկի ճեղքերից գաղտագողի ներս են նայում: Ես ձեռքս մեկնեցի և թափով ու զայրագին նրա ոտքի վրայից քաշեցի խալաթի փեշը: Ինչպես երևում էր, նա, ըստ երևույթին, շնկատեց իմ շարժումը, բայց թաշկինակը նորից գրպանը դնելիս, այս անգամ շատ հանգիստ ձայնով ասաց.

— Ես կգամ Կապրի... Բայց միայն մի պայմանով...

¹ Ոչ աշխատանքային ժամանակ, շաբաթ-կիրակի օրերին (անգլ.):

— Չհամարձակվես որևէ պայմանի մասին խոսել... ոչինչ չեմ ուզում իմանալ, — բղավեցի ես, բուրբոսվին անսպասելի: — Որոշեցինք, գնում ենք... Բայց ոչինչ իմանալ ես չեմ ուզում... իսկ այժմ այստեղից գնա, գնա այստեղից:

Ըստ երևույթին իմ ձայնում այնպիսի մի ցասում կար, որ էմիլիան վախեցավ. նա իսկույն վեր կացավ և անհապաղ դուրս գնաց սենյակից:

Գլուխ տասներկուերորդ

Հասավ և Կապրի մեկնելու օրը: Բատտիստան որոշել էր մեզ ուղեկցել կղզին, որպեսզի, ինչպես ինքն արտահայտվեց, պատշաճ կերպով ընդունի մեզ և մատուցի տանտիրոջ իր հարգանքը: Մենք դուրս եկանք փողոց և տեսանք, որ իմ փոքրիկ սակավաուժ մեքենայի կողքին կանգնած է պրոդյուսերի ոչ-սերիական արտադրության կարմիր գույնի հզոր ավտոմոբիլը: Թեև արդեն հունիսի սկիզբն էր, բայց դեռ մառախլապատ և ուժեղ քամիներով փոփոխական եղանակներ էին: Բատտիստան կաշվե պիջակով և ֆլանելի շալվարով կանգնած էր իր մեքենայի կողքին և խոսում էր Ռայնգոլդի հետ, որը, ինչպես ամեն մի օրինավոր գերմանացի, Իտալիան համարում էր արևոտ երկիր և այդ պատճառով շատ թեթև էր հագնվել. նա գլխին դրել էր հովարով սպիտակ քաթանե շերետ, իսկ հագինը բամբակե կտորից կարած, գաղութային ձևի շերտավոր մի կոստյում էր: Ես ու էմիլիան տանից դուրս եկանք դռնապանի և մեր աղախնի ուղեկցությամբ, որոնք ճամպրուկներն էին բերում: Բատտիստան ու Ռայնգոլդը մեզ նկատելով, իսկույն ընդառաջ եկան:

— Ուրեմն, ինչպե՞ս տեղավորվենք, — հարցրեց Բատտիստան, ողջույններ փոխանակելուց հետո: Եվ անմիջապես, առանց պատասխանի սպասելու, ասաց. — Ես առաջարկում եմ, Մոլտենի, որ սինյորան՝ ձեր կինը, մեկնի իմ մեքենայով, իսկ Ռայնգոլդը թող գա ձեզ հետ, այդպիսով դուք ար-

դեն հնարավորութիւն կունենաք ամբողջ ճանապարհի ընթացքում խոսել ֆիլմի մասին... քանի որ, — նա ժպտաց և լուրջ տոնով եզրափակեց իր ասածը, — հենց այսօրվանից սկսվում է իսկական աշխատանքը... Ես ուզում եմ, որ երկու ամսից հետո պատրաստի սցենարը իմ ձեռքին լինի:

Ես գրեթե մեքենայաբար նայեցի էմիլիային և նկատեցի, որ նրա դիմագծերը մի տեսակ այլայլվեցին: Այդ բանը նրա մոտ նկատել էի նաև առաջներում և գիտեի, որ դա հոգեկան շփոթահարութեան և բողոքի նշան է: Բայց առանձին ուշադրութիւն չդարձրի դրան, ինչպես և շատաժեցի այն մասին, որ այդ նույն ձևով էմիլիան այլայլվեց նաև այն ժամանակ, երբ առաջին անգամ լսեց Բատտիստայի ինձ արած, իհարկե, միանգամայն խելամիտ առաջարկութեան մասին:

— Շատ լավ, — ասացի ես, ճգնելով որքան կարելի է ուրախ երևալ, քանի որ, ինչպես թվում էր ինձ, դեպի ծով ճանապարհորդելու հանգամանքները հենց այդ էլ պահանջում էին: — Շատ լավ... էմիլիան թող գա ձեզ հետ, իսկ ես ու Ռայնգոլդը միասին կգնանք... Թեև, իհարկե, շեմ խոստանում, որ մենք ճանապարհին սցենարի մասին կխոսենք:

— Ես արագ գնալուց վախենում եմ... — հանկարծ բողոքեց էմիլիան, — իսկ դուք ձեր այդ մեքենայով բոլոր շափերն անցկացնում եք...

Սակայն Բատտիստան թափով բռնեց էմիլիայի թևը և ասաց.

— Բոլորովին մի վախեցեք ինձ հետ գնալուց... և վերջին հաշվով ինչի՞ց եք վախենում... չէ՞ որ իմ կաշին էլ ինձ համար է թանկ:

Այդ ասելով, նա էմիլիային գրեթե զոռով քարշ տվեց դեպի իր մեքենան: Ես տեսա, էմիլիան ինչպես է մոլորուն ու հարցական նայում իմ կողմը և մտածեցի, թե արդյոք լավ չէ՞ր լինի, եթե ես համառեի, որ նա ինձ հետ նստեր մեքենա: Բայց և իսկույն մտածեցի, որ Բատտիստան դրանից կարող է նեղանալ, մանավանդ որ նա մեքենայի մեծ սիրահար էր և, ճշմարիտն ասած, հիանալի էլ վարում էր, ուստի, հաշվի առնելով այդ բոլորը, նորից լռեցի: էմիլիան

դեռ շարունակում էր առարկել, բայց նրա դիմադրությունը գնալով սկսում էր թուլանալ:

— Համենայն դեպս ինձ համար գերադասելի է իմ ամուսնու մեքենան...

Իսկ Բատտիստան կատակելով բողոքում էր.

— Ինչու անպայման ձեր ամուսնու... Դուք առանց այն էլ ամբողջ օրը ձեր ամուսնու հետ եք լինում... Շուտ արեք, նստեք... Եթե ոչ՝ խիստ կնեղանամ:

Այդ ընթացքում նրանք արդեն մոտեցան մեքենային, և Բատտիստան, բացելով դռնակը, նստեցրեց էմիլիային, ապա նորից փակելով, պտույտ տվեց մեքենայի շուրջը, որպեսզի մյուս կողմից էլ ինքը նստի: Ես նայում էի նրանց մի տեսակ կիսաքուն վիճակում և նույնիսկ Ռայնգոլդի խոսքերի վրա անսպասելիությունից ցնցվեցի, երբ ասաց.

— Դե, գնացինք, պատրաստ եք:

Ես վայրկենապես սթափվեցի, նստեցի նրա կողքին և մոտորը գործի գցեցի:

Մեր հետևից լսեցի Բատտիստայի մեքենայի խուլ աղմուկը, որը տեղից շարժվեց և, անցնելով մեր առաջը, սլացավ նեղ ու դարձավար իջնող փողոցով: Ես հազիվ հասցրի ապակու միջով տեսնել կողք-կողքի նստած էմիլիայի և Բատտիստայի ուսերը, հետո մեքենան արագորեն թեքվեց և կորավ ոլորանի հետևում:

Բատտիստան մեզ հանձնարարել էր ճանապարհին խոսել սցենարի մասին: Դա, իհարկե, ավելորդ հանձնարարություն էր, որովհետև, երբ քաղաքը իր ամբողջ երկարությամբ կտրեցինք ու անցանք, և ես իմ փոքրիկ մեքենայի ունեցած արագությամբ դուրս եկա Ֆորմիա տանող խճուղին, Ռայնգոլդը, որ մինչ այդ խորին լռություն էր պահպանել, սկսեց.

— Ճիշտն ասենք, Մուլտենի, այն օրը, Բատտիստայի մոտ, դուք վախեցաք, որ կարող եք ստիպված լինել աղմուկ հանող Ֆիլմի վրա աշխատել, այդպես չէ՞:— Նա ժպտալով ընդեց այդ երկու բառը:

— Ես այդ վախը հիմա էլ ունեմ,— մտացրիվ պատասխանեցի ես:— Մանավանդ որ իտալական կինոստուդիաներում այժմ հեջ այդպիսի տենդենց է նկատվում:

— Թող դա այդպես լինի, բայց դուք վախենալու ոչինչ

չունեք... — ասաց Ռայնգոլդը, և հանկարծ նրա ձայնը հնչեց ավելի հաստատ ու տիրական: — Մենք կստեղծենք հոգեբանական մի ֆիլմ, միայն հոգեբանական... ինչպես որ ձեզ դեռ այն օրը ասացի... Ես, սիրելի Մոլտենի, սովորություն չունեմ անելու այն, ինչ պրոդյուսերներն են ուզում... Ես միշտ անում եմ այն, ինչ ինքս եմ ուզում... Ստուգիայում տնօրենը ես եմ և ոչ թե մի ուրիշը... այլապես հրաժարվում եմ ֆիլմը դնելուց... հասկանալի՞ է:

Ես ասացի, որ դա իսկապես էլ պարզ բան է, և իմ խոսքերում մի անկեղծ ուրախություն զգացի, քանի որ Ռայնգոլդի անկախության այդ փաստը ինձ հույս էր ներշնչում, որ նրա հետ հեշտությամբ կարելի է համաձայնության գալ և որ սցենարի վրա կատարվելիք աշխատանքը ավելի քիչ ձանձրույթ կպատճառի, քան սովորաբար: Ռայնգոլդը, փոքր-ինչ լռելուց հետո, նորից շարունակեց.

— Այժմ ուզում եմ ձեզ շարադրել իմ նկատառումներից մի քանիսը... Դուք կարո՞ղ եք մեքենան վարել և միևնույն ժամանակ լսել, թե ես ինչ եմ ասում:

— Ինքնըստինքյան հասկանալի է, կարող եմ, — ասացի ես, բայց հազիվ էի պատրաստվել Ռայնգոլդին լսելու, երբ դիմացի ճանապարհից խճուղի դուրս եկավ եզներ լծած ու բարձած մի սայլ, և ես ստիպված եղա մեքենայի դեկը կրտրուկ շրջել մի կողմի վրա: Մեքենան այնպես ծովեց ու զիզզագներ արեց, որ հազիվ կարողացա պահել, որպեսզի ծառին չկպչի: Ռայնգոլդն սկսեց ծիծաղել.

— Ավելի լավ կլիներ ասեիք՝ «ինքնըստինքյան հասկանալի է, չեմ կարող»:

— Այդ կարևոր չէ, — ասացի ես մի փոքր վրդովված պատահածից, — եզների գալը ոչ մի կերպ չէի կարող տեսնել... Հիմա շարունակեք, ես ձեզ լսում եմ:

Ռայնգոլդն իրեն խնդրել շտվեց.

— Գիտեք ինչ, Մոլտենի... Ես համաձայնեցի մեկնել Կապրի... քանի որ իսկապես էլ բնական պայմաններում կատարվող մեր նկարահանումները տեղի են ունենալու Նեապոլի ծովածոցում... բայց դա միայն ֆոն է լինելու... Վերջին հաշվով մենք կարող էինք մնալ նաև Հռոմում... ինչպես գիտեք, Ողիսևսի ողբերգությունը ամենևին էլ ծովագնացի

ողբերգութիւնն չէ և ոչ էլ նոր երկրներ հայտնագործողի կամ տուն վերադարձող զինվորի... Դա մի ողբերգութիւն է, որ հավասարապես կարող է վերաբերել ուզածը մարդուն... Ողիսեսի այդ առասպելի մեջ թաքնված է որոշակի տիպի մարդու իսկական պատմութիւնը...

Ես հենց այնպես, առանց երկար մտածելու, ասացի.

— Հունական բոլոր առասպելների հիմքում էլ մարդկային ողբերգութիւնն է ընկած, ընդ որում առանց ժամանակի և տեղի, այդ պատճառով էլ նրանք հավիտենական են:

— Շատ ճիշտ է... այլ կերպ ասած, հունական բոլոր առասպելները մարդկային կյանքի ալեգորիկ պատկերացումներն են... ուրեմն, այժմ մենք՝ ժամանակակից մարդիկս, ի՞նչ պետք է անենք, որպեսզի հարութիւն տանք այնքան վաղեմի և հեռավոր այդ առասպելներին... Ամենից առաջ պետք է պարզենք, թե դրանք ինչ նշանակութիւն կարող են ունենալ մեզ՝ ժամանակակիցներիս համար և ապա հետազոտել, գտնել ու մեկնաբանել այդ նշանակութիւնը... Բայց դա պետք է անել աշխույժ, անկաշկանդ, յուրովի, առանց երկյուղածության, առանց դող զգալու հունական գրականության այն գլուխգործոցներից, որոնք ստեղծված են այդ առասպելների հիման վրա... Վերցնենք մի օրինակ... անկասկած, ձեզ ծանոթ է Օ'Նիլի «Սուզը սազում է էլեկտրային» պիեսը, որի հիման վրա նկարահանված է նաև Ֆիլմը:

— Այո, ինչպես չէ:

— Ուրեմն, տեսեք, Օ'Նիլը նույնպես հասկացել է այն հասարակ ճշմարտութիւնը, որ անտիկ առասպելները պետք է մեկնաբանել ժամանակակից ձևով, ինչպես և իր պիեսում է արել... Բայց, միևնույն է, ես նրա «Սուզը սազում է էլեկտրային» գործը չեմ սիրում... և գիտե՞ք ինչու... որովհետև Օ'Նիլը թույլ է տվել, որ էսփիլեսը վախեցնի իրեն... Նա ճիշտ է վարվել, գտնելով, որ Օրեստեսի մասին եղած առասպելը կարող է մեկնաբանվել հոգեբանորեն... Բայց նյութից սարսափած՝ շափազանց տառացի է հաղորդել առասպելի բովանդակութիւնը... ինչպես օրինավոր աշակերտն է դպրոցական տողած տետրակում իր շարադրութիւնը գրում... Տողերը երևում են, Մոլտենի...

Ես լսեցի, թե ինչպես Ռայնգոլդը ինքնագոհ ծիծաղեց,

հիացած Օ'Նիլի հասցեին արած իր քննադատական դատողությունից:

Այժմ մենք սլանում էինք հոռմեական Կամպանիայով, որն ընկած էր ծովից ոչ հեռու՝ ցածրանիստ բլուրների միջև, այդ բլրալանջերը ծածկված էին հասած ցորենի դեղին արտերով, որոնց միջև երբեմն այստեղ ու այնտեղ երևում էր մենավոր ու սաղարթախիտ մի ծառ: Ըստ երևույթին, ինչպես և կարծում էի, մենք Բատտիստայից բավական հետ էինք մնացել. ճանապարհը, ինչքան որ աչքս տեսնում էր և՛ ուղիղ ձգվելիս, և՛ ոլորաններում, ամբողջովին դատարկ էր: Այժմ Բատտիստան երևի սլանում էր ժամը հարյուր կիլոմետրից ավելի արագությամբ և մեզանից արդեն մոտ հիսուն կիլոմետր առաջ անցած կլիներ: Ռայնգոլդը նորից շարունակեց իր խոսակցությունը.

— Եթե Օ'Նիլը հասկացել է այն ճշմարտությունը, որ հունական առասպելները պետք է մեկնաբանվեն ժամանակակից ձևով, ըստ հոգեբանության արած վերջին հայտնագործումների, ապա նա ոչ թե պետք է այդքան հաշվի նրստեր այդ առասպելների բովանդակության հետ, այլ, ընդհակառակը, մի կողմ նետեր այն, բացահայտեր իր ձևով, թարմացներ... Մինևչդեռ Օ'Նիլը այդ չի արել, որի հետևանքով էլ նրա «Սուգը սազում է էլեկտրային» պիեսը խիստ ձանձրալի է և սառը... պարզապես դպրոցի դաս է:

— Իսկ ինձ դուր է գալիս, — առարկեցի ես:

Ռայնգոլդը, ուշադրություն չդարձնելով իմ ասածին, շարունակեց.

— Այժմ մենք «Ողիսականի» հետ անելու ենք այն, ինչ Օ'Նիլը չի ուզեցել կամ չի կարողացել անել էսքիլեսյան «Օրեստեսի» հետ... մենք պետք է հերձենք այն, ինչպես հերձում են անատոմիական սեղանին գտնվող մարմինը, պետք է ուսումնասիրենք ու թափանցենք նրա ներքին էություն մեջ, քանդենք նրա բոլոր մասերը, ապա նորից հավաքենք ու միացնենք իրար՝ ըստ ժամանակակից մեր պահանջի:

Առանց իմանալու, թե Ռայնգոլդն ուր է ուզում տանել իր խոսակցությունը, ես հենց այնպես, առանց մտածելու ասացի.

— «Ողիսականի» ներքին էությունը բոլորին հայտնի է, դա հարազատ տան, դեպի ընտանիքն ու հայրենիքն ունեցած կարոտի և այդ տունը, ընտանիքը և հայրենիքը վերադառնալու ցանկությունը արգելակող անհամար խոչընդոտների միջև եղած հակասությունն է... Հստ երևույթին, յուրաքանչյուր ուղմագերի, ամեն մի զինվոր, որ պատերազմը վերջանալուց հետո ինչ-որ պատճառով հեռու է մնացել իր հայրենիքից, նույնպես մի փոքրիկ Ողիսևս է:

Ռայնգոլդը ծիծաղեց, և նրա այդ ծիծաղը հնչեց ինչպես հավի կշկշոց:

— Ես հենց այդպես էլ սպասում էի... զինվոր, ուղմագերի... մինչդեռ բանը բոլորովին էլ այդ չէ, Մուլտենի... դուք կանգ եք առնում հարցի արտաքին հանգամանքների, նրա փաստացի կողմերի վրա... այդ շափանիշով մոտենալիս «Ողիսականի» մոտիվներով նկարահանած ֆիլմը իսկապես որ կարող է ենթարկվել «աղմուկ հանող» ֆիլմերի վտանգին, դառնալ արկածայինի պես մի բան, ինչպես այդ կուզեր ինքը Բատտիստան... Բայց Բատտիստան պրոդյուսեր է և իր տեսակետից իրավացի է, երբ այդ ձևով է մտածում... իսկ դուք, Մուլտենի, դուք մտավորական եք... պարտավոր եք գործի դնել ձեր սեփական գլուխը... ապա փորձեցեք լավ մտածել:

— Ես բացի դրանից ուրիշ ոչնչով չեմ էլ զբաղվում, — պատասխանեցի փոքր-ինչ գրգռված:

— Ոչ, դա ճիշտ չէ, դուք չեք ուզում լավ մտածել... ապա փորձեք խորհել ինչպես պետքն է, աշխատեցեք ավելի խորը թափանցել և ամենից առաջ հաշվի առեք մի հանգամանք. այն, որ Ողիսևսի պատմությունը դա փաստորեն Ողիսևսի՝ իր կնոջ հետ ունեցած հարաբերությունների պատմությունն է:

Ես այս անգամ լուռ մնացի: Եվ Ռայնգոլդը նորից շարունակեց իր խոսքը.

— Ի՞նչն է, որ ամենից շատ է մեզ զարմանք պատճառում «Ողիսականի» մեջ: Դա Ողիսևսի վերադառնալու դանդաղկոտությունն է, դա այն է, որ նա տուն հասնելու համար տասը տարի է կորցնում... և որ այդ տասը տարիների ընթացքում, շնայած Պենելոպեի հանդեպ ունեցած իր սիրուն, որի մասին

նա բոլոր պատեհ և անպատեհ առիթներով խոսում է, իրականում ամեն անգամ դավաճանում է նրան, հենց որ հարմար առիթ է ներկայանում... Հոմերոսի ասելով, Ողիսևսի ուշք ու միտքը Պենելոպեն էր, նրա հետ միանալու ցանկությունը Ողիսևսի միակ բաղձանքն էր... Բայց արդյո՞ք մենք պետք է դրան հավատանք, Մուլտենի:

— Դե եթե Հոմերոսին չպետք է հավատանք, — ասացի ես կատակի ձևով, — այն դեպքում ես չգիտեմ, թե ում ենք հավատալու:

— Մեզ՝ ժամանակակից մարդկանցս, որ կարողանում ենք տեսնել այն, ինչ առասպելի հետևում է թաքնված... Մուլտենի, «Ողիսականը» բազմաթիվ անգամ նորից ու նորից կարդալուց հետո ես եկել եմ այն եզրակացության, որ փաստորեն Ողիսևսը, իհարկե, գուցե և առանց այդ գիտակցելու, ամենևին էլ չէր ուզում տուն վերադառնալ և Պենելոպեի հետ միանալու ոչ մի ցանկություն չուներ... Սա իմ եզրակացությունն է, Մուլտենի:

Ես նորից ոչինչ չասացի: Իմ լռությունից գոտեպնդված, Ռայնգոլդը շարունակեց.

— Այո, Ողիսևսը մի մարդ է, որը վախենում է իր կնոջ մոտ վերադառնալուց, և հետագայում մենք կտեսնենք, թե ինչու: Վախենալով դրանից, նա ենթագիտակցորեն աշխատում է իր շուրջը ստեղծել այնպիսի խոչնդոտներ, որոնք կարող էին արգելակել նրա վերադարձը: Դեպի արկածներով լի թափառումներն ունեցած նրա այնքան հոշակավոր սերը փաստորեն ոչ այլ ինչ է, եթե ոչ իր ճանապարհորդությունը ավելի և ավելի երկարացնելու շփտակցված մի ցանկություն, ճանապարհորդություն, որը բազմաթիվ արկածների հետևանքով իսկապես էլ անվերջ ընդհատվում ու երկարում է... Ողիսևսի վերադարձին խանգարում են ոչ թե Սկիլլան և Քարիբդիսը, Կալիպսոն և Ֆեակները, Պոլիֆեմը և Կիրկեն կամ էլ նույնիսկ աստվածները, Ողիսևսի վերադարձն արգելակողը հենց նրա այն ենթագիտակցությունն է, որը հարմար պատրվակներ է փնտրում՝ մի տարի այստեղ մնալու, մի երկու տարի մի ուրիշ տեղ մնալու համար և այսպես շարունակ:

Ահա թե Ռայնգոլդն ուր էր տանում խոսակցությունը. դա

կլասիկ ստեղծագործությունների ֆրեյդյան բնորոշ մեկնաբանությունն էր: Ես միայն զարմացա, որ իսկույնների շէի կռահել այդ: Ռայնգոլդը գերմանացի էր, նա իր առաջին քայլերն արել էր Բեռլինում դեռ այն ժամանակ, երբ Ֆրեյդն սկսել էր նշանավոր անուն դառնալ, այնուհետև տեղափոխվել էր Միացյալ Նահանգներ, որտեղ հոգեվերլուծությունը խիստ հարգի էր: Բնական է, նա աշխատում է այդ մեթոդները գործադրել նաև Ողիսևսի նկատմամբ, մի հերոս, որին մեծ մասամբ անծանոթ են մարդկային բարդ ապրումները: Ես շատ շոր ասացի.

— Շատ հնարամիտ է... բայց ինձ համար դեռ պարզ չէ:

— Մի րոպե, Մոլտենի, մի րոպե... Ուրեմն, ինչպես պարզ երևում է իմ այս մեկնաբանությունից, որը ըստ ժամանակակից հոգեբանության վերջին հայտնագործությունների միակ ճիշտն է, «Ողիսևսներ» ոչ այլ ինչ է, եթե ոչ մարդու անձնական տվյալտանքների մի պատմություն, դա այսպես ասած, ամուսնական կյանքի անհամերաշխության պատմություն է... Ողիսևսը երկար ժամանակ տառապում է ու խորացնում այդ դիմագրությունը, մինչև որ, վերջապես, տասը տարի ինքն իր հետ ներքին պայքար մղելուց հետո հաջողացնում է հաղթել ու դուրս գալ այդ վիճակից, թեև դրա համար նա ստիպված է լինում նորից ընդունել այն պայմանները, որոնց ծնունդն էր հենց ինքը այդ անհամերաշխությունը... Այլ խոսքերով ասած, տասը տարվա ընթացքում Ողիսևսը ինքն է ստեղծում բոլոր հնարավոր պատրվակները, որպեսզի ձգձգի իր վերադարձը, ամեն տեսակ պատճառներ է հնարում, որպեսզի չվերադառնա իր ամուսնական հարկի տակ... նա նույնիսկ ուրիշ կանանց հետ կապվելու բազմաթիվ փորձեր է անում... սակայն, վերջի վերջո, նրան հաջողվում է հաղթանակ տանել իր վրա, տիրուպետել իրեն ու վերադառնալ... Եվ ահա Ողիսևսի վերադարձը փաստորեն հաշտություն է այն դրության հետ, որի պատճառով նա գնացել էր և այլևս չէր ուզում վերադառնալ:

— Ո՞ր դրության հետ, — հարցրի ես, այս անգամ իսկապես զարմացած: — Մի՞թե Ողիսևսը չէր գնացել Տրոյական պատերազմին մասնակցելու:

— Դա միայն արտաքին կողմն է, Մուլտենի, միայն արտաքին... — անհամբերությամբ կրկնեց Ռայնգոլդը, — բայց թե ինչ դրություն էր տիրում Իթակեում՝ մինչև Ողիսևսի Տրոյական պատերազմ գնալը, բոլոր փեսացուների և մնացած բաների մասին ես կխոսեմ, երբ բացատրեմ այն պատճառները, որոնց հետևանքով Ողիսևսը չի ուզում վերադառնալ Իթակե և վախենում է նորից գտնել իր կնոջը... Այնուամենայնիվ, մինչև այդ ես ուզում եմ ընդգծել մի շատ կարևոր հանգամանք. «Ողիսականը» ոչ թե արկածների կամ ինչ-որ արատաքին իրադարձությունների նկարագրություն է, որը տեղի է ունենում տարբեր երկրներում, ինչպես Հոմերոսը կուզեր, որ մենք հավատայինք... այլ ընդհակառակը, դա Ողիսևսի ներքնաշխարհի ողբերգությունն է... իսկ այն ամենը, ինչ տեղի է ունենում «Ողիսականում», պարզապես ոչ այլ ինչ է, եթե ոչ հերոսի ենթագիտակցական զգացմունքների արտացոլում... Դուք, իհարկե, ծանոթ եք Ֆրեյդի ուսմունքի հետ, Մուլտենի:

— Այո, մի քիչ:

— Գեղեցիկ, ուրեմն հենց Ֆրեյդն էլ Ողիսևսի ներքնաշխարհում մեր ուղեցույցը կդառնա, և ոչ թե ինչ-որ Բերար՝ աշխարհագրական իր քարտեզներով ու բանասիրությամբ, որը ոչինչ չի բացատրում... և Միջերկրական ծովի փոխարեն մենք կհետազոտենք Ողիսևսի հոգին... կամ ավելի ճիշտ՝ նրա ենթագիտակցությունը:

Բավական գրգռված, գուցե փոքր-ինչ ավելորդ խստությամբ ես ասացի.

— Այդ դեպքում ինչ միտք ունի Կապրի մեկնելը, եթե խոսքը բուզուարային ողբերգության մասին է... մենք նույնպիսի հաջողությամբ կարող էինք աշխատել նաև Հոմերի նոր թաղամասերից մեկնումեկում գտնվող որևէ կահավորված սենյակում:

Ես տեսա, թե ինչպես Ռայնգոլդը ինձ վրա նետեց զարմանքի ու վիրավորվածության մի հայացք և ապա իսկույն-ևեթ ծիծաղեց այնպիսի մի տհաճությամբ, ինչպիսին լինում է այն ժամանակ, երբ մարդ կատակի է ուզում տալ մի վեճ, որը սպառնում է վատ վերջավորություն ունենալ:

— Ավելի լավ է, եկեք այս խոսակցությունը մենք թող-

նենք Կապրիում՝ հանգիստ իրադրութեան մեջ շարունակելու համար, — ասաց նա, ընդհատելով ծիծաղը, — դուք, Մուտենի, չեք կարող միաժամանակ և մեքենա վարել, և վիճել «Ողիսականի» մասին... Լավ կլինի հիմա ձեր մեքենան քշեք, իսկ ես էլ հիանամ այս շնաշխարհիկ բնապատկերներով:

Ես չհամարձակվեցի առարկել նրան, և գրեթե մի ամբողջ ժամ գնում էինք առանց խոսք փոխանակելու: Մենք անցանք հին Պոնտեական ճահիճների տերիտորիան. ճանապարհի աջ կողմում ձգվում էր թանձրաջուր, անշարժ ջրանցքը, իսկ ձախում կանաչին էր տալիս ոռոգյալ հարթավայրը: Ահա Չիստերնան, ահա և Տերրաչինան: Այս վերջին քաղաքից հետո ճանապարհի մի կողմից ձգվում էր ծովը, իսկ մյուս կողմում ցածրանիստ, քարքարոտ ու արևախանձ լեռներն էին: Ծովը հուզված էր. առափնյա դեղին ու սև ավազաթմբերի հետևում նա թվում էր պղտորված-կանաչ գույն, ըստ երևույթին, վերջերս տեղի ունեցած փոթորիկը խառնել էր նրա ջրերը, վեր հանելով հատակից անթիվ անհամար ավազաշերտեր: Հսկայական ալիքները դանդաղ ուռճանում էին և, թավալվելով դեպի նեղ լողափը, փշրվում ու փռվում, ինչպես ճերմակ սապնափրփուրը: Ավելի հեռվում ծովը ծածկված էր փոքրիկ կոհակներով և արդեն ոչ թե կանաչին էր տալիս, այլ թվում էր կապույտ, գրեթե մանուշակագույն: Նրա հարթութեան վրա քամու ուղղութեամբ մերթ հայտնվում և մերթ անհետանում էին ձյունաճերմակ կատարիկներով կալյակները: Երկնքում նույն աշխույժ և քմահաճ անկարգությունն էր. ճերմակ ամպիկները այս ու այն կողմ էին սահում, իսկ նրանց միջև բացված ճեղքերում շողշողում էր վճիտ ու կուրացուցիչ լազուրը: Ծովային թռչունները պտույտ էին գործում և գլխիվայր նետվում դեպի ցած, հետո, վեր խոյանալով, նորից թափով իջնում մինչև ջրի մակերեսը և սլանում նրա հարթութեան վրա. թվում էր, թե նրանք սովորում են իրենց թռիչքը հարմարեցնել անվերջ իր ուղղությունը փոխող քամու հոսանքին: Ես մեքենան վարում էի, աչքերս գցած այդ սքանչելի ծովային տեսարանին, և հանկարծ պատասխան տալով խղճիս այն խայթին, որը զգացել էի այն ժամանակ, երբ «Ողիսականի» Ռայնգոլդի մեկնա-

քանությունը անվանեցի բուդուարային ողբերգություն, իսկ նա ինձ վրա գցեց իր զարմացած ու վիրավորված հայացքը, որոշեցի, որ այնուամենայնիվ, ես չեմ սխալվել. ինձ թվում էր, թե այնքան թարմ ու վառ գույներով ներկված հենց այդ ծովում, ջինջ ու լուսավոր այդ երկնքի տակ, Ճանապարհի երկարությամբ ձգված այդ ամայի ծովափի մոտ դժվար չէր լինի պատկերացնել Ողիսևսի սև նավերը, որոնք, ալիքների վրա օրորվելով, ուղևորվում էին դեպի Միջերկրականի այն ժամանակ դեռ անմշակ ու անհայտ հողերը: Հոմերոսն ուզում էր պատկերել հենց այնպիսի մի ծով, ինչպիսին այս է, այնպիսի մի երկինք և այնպիսի մի ծովեզերք, ինչպիսին սրանք էին. նրա հերոսները նմանվում էին այս բնությանը, որը նրանց օժտել էր կլասիկ պարզությամբ և շափի զարմանալի զգացողությամբ: Ահա և բոլորը և ոչինչ ավելի: Մինչդեռ Ռայնգոլդն ուզում է այս գունեղ ու լուսավոր աշխարհը, որը համակված է թարմ հողմերով և ողողված արևի լույսով, բնակեցված հնարամիտ ու կենսախինդ էակներով, դարձնել ինչ-որ անգույն, անձև, արևից ու օդից զրկված ենթագիտակցության մի աշխարհ՝ Ողիսևսի հոգու գաղտնարանը: Ուրեմն, դուրս էր գալիս, որ «Ողիսականը» ոչ թե մարդկային առասպելական մանկության շրջանում Միջերկրական ծովը հայտնաբերելու զարմանահրաշ արկածներով լեցուն թափառումների մի պատմություն էր, այլ հակասությունների մեջ խճճված, հոգեգարության եզրին գտնվող ժամանակակից մարդու ներքին ողբերգությունը պատկերող մի գործ: Այդ բոլորը ինձ հիմք տվեց գալու այն եզրակացությանը, որ հազիվ թե հնարավոր լիներ գտնել ավելի վատ մի խաղրնկեր, քան Ռայնգոլդն է, որի հետ ես պետք է աշխատեի: Կինոյում գոյություն ունեցող սովորական տենդենցին, ըստ որի ամեն ինչ առանց որևէ անհրաժեշտության պետք է փոխել ու դարձնել ավելի վատ, այս դեպքում ավելանում էր նաև հատուկ մի մռայլություն, որը բնորոշ է զուտ մեխանիկական և վերացական հոգեվերլուծությանը: Դրան պետք էր ավելացնել նաև այն, որ ի լրումն դրա, այդ փորձն արվում էր մի այնպիսի զարմանալի պարզություն և պայծառություն ունեցող երկի վրա, ինչպիսին «Ողիսականն» էր:

Մեր մեքենան սլանում էր գրեթե ծովի կողքով: Ճանա-

պարհի երկարութեամբ, առափնյա ավազներին կպած, ձրգվում էր խաղողի կանաչաթուփ մի այգի, որի հետևում սևին էր տալիս ժայռաբեկորներով ծածկված լողափի նեղլիկ շերտը, ուր ժամանակ առ ժամանակ թավալվելով հասնում էին փրփրաբաշ ալիքներն ու փշրվում քարերի մեջ: Ես միանգամից արգելակեցի մեքենան և շատ շոր ասացի.

— Ոտքերս նստելուց ընդարմացան, պետք է մի քիչ ման գամ, որպեսզի բացվեն...

Մենք մեքենայից իջանք, և ես խաղողի այգու միջով անցնող փոքրիկ մի արահետով քայլեցի դեպի լողափ: Կարծես արդարանալով, Ռայնգոլդին ասացի.

— Ուղիղ ութ ամիս է տանը փակված նստած եմ... անցյալ տարվա ամառվանից ծովի երես չեմ տեսել... Եկեք մի ըոպեով մոտենանք ծովին:

Ռայնգոլդը լուռ հետևեց ինձ, ըստ երևույթին նա դեռ վիրավորված էր և զայրացած: Մենք այգու միջով անցնող ոլորմոլոր արահետով ընդամենը մի հիսուն մետր էլ չէինք գնացել, երբ նա մտավ առափնյա ավազների մեջ ու կորավ այնտեղ: Մոտորի մեխանիկական ու միալար աղմուկին այժմ փոխարինում էր ալիքների անհավասար՝ մերթ ուժեղացող, մերթ նվազող հոնդյունը, որոնք անկանոն կերպով հեծնելով իրար, գլորվում էին դեպի ափ և փշրվում այնտեղ: Ես մի քիչ քայլեցի թաց ու փայլփլող ավազների վրայով, աշխատելով հեռու մնալ դեպի ափ վազող ալիքներից, ապա, վերջապես, կանգ առա մի ավազաբլրակի վրա և, անշարժացած, երկար-երկար նայեցի հորիզոնին: Ես զգում էի, որ Ռայնգոլդին վիրավորել եմ, և որ այժմ պետք է նրա հետ խոսակցությունս վերսկսեմ ավելի քաղաքավարի ու սիրալիր ձևով, քանի որ նա ինքն էլ հենց այդ էր սպասում: Եվ շնայած անշափ տհաճ էր ընդհատել այդ լայնարձակ ծովային տարածությունների առաջ ինձ այնքան երանություն պատճառող իմ խոհերի ընթացքը, այնուամենայնիվ, ես արի այդ:

— Ներեցեք ինձ, Ռայնգոլդ, — հանկարծ ասացի ես, — գուցե մի քիչ առաջ ես այնքան էլ լավ չարտահայտվեցի... բայց, ճշմարիտն ասած, ձեր մեկնաբանությունը ինձ չհամոզեց և եթե ուզում եք, կարող եմ ասել, թե ինչու:

Նա մեծ անհամբերությամբ պատասխանեց.

— Այո, ուզում եմ... ասացեք, տեսնենք... Չէ՞ որ մեր աշխատանքի մի մասն էլ վեճերը պետք է լինեն:

— Շատ լավ, — շարունակեցի ես առանց նրան նայելու, — ընդունենք, որ «Ողիսականը» կարելի է մեկնաբանել նաև այնպես, ինչպես դուք եք ասում, թեև դրանում ամենևին էլ համոզված չեմ... Եվ այնուամենայնիվ Հոմերոսի պոեմների, ինչպես և առհասարակ անտիկ արվեստի բնորոշ առանձնահատկությունը այն է, որ յուրաքանչյուր մեկնաբանություն, ինչպես այդ, այնպես էլ շատ ու շատ ուրիշ կարգի, որ կարող են մեր՝ ժամանակակից մարդկանցս մտքով անցնել, պետք է ունենա խոր բովանդակություն ունեցող այդ ստեղծագործությունների խիստ ավարտված ձևը: — Եվ վայրկենական, անբացատրելի գրգռվածությամբ ավելացրի. — Ուզում եմ ասել, որ «Ողիսականի» ամբողջ հմայքը հենց իրական աշխարհին հավատարիմ մնալու մեջ է, այն աշխարհին, որը և ներկայացնում է մեզ: Եվ Հոմերոսյան «Ողիսականի» այդ ավարտված ձևը չի կարելի ձևափոխել ոչ լրիվ և ոչ էլ մասնակի կերպով, նրան մոտենալու մի ձև կա միայն՝ կամ ընդունել, ինչպես որ է, կամ հրաժարվել Ֆիլմը Հոմերոսյան մոտիվներով դնելու մտքից: Այլ խոսքերով ասած, — եզրափակեցի ես, շարունակելով նայել ոչ թե Ռայնգոլդին, այլ ծովին, — Հոմերոսի աշխարհը ոեալ աշխարհ է... Հոմերոսը պատկանում էր մի այնպիսի քաղաքակրթության, որը բնության հետ ոչ միայն հակասության մեջ չէր գտնվում, այլև զարգանում էր նրա հետ լրիվ ներդաշնակությամբ... Այդ պատճառով էլ Հոմերոսը հավատում էր զգացողական աշխարհի իրական լինելուն և այդ աշխարհը տեսնում էր ոեալ կերպով, այնպես, ինչպես պատկերացնում էր ինքը: Ուրեմն մենք նույնպես պետք է այդ աշխարհը ընդունենք այնպես, ինչպես որ կա, հավատանք այդ աշխարհին այնպես, ինչպես Հոմերոսն ինքն էր հավատում, հասկանանք տառացիորեն, և ճիգ ու ջանք չգործադրենք այնտեղ ինչ-որ թաքնված, մութ իմաստ գտնելու համար:

Ես լռեցի, բայց առանց խաղաղվելու, ընդհակառակը, ինձ համակել էր ինչ-որ անհասկանալի մի գրգռվածություն. բոլոր այն ճիգերը, որ ես գործադրում էի իմ տեսակետը հաս-

կացնելու համար, ինձ թվում էին անօգուտ ու զուր: Եվ իրոք, համարյա նույն վայրկյանին ես լսեցի Ռայնգոլդի ծաղրական պատասխանը, որը այս անգամ արդեն հաղթական էր հընչում:

— Դա արտահայտեցողութուն է, արտահայտեցողութուն... Դուք, Մուտենի, ինչպես և հարավի բոլոր բնակիչները, արտահայտեցող մարդ եք և չեք հասկանում նրանց, ովքեր ներհայտեցող են... Սակայն դրա մեջ ոչ մի վատ բան չկա... Ես ներհայտեցող եմ, դուք՝ արտահայտեցող... հենց այդ պատճառով էլ ձեզ եմ ընտրել... Դուք ձեր արտահայտեցողական էությամբ կհավասարակշռեք իմ ներհայտեցողական էությունը... Դուք կտեսնեք, որ մեր համատեղ աշխատանքը հրաշքներ կգործի...

Ես այն է, ուզում էի պատասխանել Ռայնգոլդին և, կարծում եմ, պատասխանս նորից կվիրավորեր նրան, քանի որ զգում էի, թե ինչպես է իմ մեջ ուժգնորեն զայրույթ բարձրանում նրա բույթ համառության դեմ, երբ հանկարծ թիկունքիցս շատ ծանոթ մի ձայն լսեցի.

— Ռայնգոլդ, Մուտենի... այդ ի՞նչ եք անում այդտեղ... Թարմ օ՞դ եք շնչում:

Ես շրջվեցի և ավազաբլուրներից մեկի վրա առավոտյան պայծառ լույսի տակ տեսա Բատտիստայի և էմիլիայի պարզորոշ կերպարանքները: Բատտիստան արագ-արագ մեր կողմն էր գալիս՝ ձեռքը թափահարելով որպես ողջույնի նշան: Էմիլիան գլուխը կախ գցած դանդաղ քայլում էր նրա հետևից: Բատտիստան թվում էր սովորականից շատ ավելի ուրախ ու ինքնավստահ, մինչդեռ էմիլիայի ամբողջ կերպարանքը դժգոհութուն, շփոթմունք և գրեթե նողկանք էր արտահայտում:

Ես փոքր-ինչ զարմացած, իսկույններից ասացի Բատտիստային.

— Իսկ մենք կարծում էինք, թե դուք մեզանից շատ եք առաջ... Երևի արդեն Ֆորմիա հասած կլինեք կամ նույնիսկ ավելի այն կողմ:

Բատտիստան բոլորովին անկաշկանդ ինձ պատասխանեց.

— Մենք ճանապարհը երկարացրինք, ես ուզում էի ձեր տիկնոջը ցույց տալ Հոոմի մոտերքը գտնվող իմ հողաբա-

ժինը, որտեղ ես հիմա ամառանոց եմ կառուցում... հետո մի քանի անգամ ստիպված եղանք բավական սպասել երկաթգրծային անցումների արգելափայտերի առաջ:— Նա շրջվեց Ռայնգոլդի կողմը և հարցրեց.— Հը, Ռայնգոլդ, գործերը լավ են... «Ողիսականի» մասին խոսե՞լ եք արդեն:

— Գործերը լավ են,— քաթանե գլխարկի հովարի տակից պատասխանեց Ռայնգոլդը նույն հեռագրային ոճով: Ինչպես երևում էր, Բատտիստայի հայտնվելը նրա ջղերի վրա ազդում էր, նա կգերադասեր ինձ հետ շարունակել իր զրույցը:

— Հիանալի է, ուղղակի սքանչելի է,— Բատտիստան մտերմաբար մեզ թևանցուկ արեց և քարշ տվեց դեպի էմիլիան, որը փոքր-ինչ հեռու կանգնած էր լողափում:— Այդ դեպքում,— շարունակեց նա խիստ քաղաքավարի, որը ինձ անտանելի թվաց,— այդ դեպքում, սքանչելի սինյորա, ճաշելու տեղի ընտրությունը դուք եք կատարելու, որտե՞ղ կկամենայիք, Նեապոլո՞ւմ, թե՛ Ֆորմիայում... Որոշեք:

էմիլիան ցնցվեց և ասաց.

— Դուք ինքներդ որոշեք... ինձ համար միևնույն է:

— Ոչ, սատանան տանի, այսպիսի դեպքերում, հարկ է, որ կինն ինքը որոշի:

— Ուրեմն, եկեք Նեապոլում ճաշենք, հիմա ես ախորժակ չունեմ:

— Շատ լավ, թող Նեապոլում լինի... տոմատով պատրաստած ձկնապուր... փոքրիկ նվազախումբ, «օ սուլե միո»:— Բատտիստան շատ ուրախ տրամադրության մեջ էր:

— Շոգենավը ժամը քանիսի՞ն է գնում Կապրի,— հարցրեց Ռայնգոլդը:

— Երկուսն անց կեսին... արդեն մեր շարժվելու ժամանակն է,— պատասխանեց Բատտիստան և, մեզ թողնելով այդտեղ, ինքը շարժվեց դեպի խճուղին:

Ռայնգոլդը իսկույն գնաց նրա հետևից, ապա հասնելով նրան, սկսեց կողքից քայլել: Իսկ էմիլիան, կարծես ցանկանալով, որ նրանք առաջ անցնեն, մի քանի բռնակ մնաց իր տեղում կանգնած, ձևացնելով, թե ծովին է նայում: Բայց հենց որ հավասարվեցի իրեն, նա թևիցս իսկույն բռնեց և հազիվ լսելի ձայնով ասաց.

— Ես հիմա քո մեքենան եմ նստելու... աշխատիր շա-
ռարկել:

Ես ապշեցի նրա այդ պահանջկոտ տոնից:

— Ի՞նչ է պատահել:

— Ոչ մի բան... Բատտիստան սոսկալի արագ է քշում:

Մենք լուռ ու մունջ քայլեցինք արահետով: Խճուղին դուրս
գալուն պես, որտեղ երկու մեքենան էլ կանգնած էին իրար
մոտ, էմիլիան վճռական կերպով քայլեց դեպի իմը:

— Ինչպե՞ս թե,— գոռաց Բատտիստան,— սինյորան
այլևս իմ մեքենայո՞ւմ չի գալիս:

Ես շրջվեցի. Բատտիստան կանգնած էր իր մեքենայի
լայնորեն բացած շոնակի մոտ, արևով ողողված խճուղու
մեջտեղը: Ռայնգոլդը մի տեսակ շփոթված կանգնել էր եր-
կու մեքենաների միջև և մեզ էր նայում: Էմիլիան շատ հան-
գիստ, առանց ձայնը բարձրացնելու, ասաց.

— Ես հիմա գնում եմ իմ ամուսնու հետ... կհանդիպենք
Նեապոլում:

Ես սպասում էի, թե Բատտիստան առանց համառելու
կզիջի: Մինչդեռ, ի զարմանք իմ, նա վազելով եկավ մեր
կողմը.

— Սինյորա, դուք ձեր ամուսնու հետ ամբողջ երկու ամիս
կապրիում եք լինելու... իսկ ես,— ավելացրեց նա կամաց,
որպեսզի ուշադրություն չստանա,— Ռայնգոլդի հետ միասին շատ
երկար եմ եղել Հռոմում, և կարող եմ ձեզ հավաստիացնել,
որ դա այնքան էլ զվարճալի չէ... ձեր ամուսինը, իհարկե,
ոչ մի առարկություն չի ունենա, որպեսզի դուք ինձ հետ գաք,
ճի՞շտ է, Մոլտենի:

Ինձ այլևս ոչինչ չէր մնում անելու, քան ճիզ գործադրե-
լով, ասել.

— Բացարձակապես ոչ մի... Միայն թե էմիլիան ասում
է, որ դուք չափազանց արագ եք քշում:

— Սրանից հետո կրիայի նման կզնամ,— կատակով
ու եռանդուն խոստացավ Բատտիստան,— բայց խնդրում եմ
ձեզ, ինձ Ռայնգոլդի հետ մենակ մի՛ թողեք,— նա ձայնը
նորից ցածրացրեց,— եթե իմանայիք, թե նա որքա՞ն է
ձանձրալի... Խոսակցության նյութը միայն կինոն է:

Զգիտեմ, թե ինչ պատահեց ինձ այդ րոպեին: Գուցե մտա-

ծեցի, որ կարիք չկա այդպիսի մի շնչին բանի համար փշացնել Բատտիստայի տրամադրութիւնը: Սակայն, չհասցնելով նույնիսկ որևէ բան մտածել, ասացի.

— Գնա, էմիլիա... մի՞թե չես ուզում Բատտիստային հաճույք պատճառել... Իսկապես, նա իրավացի է,— վրա բերի ես ժպտալով,— Ռայնգոլդի հետ բացի կինոյից, ոչ մի բանի մասին խոսել չի կարելի:

— Այո, այո,— գոհ հաստատեց Բատտիստան: Եվ ապա բռնելով էմիլիային ուղղակի թևատակից, ավելացրեց.— դե գնանք, սքանչելի սինյորա, մի համառոտ այդպես... ես ձեզ խոստանում եմ մեքենան վարել այնպես, որ ոտքով գնացողի արագութիւնից ավել չլինի:

Ես նկատեցի, թե ինչպես էմիլիան մի հայացք գցեց իմ կողմը, որի իմաստը իսկույն չկարողացա հասկանալ, ապա դանդաղ պատասխանեց.

— Եթե այդ դու ես ինձ ասում...

Նա անսպասելի վճռականութեամբ շուռ գալով, ավելացրեց. «Այդ դեպքում գնանք», և քայլեց Բատտիստայի հետ, որը դեռ նույն ձևով շարունակում էր ամուր բռնել էմիլիայի թևատակից, կարծես վախենալով, թե նա կարող է փախչել: Ես մի տեսակ շփոթահար մնացի մեքենայի մոտ կանգնած, նայելով հեռացող էմիլիային ու Բատտիստային: Թիկնեղ և իրենից կարճ Բատտիստայի կողքին էմիլիան քայլում էր մի տեսակ դանդաղ, ալարկոտ ու դժգոհ, բայց, շնայած դրան, հենց այդ նույն քայլվածքի մեջ զգում էիր, որ մի խորհրդավոր զգայնութիւն կա: Այդ րոպեին էմիլիան ինձ թվաց ուղղակի աննման, նա թվաց ոչ թե այն քաղքենիական «սքանչելի սինյորան», ինչպես որ Բատտիստան էր իր տհաճ ու մետաղյա ձայնով անվանում, այլ իսկապես շքնաղ մի էակ, իր գեղեցկութեամբ այնքան լավ ներդաշնակվող շողշողուն ծովի և վճիտ երկնքի հետ, որի ֆոնի վրա այնպիսի պարզորոշութեամբ պատկերվում էր նրա կերպարանքը: Բայց էմիլիայի գեղեցկութեան մեջ մի խոռվահույզ ու ներքին բողոքի պես բան էր զգացվում, որը չգիտեի, թե ինչին կարելի է վերագրել: Իսկ հետո, երբ ես դեռ շարունակում էի նայել նրա հետևից, հանկարծ իմ գլխում մի միտք ծագեց. «Հիմա՛ր... գուցե նա ուզում էր քեզ հետ մենակ մնալ... գուցե

ուզում էր քեզ հետ խոսել, սիրտը բաց անել քո առաջ, ասել այն ամենը, ինչ մինչև այսօր չէր խոստովանել... Գուցե ուզում էր ասել, որ քեզ սիրում է... մինչդեռ դու ստիպեցիր նրան Բատտիստայի հետ գնալ»: Այդ մտքի վրա սրտումս սոսկալի սուր մի ցավ զգացի և ձեռքս այնպես բարձրացրի, որ կարծես ուզում էի հետ կանչել նրան: Բայց արդեն ուշ էր. էմիլիան արդեն նստում էր Բատտիստայի մեքենան, Բատտիստան տեղավորվում էր նրա կողքին, իսկ Ռայնգոլդը գալիս էր դեպի ինձ: Ես նույնպես նստեցի իմ տեղը, կողքս թողնելով Ռայնգոլդին: Հենց այդ նույն վայրկյանին Բատտիստայի ավտոմոբիլը սուրաց մեր կողքով և, տարածության մեջ իսկույն փոքրանալով, անհետացավ մեր աչքից:

Հստ երևույթին Ռայնգոլդը նկատեց ինձ համակած այն վատ տրամադրությունը, որը գրեթե զայրույթի էր հասնում, ու թերևս այդ էր պատճառը, որ «Ողիսականի» մասին զրույցը շարունակելու փոխարեն, որից ես այնքան վախւում էի, գլխարկը քաշեց աչքերին, հետ ընկավ նստատեղին և շուտով սկսեց ննջել: Ես լուռի մեջ շարունակում էի վարել, բացելով իմ սակավաուժ մեքենայի մաքսիմալ արագությունը, իսկ այդ ընթացքում գնալով ավելի ու ավելի էր աճում իմ մեջ անգիտակցական կատաղությունը: Խճուղին ծովից բավական արդեն հեռացել էր և այժմ անցնում էր ծաղկուն և արևաշող դաշտերի միջով: Ուրիշ ժամանակ ինչպե՞ս կհիանայի այս բարձրակատար ծառերով, որոնց գագաթները իմ գլխավերևում միանալով իրար, խշշացող սաղարթներից մի կենդանի միջանցք էին կազմել, այս գորշատերև ձիթենիներով, որոնք ամենուրեք, ինչքան աչքդ կտրում է, սփռված են կարմիր բլուրների լանջերին, նարնջի այս այգիներով, որոնց փայլուն ու մուգ տերևների միջից շողշողում էր ոսկյա պտուղը և այս հնամենի, ժամանակից արդեն սևացած գյուղական տներով, որոնց կողքերին դեղնավուն ծղոտի երկու-երեք դեզեր էին ցցված: Մինչդեռ այժմ ես ոչինչ չէի նկատում, վարում էի մեքենան, և որքան ավելի շուտ էր անցնում ժամանակը, այնքան ավելի շատ ընկնում ու սաստկանում էր իմ տրամադրությունը: Ես ոչ մի փորձ չէի անում գտնելու համար այն բանի պատճառը, որ կատարվում էր ինձ հետ, մինչդեռ դա միանգամայն, իհարկե, պարզ էր.

այժմ էմիլիային ինձ հետ շվերցնելու, նրան Բատտիստային զիջելու զղջանքի ցավն էր, որ տանջում էր ինձ: Սակայն եթե ես ուզենայի էլ բացատրություն գտնել, միևնույն է, իմ միտքն այնքան էր մթազնած զայրույթից, որ հազիվ թե ընդունակ լինեի այդ անելու: Այս ամենը նման էր այն անդիմադրելի ջղային նոպային, որը տևում էր այնքան, որքան անհրաժեշտ է, իսկ հետո, աստիճանաբար մեղմանալով, ամբողջովին անցնում է, դարձնելով հիվանդին թույլ և ուժասպառ: Այդ նույնը տեղի ունեցավ նաև ինձ հետ, մինչև մեքենաս կտրում անցնում էր դաշտերը, անտառները, հարթավայրերը և լեռները, իմ զայրույթը, հասնելով իր գագաթնակետին, սկսեց կամաց-կամաց անցնել, և երբ արդեն նեպոլին էինք մոտենում, ամբողջովին շքացավ: Այժմ մենք բլրալանջով արագընթաց իջնում էինք դեպի ծովը: Ճանապարհն անցնում էր սոճիների և կղբիների միջով, հեռվում արդեն երևում էր կապույտ ծովածոցը: Ես ինձ զգում էի ամբողջովին ուժասպառ ու բթացած, ինչպիսի վիճակ վերնոտն է ունենում՝ հոգին ու մարմինը ուժգնորեն ցնցվող ընկնավորության նոպայից հետո:

Գլուխ տասներեքերորդ

Բատտիստայի ամառանոցը ինչպես այդ պարզվեց Կապրի ժամանելուց անմիջապես հետո, գտնվում էր քաղաքի կենտրոնական հրապարակից հեռու, ծովափի այն մեկուսի վայրերից մեկում, որը Սորրենտո թերակղզուն է նայում: Ռայնգոլդին հյուրանոց ուղարկելուց հետո Բատտիստան, էմիլիան ու ես մի նեղլիկ փողոցով շարժվեցինք դեպի ամառանոց:

Այդ փոքրիկ ճանապարհը մեզ դուրս բերեց մի ծառուղի, որը պտույտ էր տալիս ամբողջ կղզու շուրջը: Մայրամուտ էր, ծաղկած դափնեվարդերի ստվերների տակ, աղյուսապատ ճանապարհներով, ստվերախիտ պուրակների պատերի երկայնքով, լռության մեջ դանդաղ զբոսնում էին ընդամենը մի քանի զբոսաշրջիկներ: Սոճիների և եղջերածառերի սա-

դարձնելի արանքից երբեմն-երբեմն երևում էր հեռվում փրո-
 ված մուգ լազուրե ծովը, որը ողողվել էր թեքված արևի փայլ-
 փրլուն ու պաղ շողերով: Ես քայլում էի Բատտիստայի և
 էմիլիայի հետևից, անընդհատ կանգ առնելով, որպեսզի հիա-
 նամ ինձ շրջապատող բնության գեղեցկությամբ, և վաղուցվա-
 նից ի վեր, առաջին անգամ գրեթե զարմանքով էի զգում, թե
 ինչպես է սիրտս լցվում, եթե ոչ ուղղակի բերկրանքով, ապա
 գոնե խաղաղությամբ ու անդորրով: Այդ ծառուղիով մենք
 քայլեցինք մինչև նրա վերջը, ապա, թեքվելով մյուս կողմ,
 բռնեցինք մի ուրիշ՝ ավելի նեղ ճանապարհ: Հանկարծ, ոլո-
 րաններից մեկի հետևում, մեր հայացքի առաջ տարածվեց
 անծայրածիր ծովը, և երևացին Ֆարալյոնիի ժայռերը, ու ես
 հաճույքով լսեցի, թե ինչպես էմիլիայի շուրթերից դուրս
 թռավ զարմանքի և հիացմունքի մի ճիշ: Էմիլիան կապրիում
 առաջին անգամ էր լինում և մինչև հիմա, ամբողջ ճանա-
 պարհի ընթացքում, դեռ բերանը չէր բացել: Մեր կանգնած
 բարձունքից, ծովի ջրերի վրա կախված այդ վիթխարի երկու
 կարմիր ժայռերը տարօրինակ տպավորություն էին գործում
 մարդու վրա. նրանք նման էին երկնքից ծովի հարթության
 վրա ընկած երկու երկնաքարերի: Այդ տեսարանի առաջ
 չկարողանալով զսպել նաև իմ հիացմունքը, ես էմիլիային
 ասացի, որ Ֆարալյոնիի ժայռերի վրա մողեսների մի այնպի-
 սի տեսակ կա, որից աշխարհում ուրիշ ոչ մի տեղ չես գտնի.
 այդ մողեսները կապույտ գույն ունեն, գուցե պատճառն այն
 է, որ գտնվում են կապույտ երկնքի և կապույտ ծովի միջև:
 Էմիլիան իմ այդ բացատրությունը լսեց մեծ հետաքրքրու-
 թյամբ, կարծես մի բոլոր մոռանալով իմ հանդեպ ունեցած
 իր թշնամանքը. և իմ մեջ նորից ծնունդ առավ հաշտության
 անդիմադրելի մի հույս: Այդ երկու ժայռերի ճեղքերում բույն
 դրած կապույտ մողեսները, որոնց մասին ես հենց նոր պատ-
 մում էի, հանկարծ իմ գիտակցության մեջ դարձան ինչ-որ
 մի խորհրդանիշ: Ով գիտե, թե ինչպիսին մենք ինքներս կդառ-
 նայինք, եթե երկար ժամանակ մնայինք այս կղզում. կա-
 պույտ ջրերի մոտ գտնվող մեր անդորրավետ կյանքը աս-
 տիճանաբար դուրս կմղեր մեր հոգիներից քաղաքի տխուր
 մտքերի մրուրքը, մեր հոգիներն ու մտքերը նույնպես կդառ-
 նային այդպես վճիտ, ներսից լուսավորվող ու կապույտին

տվող, ինչպես այդ մողեսները, ինչպես մեր շուրջը սփռված ծովի ջրերը, ինչպես մեր վերևը գտնվող երկինքը և այն ամենը, ինչը վճիտ է, ուրախ է և անաղարտ:

Փարալյոնյան ժայռերից հետո մեզ տանող նեղլիկ ճանապարհը սկսեց պտույտներ տալ զառիկող ու լերկ ժայռերի միջով, որտեղ ոչ ամառանոցներ կային և ոչ էլ այգիներ: Վերջապես մենավոր մի անկյունում մեր հայացքի առաջ հայտնվեց ճերմակ գույնի երկար ու ցածրիկ մի շինություն, որը իր վիթխարի պատշգամբով ձգվում էր դեպի ծով. դա Բատտիստայի ամառանոցն էր:

Ամառանոցը առանձապես մեծ չէր. բացի պատշգամբ դուրս եկող հյուրասրահից, եղած-չեղածը ընդամենը երեք սենյակ էր: Բատտիստան, որ առաջնորդում էր մեզ և ամեն պատեհ առիթով գրեթե պարծենկոտությամբ ընդգծում ամառանոցի տերն ու տնօրենը լինելու փաստը, մեզ ասաց, որ ինքը երբեք այստեղ չի բնակվել և որ ամառանոցը ընդամենը մի տարի առաջ ստացել է մի պարտապանից՝ վճարվելիք գումարի ինչ-որ մի մասի դիմաց: Նա ամեն կերպ ուզում էր ցույց տալ, որ մեր գալու կապակցությամբ ինքը յուրաքանչյուր մանրուք հաշվի է առել. հյուրասրահում թարմ ծաղիկներով ծաղկամաններ էին դրված սեղաններին, փայլեցրած հատակից բարձրանում էր մոմի քիթ ծակող հոտը, իսկ երբ խոհանոց մտանք, տեսանք պահակի կնոջը, որը փութկոտությամբ ընթրիք էր պատրաստում մեզ համար: Թվում էր, թե Բատտիստան ոչ մի ջանք չի խնայում՝ իր ամառանոցի բոլոր հարմարությունները մեզ ի ցույց դնելու համար. Բատտիստան բաց շփողեց նույնիսկ ամենափոքրիկ ու աննշան անկյունը: Նա իր սիրալիրությունը հասցրեց մինչև անգամ այնտեղ, որ, բացելով մեր առաջ զգեստապահարանները, էմիլիային հարցրեց, թե նրա շորերի համար կբավարարեն արդյոք եղած կախիչները: Այնուհետև մենք մտանք հյուրասրահ: էմիլիան ասաց, որ ցանկանում է շորերը փոխել և դուրս գնաց: Նույնը ուզում էի անել նաև ես ինքս, սակայն Բատտիստան, ընկողմանելով բազկաթոռներից մեկի մեջ, ինձ նույնպես առաջարկեց նստել և այդպիսով թույլ շտվեց ի կատար ածել մտադրությունս: Նա վառեց իր սիգարետը և, առանց նախաբանի, միանգամից հարցրեց.

— Մուլտենի, դուք ի՞նչ եք մտածում Ռայնգոլդի մասին:
Փոքր-ինչ զարմացած, ես պատասխանեցի.

— Ճիշտն ասած, դժվարանում եմ ասել... ես նրան այն-
քան չգիտեմ, որպեսզի կարողանամ դատել նրա մասին...
ինձ թվում է, շատ լուրջ մարդ է... Կալ, փորձված ռեժիսո-
րի անուն ունի:

Բատտիստան մի պահ մտածեց, ապա շարունակեց.

— Գիտեք ինչ, Մուլտենի... Ռայնգոլդին ես էլ եմ նոր ճա-
նաչում, բայց, շատ թե քիչ, հասկանում եմ, նա ինչ է մտա-
ծում և ինչ է ուզում... Նա, ամենից առաջ, գերմանացի է,
ճի՞շտ է: Իսկ մենք իտալացի ենք՝ երկու տարբեր աշխարհ,
երկու տարբեր աշխարհայացք, երկու աշխարհընկալում:

Ես ոչինչ չպատասխանեցի: Սովորաբար Բատտիստան
հեռվից էր սկսում և առանց նյութական հանգամանքներ շո-
շափելու. ես որոշեցի լռել՝ տեսնելու համար, թե ուր է տա-
նում խոսակցությունը:

Բատտիստան շարունակեց.

— Գիտեք ինչ, Մուլտենի, ես ուզեցի ձեզ՝ իտալացուն,
գործի դնել գերմանացի Ռայնգոլդի հետ հենց այն պատճա-
ռով, որ նա մեզանից տարբերվում է... Ես ձեզ վստահում եմ,
Մուլտենի, և նախքան իմ այստեղից գնալը, իսկ ես, դժ-
բախտաբար, պետք է մեկնեմ որքան կարելի է շուտ, ուզում
եմ ձեզ մի քանի խորհուրդներ տալ:

— Խնդրեմ, ասացեք, — արտասանեցի ես շատ սառը տո-
նով:

— Ֆիլմի մասին ունեցած մեր խոսակցության ժամա-
նակ, — ասաց Բատտիստան, — ես հետևել եմ Ռայնգոլդին...
Նա կամ համաձայնում է ինձ հետ, կամ լռում... Բայց հիմա
ես չափազանց մեծ փորձ ունեմ մարդկանց ճանաչելու հար-
ցում և նման վերաբերմունք ունեցողներին երբեք չեմ վրս-
տահում... Դուք՝ մտավորականներդ, Մուլտենի, բոլորդ առանց
բացառության, գուցե միայն չնչին տարբերությամբ, համա-
րում եք, որ պրոդյուսերները գործամուլ մարդիկ են և ուրիշ
ոչինչ... Մի առարկեք, Մուլտենի, դուք ևս այդպես եք մտա-
ծում և, իհարկե, այդպես մտածում է նաև Ռայնգոլդը... Սա-
կայն այդ ճշմարիտ է միայն որոշ չափով... Ռայնգոլդը, գու-
ցե, կարծում է, թե իր պասսիվ վերաբերմունքով կարող է

բթացնել իմ զգոնությունը... բայց ես արթուն եմ, Մուտենի...
արթուն եմ և սթափ:

— Մի խոսքով, — ասացի ես կոպտորեն, — դուք չե՞ք վրստահում Ռայնգոլդին:

— Ես և վստահում եմ, և չեմ վստահում... Ես նրան վրստահում եմ որպես մասնագետի, որպես իր գործն իմացող մարդու... Բայց չեմ վստահում որպես գերմանացու, որպես ուրիշ աշխարհի մի մարդու, աշխարհ, որը այնքան տարբերվում է մերից... Իսկ այժմ, — Բատտիստան սիգարետը դրեց մոխրամանը և նայեց աչքերիս, — այժմ, Մուտենի, ես ուզում եմ ամբողջ պարզությամբ ասել, որ իմ ուզած ֆիլմը պետք է, ինչքան հնարավոր է, ավելի շատ նման լինի Հոմերոսի «Ոդիսականին»... Ի՞նչ է Հոմերոսն ուզեցել անել «Ոդիսականով»: Նա ուզեցել է պատմել արկածային մի պատմություն, որը կկարողանա անընդհատ լարված վիճակում պահել ընթերցողին... մի պատմություն, որը, այսպես ասած, կկարողանա ներգործել երևակայության վրա... ասա թե ինչն է Հոմերոսի ուզածը... և ես ուզում եմ, որ դուք հավատարիմ մնաք Հոմերոսին... Հոմերոսը իր պոեմի մեջ ցույց է տվել հսկաների, հրաշքների, փոթորիկների, կախարդների, հրեշների... ես նույնպես ուզում եմ, որ դուք ձեր ֆիլմում ցույց տաք այդ հսկաներին, հրաշքները, փոթորիկները, կախարդներին, հրեշներին...

— Բայց չե՞ որ դրանք բոլորը լինելու են նաև մեր ֆիլմում:

— Լինելու են, լինելու են... — վայրկենական գրգռվածությամբ տնազ արեց Բատտիստան, — գուցե դուք ինձ հիմարի տե՞ղ եք դնում, Մուտենի... Բայց լավ իմացեք, որ ես հիմար չեմ:

Նա ձայնը բարձրացրեց և կատաղությամբ նայեց վրաս: Ինձ ապշեցրեց Բատտիստայի այդ զայրույթը, իսկ ավելի շատ՝ նաև դիմացկունությունը. ամբողջ օրը նա մեքենա էր վարել, իսկ Նեապոլից մինչև Կապրի օրորվել էր շոգենավի վրա, և հիմա էլ, փոխանակ հանգստանալու, ինչպես այդ կանեի ես, եթե նրա տեղը լինեի, չի ծուլանում վիճել Ռայնգոլդի դիտավորությունների մասին: Ես շատ մեղմ հարցրի.

— Բայց ի՞նչն է ձեզ հիմք տվել մտածելու, թե ես ձեզ...
ձեզ հիմք: Երբ եմ դնում:

— Ձեր շարաբերմունքը, Մուլտենի, ձեր և Ռայնգոլդի վե-
րաբերմունքը:

— Բացատրեք, տեսնենք ի՞նչ եք ուզում դրանով ասել:
Փոքր-ինչ հանդարտված, Բատտիստան նորից վառեց սի-
գարետը և շարունակեց.

— Հիշո՞ւմ եք այն օրը, երբ դուք առաջին անգամ հան-
դիպեցիք Ռայնգոլդին իմ առանձնասենյակում... Դուք դեռ
այն ժամանակ ասացիք, որ այդպիսի ֆիլմի համար դուք
հարմար մարդ չեք, ճի՞շտ է:

— Այո, կարծեմ:

— Իսկ ի՞նչ ասաց Ռայնգոլդը՝ ձեզ հանգստացնելու հա-
մար:

— Լավ չեմ հիշում...

— Ես կարող եմ ձեր հիշողության մեջ թարմացնել ավելի...
Ռայնգոլդը ձեզ ասաց, որ դուք հանդիստ մնաք... որ նա մը-
տադիր է նկարահանել հոգեբանական ֆիլմ... մի ֆիլմ, որը
հիմնված է լինելու Ուիսկոնսին և Պեննելոպեի ամուսնական հա-
րաբերությունների վրա... Ճի՞շտ է:

Ես մի ավելորդ անգամ ևս զարմացա. անկիրթ մարդու իր
դիմակի տակ Բատտիստան շատ ավելի նուրբ քանականու-
թյուն ուներ, քան կարելի էր ենթադրել: Ես համաձայնեցի:

— Այո, կարծեմ, ինչ-որ նման մի բան ասաց:

— Ուրեմն, քանի որ սցենարը մինչև հիմա չի սկսված և
դեռ ոչինչ չի արվել, լավ կլինի, եթե ես ամենայն լրջությամբ
ձեզ զգուշացնեմ. ինձ համար Հոֆերոսի պոեմը Ուիսկոնսին և
Պեննելոպեի միջև գոյություն ունեցող ամուսնական հարաբե-
րություններ չեն:

Ես ոչինչ չասացի: Իսկ Բատտիստան փոքրիկ դադարից
հետո շարունակեց:

— Եթե ես ուզում եմ կնոջ և ամուսնու հարաբերություն-
ների մասին որևէ ֆիլմ տալ, վերցնում եմ որևէ ժամանա-
կակից վեպ, և, առանց Հոոմից ոտքս դուրս դնելու, նկարա-
հանում եմ Պարիզի¹ ննջարաններում ու հյուրասենյա-

¹ Հոոմի ամենապերճաշուք թաղամասը:

կում... և հանգիստ եմ թողնում Հոմերոսին ու նրա «Ողիսականը»... Հասկացա՞ք, Մուլտենի:

— Իհարկե, հասկացա:

— Կնոջ և նրա ամուսնու միջև եղած հարաբերությունները ինձ ամենևին չեն հետաքրքրում, հասկացա՞ք, Մուլտենի... «Ողիսականը» դա Ողիսևսի Իթակե վերադառնալու ժամանակ նրա արկածային թափառումների պատմությունն է, և ես ուզում եմ, որ Ֆիլմը Ողիսևսի հենց այդ արկածների մասին էլ լինի... և որպեսզի այլևս ոչ մի տեսակ կասկածներ չլինեն, նկատի ունեցեք, որ իմ ուզածը զվարճություն պատճառող Ֆիլմ է, Մուլտենի զվարճու-թյուն պատճառող, հասկացա՞ք, Մուլտենի:

— Կարող եք շկասկածել, — ասացի ես արդեն ձանձրացած, — դուք կունենաք զվարճություն պատճառող Ֆիլմ:

Բատտիստան սիգարետը շարտեց և սովորական ձայնով ասաց.

— Ես չեմ էլ կասկածում, վերջին հաշվով, չէ՞ որ փող վճարողը ես ինքս եմ... Դուք պետք է հասկանաք, Մուլտենի, որ այս ամենը ես ձեզ ասում եմ տհաճ թյուրիմացություններից խուսափելու համար... դուք վաղը առավոտվանից սկսեք աշխատել, ես ուզում էի ձեզ այդ մասին ժամանակին զգուշացնել, դա ելնում է նաև ձեր շահերից... Ես ձեզ վստահում եմ, Մուլտենի, և ուզում եմ, որ դուք իմ ձայնը, այսպես ասած, Ռայնգոլդին հասցնողը լինեք... Դուք ամեն անգամ, երբ անհրաժեշտություն լինի, Ռայնգոլդին պետք է հիշեցնեք, որ «Ողիսականը» մարդկանց դուր է գալիս և միշտ դուր է եկել այն պատճառով, որ այն պոեզիա է, տոգորված է պոեզիայով... և ես ուզում եմ, որ այդ պոեզիան՝ ամբողջությամբ, ինչպես որ կա, այնպես էլ փոխանցվի Ֆիլմին:

Ես հասկացա, որ Բատտիստան իրոք արդեն խաղաղվել է. և իսկապես էլ, նա այլևս ոչ թե զվարճացնող Ֆիլմի մասին էր խոսում, որը քիչ առաջ պահանջում էր մեզանից, այլ պոեզիայի: Դրամարկղային հաջողությունների երկրային կարճատև էքսկուրսից հետո մենք նորից վերադարձանք սավառնելու արվեստի և հոգևոր հետաքրքրությունների երկնային բարձունքներում: Դեմքի տառապագին ծոմոումից հետո, որը ժպիտ պետք է նշանակեր, ես ասացի.

— Մի կասկածեք, Բատտիստա... Դուք կստանաք Հոմերոսի ամբողջ պոեզիան... կամ գոնե այնքան, որքան մենք ընդունակ կլինենք դուրս բերել այնտեղից:

— Հիանալի է, հիանալի է, այլևս այդ մասին չենք խոսելու:

Բատտիստան ձգվելով վեր կացավ իր բազկաթոռից, նայեց թևի ժամացույցին և կոպտորեն ասելով, որ գնում է իրեն կարգի բերի ընթրիքի համար, դուրս գնաց: Ես մնացի մենակ:

Սկզբում ես նույնպես մտադիր էի գնալ իմ սենյակը և պատրաստվել ընթրիքի: Սակայն Բատտիստայի հետ ունեցած վիճաբանությունն ինձ վրդովեց, խափանելով այդ մտադրությունս: Ես ինքնաբերաբար վեր կացա և սկսեցի հյուրասրահում հետ ու առաջ քայլել: Իրականում այն ամենը, ինչ Բատտիստան ասաց, ինձ առաջին անգամ ստիպեց ամենայն լրջությամբ նայել այն դժվարին աշխատանքին, որը առանց հաշվի առնելու, նկատի ունենալով միայն նրանից եկած նյութական օգուտը, ես ընդունել էի: Եվ ինձ թվում էր, թե նախապես, հենց հիմա արդեն զգում եմ այն հոգնածությունը, որը պետք է զգալի սցենարը վերջացնելուց հետո: «Ինչի՞ համար է այս բոլորը, — մտածում էի ես, — ինչո՞ւ մտնեմ այս ծանր ու տհաճ բեռի տակ, այն վեճերի մեջ, որոնք անկասկած կլինեն մեր և Բատտիստայի միջև, ինչո՞ւ տանեմ այն ամենը, ինչ տեղի է ունենալու իմ և Ռայնգոլդի միջև, կոմպրոմիսներ փնտրեմ, որոնք, ուզես թե չուզես, պետք է լինեն, հանդուրժեմ անունս մի ստեղծագործության տակ գրելու հանգամանքը, որը այլանդակելու է «Ողիսականը» և ստեղծվելու է սոսկ հանուն դրամի, առևտրական նպատակով... ինչի՞ համար է այս բոլորը»: Քիչ առաջ էր, երբ ես փոքրիկ ճանապարհի բարձունքից նայում էի Ֆարալյոնիի ժայռերին, կապրիում ապրելը ինձ թվում էր կատարյալ երանություն, իսկ այժմ այն թվում էր անուրախ ու մռայլ, որի պատճառը իմ ստանձնած անշնորհակալ և անիրագործելի աշխատանքն էր, որը պահանջում էր, որ ես իմ ազնիվ գրականագետի սկզբունքները հաշտեցնեմ պրոդյուսերի բոլորովին հակառակ պահանջների հետ: Ես մի ավելորդ անգամ արտասովոր ճշգրտությամբ զգացի, որ Բատտիս-

տան տեր է, իսկ ծառա, և որ ծառան ամեն ինչ կարող է անել, բացի տիրոջ կամքը չկատարելուց, իսկ այն միջոցները, որոնց օգնութեամբ նա փորձում է պաշտպանել իրեն տերունական իշխանութիւնից, դա խորամանկութիւնն ու քրժնանքն է, որոնք ավելի ստորացուցիչ են, քան առանց առարկութեան ենթարկվելը: Մի խոսքով, զգում էի, որ ստորագրելով այդ կոնտրակտը, ես իմ հոգին վաճառել էի սատանային, որը, ինչպես և բոլոր սատանաները, միևնույն ժամանակ և պահանջկոտ էր, և մանրոգի: Բատտիստան որոշակի պարզութեամբ դա արտահայտեց անկեղծութեան րոպեներից մեկի ժամանակ. «Չէ որ փողը վճարողը ես եմ», — ասաց նա: Իսկ ինձ պետք էր ընդամենը մի քիչ անկեղծութիւն, որպեսզի ինքս ինձ ասեի. «Չէ որ ես էլ վճարվողն եմ»: Այդ նախադասութիւնը ամեն անգամ իսկույն հնչում էր իմ ականջներում, հենց որ սկսում էի մտածել սցենարի մասին: Հանկարծ ես խեղդվելու այնպիսի մի զգացում ունեցա, որ թվաց, թե այդ մտքերն են իմ մեջ շնչահեղձութեան նոպա առաջացնում: Ես այդ սենյակից դուրս փախչելու ցանկութիւն զգացի, որպեսզի շնչեմ այն օդը, որը քիչ առաջ շնչում էր Բատտիստան: Ես մոտեցա ապակյա դռանը, բացեցի և դուրս եկա պատշգամբ:

Քլուխ տասնչորսերորդ

Արդեն գիշեր էր, և պատշգամբը լուսավորված էր տակավին շերեացող լուսնի մեղմ շողերով, որոնք սփռված էին ամբողջ երկնքով մեկ: Պատշգամբից սանդուղք էր իջնում ուղղակի այն ճանապարհի վրա, որը պտույտ էր տալիս կղզու շուրջը: Մի պահ մտքովս անցավ ցած իջնել աստիճաններով և գնալ թափառելու, բայց իսկույն հրաժարվեցի այդ մտքից, քանի որ արդեն բավական ուշ էր և ճանապարհն էլ խիստ մութ: Ես որոշեցի մնալ պատշգամբում և, մոտենալով բազրիքին, ընկա նրա վրա ու սկսեցի ծխել:

Իմ վերևում դեպի աստղալի և վճիտ երկինքն էին խոյա-

նու՛մ կղզու սև ու սրածայր ժայռերը: Իսկ ներքևում, հեռա՛վոր ու մութ անդունդի խորքում կռահվում էին նույնպիսի հսկայական ժայռեր: Գիշերային խոր լռություն էր, բավա՛կան էր ականջ դնել, իսկույն լսվում էր թեթև ճողփյունը ա՛լիքների, որոնք թավալվում էին դեպի առափնյա քարերը և խշշալով նորից հետ քաշվում ծով: Կամ գուցե ես նույնիսկ սխալվում էի, և դա ոչ թե ներքևից լսվող ալիքների թեթև շրշյունն էր, այլ լոկ անդորրված ծովի խաղաղ շնչառությու՛նը, որը մակընթացության ու տեղատվության շարժմանը համապատասխանաբար ուռճանում էր ու նորից նստում: Օդը կանգնած էր, քամու ոչ մի շարժում չկար: Հայացքս գցելով հորիզոնին, ես հեռավոր հեռվում ինչ՝որ տեղ նկատեցի մի փոքրիկ ու հազիվ նշմարելի սպիտակ լույս՝ դա ցամաքում գտնվող Պունտա Կամպանելլայի փարոսն էր, որը անընդհատ պտտվելով մերթ հանգչում էր ու մերթ վառվում: Ահա հազիվ նշմարելի և գիշերային անհունության մեջ կորած այդ լույսն էր միայն, որ կենդանության նշան էր ցույց տալիս ամբողջ իմ շրջակայքում:

Ես զգացի, թե ինչպես է գիշերային անդորրավետ խա՛ղաղությունը լցվում իմ հոգու մեջ, թեև պարզորոշ գիտակցում էի, որ աշխարհի բոլոր գեղեցկություններն անգամ չեն կարող շեղել իմ ուշադրությունը ինձ զբաղեցնող տազնապալի խոհերից: Եվ իսկապես էլ, կախարդված այդ գիշերային գեղեցկությամբ, ես երկար-երկար մնացի այդպես կանգնած, առանց որևէ մտածմունքի, բայց հետո, գրեթե հակառակ իմ կամքին, նորից վերադարձա էմիլիային վերաբերող իմ տանջագին մտորումներին: Սակայն այս անգամ նրա շուրջը պտտվող իմ մտքերը զարմանալի կերպով խճճված էին և անվերջ միահյուսվում էին սցենարի մասին ունեցած իմ խոհերի հետ: Գուցե դա բացատրվում էր Բատտիստայի և Ռայնգոլդի հետ վարած իմ զրույցների տպավորությամբ կամ գուցե նրանով, որ այդ կղզին անչափ նման էր այն վայրերին, որոնք նկարագրվում են Հոմերոսի պոեմներում: Հանկարծ, շփտեմ որտեղից որտեղ, հիշեցի «Ողիսականի» վերջին երգից մի փոքրիկ հատված, որտեղ Ողիսևսը մանրամասնորեն նկարագրում է իր ամուսնական մահիճը, որից հետո, վերջապես, Պենելոպեն ճանաչում է ամուսնուն: Նա

խսկույն գունատվում է, քիչ է մնում ուշագնաց լինի, ապա արցունքներով ողողված ընկնում է Ողիսեսի գիրկը, արտասանելով հետևյալ խոսքերը, որոնք բազմաթիվ անգամ կարդալու և ինքս իմ մեջ անվերջ կրկնելու հետևանքով գամվելու մնացել են հիշողությանս մեջ:

Մի զայրանա, ով Ողիսես, դու, որ բոլոր մարդկանցից էլ Այր ես եղել խոհուն, բարի. Աստվածները մեզ պատժեցին, Չուղեցին, որ մեր վայելած կյանքի գարունն անցնելուց ետ, Միշտ անբաժան՝ տեսնենք նաև ճերմակելը մեր մազերի:

Դժբախտաբար ես հունարեն չգիտեմ, բայց միշտ զգացել եմ, որ Պինդեմոնտեի թարգմանությունը հարազատ չէ բնագրին և ոչ մի կերպ չի արտահայտում նրա պարզ, անպաճույճ անմիջականությունը: Բայց, միևնույն է, բանաստեղծության այդ տողերը ինձ անսահման դուր են եկել. նրանց մեջ անկեղծ զգացմունքների ջերմություն կա, թեև հնչում են փոքր-ինչ վերամբարձ: Կարդալով այդ հատվածը, ես ակամայից համեմատում էի դա Պետրարկայի նշանավոր սոնետի հետ, որ հետևյալ տողով է սկսում.

Սերն ինձ ցույց տվեց մեղմ նավահանգիստ...

և վերջանում է այս տերցինով.

Գուցե այդ պահին, որպես պատասխան,
Հառաչեր, մի սուրբ խոսք ասեր նա ինձ,
Երբ մազերը մեր տեսներ ճերմակած:

Այն, ինչը ինձ այնքան զարմացնում էր ինչպես Հոմերոսի, այնպես էլ Պետրարկայի մոտ, դա նրանց արտահայտած անխախտ ու հավատարիմ սիրո զգացումն էր, որին ոչինչ ոչ կարող է կործանել և ոչ էլ սառեցնել, անգամ տարիները: Ինչո՞ւ հանկարծ հիշեցի այդ տողերը: Ես հասկացա ինչու. որովհետև այդ տողերը ինձ հիշեցնողը էմիլիայի հետ ունեցած իմ հարաբերություններն էին, որոնք այնքան տարբերվում էին Ողիսեսի և Պենելոպեի, Պետրարկայի և Լաուրայի միջև եղած հարաբերություններից, այո, իմ հարաբերությունները, որոնց վտանգ էր սպառնում ոչ թե տասնյակ տարիներ անց, այլ հիմա, ընդամենը մի երկու տարվա ամուսնական

կյանքից հետո... Միանգամայն պարզ էր, որ այնպիսի հարաբերությունների պայմաններում, ինչպիսին մեր հարաբերություններն էին, չէր կարելի կյանքը համատեղ անցկացնելու հույս ունենալ, սիրել ու սիրված լինել, ինչպես առաջին օրը, թեև

Նա մազերը մեր տեսնում էր ճերմակ:

Եվ ես, որ միշտ բաղձում էի, որպեսզի մեր հարաբերությունները ապագայում այդպիսին լինեն, այժմ ամբողջովին մոլորված, սարսափել էի ինձ համար անհասկանալի այդ փրկուզումից, որը խորտակել էր բոլոր երազանքներս: Սակայն ինչո՞ւ: Ի՞նչ էր պատահել արդյոք: Եվ կարծես սպասելով, որ ամառանոցը տա ինձ այդ պատասխանը, որի սենյակներից մեկում այժմ գտնվում էր էմիլիան, ես երեսով շրջվեցի դեպի լուսամուտը: Այժմ պատշգամբից, որտեղ կանգնած էի, ընդ որում, առանց երևալու, ես կարող էի տեսնել այն ամենը, ինչ կատարվում էր հյուրասրահում: Եվ ահա, աչքերս բարձրացնելով, տեսա Բատտիստային էմիլիայի հետ: Էմիլիան նույն սև մետաքսե լանջաբացվածքով էր, որը հագել էր Բատտիստայի հետ առաջին անգամ մեր հանդիպման ժամանակ: Նա կանգնած էր անիվներ ունեցող փոքրիկ սեղանի մոտ, որի վրա տարբեր տեսակ շշեր էին շարված, իսկ Բատտիստան, խոնարհված սեղանին, բյուրեղապակե մեծ բաժակի մեջ կոկտեյլ էր պատրաստում: Ես իսկույնսեթ էմիլիայի մոտ ինչ-որ անբնական մի բան նկատեցի՝ դա միաժամանակ շփոթահարության և անկաշկանդվածության մի խառնուրդ էր, թվում էր, թե նա չի կարողանում մինչև վերջը իր մեջ հաղթահարել ամոթի զգացումը, բայց միևնույն ժամանակ ուզում է նաև հրապուրող լինել, գայթակղել: Նա կանգնած սպասում էր, որ Բատտիստան բաժակը մեկնի իրեն և երբեմն-երբեմն մի տեսակ անվստահ շուրջն էր նայում: Շփոթվածությունն ու երկիմաստ ժպիտը ծռել էին նրա դեմքը, որը և իսկույն իմ աչքին զարնեց: Հետո Բատտիստան վերջացրեց լիկյորների իրար խառնելը, զգուշորեն լցրեց երկու բաժակ և, ուղղվելով, մի բաժակը մեկնեց էմիլիային: Էմիլիան ցրնցվեց, կարծես սթափվելով իրեն զբաղեցնող մտքերից և ձեռքը անշտապ մեկնեց՝ բաժակը վերցնելու: Այդ րոպեին ես

լարված նրան էի նայում: Նա կանգնել էր Բատտիստայի առջև, մարմնով փոքր-ինչ հետ ընկած, մի ձեռքով հենված բազկաթոռի մեջքին, իսկ մյուսով՝ բաժակը բռնած: Ես ինձանից անկախ ուշադրություն դարձրի, թե նա ինչպես է առաջ ցցել փայլուն մետաքսով սքողված պիրկ կուրծքն ու փորը, ակամայից թվում էր, նա իրեն առաջարկում է Բատտիստային: Սակայն այդ պատրաստակամությունը ոչ մի շափով չէր արտահայտված նրա դեմքին, որը, ընդհակառակը, պահպանում էր անվստահության սովորական արտահայտությունը: Վերջպես, կարծես ցանկանալով խզել այդ ծանր լուծությունը, նա ինչ-որ բան ասաց, գլուխը դարձնելով դեպի հյուրասրահի խորքում գտնվող բուխարու մոտ դրված բազկաթոռները, ապա զգուշորեն այնպես քայլելով, որ ձեռքի լիքը բաժակից խմիչքը չթափվի, էմիլիան մոտեցավ բազկաթոռներին: Եվ ահա այդտեղ կատարվեց այն, ինչը ես փաստորեն վաղուց էի սպասում. Բատտիստան սենյակի մեջտեղում հասավ նրան, մի ձեռքով գրկեց նրա իրանը և, վիզը երկարացնելով, այտը ամուր սեղմեց էմիլիայի այտին: Էմիլիան իսկույն դիմադրեց նրան, բայց առանց որոշակի խստության, եթե չասենք ավելին, որ նա իր բողոքը, ըստ երևույթին, արտահայտեց կատակով ու կոկետորեն, խնդրելով բաց թողնել իրեն և աչքերով ցույց տալով լիքը բաժակը, որը նա բռնել էր վեր պահած ձեռքին: Բատտիստան ծիծաղեց, օրորեց գլուխը և էմիլիային ավելի ամուր քաշեց ու սեղմեց իրեն, ընդ որում նա այդ արեց այնքան կոպիտ, որ բաժակի խրմիչքը, ինչպես որ էմիլիան վախենում էր, ամբողջովին թափվեց: Ես մտածեցի. «Հիմա ուր որ է, շուրթերը կհամբուրի»: Բայց հաշվի չէի առել Բատտիստայի բնավորությունը, մոռացել էի նրա կոպտության մասին: Եվ իսկապես էլ, նա էմիլիային շհամբուրեց, բայց դրա փոխարեն բուն հավաքեց էմիլիայի զգեստի ուսը մինչև կրծքի բացվածքը, անհասկանալի և կատաղի դաժանությամբ կտորը ոլորեց ձեռքի մեջ և ամբողջ ուժով թափ տվեց: Էմիլիայի ուսը լրիվ մերկացավ, և Բատտիստան իսկույն շուրթերով մխրձվեց նրա ուսի մեջ: Էմիլիան այնպես էր ուղիղ և անշարժ կանգնել իր տեղում, կարծես համբերությամբ սպասում էր, որ Բատտիստան հագենա և հետ քաշվի: Սակայն իմ աչքից չվրիպեց նաև այն, որ

նույնիսկ այդ համբույրի ժամանակ էլ նրա երեսն ու աչքերը առաջվա նման մնում էին շփոթահար ու մոլորուն: Այնուհետև նա նայեց լուսամուտի կողմը, և ինձ թվաց, թե մեր հայացքները հանդիպեցին իրար, բայց էմիլիան ընդամենը ձեռքով վրդովմունքի մի շարժում արեց, ապա կրծքի վրա պահելով պոկված ուսակապը, արագ-արագ դուրս գնաց սենյակից: Ես իմ հերթին նույնպես քաշվեցի պատշգամբի խորքը:

Այդ րոպեին ինձ ամենից շատ համակել էր շփոթմունքի և ծայրահեղ զարմանքի զգացումը. ինձ թվում էր, թե իմ տեսածը հակասում է այն ամենին, ինչ ես մինչև հիմա իմացել եմ կամ մտածել: էմիլիան ոչ միայն այլևս ինձ չէր սիրում կամ, իր խոսքերով ասած, արհամարհում էր, այլև, փաստորեն, դավաճանում էր ինձ: Այժմ արդեն դրուժյունը խիստ այլ էր. իմ անիրավացի լինելու աղոտ զգացումը փոխվում էր արդարացի լինելու պարզ գիտակցության: Առանց որևէ պատճառի ինձ արհամարհված տեսնելուց հետո, այժմ ես բոլոր հիմքերն ունեի նույնպես արհամարհելու: Իսկ ինչ վերաբերում է էմիլիայի առեղծվածային վերաբերմունքին, ապա դա ոչ այլ ինչ էր, եթե ոչ սովորական բանսարկություն, խարդավանք: Գուցե րոպեի տպավորության տակ ծնված այդ առաջին մտքերը, որոնք, խորություն չունենալով հանդերձ, խիստ տրամաբանական էին և թելադրված ավելի շուտ ինքնասիրության կողմից, քան որևէ այլ զգացումի, ինձ խանգարեցին այդ պահին զգալ էմիլիայի դավաճանության (կամ դավաճանություն թվացող արարքի) ցավը: Բայց երբ ամբողջովին ինքս ինձ կորցրած մոտեցա պատշգամբի ծայրին, հանկարծ ինձ համակեց ցավի մի սուր զգացում, իսկ անմիջապես հետո նաև մի համոզմունք, որ իմ տեսածը ոչ ճշմարիտ բացատրություն էր, ոչ էլ կարող էր այդպիսին լինել: Այո, չի կարելի հերքել, ասում էի ինքս ինձ, որ էմիլիան Բատտիստային թույլ տվեց համբուրել իրեն, բայց, շնայած դրան, իմ անիրավացի լինելու գիտակցումը տարօրինակ կերպով հետապնդում էր ինձ, և ես զգում էի, որ արդարացի չեմ լինի, եթե, հիմք ընդունելով տեսածս, հիմա էլ ես սկսեմ արհամարհել նրան: Դեռ ավելին, չգիտեմ ինչու, ինձ թվում էր, թե այդ իրավունքը դեռ պատկանում է նրան, և որ, շնայած այդ համբույրին, էմիլիան իրավունք ունի իմ հանդեպ արհա-

մարհանք տածելու: Այդպես, ուրեմն, փաստորեն ես սխալ-
վում էի. էմիլիան շէր դավաճանել ինձ կամ, համենայն
դեպս, նրա արածը ոչ այլ ինչ էր, եթե ոչ թվացող դավաճա-
նություն, և այժմ, առանց ուշադրություն դարձնելու այդ ար-
տաքին հանգամանքներին, ես պետք է գտնեի էմիլիայի դա-
վաճանության իսկական փաստը և հանգամանորեն պարզեի
նրա պատճառները:

Ես հիշեցի, որ էմիլիան դեպի Բատտիստան միշտ մի
համառ և ինձ համար անբացատրելի նողկանք էր տածում:
Չէ որ ընդամենը հենց այդ նույն օրն առավոտյան էր, երբ
նա երկու անգամ ինձ խնդրեց Կապրի մեկնելիս իրեն մենակ
չթողնել Բատտիստայի հետ: Ես ինչպե՞ս կարող էի համա-
տեղել նրա այդ վերաբերմունքը համբույրի հետ: Կասկածից
վեր էր, որ այդ համբույրը դեռ առաջինն էր. ամենայն հա-
վանականությամբ, Բատտիստան կարողացել էր օգտվել
հարմար առիթից, որը մինչև այդ երեկոն նա չէր ունեցել:
Ուրեմն, դեռ շատ բան կորած չէր: Ես դեռ կարող էի պար-
զել, թե էմիլիան ինչո՞ւ թույլ տվեց, որ Բատտիստան իրեն
համբուրի, իսկ որ գլխավորն է, ինչո՞ւ էի ես մի տեսակ ա-
ղոտ, բայց միևնույն ժամանակ այնքան որոշակի զգում, որ,
չնայած նրանց միջև եղած այդ համբույրին, իմ հարաբերու-
թյունները դեպի էմիլիան չէին փոխվել, և նա առաջվա նման,
նույնիսկ առաջվանից ոչ պակաս, իրավունք ուներ ինձ նույն
ձևով մերժելու իր սերը և արհամարհելու ինձ:

Կարող են ասել, որ այդպիսի ժամանակ ոչ թե նման դա-
տողություններով են զբաղվում, այլ խուժում են հյուրասրահ
և կանգնում երկու սիրահարների առաջ, մի բան, որ շատ
ավելի բնական կլիներ այդ դեպքի համար: Բայց որովհետև
ես դեռ վաղուցվանից էի մտածում իմ հանդեպ ունեցած
էմիլիայի վերաբերմունքի մասին, ապա այդ անմիջական ու
միամիտ քայլին դիմել չէի կարող: Իսկ մյուս կողմից, ինձ
համար կարևոր էր ոչ այնքան էմիլիային մեղավոր դարձ-
նելը, որքան մեր հարաբերությունների վրա մինչև վերջը
լույս սփռելը: Հյուրասենյակ խուժելը ինձ կզրկեր ոչ միայն
ճշմարտությունը պարզելու, այլև էմիլիային կրկին ձեռք
բերելու բոլոր հնարավորություններից: Մինչդեռ ես պետք է
գործեմ, ասում էի ինքս ինձ, այնքան զգույշ և խելամիտ, որ-

քան այդ ինձանից պահանջում են քաղաքավարությունն ու դրա հետ մեկտեղ ոչ այնքան պարզորոշ հանգամանքները:

Գոյություն ուներ նաև մի ուրիշ հանգամանք, գուցե իր բնույթով ավելի եսասիրական, որը ինձ կանգնեցրեց հյուրասրահի շեմքին. ահա և ես «Ողիսականից» գլուխս ազատելու մի հիանալի պատրվակ ունեի, մի պատճառ, որի շնորհիվ կարող էի ձեռք քաշել ինձ զզվանք պատճառող այդ ամբողջ աշխատանքից և վերադառնալ ինձ համար այնքան սիրելի դրամատուրգիային: Այդ դատողության առավելությունն այն էր, որ նա ձեռնտու էր մեր երեքի համար էլ. էմիլիայի, Բատտիստայի և իմ: Իրականում համբույրը այն թյուրիմացությունների գազաթնակետն էր, որոնց մեջ թպրտում էր իմ կյանքը, թյուրիմացություններ, որոնք թունավորել էին ինչպես էմիլիայի հետ ունեցած իմ հարաբերությունները, այնպես էլ իմ աշխատանքը: Վերջապես ես հնարավորություն էի ստացել մեկընդմիջտ պարզելու ամենազլխավորը: Բայց դրա համար պետք է գործեի առանց շտապելու, անաղմուկ, աստիճանաբար:

Բոլոր այդ մտքերը իմ գլխով անցան այնպիսի խենթ արագությամբ, ինչպիսի թափով հանկարծակի բացված լուսամուտից ներս է խուժում սանձակտուր քամին, իր հետ բերելով հող, տերև, փոշի և ամեն տեսակ թափթփուկներ: Եվ ինչպես լուսամուտը փակելուց հետո սենյակում հանկարծ լռություն է տիրում և անշարժանում օդը, այնպես էլ կարծես իմ գլխում միանգամից դատարկվեց, անշատվեց գիտակցությունս, և ես, այլևս ոչ մի բան ոչ մտածելով և ոչ էլ զգալով, ընդարմացած մնացի կանգնած, աչքերս հառած գիշերային խավարին: Այնուհետև հոգեկան նույն այդ ինքնամոռաց վիճակում, գրեթե առանց հաշիվ տալու, թե ինչ եմ ուզում անել, ես պոկվեցի պատշգամբի բազրիքից, մոտեցա հյուրասրահի ապակե դռանը, բացեցի և ներս մտա: Ինչքան էի մնացել պատշգամբում էմիլիային Բատտիստայի գրկում տեսնելուց հետո: Իհարկե, ավելի երկար, քան ինձ թվաց, որովհետև Բատտիստային ու էմիլիային ես գտա արդեն սեղանի մոտ նստած, ընթրիքի կեսը նրանք գրեթե արել էին: Ես իսկույն նկատեցի, որ էմիլիան փոխել է իր այն զգեստը, որը Բատտիստան պատռել էր, և այժմ նստած էր

ճանապարհին հագած շորով: Այդ հանգամանքը, շփտեմ ին՝
չու, ինձ խոր հուզմունք պատճառեց, թվում էր, թե հենց դա
է, որ պերճախոսորեն ու դաժանությամբ հաստատում է
էմիլիայի դավաճանությունը:

— Իսկ մենք կարծում էինք, թե դուք գնացել եք գիշերը
լողանալու, — ուրախ ասաց Բատտիստան, — այդ ո՞ւր էիք
գնացել:

— Ոչ մի տեղ էլ չէի գնացել, այստեղ պատշգամբում
էի, — պատասխանեցի ես ցածր ձայնով:

Ես նկատեցի, թե ինչպես էմիլիան աչքերը բարձրացրեց,
մի պահ նայեց ինձ ու նորից կախեց: Ես լրիվ համոզված
էի, որ նա նկատել է, թե ես ինչպես եմ պատշգամբից իրենց
նայում, և գիտեր, որ կատարվածին տեղյակ եմ:

Գլուխ տասնհինգերորդ

Ընթրիքի ժամանակ էմիլիան լուռ էր, բայց դեմքին որևէ
տհաճ զգացման արտահայտություն չկար, մի բան, որ ինձ
զարմացնում էր. ես կարծում էի, որ նա, ընդհակառակը,
պետք է հուզված լինի, մինչև հիմա երբեք նրան կեղծիքի
ընդունակ չեմ համարել: Իսկ ինչ Բատտիստային էր վերա-
բերում, ապա նա չէր թաքցնում իր հաղթանակող ու բարձր
տրամադրությունը, մի գլուխ խոսում էր, գրեթե առանց ընդ-
միջելու, ուտում էր շատ մեծ ախորժակով և գուցե նույնիսկ
չափից ավելի հաճախ ձեռքը խմիչքներին էր մեկնում: Ինչի՞
մասին էր այն երեկո խոսում Բատտիստան: Խոսում էր շատ
բաների մասին, բայց, ինչպես նկատեցի, ամենից շատ իր
մասին էր խոսում, լինի դա ուղղակի, թե անուղղակի ձևով:
«Ես» բառը նրա շուրթերին հնչում էր խիստ հարձակողական,
թուշելով բերանից այնքան հաճախ, որ ինձ արդեն սկսել էր
զայրույթ պատճառել: Պակաս զայրույթ չէր պատճառում ինձ
նաև այն, թե ինչպիսի հեշտությամբ էր նրան հաջողվում
ամենահեռավոր թեմաների շուրջը պտտվող խոսակցությունը
բերել ու կանգնեցնել իր անձի վրա: Սակայն հասկանում

էի, որ նրա իր հասցեին արած այդ գովասանքները բա-
 ցատրվում են ոչ այնքան փառասիրությամբ, որքան զուտ
 տղամարդկային ցանկությամբ՝ իրեն էմիլիայի աչքում բարձ-
 րացնելու, ինչպես և ինձ, գուցե, նսեմացնելու համար: Նա
 համոզված էր, որ էմիլիային արդեն նվաճել է, իսկ այժմ,
 ինչպես և բնական էր, ուզում էր պոչի կուրացուցիչ փետուր-
 ները բացող սիրամարզի նման ամբողջ փայլով ցույց տալ
 իր նվաճյալ էմիլիային: Պետք է, իհարկե, խոստովանել,
 որ Բատտիստան հիմար մարդ չէր, և այդ պատճառով էլ, եթե
 անգամ իր տղամարդկային փառասիրությունն էր գովերգում,
 դարձյալ աշխատում էր այնպես անել, որպեսզի ոտքերը
 գետնին մնան, երկրից չկտրվեն, և ինչ էլ որ պատմեր, մեծ
 մասամբ հետաքրքիր էր լինում: Ինչպես, օրինակ, ընթրիքի
 վերջում նա շատ աշխուժորեն, բայց միևնույն ժամանակ
 բավական խոր լրջությամբ մեզ պատմեց վերջերս Ամերիկա
 կատարած իր ճանապարհորդության և Հոլլիվուդի ստուդիա-
 ները արած այցելությունների մասին: Բայց այնուամենայ-
 նիվ նրա հեղինակավոր, առարկություն չվերցնող, ինքնագոհ
 տոնը ինձ անտանելի էր թվում, և ես միամտաբար կարծում
 էի, թե նա այդպիսին էլ էմիլիային պետք է թվա. հակառակ
 այն ամենին, ինչ ես տեսել էի և լսել, շգիտես ինչու, ինձ
 առաջվա պես թվում էր, թե էմիլիան Բատտիստային դեռ
 անբարյացակամ է վերաբերվում: Բայց ես սխալվում էի
 մի ավելորդ անգամ ևս. էմիլիան անբարյացակամության ոչ
 մի զգացում չէր դրսևորում դեպի Բատտիստան, ընդհակա-
 ռակը. երբ Բատտիստան խոսում էր, ես հետևում էի էմի-
 լիայի դեմքի արտահայտությունը և, դատելով նրա աչքերից,
 կարելի էր կարծել, որ եթե նա ամբողջովին հրապուրված չէ
 Բատտիստայով, ապա գոնե լրջորեն հետաքրքրված է: Եր-
 բեմն նա նույնիսկ հիացմունքի հարգանքով լցված հայացք-
 ներ էր գցում Բատտիստայի վրա: Այդ հայացքները ինձ
 շփոթության առաջ էին կանգնեցնում, դրանք ինձ համար
 թերևս ավելի տհաճ էին, քան Բատտիստայի դատարկ պար-
 ծենկոտությունը: Այդ հայացքները ինձ հիշեցնում էին ինչ-որ
 մեկի՝ դրան շատ նման հայացքը, որը ես ոչ մի կերպ չէի
 կարողանում մտաբերել, թե ում մոտ եմ տեսել: Եվ միայն
 ընթրիքի վերջում էր, երբ բոլորովին անսպասելի հիշեցի

այդպիսի մի հայացք կամ համենայն դեպս, դրան շատ նման, վերջերս ես տեսել էի ռեժիսոր Պազետտիի կնոջ աչքերում, երբ նրանց տանը ընթրում էի: Անգույն, շնչին, բծախնդիր Պազետտին դատողություններ էր անում, իսկ նրա կինը նրատել էր կախարդվածի նման և շէր կարողանում ամուսնու երեսից կտրել իր աչքերը, որոնց մեջ միաժամանակ կար և՛ սեր, և՛ խորին հարգանք, և՛ հիացմունք, և՛ նվիրվածություն: Էմիլիան Բատտիստայի նկատմամբ, իհարկե, դեռ շէր հասել այդպիսի ինքնամոռացման, բայց ինձ թվում էր, որ նրա հայացքի մեջ ես արդեն սաղմնային վիճակում նկատում եմ այն բոլոր զգացմունքները, որոնք սինյորա Պազետտին տածում էր դեպի իր ամուսինը: Մի խոսքով, Բատտիստան իրավունք ուներ պարծենալու, Էմիլիան ինչ-որ անբացատրելի ձևով նրա կողմից կիսով չափ արդեն ստրկացված էր, շուտով կստրկանար ամբողջությամբ: Այդ մտքի վրա իմ սիրտը խոցեց մի ավելի սուր ցավ, քան նույնիսկ այն ցավը, որը զգացի փոքր-ինչ ա՞աջ, երբ տեսա, թե նրանք ինչպես են համբուրվում: Ես ինձանից անկախ այնպես մոայլվեցի, որ դեմքիս հեշտությամբ կարելի էր կարդալ իմ հոգեվիճակը: Բատտիստան, երևի, նկատեց իմ մեջ կատարված փոփոխությունը: Խորաթափանց մի հայացք գցելով ինձ վրա, նա հանկարծ հարցրեց.

— Ձեզ ի՞նչ է պատահել, Մուլտենի... Դժգո՞հ եք Կապրի գալուց: Որևէ բան ձեզ դո՞ւր չի գալիս:

— Ինչո՞ւ եք կարծում:

— Որովհետև շատ տխուր եք, — ասաց Բատտիստան գինի լցնելով իրեն, — ըստ երևույթին անտրամադիր եք:

Այդպես նա անցավ գրոհի, իմանալով, որ պաշտպանության լավագույն ձևը հարձակումն է: Ես այնքան արագ պատասխանեցի, որ նույնիսկ զարմացա.

— Տրամադրությունս փշացավ, երբ պատշգամբում կանգնած ծովին էի նայում:

Նա հոնքերը վեր քաշեց, բայց, առանց իրեն կորցնելու, հարցական հայացքով նայեց երեսիս:

— Մի՞թե: Իսկ ինչո՞ւ:

Ես նայեցի Էմիլիային. նրա մոտ նույնիսկ հուզմունքի նշույլ չկար: Երկուսով էլ աներևակայելի վստահ էին իրենց

վրա: Այնուամենայնիվ, էմիլիան, կարծում եմ, ինձ տեսել էր և, ըստ երևույթին, Բատտիստային ասել: Հանկարծ բերնիցս այնպիսի բառեր թռան, որ ես մտադիր չէի ասելու.

— Բատտիստա, ես կարո՞ղ եմ ձեզ հետ անկեղծ խոսել:

Ինձ նորից հիացրեց Բատտիստայի սառնարյունությունը:

— Անկե՞ղծ... ինքնըստինքյան հասկանալի է... ինձ հետ միշտ էլ պետք է անկեղծ խոսել:

Ես ասացի.

— Գիտեք ինչ, երբ ծովին էի նայում, ես մի պահ պատկերացրի, թե այստեղ մենակ եմ, աշխատում եմ ինձ համար, բոլորովին ինքնուրույն... Ես, ինչպես դուք գիտեք, միշտ երազել եմ գրել թատրոնի համար... և մտածեցի, թե այստեղ, ինչպես ասում են, հենց այն իդեալական տեղն է, որտեղ կարելի է ամբողջութեամբ նվիրվել սիրած գործին: Եվ իսկապես էլ, ինչ ասես, որ չկա. գեղեցիկ բնություն, անդորր, անհուն խաղաղություն, կինս կողքիս, մտահոգող ոչ մի հոգս... Հետո հիշեցի, որ այս սքանչելի և ստեղծագործական աշխատանքի համար այնքան բարենպաստ տեղում ես պետք է, — խնդրում եմ ինձ ներեք, դուք ինքներդ ուզեցիք, որ ես անկեղծ լինեմ, — ժամանակս վատնեմ սցենար գրելու համար, որը, անշուշտ, լավ բան կստացվի, բայց թե ինձ ինչ... ես իմ բոլոր ուժերը, բոլոր կարողությունները կտամ Ռայնգոլդին, իսկ նա դրանք կօգտագործի ինչպես ուզում է, և այդ բոլորից հետո կմնամ դատարկ՝ ընդամենը բանկի մի շեկ գրպանումս... Կորցնելով իմ կյանքի ամենալավ ու ամենաստեղծագործական շրջանից երեք-չորս ամիս... Ես գիտեմ, որ այսպիսի բաներ չի կարելի ասել ոչ ձեզ և ոչ էլ որևէ այլ պրոդյուսերի... Բայց դուք ուզեցիք, որ անկեղծ լինեմ... Այժմ դուք արդեն իմացաք, թե ինչու է իմ տրամագրությունը վատ:

Ինչո՞ւ ես այս բաների մասին սկսեցի խոսել, փոխանակ բոլորովին ուրիշ բան ասելու, որը գրեթե լեզվիս ծայրին էր և վերաբերում էր Բատտիստայի՝ իմ կնոջ հանդեպ ունեցած վարքին: Չեմ կարող ասել ինչու: Գուցե դրա պատճառը հոգնածությունն էր, որը ինձ համակել էր հանկարծ՝ ջղերի սուկալի լարվածության հետևանքով, իսկ գուցե նաև այն, որ այս ձևով ես անուղղակիորեն դրսևորում էի էմիլիայի ան-

հավատարմությունից բխող իմ հուսահատությունը: Ես զգում էի, որ էմիլիայի վաճառվածության և իմ աշխատանքի ծախված, կախյալ բնույթի մեջ ինչ-որ կապ կա: Սակայն Բատտիստան ու էմիլիան, ինչպես մինչև այդ իմ արտասանած սպառնազին նախաբանի ընթացքում որևէ հուզմունք չէին ցուցաբերել, այնպես էլ այժմ չէին ցույց տալիս, թե ինչ-որ թեթևություն են զգում՝ լսելով իմ թուլությունն հաստատող ողորմելի խոստովանությունը: Բատտիստան լրջությամբ ասաց.

— Բայց ես համոզված եմ, Մուլտենի, որ դուք հիանալի սցենար կգրեք:

Ես զգացի, որ սխալ ճանապարհով եմ գնում, բայց այլևս կանգնել չէի կարող, պետք է գնայի մինչև վերջ: Եվ գրգռված պատասխանեցի.

— Վախենում եմ, որ դուք ինձ չհասկացաք... Ես դրամատուրգ եմ, Բատտիստա, և ոչ թե պրոֆեսիոնալ սցենարիստ, որոնցից հիմա շորս կողմը լիքն են... և այդ սցենարը, որքան էլ ուզում է լավ ու կատարյալ լինի, միևնույն է, նա ինձ համար մնալու է որպես սցենար... մի գործ, որ ես ստանձնում եմ, թույլ տվեք ինձ այդ անկեղծորեն ասելու ձեզ, միայն ու միայն փող վաստակելու համար: Ես հիմա քսանյոթ տարեկան եմ և ունեմ այն, ինչը ընդունված է իդեալ անվանել... Իսկ իմ իդեալը թատրոնի համար գրելն է... բայց ինչո՞ւ ես այդ շեմ կարողանում անել: Չեմ կարողանում այն պատճառով, որ ժամանակակից աշխարհը այնպես է կառուցված, որ ոչ ոք չի կարող անել այն, ինչ կուզենար, ընդհակառակը, պետք է անի այն, ինչ ուրիշներն են ուզում... Որովհետև ամեն ինչի հիմքում փողն է ընկած. փողից է կախված և այն, ինչ անում ենք, և այն հանգամանքը, թե ինչ ենք մեզանից ներկայացնում, ինչ ենք ուզում դառնալ, փողից են կախված մեր աշխատանքը, մեր լավագույն ձգտումները, փողն է ընկած նույնիսկ մեզ համար սիրելի մարդկանց հետ ունեցած մեր հարաբերությունների հիմքում:

Ես նկատեցի, որ սոսկալի հուզված եմ, նույնիսկ այն աստիճան, որ աչքերս ուղղակի լցվել էին արցունքով: Բայց ամաչեցի նաև իմ սենտիմենտալությունից և անիծեցի ինձ,

որ սիրտս բացում եմ մի մարդու առաջ, որը ընդամենը մի քանի րոպե առաջ փորձում էր գայթակղել, և այն էլ ոչ առանց հաջողության, իմ կնոջը: Սակայն Բատտիստան այդպիսի աննշան բաներից հուզվողներից չէր: Նա ասաց.

— Գիտե՞ք Մուլտենի, երբ ես լսում եմ ձեզ, թվում է, թե ինքս ինձ եմ տեսնում, երբ դեռ ձեր տարիքին էի:

— Մի՞թե, — փնթփնթացի ես մի տեսակ շփոթահար:

— Այո, ես շատ աղքատ էի, — շարունակեց Բատտիստան՝ գինի լցնելով իրեն, — և ես նույնպես, ինչպես դուք եք ասում, իդեալներ ունեի... ինչ իդեալներ էին... Այժմ հազիվ թե կարողանամ այդ ասել... շատ հնարավոր է, որ ես այդ շփոթեի նաև այն ժամանակ... Բայց ինչ ունենալուն է վերաբերում, ունեի... կամ գուցե դրանք ոչ թե իդեալներ էին, այլ Իդեալ, որը մեծատառով է գրվում... Հետո հանդիպեցի մի մարդու, որին շատ բան եմ պարտական, թեկուզև այն պատճառով, որ որոշ բաներ նրանից եմ սովորել: — Բատտիստան իր սովորական հիմար հանդիսավորությամբ մի պահ լռեց. իսկ ես ակամայից հիշեցի, որ նրա ակնարկած մարդը անպայման եղել է ինչ-որ կինոպրոդյուսեր, որը այժմ արդեն մոռացված է, բայց մի ժամանակ՝ իտալական կինոյի ստեղծման առաջին շրջանում, եղել է բավական նշանավոր, որի հետև և որի գլխավորությամբ էլ Բատտիստան սկսել է իր հաջողակ և բախտավոր կարիերան: Սակայն, որքան ինձ հայտնի է, այդ մարդու ամենամեծ և հիացմունքի արժանի առավելությունը այն է եղել, որ կարողացել է փող շինել... — Եվ ահա մի անգամ, — շարունակեց Բատտիստան, — ես այդ մարդուն ասացի գրեթե այն ամենը, ինչ այսօր դուք ասացիք ինձ... Եվ գիտե՞ք նա ինձ ինչ պատասխանեց: Այնքան ժամանակ, քանի դեռ դուք ինչպես պետքն է շփոթեք, թե ինչ եք ուզում, ավելի լավ է մոռանաք այդ իդեալների մասին կամ ծալեք ու մի կողմ դնեք... Բայց երբ զգաք, որ ձեր ոտքի տակ արդեն ամուր հող կա, այն ժամանակ իսկույն հիշեցեք իդեալի մասին... և այդ իդեալը թող լինի ձեր վաստակած առաջին հազար լիրայանոց թղթադրամը, ուրիշ ոչինչ: Իսկ հետո, ինչպես նա ինձ ասաց, իդեալը կսկսի զարգանալ, դառնալ կինոստուդիա, կինոթատրոններ, արդեն դրված ֆիլմեր և ֆիլմեր, որոնք դեռ նոր պետք է դրվեն: Մի

խոսքով, իդեալը՝ դա մեր ամենօրյա աշխատանքն է... ահա թե նա ինձ ինչ ասաց... Ես էլ շարժվեցի նրա խորհրդով և երևակայեք, շեմ գղջում... Մինչդեռ դուք մի մեծ առավելություն ունեք, այն, որ գիտեք, թե որն է ձեր իդեալը. ձեր իդեալը պիես գրելն է... ուրեմն, կգրեք:

— Կգրե՞մ, — կասկածով հարցրի ես, բայց միևնույն ժամանակ նաև մի տեսակ սփոփանք զգացի:

— Այո, կգրեք, — հաստատեց Բատտիստան, — կգրեք, եթե իսկապես ուզում եք գրել, նույնիսկ փողի համար աշխատելիս, նույնիսկ «Տրիումֆ-Ֆիլմի» համար սցենարներ գրելիս... Ուզո՞ւմ եք իմանալ, որն է հաջողության գաղտնիքը, Մուտենի...

— Ո՞րն է:

— Կանգնել կյանքի հերթում և սպասել մինչև ժամանակը հասնի, ճիշտ այնպես, ինչպես կայարանի տոմսարկղի առաջ են հերթ կանգնում... և մեր հերթը անպայման կգա, եթե համբերությամբ սպասում ենք և ոչ թե մի հերթից վազում դեպի մյուսը... Այո, հերթը անպայման նաև մեզ կհասնի, և տոմսեր վաճառողը յուրաքանչյուրիս կտա իր պահանջած տոմսը... Ինքնըստինքյան հասկանալի է, ըստ մեր արժանիքների... Նա, ով պետք է և կարող է ուղևորվել հեռու ճանապարհորդության, թեկուզև մինչև Ավստրալիա, նրան այդպիսի տոմս կտան... իսկ մյուսները տոմսեր կստանան ավելի կարճ ճանապարհ գնալու համար... ասենք, մինչև Կապրի... — Գոհ իր այդ երկիմաստ ակնարկությունից, Բատտիստան ծիծաղեց և ավելացրեց իսկույն. — իսկ ես ցանկանում եմ, որ դուք տոմս ստանաք շատ, անչափ շատ հեռու գնալու համար... Ուզո՞ւմ եք, մինչև Ամերիկա...

Ես նայեցի Բատտիստային, որը մի տեսակ հայրաբար ժպտում էր ինձ, հետո նայեցի նաև էմիլիային և տեսա, որ սա նույնպես ժպտում է, բայց հազիվ նկատելի մի ժպտով, որը, ինչպես գոնե ինձ թվաց, բավական անկեղծ էր: Ես մի ավելորդ անգամ համոզվեցի, որ ինչ-որ ձևով Բատտիստային հաջողվել էր այդ օրվա ընթացքում իր նկատմամբ ունեցած էմիլիայի անբարյացակամությունը փոխել նույնիսկ համակրանքի: Այդ մտքի վրա ինձ նորից համակեց այն թախիծը, որը ես զգացի առաջին անգամ էմիլիայի աչքերում

սինյորա Պաղետտիի հայացքը նկատելիս: Այո, ես թախիժ եմ ասում և ոչ թե խանդ. և իսկապես էլ, ես անսահման հոգնել էի, ինչպես ճանապարհից, այնպես էլ այդ օրվա բազմաթիվ իրադարձությունների հետևանքով, և այդ հոգնածությունը խառնվելով իմ բոլոր, նույնիսկ ամենափոթորկուն զգացմունքներին, սպանել ու դարձրել էր դրանք մի թույլ ու վհատ մելամաղձություն:

Ընթրիքը վերջացավ մի տեսակ շնախատեսված ձևով: Բատտիստային համակրանքով լսելուց հետո, էմիլիան կարծես հանկարծակի հիշեց նաև ինձ կամ, ավելի ճիշտ, իմ գոյություն մասին, ըստ որում նա այդ արեց այնպես, որ մի ավելորդ անգամ հաստատեց իմ տազնապր: Ասածս առանձնակի կարևորություն չունեցող մի նախադասությունը, թե՛ «կարելի է գնալ պատշգամբ... լուսինը երևի արդեն դուրս է եկել», էմիլիան շատ շոր պատասխանեց.

— Ես պատշգամբ գնալու ցանկություն չունեմ... գնում եմ քնելու... հոգնած եմ,— և առանց հապաղելու տեղից կանգնեց, հրաժեշտ տվեց մեզ ու դուրս գնաց:

Թվաց, թե էմիլիայի այդ կոպիտ արարքը Բատտիստային ամենևին էլ չզարմացրեց, եթե շատենք բոլորովին հակառակը, ինչպես այդ գոնե ինձ թվաց, որ Բատտիստան նույնիսկ գրեթե գոհ մնաց այդ արարքից, դրա մեջ տեսնելով իր ինքնասիրությունը շոյող այն հուզմունքը, որն ինքը կարողացել էր արթնացնել էմիլիայի սրտում: Բայց ես զգացի, թե որքան արագ են կրկնապատկվում իմ տազնապները: Եւ թեև, ինչպես արդեն ասացի, հոգնածությունը ինձ լրիվ ուժասպառել էր, և հասկանում էի, որ շատ ավելի լավ կլիներ, եթե բոլոր տեսակ բացատրությունները հետաձգեի մինչև հաջորդ օրը, այնուամենայնիվ, ինձ զսպել չկարողացա: Եվ պատճառաբանելով, որ ես նույնպես ուզում եմ քնել, հրաժեշտ տվի Բատտիստային ու դուրս գնացի ճաշասրահից:

Գլուխ տասնվեցերորդ

Իմ սենյակը էմիլիայի սենյակին միացնում էր մի դուռ: Ծախսույն մոտեցա այդ դռանը և բախեցի: Էմիլիան ինձ ներս հրավիրեց:

Նա անշարժ ու մտախոհ նստած էր մահճակալին: Ինձ տեսնելուն պես հոգնած ու գրգռված հարցրեց.

— Է՛լ ինչ ես ուզում ինձանից:

— Ոչ մի բան, — սառնությամբ պատասխանեցի ես: Այժմ արդեն լրիվ հանդարտվել էի, միտքս մի տեսակ պայծառացել էր, և նույնիսկ ինձ ավելի քիչ էի հոգնած զգում, — մտաբարի գիշեր ասելու:

— Թե՞ իմանալու ինչ կարծիքի եմ այս երեկո Բատտիստայի հետ ունեցած քո խոսակցության մասին... Եթե դա է քեզ հետաքրքրում, կարող եմ ասել հենց այս րոպեին. դա ո՛չ տեղին և նույնիսկ ծիծաղելի խոսակցություն էր:

Ես վերցրի ավտոններից մեկը, նստեցի և հարց տվի էմիլիային:

— Իսկ ինչո՞ւ:

— Ես քեզ չեմ հասկանում, — պատասխանեց նա գրգռված, — ուղղակի չեմ հասկանում... Կար ժամանակ, որ դու տաք-տաք կպած էիր այդ սցենարից, իսկ հիմա էլ եկել պրոդյուսերին հայտարարում ես, թե աշխատում ես միայն փողի համար, որ աշխատանքը քեզ դուր չի գալիս, որ քո իդեալը թատրոնի համար գրելն էր և այլն... Մի՞թե դու չես հասկանում, որ նա այսօր քաղաքավարությունից դրդված էր համաձայնում քեզ հետ, իսկ վաղը ասածներդ բոլորը կհիշի և այլևս քեզ ուրիշ աշխատանք չի հանձնարարի: Մի՞թե դու այդ հասարակ բանը չես հասկանում:

Եվ այդպես, էմիլիան դեռ հարձակվում էր վրաս: Ու թեև ես հասկանում էի, որ նա այդ անում է իրեն անհանգստացնող ուրիշ և շատ ավելի կարևոր մտքեր ինձանից թաքցնելու համար, այնուամենայնիվ, չէի կարող նրա ձայնի մեջ չզգալ ինչ-որ մի անկեղծություն, որը գուցե ինձ համար և վիրավորական էր, և ստորացուցիչ: Ես որոշել էի հանգիստ մնալ:

Սակայն տեսնելով նրա այդ արհամարհական տոներ, ինձանից անկախ բռնկվեցի.

— Ես ճշմարտությունն ասացի,— հանկարծ բղավեցի ես,— այս աշխատանքը ինձ ոչ դուր է գալիս և ոչ էլ երբևէ դուր է եկել... և, առհասարակ, ո՞վ է ասել, որ ես անվերջ այդ գործն եմ անելու:

— Այո, կտեսնես, որ հենց դա ես անելու:— Երբեք էմիլիան այն աստիճան ինձ չէր արհամարհել, որքան հիմա էր արհամարհում:

Ես, սեղմելով ատամներս, աշխատեցի տիրապետել ինձ:

— Դա դեռ հարց է, գուցե և շանեմ,— ասացի ես առանց ձայնս բարձրացնելու, — մինչև այսօր առավոտ ես դեռ մտադիր էի անել... Բայց այսօրվա ընթացքում այնպիսի բաներ պատահեցին, որ, ամենայն հավանականությամբ, ես ամենաուշը վաղը Բատտիստային կհայտնեմ սցենարի վրա աշխատելուց իմ հրաժարվելու մասին:

Ես այդ խորհրդավոր նախադասությունն ասացի դիտավորյալ, գրեթե վրեժխնդրորեն: Նա ինձ այնքան էր տանջել, որ հիմա էլ ինքս էի ուզում տանջել իրեն, ակնարկելով, այն, ինչ տեսել էի լուսամուտից, բայց խուսափելով ասել երես առ երես և որոշակի: Նա սևեռված նայեց ինձ և շատ հանգիստ հարցրեց.

— Իսկ ինչե՞ր պատահեցին:

— Շատ բաներ:

— Օրինակ:

էմիլիան ձեռք չէր քաշում. և ինձ թվում էր, թե նա անկեղծորեն ուզում է, որ ես իրեն մեղադրեմ, հանդիմանեմ իրեն անհավատարմության համար: Բայց ես շարունակում էի խուսափողական պատասխաններ տալ:

— Դրանք Ֆիլմի հետ կապ ունեցող բաներ են... և վերաբերում են միայն ինձ ու Բատտիստային... այնպես որ ասելու ոչ մի անհրաժեշտություն չկա:

— Իսկ ինչո՞ւ չես ուզում ասել:

— Որովհետև դրանք քեզ չեն հետաքրքրի:

— Թող այդպես լինի, բայց, միևնույն է, դու քաջություն չես ունենա հրաժարվելու սցենարից: Եվ կգրես:

Ես լավ չհասկացա, այդ նախադասության մեջ արտա-

հայտված էր իմ հանդեպ ունեցած նրա սովորական արհամարհանքը միայն, թե՞ ինչ-որ մի աղոտ հույս: Ես զգուշորեն հարցրի:

— Ինչո՞ւ ես այդպես կարծում:

— Որովհետև քեզ լավ եմ ճանաչում:— Նա մի պահ լռեց, ապա մեղմացնելով վրա բերեց:— Գիտեմ, որ սցենարների հարցում դու միշտ էլ այդպես ես եղել... քանի-քանի անգամ ես հայտարարել, որ այս կամ այն սցենարը այլևս չես գրելու և, այնուամենայնիվ, գրել ու վերջացրել ես... Բավական է ձեռնամուխ լինես, բոլոր դժվարություններն իսկույն հարթվում, գնում են:

— Այո, բայց այս անգամ դժվարությունը սցենարի մեջ չէ:

— Իսկ որտե՞ղ է:

— Իմ մեջ:

— Այսի՞նքն: Դրանով ինչ ես ուզում ասել:

Քիչ էր մնացել ասելի. «Այն, որ Բատիստան համբուրում էր քեզ»: Բայց ինձ զսպեցի: Մենք երբեք այնքան անկեղծ չէինք լինում, որպեսզի մեր հարաբերությունները մինչև վերջը պարզ լինեին, նրանք միշտ սահմանափակվում էին միայն ինչ-որ ականարկներով: Մինչև ճշմարտությունը մենք դեռ շատ բան պետք է ասեինք իրար: Ես խոնարհվեցի առաջ և լուրջ տոնով ասացի.

— Էմիլիա, այդ պատճառները քեզ հայտնի են, չէ որ դրանք դեռ սեղանի մոտ ասացի. ես հոգնել եմ ուրիշների համար աշխատելուց և կուզեի վերջապես ինքս ինձ համար աշխատել:

— Իսկ ո՞վ է քեզ արգելում:

— Դու, — վերամբարձորեն ասացի ես, բայց նկատելով, որ նա բողոքի մի շարժում արեց, իսկույն վրա բերի. — այսօրինքն՝ ոչ թե ուղղակիորեն դու... այլ իմ կյանքում եղած քո ներկայությունը... Դժբախտաբար, դու շատ լավ գիտես, թե ինչ են իրենցից ներկայացնում հիմա մեր հարաբերությունները. ավելի լավ է այդ մասին չխոսենք... բայց դու դեռ իմ կինն ես, և ես, (սա առաջին անգամը չէ, որ քեզ ասում եմ), այդպիսի աշխատանքը վերցնում եմ միայն ու միայն հանուն քեզ... Եթե դու չլինեիր, ես երբեք չէի համաձայնի վերց-

նել այդ... Մի խոսքով, դու այդ բոլորը ինքդ հիանալի գիտես և զուր տեղը կրկնելու կարիք չկա՝ մենք շատ պարտքեր ունենք, բնակարանի դիմաց դեռ ահագին փող պետք է մուծենք, մենք նույնիսկ մեքենայի վճարն էլ մինչև այսօր լրիվ չենք վերջացրել... ահա այդ պատճառով էլ սցենարներ եմ գրում... Սակայն ես ուզում եմ հիմա քեզ մի առաջարկութուն անել...

— Ինչպիսի՞նք:

Ինձ թվաց, թե ես շատ հանգիստ եմ, շատ խելամիտ, որ միտքս շատ պայծառ է: Բայց դրա հետ միասին հազիվ նրշմարելի ինչ-որ տհաճ զգացում ինձ նախազգուշացնում էր, որ իմ այդ հանգստութունը, խելամտութունը և մտքի պայծառութունը ոչ այլ ինչ են, եթե ոչ իրական երևույթի կեղծում, կամ որ նույնիսկ ավելի վատ է, պարզապես անհեթեթութուն: Չէ որ վերջին հաշվով էմիլիային տեսել էի Բատտիստայի գրկում. մի՞թե սա հենց այն կարևոր հանգամանքը չէր, որը և պետք է ամենից շատ հուզեր ինձ: Սակայն ես ասացի.

— Առաջարկութունը, որը ուզում եմ քեզ անել, հետևյալն է. դու ինքդ որոշիր, այդ սցենարը գրե՞մ, թե՞ ոչ... Ես քեզ խոստանում եմ, որ եթե դու ինձ ասես կարիք չկա հանձն առնելու, ապա հենց վաղն առավոտյան Բատտիստային կհայտնեմ, որ հրաժարվում եմ սցենարը գրելուց... և հենց առաջին շոգենավով էլ կմեկնենք Կապրիից:

էմիլիան գլուխը խոնարհած նստել էր, թվում էր, թե ամբողջովին մտքերի մեջ է սուզվել:

— Խորամանկն ես երևում,— վերջապես ասաց նա:

— Ինչո՞ւ:

— Որովհետև, եթե հետագայում փոշմանես, ասես, որ հանցավորը ես եմ եղել:

— Իմ մտքովն անգամ չի անցնի այդպիսի բան ասել... մանավանդ որ ես եմ քեզ խնդրում, որպեսզի որոշում կայացնես:

Ես տեսնում էի, որ նա մտածում է, թե ինչ պատասխան տա ինձ: Եվ հասկանում էի, որ այդ պատասխանի միջոցով կարելի կլինի անսխալ կերպով որոշել իմ հանդեպ ունեցած նրա զգացմունքը, ինչպիսին էլ որ ուզում է այն լինի: Եթե նա

ինձ խորհուրդ տա, որ այդ սցենարը գրեմ, դա կնշանակի, նա իսկապես իր հոգու ամբողջ ուժով ինձ արհամարհում է, քանի որ, առանց հաշվի առնելու իրերի այդ վիճակը, հնարավոր է համարում իմ աշխատանքի շարունակելը: Իսկ եթե, ընդհակառակը, պատասխանը բացասական լինի, դա նշանակում է, որ իմ հանդեպ նրա մեջ հարգանքի ինչ-որ մի նշույլ է պահպանվել, և նա չի ուզում, որ ես աշխատեմ որպես իր սիրեկանի ստորադաս: Եվ այսպես, այդ ամենից հետո, ես նորից էի կանգնում սովորական դարձած նույն հարցի առաջ. արդյո՞ք իսկապես էմիլիան ինձ արհամարհում էր, եթե այո, ապա ինչո՞ւ: Վերջապես նա տեսց.

— Այսպիսի հարցերը չի կարելի թողնել, որ ուրիշները որոշեն:

— Իսկ ես խնդրում եմ, որ դու որոշես:

— Լավ հիշիր, որ դու ինքդ ես ինձ ստիպում վճիռ կայացնել, — հանկարծակի շատց էմիլիան, վայրկենական հանդիսավորությամբ:

— Այո, կհիշեմ:

— Ուրեմն, այսպես. ես կարծում եմ, որ եթե այդ պարտականությունը արդեն քեզ վրա ես վերցրել, կարիք չկա այժմ նրանից հրաժարվելու... Վերջին հաշվով, դու ինքդ ես բազմաթիվ անգամ ասել, որ Բատտիստան կարող է նեղանալ դրանից և այլևս ոչ մի աշխատանք քեզ չառաջարկել... Ես կարծում եմ, որ դու այս աշխատանքը պետք է ավարտես:

Այսպիսով, էմիլիան ինձ խորհուրդ էր տալիս շարունակել սցենարի աշխատանքը: Ուրեմն, ինչպես և ենթադրում էի, էմիլիան ինձ արհամարհում էր և արհամարհում էր շատ որոշակի, հոգու ամբողջ ուժով:

— Դու իսկապե՞ս կարծում ես, որ ես այդ աշխատանքից չպետք է հրաժարվեմ:

— Անկասկած:

Մի պահ իմ բերանը խոսք չեկավ, ես շփտեի ինչ ասել: Հետո թշնամությամբ լցված նախազգուշացրի.

— Շատ լավ... միայն հետո շասես, թե այդ խորհուրդը տվի, զգալով, որ ներքուստ ինքդ էլ ես ուզում շարունակել այդ աշխատանքը... ինչպես այն օրը, երբ պայմանագիր

պետք է կնքեի... Ես պարզ ու հստակ ասում եմ, որ ոչ մի ցանկություն չունեմ այդ աշխատանքն անելու:

— Օ՛Ֆ, հոգիս հանեցիր,— ասաց նա արհամարհական տոնով և, վեր կենալով մահճակալից, որտեղ նա նստած էր, գնաց դեպի պահարանը:— Իմ խորհուրդն այդ է... Իսկ դրանից հետո քո գործն է, կարող ես անել այն, ինչ ուզում ես...

Հմիլիայի վերաբերմունքի մեջ նորից էր զգացվում արհամարհական տոնը, ուրեմն իմ ենթադրությունը հաստատվում էր: Հանկարծ ես զգացի, թե ինչպես ծանոթ սուր ցավը կրկին խոցեց իմ սիրտը, դա նույն այն ցավն էր, որը ես առաջին անգամ զգացել էի Հոռմում, երբ նա ուղղակի երեսառ երես գոռաց ինձ վրա և ասաց, որ նողկում է ինձանից: Ես ինձանից անկախ բացականչեցի.

— Հմիլիա, ի՞նչ պատահեց մեզ... ինչո՞ւ եմք մենք այսպես թշնամիներ դարձել:

Բացելով պահարանի դուռը և, ներսի կողմից նրա վրա գտնվող հայելու մեջ նայելով իրեն, նա մի տեսակ ցրված ասաց.

— Բա ինչ էիր ուզում, կյանքն է այսպիսին:

Ես լուռ և անշարժ քարացա կանգնած տեղս: Երբեք Հմիլիան ինձ հետ այդ ձևով չէր խոսել, չէր ցուցաբերել այնպիսի անտարբերություն, այնպիսի հուլուժյուն, ինչպես այս անգամ էր, երբեք նրա խոսքերի մեջ այդքան պայմանականություններ չէին եղել: Ես հասկանում էի, որ այդ իրադրությունը կարող եմ բոլորովին ուրիշ ուղղություն տալ, եթե ասեմ, որ իրեն տեսել եմ Բատտիստայի հետ, մի բան, որ հիանալի գիտեր նաև ինքը Հմիլիան, որ եթե ես իրեն եմ խնդրում որոշել, միտք ունի՞ արդյոք շարունակել սցենարի աշխատանքը, թե ոչ, ապա դրանով ուզում եմ սոսկ իրեն փորձել, ինչը և արի, և, վերջապես, ես հասկանում էի, որ ինչպես հիմա, այնպես էլ առաջ, ամեն ինչ բացատրվում էր մեր միջև գոյություն ունեցող հարաբերություններով: Բայց ես քաջություն, ավելի ճիշտ ուժ չունեցա այդ անելու: Ես անսահման ինձ հոգնած էի զգում: Եվ այդ ամենի փոխարեն գրեթե երկշտությամբ հարցրի.

— Իսկ դու ինչո՞վ ես զբաղվելու Կապրիում մեր գտնվելու ընթացքում, քանի դեռ ես սցենարի վրա եմ աշխատելու:

— Առանձնապես ոչ մի բանով... կգնամ զբոսանքի, կլողանամ... արևի տակ կսևանամ... կանեմ այն, ինչ բոլորն են անում:

— Մենա՞կ:

— Այո, մենակ:

— Չե՞ս ձանձրանա:

— Ես երբեք չեմ ձանձրանում... Ես մտածելու շատ բաներ ունեմ:

— Իսկ իմ մասին երբեմն չե՞ս մտածում:

— Իհարկե, քո մասին էլ եմ մտածում:

— Իսկ ի՞նչ ես մտածում:

Ես վեր կացա և, մոտենալով էմիլիային, բռնեցի նրա ձեռքը:

— Մենք այդ մասին շատ ենք արդեն խոսել:

Նրա ձեռքը ամեն կերպ դիմադրում էր, թեև ազատվելու վճռական փորձ չէր անում:

— Դու իմ մասին նույն ձևով ես մտածում, ինչպես և առաջ:

Այս խոսքերի վրա նա ձեռքը հետ քաշեց և կոպտորեն ասաց.

— Լսիր, Ռիկկարդո, ավելի լավ է, գնաս քնես... որոշ բաներ քեզ համար տհաճ է լսել, և դա հասկանալի է... իսկ մյուս կողմից էլ ես դրանք միայն կրկնել կարող եմ... ի՞նչ հաճույք ես զգում դրանց մասին խոսելուց:

— Բայց չէ, արի խոսենք:

— Ախր ի՞նչ խոսենք... Միևնույն է, կրկնելու եմ այն բոլորը, ինչ բազմաթիվ անգամ եմ ասել... Ես ամենևին էլ իմ կարծիքը չեմ փոխել կապրի գալուց հետո. ընդհակառակը:

— Ի՞նչ է նշանակում «ընդհակառակը»:

— Ընդհակառակը, — բացատրեց նա՝ փոքր-ինչ շփոթահար, — նշանակում է այն, որ ես իմ կարծիքը բոլորովին չեմ փոխել. ուրիշ ոչինչ:

— Նշանակում է, որ դու իմ նկատմամբ... նույն զգացումներն ունես, ինչպես և առաջ... Ճի՞շտ է:

Բոլորովին անսպասելի կերպով նա այնպես վրդովվեց, որ ձայնը հնչեց գրեթե լացի պես.

— Ախր ինչո՞ւ ես այդպես ինձ տանջում... Մի՞թե կար-

ծում ես, թե այս բոլորն ասելը ինձ հաճույք է պատճառում...
Հասկացիր, որ դրանք ինձ համար շատ ավելի տհաճ են, քան
քեզ համար:

Նրա ձայնի մեջ զգացվող այդ անկեղծ ցավը հուզեց ինձ:
Ես նորից բռնելով նրա ձեռքը, ասացի.

— Իսկ ես քո մասին միայն լավ եմ մտածում... և միշտ
էլ այդպես եմ մտածելու, ինչ էլ որ պատահի, — ավելացրի ես,
կարծես ցանկանալով հասկացնել նրան, որ ներում եմ իր
դավաճանությունը, ինչպես և փաստորեն ներել էի:

Էմիլիան ոչ մի պատասխան չտվեց: Նա նայում էր մի
կողմ և թվում էր, թե ինչ-որ բան է սպասում: Բայց դրա
հետ միասին ես զգում էի, թե նա ինչպես է կամաց-կամաց
ու համառ թշնամությամբ աշխատում դուրս քաշել իմ ձեռքի
միջից իր ձեռքը: Այդ նկատելով, ես կոպտորեն հրեցի նրան
ինձնից և, բարի գիշեր ասելով, դուրս եկա սենյակից: Հենց
այդ նույն վայրկյանին լսեցի, թե ինչպես դռան բանա-
լին պտտվեց իր անցքում: Այդ ձայնը նորից սուր ցավի նման
խոցեց իմ սիրտը:

Գլուխ տասնչորերորդ

Հաջորդ օրը վաղ առավոտյան վեր կացա և, առանց
հետաքրքրվելու, թե որտեղ են Բատտիստան ու Էմիլիան,
դուրս գնացի կամ, ավելի ճիշտ, դուրս փախա տանից: Գի-
շերը քնելուց և հանգստանալուց հետո, նախորդ օրվա դեպ-
քերը և, ամենից առաջ, իմ վարվելակերպը ինձ ներկայացան
շատ անհրապույր մի լույսի տակ՝ ինչպես անհեթեթություն-
ների մի ամբողջ շարան, որոնց հետ առնչվելու ժամանակ ես
ինձ պահել էի շատ հիմար ձևով: Այժմ ուզում էի հանգիստ
վիճակում մտածել, թե ինչ պետք է անեմ, ինչպես պետք է
վարվեմ, որ վտանգի շենթարկեմ իմ գործողությունների
ազատությունը, սահմանափակելով այն այնպիսի մի հապ-
ճեպ որոշումով, որը հետագայում կարող է ուղղման են-
թակա շլինել: Ուրեմն, դուրս գալով տնից, գնացի նույն
այն ճանապարհով, որով նախորդ օրը երեկոյան էի եկել, և

քայլերս ուղղեցի դեպի Ռայնգոլդի իջևանած հյուրանոցը: Ես հարցրի, թե որտեղ է ուեժիսորը: Ինձ ասացին, որ նա պարտեզում է: Ես գնացի պարտեզ: Ծառուղիներից մեկի խորքում իմ աչքով ընկավ բելվեդերի բարալիկ ճաղերի մի շարք, որը ողողված էր անդորրված ծովի և խաղաղ, արևով լեցուն երկնքի շողշողուն փայլով: Բելվեդերի ճաղաշարի մոտ դրված էր մի քանի աթոռ և մի փոքրիկ սեղան, որի մոտ նստած մարդը ինձ նկատելով, տեղից ելավ և, ձեռքը թափահարելով, ողջունեց ինձ: Դա Ռայնգոլդն էր, որը ոտից գլուխ հագնված էր ինչպես նավի կապիտանը: Նրա գլխին ոսկեզօծ խարիսխը վրան բաց կապույտ գլխարկ էր, իսկ հագինը նույն գույնի պիջակ և սպիտակ շալվար: Սեղանի վրա նախաճաշի մնացորդներով մի մատուցարան կար դրված և գրելու անհրաժեշտ պիտույքներով մի պայուսակ:

Ռայնգոլդը շատ ուրախ տրամադրությամբ մեջ էր: Նա իսկույն հարցրեց ինձ.

— Հը, Մուլտենի... ինչպե՞ս է ձեզ դուր գալիս այսօրվա առավոտը:

— Հիանալի առավոտ է:

— Իսկ ի՞նչ կասեիք, Մուլտենի,— շարունակեց նա, բռնելով թևս ու մոտենալով բելվեդերի ճաղաշարին,— իսկ ի՞նչ կասեիք, եթե թողնեինք մեր աշխատանքը, մի նավակ վերցնեինք և, կամաց-կամաց թիավարելով, պտույտ տայինք կղզու շուրջը... Մի՞թե դա անսահմանորեն ավելի լավ ու հաճելի չէր լինի, քան աշխատելը:

Ինքս իմ մեջ մտածելով, որ Ռայնգոլդի ընկերակցությունը այդպիսի զբոսանքը զգալի չափով կարող է զրկել իր հմայքից, ես, առանց ներքին համոզվածության, պատասխանեցի.

— Այո, իհարկե, որոշ իմաստով դա ավելի հաճելի կլինի:

— Դուք, Մուլտենի, ասացիք «որոշ իմաստով»,— հանդիսավորությամբ բացականչեց Ռայնգոլդը,— բայց ի՞նչ իմաստով: Մի՞թե ոչ այն իմաստով, ինչպես մենք ենք հասկանում կյանքը... չէ որ մեզ համար կյանքը պարտականություն է... ճիշտ չէ՞, Մուլտենի... ամենից առաջ՝ պարտականություն... Ուրեմն, Մուլտենի, դեպի աշխատանք:

Նա հեռացավ բելվեդերի բազրիքից, նորից նստեց սեղա-

նի մոտ և, խոնարհվելով իմ կողմն ու նայելով աչքերիս, ոչ առանց հանդիսավորության ասաց.

— Մոտ նստեք... այս առավոտ մենք միայն կխոսենք...
Ես շատ բան ունեմ ձեզ ասելու...

Ես նստեցի, Ռայնգոլդը, գլխարկը աչքերին քաշելով, շարունակեց.

— Դուք, անշուշտ, հիշում եք, Մուլտենի, «Ողիսականին» տված իմ այն մեկնաբանությունը, որ ես ձեզ ասացի Հոռմից Նեապոլ տանող ճանապարհին... Բայց ես իմ մտքերը մինչև վերջ ասել չկարողացա, Բատտիստայի գալու վրա խոսքս ընդհատեցի... Իսկ հետո էլ, մնացած ճանապարհի ընթացքում, ննջում էի և որոշեցի հետաձգել բոլոր բացատրությունները... Հիշո՞ւմ եք, Մուլտենի:

— Իհարկե, անկասկած:

— Դուք մոռացած չեք լինի նաև, որ ես ձեզ տվի «Ողիսականի» մեկնաբանության բանալին այս ձևով. Ողիսեսը տասը տարի է վատնում տուն վերադառնալու համար լոկ այն պատճառով, որ փաստորեն, ենթագիտակցաբար, չի ցանկանում այդ վերադարձը:

— Հասկացանք:

— Իսկ այժմ ես ձեզ ցույց կտամ, թե, իմ կարծիքով, նա ինչո՞ւ չի ուզում վերադառնալ.— ասաց Ռայնգոլդը: Նա մի պահ լռեց, կարծես ընդգծելու համար իր հայտնագործության սկիզբը և ապա, հոնքերը կիտելով ու սևեռելով ինձ վրա իր լուրջ և հեղինակավոր հայացքը, շարունակեց.— Ողիսեսը ենթագիտակցաբար չի ուզում Իթակե վերադառնալ այն պատճառով, որ նա Պենելոպեի հետ վատ հարաբերությունների մեջ է... ահա ձեզ պատճառը, Մուլտենի... Իսկ այդ հարաբերությունները փշացել են դեռ մինչև Ողիսեսի պատերազմ մեկնելը... Ձեզ ավելին ասեմ, եթե ուզում եք իմանալ, Ողիսեսը փաստորեն պատերազմ է մեկնում հենց այն պատճառով, որ իր տանը իրեն վատ է զգում... Իսկ վատ է զգում, որովհետև լավ հարաբերությունների մեջ չէ իր կնոջ հետ:

Ռայնգոլդը նորից մի րոպե լռեց, սակայն առանց փոխելու իր հեղինակավոր և ուսուցանող կեցվածքը: Ես, օգտվելով

այդ կարճ դադարից, աթոռս այնպես շրջեցի, որ արևը աչքերս շժակի: Ռայնգոլդը նորից շարունակեց.

— Եթե Ողիսևսի հարաբերությունները Պենելոպեի հետ լավ լինեին, Ողիսևսը պատերազմ չէր գնա... Նա կովարար պարծենկոտներից չէ... և ոչ էլ ոազմատենչ... Ողիսևսը խելամիտ, իմաստուն և շրջահայաց մարդ է... Եթե նրա հարաբերությունները Պենելոպեի հետ լավ լինեին, ապա նա լուկիր համերաշխությունը Մենելաոսին ցույց տալու համար, թերևս սահմանափակվեր միայն իր վստահելի մարդկանցից որևէ մեկի գլխավորությամբ էքսպեդիցիոն մի կորպուս առաքելով... Մինչդեռ նա, օգտագործելով պատերազմի առիթը, ինքն է մեկնում, որպեսզի փախչի իր կնոջից:

— Շատ տրամաբանական է:

— Դուք ուզում եք ասել՝ շատ հոգեբանական է, Մուլտենի,— ուղղեց ինձ Ռայնգոլդը, ըստ երևույթին իմ ձայնի մեջ ինչ-որ հեզնանք զգալով,— շատ հոգեբանական է... և մի մոռացեք, որ ամեն ինչ կախված է հոգեբանությունից, առանց հոգեբանության բնավորություններ չեն լինում, իսկ առանց բնավորությունների՝ պատմություն... հիմա տեսնենք, թե ո՞րն է Ողիսևսի և Պենելոպեի հոգեբանությունը... Ահա թե որն է. Պենելոպեն Հունաստանի նահապետական, ֆեոդալական, արիստոկրատական ավանդույթներին հավատարիմ կին է: Նա առաքինի է, ազնիվ, վեհանձն, կրոնապաշտ, նա լավ տնտեսուհի է, լավ մայր, լավ ամուսին... Մինչդեռ Ողիսևսը Հունաստանի ավելի ուշ շրջանի բնավորությունների մարմնացումն է, նա մարմնացումն է այն Հունաստանի, որի համար բնորոշ են իմաստուններն ու փիլիսոփաները... Ողիսևսը առանց նախապաշարումների մարդ է, իսկ անհրաժեշտության դեպքում նաև աննրբախնդիր, նա խորաթափանց է, լուրջ, խելամիտ, կրոնապաշտ չէ, նա թերահավատ է, իսկ երբեմն էլ նույնիսկ՝ ցինիկ:

— Ինձ թվում է,— առարկեցի ես,— որ դուք Ողիսևսի բնավորությունը սև գույներով եք ներկայացնում... իսկ փաստորեն պոեմում...

Բայց Ռայնգոլդն անհաբերությամբ ինձ ընդհատեց.

— Մենք տվյալ դեպքում այստեղ «Ողիսականով» չենք զբաղվում... կամ, ավելի ճիշտ, մենք «Ողիսականը» մեկնա-

բանում, զարգացնում ենք մեր ձևով... Մենք ֆիլմ ենք ստեղծում, Մուլտենի... «Ողիսականը» վաղուց գրած-վերջացրած է, իսկ ֆիլմը դեռ պետք է նոր դրվի:

Ես դարձյալ լռեցի, և նա շարունակեց.

— Ուրեմն, Ողիսևսի և Պենելոպեի միջև եղած վատ հարբերությունների պատճառը պետք է որոնել նրանց բնավորությունների տարբերության մեջ... Մինչև Տրոյական պատերազմն սկսվելը, Ողիսևսը այնպիսի մի բան է արել, որ դուր չի եկել Պենելոպեին... Բայց ի՞նչ... Ահա այստեղ է, որ հանդես են գալիս փեսացուները... «Ողիսականից» մենք գիտենք, որ նրանք ձգտում են տիրանալ Պենելոպեին, իսկ մինչև այդ նրանք սանձարձակորեն կողոպտում են Ողիսևսի տան եղած-չեղածը... Անհրաժեշտ է իրադրությունը շրջել:

Ես զարմանքից բերանս բաց նայեցի Ռայնգոլդին:

— Չե՞ք հասկանում, — հարցրեց նա, — շատ լավ, ես այս բոլորիս ձեզ կբացատրեմ... փեսացուները. գուցե ավելի լավ կլինի մենք նրանց կրճատենք ու թողնենք ընդամենը մի հոգի՝ ասենք Անտինոսին: — Ուրեմն, փեսացուները սիրահարված են Պենելոպեին դեռ մինչև Տրոյական պատերազմն սկսելը... և լինելով սիրահարված, նրանք, ըստ գոյություն ունեցող հունական սովորույթի, նվերներով ծածկում են Պենելոպեին... Պենելոպեն, որ անտիկ բարքերով դաստիարակված հպարտ, վեհանձն, սեփական արժանապատվության գիտակցությամբ լեցուն մի կին է, կուզենար մերժել բոլոր այդ նվերները, և ամենից առաջ նա կուզենար, որ իր ամուսինը քշեր այդ բոլոր փեսացուներին... Սակայն Ողիսևսը ինչ-որ պատճառով, իսկ թե ինչ, այդ մենք դեռ չգիտենք, թեև հեշտությամբ կարող ենք գտնել, չի ցանկանում վրդովել փեսացուներին... Կինելով լրջմիտ մարդ, նա առանձնապես կարևորություն չի տալիս փեսացուների այդ սիրահետումներին, քանի որ ինքը համոզված է կնոջ հավատարմությանը: Նա կարևորություն չի տալիս նաև նրանց տված նվերներին, որոնք գուցե և վերջին հաշվով այնքան էլ տհաճ չէին իրեն... Մի մոռացեք, Մուլտենի, որ հույները անսահման շատ էին սիրում նվերներ ստանալ... Ինքնըստինքյան հասկանալի է, Ողիսևսը, ամենևին էլ մտադրություն չունի խորհուրդ տալու Պենելոպեին, որպեսզի նա զիջի փեսացուների ցանկություն-

ներին, սակայն դրա հետ միասին Ողիսևսը չի ուզում նաև, որպեսզի Պենելոպեն զուր տեղը վրդովի նրանց, դա պարզապես իմաստ չունի... Ողիսևսն ուզում է հանգիստ ապրել, նա ատում է սկանդալները... Պենելոպեն, որ ամեն ինչ սպասում էր, բացի Ողիսևսի այդ պասսիվությունից, խիստ վրդովված է, չի կարողանում հավատալ դրան... Նա բողոքում է, զայրույթ է արտահայտում... Սակայն դա ոչ մի շափով չի հուզում Ողիսևսին, նա այդ նվիրատվությունների մեջ ոչ մի վիրավորական բան չի տեսնում... ընդհակառակը, նա նորից է խորհուրդ տալիս Պենելոպեին վերցնել այդ նվերները, լինել քաղաքավարի ու սիրալիր, վերջին հաշվով, մի՞թե այդպես երևալը դժվար է նրա համար... Եվ Պենելոպեն, վերջապես, հետևում է ամուսնու խորհրդին... Բայց և միևնույն ժամանակ, լցվում է նրա հանդեպ խոր մի արհամարհանքով... Նա զգում է, որ այլևս Ողիսևսին չի սիրում և այդ ասում է նրան... Չափազանց ուշ Ողիսևսը նկատում է արդեն, որ իր խորամիտ զգուշավորությամբ ինքը սպանել է Պենելոպեի սերը... Ողիսևսը ամեն ճիգ գործադրում է՝ դրությունը շտկելու համար, որպեսզի նորից նվաճի կնոջ սերը, սակայն դա նրան չի հաջողվում... կյանքը Իթակեում նրա համար վեր է ածվում դժոխքի... Վերջապես, բոլորովին հուսահատված, նա օգտագործում է Տրոյական պատերազմի առիթը, որպեսզի տանից հեռանա... Յոթ տարի տևելուց հետո պատերազմը վերջանում է, և Ողիսևսը նորից է ճանապարհ ընկնում, որ ծովով հասնի Իթակե... Սակայն նա գիտե, որ տանը նրան սպասում է մի կին, որը ոչ միայն չի սիրում իրեն, այլև արհամարհում է... և ահա այդ պատճառով Ողիսևսը անգիտակցորեն օգտագործում է ամեն մի առիթ, որպեսզի որքան կարելի է ձգձգի իր անուրախ վերադարձը, որից այնքան վախենում է... Բայց երբ էլ ուզում է լինի, միևնույն է, նա պետք է վերադառնա... Եվ ահա, երբ վերջի վերջո տուն է հասնում, նրա հետ կատարվում է նույնը, ինչը տեղի է ունենում Վիշապի մասին եղած լեգենդում՝ ասպետի հետ, հիշո՞ւմ եք, Մուլտենի... Արքայադուստրը ասպետից պահանջում է սպանել վիշապին, եթե նա ուզում է արժանանալ իր սիրուն... Ասպետը սպանում է վիշապին և այսպիսով նվաճում արքայադստեր սիրտը... Այդպես էլ

Պենելոպեն է: Ողիսևսի վերադարձին, ապացուցելով ամուսնուն, որ ինքը հավատարիմ է մնացել, Պենելոպեն միևնույն ժամանակ նաև հասկացնում է նրան, որ այդ հավատարմությունը ոչ թե բխել է սիրուց, այլ սեփական արժանապատվությունը բարձր պահելու ցանկությունից... Իսկ ինչ վերաբերում է նորից Ողիսևսին սիրելուն, ապա այդ կարող է հնարավոր լինել միայն մի պայմանի դեպքում. եթե նա սպանի բոլոր այդ փեսացուներին... Ողիսևսը, ինչպես մենք գիտենք, ոչ արյունոտուշտ և ոչ էլ վրիժատենչ մարդ է... Նա, թերևս, կգերադասեր փեսացուներին հեռացնել, ինչպես ասում են, առանց անախորժությունների, համոզելով նրանց... Բայց... Նա սպանելու վճիռ է կայացնում... Ողիսևսը գիտե, որ այդ վճռական քայլից է կախված Պենելոպեի հարգանքը, իսկ դրանից հետո նաև սիրո նվաճումը... Ահա թե ինչն է ստիպում նրան սպանել փեսացուներին... Եվ ահա այդ ժամանակ է, միայն ու միայն այդ ժամանակ է, որ Պենելոպեն դադարում է նրան արհամարհելուց և նվիրում նրան իր սերը... Այդպիսով, Ողիսևսն ու Պենելոպեն այնքան տարիների բաժանումից հետո նորից են սկսում սիրել իրար... և անում են իրենց իսկական հարսանիքը... Իրենց բլուտհոխցայտը... Իրենց արյունալի հարսանիքը... Հիմա հասկացա՞ք, Մուտենի: Եկեք, ուրեմն, ամփոփենք. առաջինը՝ Պենելոպեն արհամարհում է Ողիսևսին այն պատճառով, որ սա որպես տղամարդ, ամուսին և արքա ոչ մի ռեակցիա չի տալիս փեսացուների նկրտումներին: Երկրորդը՝ Պենելոպեի արհամարհանքն է, որ պատճառ է դառնում Ողիսևսի Տրոյական պատերազմ մեկնելուն... Երրորդը՝ գիտենալով, որ տանը նրան սպասում է մի կին, որը արհամարհում է իրեն, Ողիսևսը անգիտակցաբար, ինչքան կարող է, ձգձգում է իր վերադարձը... Զորրորդը՝ Պենելոպեի հարգանքն ու սերը նորից նվաճելու համար Ողիսևսը սպանում է փեսացուներին... Հասկացա՞ք, Մուտենի:

Ես ասացի, որ հասկացա: Փաստորեն դրանք հասկանալը այնքան էլ դժվար չէր: Բայց նողկանքի այն զգացումը, որը իմ մեջ դեռ սկզբից էլ առաջացնում էր Ռայնգոլդի «Ողիսևսականին» տված հոգեվերլուծական մեկնաբանությունը, այժմ նորից էր ծնունդ առել և ավելի ուժեղ էր, քան երբևէ նախ-

կինում: Ես մի տեսակ այնպես էի շփոթվել, որ շփտեի նույնիսկ ինչ ասեմ, թվում էր, թե Ռայնգոլդին երազի մեջ եմ լսում: Մինչդեռ նա բժախնդրորեն ինձ բացատրում էր.

— Իսկ դուք գիտե՞ք, թե ես ինչպես եմ հասել ամբողջ իրադրություն այս մեկնաբանությանը, բանալուն... Ես դրան հասել եմ պոեմում նկարագրված փեսացուներին կոտորելու փաստի հասարակ վերլուծությամբ... Ես տեսա, որ այդ գազանային, դաժան, անգույթ կոտորածը բացարձակապես չի համապատասխանում Ողիսևսի բնավորությանը, որը, ինչպես մինչև այդ մեզ ներկայացված է, մի խորամանկ, ճկուն, խորաթափանց, խելամիտ, շրջահայաց մարդ է: Եվ ես ինձ ասացի. «Ողիսևսը հիանալի կերպով կարող էր այդ բոլոր փեսացուներին առանց արյուն հեղելու դուրս անել... չէ՞ որ էա արդեն իր տանն էր, դա նրա իրավունքն էր, և վերջին հաշվով նա արքա էր, բավական կլիներ միայն բացել այդ գաղտնիքը... Եվ եթե նա այդ չի անում, ուրեմն ինչ-որ մի լուրջ պատճառ կա դրա համար... իսկ ինչպիսի՞ն է այդ... Ըստ երևույթին, Ողիսևսը ուզում է ցույց տալ, որ ինքը ոչ միայն խորամանկ է, ճկուն, խորաթափանց, խելամիտ, շրջահայաց, այլև անհրաժեշտության դեպքում մոլեգին՝ ինչպես Այաքսը, խելացնոր՝ ինչպես Ագամեմնոնը... Այժմ հարց է առաջանում. իսկ ո՞ւմ էր ուզում նա այդ ամենը ցույց տալ... Ըստ երևույթին, Պենելոպեին... Ուրեմն՝ էվրիկա:

Ես ոչինչ չասացի: Ռայնգոլդի դատողությունները ոչ միայն ընթանում էին հիանալի, այլև միանգամայն համապատասխանում էին հոգեվերլուծական տեսության հիման վրա «Ողիսևսներ» սեքսուալ ողբերգության վերածելու նրա ձգտումներին: Սակայն «Ողիսևսներ» գոեհկացնելու Ռայնգոլդի հենց այդ փորձերն էին, որ իմ մեջ զայրույթ ու զրզվանք էին առաջացնում: Հոմերոսի մոտ ամեն ինչ անպաճույճ էր, հստակ, ազնիվ, միամիտ, նույնիսկ Ողիսևսի խորամանկությունը, որը բանաստեղծական առումով հանդես է բերված միայն որպես նրա մտավոր կարողությունների առավելություն: Իսկ Ռայնգոլդի մեկնաբանությամբ ամեն ինչ իջեցվում էր և հասցվում ժամանակակից բարոյախոսական ու հոգեբանական ողբերգության մակարդակի: Այդ

ժամանակ Ռայնգոլդը, շատ գոհ իր բացատրություններից, արդեն սկսում էր եզրափակել.

— Ինչպես տեսնում եք, Մուլտենի, սցենարը բոլոր մանրամասնություններով արդեն պատրաստ է... Մեզ մնում է միայն գրել:

Ես գրեթե զայրույթով ընդհատեցի նրան.

— Գիտեք ինչ, Ռայնգոլդ, ձեր այդ մեկնաբանութունը ինձ բոլորովին դուր չի գալիս:

Նա աչքերը շոկեց, զարմացած թերևս ավելի շատ իմ այդպես տաքանալուց, քան նրա համար, որ համաձայն չէի իր հետ:

— Ձեզ դուր չի՞ գալիս, Մուլտենի: Իսկ ինչո՞ւ դուր չի գալիս:

Ես սկսեցի խոսել՝ ճիգեր գործադրելով ինքս ինձ վրա, բայց խոսելու ընթացքում զգացի, որ գնալով ձայնս դառնում է ավելի վստահ:

— Ինձ դուր չի գալիս, որովհետև ձեր մեկնաբանությունը լրիվ կեղծում է Ոդիսևսի իսկական բնավորությունը... Հոմերոսի պոեմում Ոդիսևսը պատկերված է, այո՛, որպես խորաթափանց, խելամիտ, եթե ուզում եք, նույնիսկ խորամանկ մի մարդ, բայց մի մարդ, որը երբեք չի մոռանում ոչ իր պատիվը և ոչ էլ արժանիքները... Նա երբեք չի դադարում հերոս լինելուց, նա միշտ կորովի զինվոր է, արքա, հավատարիմ ամուսին... Իսկ ձեր մեկնաբանությամբ, թույլ տվեք այդ ասել ձեզ, հարգելի Ռայնգոլդ, դուք ոիսկ եք անում նրան դարձնել պատվի զգացումից ու սեփական արժանապատվությունից զուրկ մի մարդ, այո՛, մի մարդ, որը դադարում է հարգանք ներշնչելուց, էլ չխոսենք այն մասին, որ դուք անսահմանորեն հեռանում եք բնագրից...

Ես տեսնում էի, թե ինչպես է իմ խոսելու ժամանակ Ռայնգոլդի կիսալուսնային ժպիտը աստիճանաբար սեղմվում, ջնջվում երեսից, մինչև որ ամբողջովին չքացավ: Ապա, առանց թաքցնելու իր տևտոնական առոգանությունը, որը սովորաբար աշխատում էր ցույց շտալ, զայրույթով վրա բերեց.

— Հարգելի իմ Մուլտենի, թույլ տվեք ձեզ ասել, որ դուք, ինչպես սովորաբար, ոչինչ չեք հասկացել:

— Ինչպես սովորաբար,— վերավորված կրկնեցի ես՝
ընդգծված հեգնանքով:

— Այո, ինչպես սովորաբար,— հաստատեց Ռայնգոլդը,— և այս րոպեին կասեմ ինչու... ինձ լավ լսեք, Մուլտենի:

— Ես ձեզ լավ եմ լսում, կարող եք շկասկածել:

— Ես ամենևին էլ մտադիր չեմ Ողիսևսին դարձնելով, ինչպես այդ դուք եք պատկերացնում, սեփական արժանապատվություն շունեցող, պատվի զգացումից զուրկ, հարգանք չներշնչող մի մարդ... Ես պարզապես ուզում եմ նրան ներկայացնել այն ձևով, ինչ ձևով նա պատկերված է պոեմում... Ո՞վ է Ողիսևսը պոեմում, ի՞նչ է նա իրենից ներկայացնում: Պոեմում նա պարզապես քաղաքակրթված մարդ է, մի մարդ, որը քաղաքակրթություն է ներկայացնում... Բոլոր շքաղաքակրթված հերոսների մեջ Ողիսևսը միակ մարդն է, որը իր մեջ քաղաքակրթություն է կրում... Իսկ ինչո՞ւմ է կայանում նրա քաղաքակրթությունը... կայանում է նրանում, որ նա հեռու է նախապաշարումներից, նրանում, որ ամեն գնով և միշտ ականջ է դնում բանականության ձայնին, նույնիսկ այն հարցերում, երբ, ինչպես դուք եք ասում, խոսքը վերաբերում է սեփական արժանապատվությանը, պատվին, հարգանք ներշնչելուն... նրանում, որ խելացի է, օբյեկտիվ է, որ, ես նույնիսկ կասեի, օժտված վերլուծելու բնատուր հատկությամբ... Ինքնըստինքյան հասկանալի է,— շարունակեց Ռայնգոլդը,— քաղաքակրթվածությունը նույնպես ունի իր թերությունները... օրինակ, Ողիսևսը շատ հեշտ մոռանում է, թե ինչպիսի կարևորություն են տալիս շքաղաքակրթված մարդիկ այսպես կոչված պատվի հարցերին... Պենելոպեն քաղաքակրթված կին չէ, նա մի կին է, որն ապրում է ավանդույթներով... Նա ենթարկվում է ոչ թե բանականությանը, այլ բնազդին, տաք արյանը, հպարտությանը... Այժմ առանձնապես ուշադիր եղեք, Մուլտենի, և աշխատեք հասկանալ այն, ինչ որ ուզում եմ ասել... Բոլոր նրանց համար, ովքեր քաղաքակրթված չեն, քաղաքակրթությունը կարող է թվալ (իսկ հաճախ պարզապես թվում է) բարոյական նեխվածություն, անբարոյականություն, անսկզբունքայնություն, ցինիկություն... Այդպիսի մեղադրանքներ քաղաքակրթության դեմ, օրինակի համար, առաջ էր քաշում Հիտլերը, որը անկասկած,

քաղաքակրթութիւնից հեռու կանգնած մարդ էր... Չէ որ նա նույնպես պատվի մասին շատ էր խոսում... Բայց չէ որ մենք այժմ արդեն գիտենք, թե ով էր Հիտլերը, և ինչ էր իրենից ներկայացնում նրա պատիվը... Կարճ ասած, «Ողիսականում» Պենելոպեն ներկայացնում է բարբարոսութիւն, իսկ Ողիսեսը՝ քաղաքակրթութիւն... Գիտեք, Մուլտենի, ես ձեզ համարում էի Ողիսեսի պես քաղաքակիրթ մարդ, մինչդեռ պարզվում է, որ դուք ձեր դատողութիւններով չեք տարբերվում բարբարոս Պենելոպեից:

Այս վերջին բառերը Ռայնգոլդն արտասանեց ամբողջ երեսով մեկ տարածված փայլատակող ժպիտով. ինչպես երևում էր, նրան շատ էր դուր եկել ինձ Պենելոպեի հետ համեմատելու իր գյուտը: Սակայն հենց այդ համեմատութիւնը, ինքս էլ նույնիսկ չգիտեմ ինչու, ինձ համար հատկապես տհաճ էր: Ես զգացի, որ զայրույթից գունատվում եմ և կատաղութիւնս հազիվ զսպած ասացի.

— Եթե դուք քաղաքակրթութիւնը համարում եք այն, որ մի ամուսին կույր է ձեռնում, որպեսզի շտեմանի իր կնոջը սիրահետողին, այն դեպքում, թանկագին Ռայնգոլդ, իսկապես որ ես քաղաքակիրթ մարդ չեմ:

Սակայն այս անգամ, ի զարմանս իմ, Ռայնգոլդը չբռնկվեց:

— Մի բոպե, — ձեռքը բարձրացնելով ասաց նա, — այսօր, Մուլտենի, դուք ի վիճակի չեք հանգիստ դատողութիւններ անելու... Ուղղակի Պենելոպեն եք... Եկեք այսպես անենք... այժմ դուք գնացեք մի լավ լողացեք և ապա ուշադիր ու լուրջ վերլուծեք այն ամենը, ինչի մասին մենք այսօր այստեղ խոսեցինք... իսկ վաղն առավոտյան կգաք և ինձ կասեք, թե ինչ արդյունքների հասաք... Համաձայն եք:

Ես մի տեսակ շփոթված պատասխանեցի.

— Համաձայն եմ... Բայց չեմ կարծում, որ կարողանամ փոխել իմ տեսակետը:

— Կավ մտածեք այն ամենի մասին, ինչ այստեղ խոսեցինք, — կրկնեց Ռայնգոլդը և, տեղից կանգնելով, ձեռքը մեկնեց ինձ:

Ես նույնպես վեր կացա: Ռայնգոլդը շատ հանգիստ ավելացրեց.

— Ես վստահ եմ, այս բոլորը վերլուծելուց հետո դուք կհամոզվեք, որ իրավացի եմ:

— Չեմ կարծում, — պատասխանեցի ես և շարժվեցի դեպի հյուրանոց տանող ծառուղիով:

Գլուխ տասնութերորդ

Ռայնգոլդի հետ ես մնացի մի ժամից ոչ ավելի. ընդամենը այնքան, որքան տևեց մեր վեճը «Ողիսականի» մասին: Այսպիսով, ես իմ առաջ մի ամբողջ օր ժամանակ ունեի, որպեսզի, ինչպես ինքն արտահայտվեց, «ամաժեի ամեն ինչի մասին» կամ, կարճ ասած, որոշեի համաձայն եմ պոեմի նրա մեկնաբանության հետ, թե՞ ոչ: Ճիշտն ասած, հազիվ էի ոտքս դուրս դրել հյուրանոցից, երբ արդեն անհաղթահարելի մի ցանկություն զգացի ոչ միայն շատաժել Ռայնգոլդի արտահայտած գաղափարների շուրջը, այլև ամբողջովին մոռանալ նրանց մասին և վայելել այդ հիանալի արևոտ օրը: Բայց մյուս կողմից էլ ինձ թվում էր, որ Ռայնգոլդի ասածների մեջ մի բան կա, որը դուրս է գալիս սցենարի վրա պահանջվող աշխատանքի սահմաններից: Թե ինչ էր այդ բանը, դեռ չէի կարողանում որոշել, բայց զգում էի, որ այդ ամբողջ խոսակցությունը իմ մեջ շատ խիստ ռեակցիա է առաջացնում:

Բայց այդ բոլորից հետո ես, այնուամենայնիվ, պետք է իսկապես «ամեն ինչի մասին մտածեի»: Ես հիշեցի, որ առավոտյան տանից դուրս գալու ժամանակ, այն ժայռի տակ, որի վրա Բատտիստայի ամառանոցն էր գտնվում, նկատեցի մի փոքրիկ, առանձնացած ու խաղաղ ծովածոց և որոշեցի անպայման իջնել այնտեղ. այդ ծովածոցում ես կարող էի ըստ ռեժիսորի խորհրդի, «ամեն ինչի մասին մտածել», իսկ եթե մտածելու ցանկություն չունենայի, ապա գոնե կլողանայի ծովում:

Ուրեմն, այդ մտքերով տարված, ես քայլեցի ինձ արդեն ծանոթ այն ծառուղիով, որը պտույտ էր տալիս կղզու շուրջը:

Ժամանակը դեռ բավական վաղ էր, և նեղ ու ստվերոտ ճանապարհին գրեթե ոչ ոք չէր երևում, բացի մի քանի փոքրիկ երեխաներից, որոնք աղյուսով սալարկած ծառուղիում լուսթյան մեջ մեղմ աղմուկ էին անում իրենց բոբիկ ոտքերով: Հետո գրկախառնված՝ իրար հետ քշփշալով անցան երկու աղջնակ, ապա նաև երկու թե երեք պառավ տիկիներ, որոնք իրենց շներին էին դուրս բերել զբոսանքի:

Հասնելով ծառուղու վերջը, այնտեղ ուր այն անցնում է կղզու ամենաամայի և ուղղաբերձ մասով, ես թեքվեցի դեպի մի ուրիշ նեղ ճանապարհ: Որոշ տարածություն անցնելուց հետո կանգնեցի մի արահետի առաջ, դա, շեղվելով այդ ճանապարհից, տանում էր դեպի մի բելվեդեր, որը թվում էր, թե անդունդի վրա է կախված: Ես բռնեցի այդ արահետը և, հասնելով բելվեդերին, կանգ առա ու ցած նայեցի: Ավելի քան հարյուր մետր ցածում, արևի շողերով ողողված թրթրոալով փայլփլում էր ծովը, որը, ըստ քամու ուղղության, անընդհատ երփներանգվում ու փոխում էր գույնը: Նրա հարթությունը մի տեղ երկնագույն էր, մի ուրիշ տեղ՝ կապույտ, գրեթե մանուշակագույն, իսկ ափից ավելի հեռու գտնվող տեղերում՝ լրիվ կանաչ: Հեռավոր ու անդորրված այդ ծովի մոտից, դեպի ինձ թռչող անհամար նետերի նման իրենց լերկ, արևի տակ պսպղացող գագաթներով վեր էին խոչանում կղզու ուղղաձիգ ու ծանրանիստ ժայռերը: Նայելով այդ ժայռերին, ինքս էլ շփտեմ ինչու, հանկարծ ինձ համակեց ինչ-որ հիվանդագին մի հուզավառություն: Ինչո՞ւ եմ ապրում, մատծեցի ես, և նույն վարկյանին իմ մեջ մի միտք փայլատակեց. շթռչե՞մ արդյոք հենց այստեղից այդ անհուն ու լուսավոր անդունդը: Գուցե այդ ձևով մահանալը թեկուզև որոշ շափով արժանի լինի այն լավագույնին, ինչ ես ունեմ իմ մեջ: Այո, ես ուզում էի ինքնասպան լինել, որպեսզի գոնե մահվանից հետո գտնեմ այն մաքրությունը, ինչը ապրելու ժամանակ բացակայում էր ինձ մոտ:

Ինքնասպան լինելու այդ գայթակղությունը ինձ մոտ այնքան էր ինքնաբուխ և անկեղծ, որ ըստ երևույթին իմ կյանքը իսկապես էլ մի պահ վտանգի տակ էր: Հետո ես գրեթե բնազդաբար մտածեցի էմիլիայի մասին, ինքս ինձ հարցնելով, թե նա ինչպես կընդուներ իմ մահվան լուրը: Եվ այդ

Ժամանակ հանկարծ ասացի. «Դու ինքնասպան ես լինում ոչ թե նրա համար, որ հոգնել ես կյանքից... Ոչ, դու կյանքից ամենևին էլ չես հոգնել... Դու ինքնասպան ես լինում էմիլիայի համար»: Այդ միտքը ինձ մի տեսակ շփոթմունք պատճառեց, գրեթե նենգաբար իմ այդ հոգեհուզանքը զրկում էր ինձ ամեն տեսակ անձնական բնույթի շահագրգռվածությունից: Այնուհետև ես նորից ինձ հարց տվի. «էմիլիայի պատճառով, թե՞ էմիլիայի համար... Դրանք տարբեր բաներ են, և այդ տարբերությունը խիստ կարևոր է», — ապա նույն այդ ընդունելի ես ինձ պատասխանեցի. «էմիլիայի համար... որպեսզի նորից վերագարձնեմ նրա սերը, նրա հարգանքը, թեկուզև իմ մահից հետո... որպեսզի ստիպեմ նրան տառապել իր խղճի խայթերից, քանի որ ինձ արհամարհել է անարդարացիորեն»:

Ինձ զբաղեցնող այդ մտքերը ես նմանեցնում էի խորանարդիկներով մանկական խաղին, երբ անկանոն իրար վրա թափած խորանարդիկները պետք է այնպես դասավորել, որպեսզի որոշակի նկար ստացվի: Ես հազիվ էի երևակայությունս մեջ նկարել իմ այժմյան դրությունը, երբ իսկույն այդ ընդհանուր պատկերը եկավ լրացնելու իմ գլխում ծագած այս նոր միտքը. «Ռայնգոլդի մեկնաբանությունները քո մեջ այդպիսի փոթորկուն ունեցիա առաջացրին, որովհետև քեզ թվաց, թե բացատրելով Ողիսևսի և Պենելոպեի միջև գոյություն ունեցող հարաբերությունները, Ռայնգոլդը գուցե ինքն անգամ այդ շղթալով, ակնարկում էր քո և էմիլիայի միջև եղած հարաբերությունները... Երբ նա սկսեց խոսել Պենելոպեի դեպի Ողիսևսը տածած արհամարհանքի մասին, դու իսկույննեթ մտաբերեցիր էմիլիայի՝ դեպի քեզ ունեցած արհամարհանքը... Կարճ ասած, քեզ համար տհաճ էր ճշմարտություն լսելը, և դու ծառս եղար այդ ճշմարտության դեմ, շուզեցիր ընդունել այն»:

Սակայն պատկերը այնուամենայնիվ դեռ լրիվ չէր, և ահա մի քանի ուրիշ մտքեր այս անգամ եկան ու վերջնականապես լրացրին այն. «Դու մտածում ես ինքնասպան լինելու մասին, որովհետև ի վիճակի չես ըմբռնելու այն, ինչ տեղի է ունենում քո մեջ... մինչդեռ եթե ուզում ես նորից արժանանալ էմիլիայի հարգանքին, ապա դրա համար ամենևին էլ

անհրաժեշտ չէ, որ դու ինքնասպան լինես... շատ ավելի քշով էլ կարելի է բավարարվել... Այն, ինչ պահանջվում է դրահամար, Ռայնգոլդը քեզ ցույց տվեց... Ողիսեսը Պենելոպեի սերը նորից նվաճելու համար սպանում է փեսացուներին... Ուրեմն, եթե դատենք տեսականորեն, ապա դու ինքդ էլ պետք է Բատտիստային սպանես... Սակայն մենք ապրում ենք ավելի քիչ դաժան և ավելի շատ բարդ մի աշխարհում, քան «Ողիսականում» պատկերված աշխարհն էր... Քեզ համար բավական կլինի նաև այն, եթե հրաժարվես սցենարը գրելուց և, խզելով բոլոր տեսակ հարաբերություններդ Ռայնգոլդի հետ, հենց վաղն առավոտյան մեկնես Հռոմ... Էմիլիան քեզ խորհուրդ չտվեց մերժել սցենարը այն պատճառով, որովհետև փաստորեն ուզում է քեզ արհամարհել և ցանկանում է, որպեսզի դու վարքովդ հաստատես քո հանդեպ ունեցած նրա արհամարհանքի հիմնավորվածությունը... Բայց դու հաշվի չպետք է առնես նրա խորհուրդները, ընդհակառակն, դու պետք է վարվես այնպես, ինչպես, Ռայնգոլդի կարծիքով, վարվեց Ողիսեսը»:

Այս անգամ պատկերը միանգամայն կատարյալ էր. ես իմ վիճակը ենթարկել էի հանգամանակից, անողոք, իմ նկատմամբ ամենաճշմարիտ ու անխնա վերլուծության: Եվ ինձ համար պարզ դարձավ, որ այժմ «ամեն ինչի մասին մտածելու» այլևս ոչ մի անհրաժեշտություն չկա, ինչպես այդ խորհուրդ էր տալիս Ռայնգոլդը: Ես կարող էի առանց այլևայլության վերադառնալ հյուրանոց և ռեժիսորին հայտարարել իմ որոշումը, որն այս անգամ արդեն իսկապես որ վերջնական էր լինելու: Սակայն այդ նույն րոպեին ինքս ինձ ասացի. հենց այն պատճառով, որ այլևս ոչ մի անհրաժեշտություն չկա «ամեն ինչի մասին մտածելու», ապա կարիք չկա նաև որևէ շտապողականություն ցուցաբերել, որպեսզի տպավորություն չստեղծվի, թե ես այդ անում եմ առանց կշռադատելու, բորբոքված րոպեիս: Ես Ռայնգոլդի մոտ կգնամ ճաշից հետո և շատ հանգիստ նրան կհայտնեմ իմ որոշումը: Վերադառնալով տուն, նույնքան հանգիստ կկարգադրեմ, որ Էմիլիան ճամպրուկները դասավորի: Իսկ ինչ Բատտիստային է վերաբերում, ապա ես մտադիր չէի նրա հետ որևէ խոսակցություն վարել, ուզում էի միայն առա-

վոտյան, մեկնելուց մի քանի րոպե առաջ, մի փոքրիկ երկտող թողնել, որի մեջ շատ հակիրճ կհայտնեի որոշումս, քացատրելով այն իմ և Ռայնգոլդի հայացքների տարբերությամբ, որը, իրականում, հենց այդպես էլ էր: Բատտիստան խորաթափանց մարդ է, նա իսկույն կհասկանա գործի էությունը, և ես այլևս կյանքում նրան չեմ հանդիպի:

Այդ մտքերով տարված, ինքս էլ շնկատեցի, թե ինչպես նորից վերադարձա իմ անցած արահետը և, քայլելով նրա երկայնքով, հասա այն զառիթափին, որի վրա ծվարել էր ամառանոցը: Մտքերից սթափվելով, ես նկատեցի, որ համարյա վազքով, ոտքերիս տակ փլվող քարքարոտ արահետն ի վար իջնում եմ դեպի այն փոքրիկ ու մենավոր ծովածոցը, որը դեռ առավոտյան էի նկատել տնից դուրս գալու պահին: Շնչակտուր հասա ներքև և հանգստանալու համար մի րոպե կանգ առա առափնյա ժայռերից մեկի վրա ու նայեցի շուրջս: Նեղ ու քարքարոտ լողափը բոլոր կողմերից շրջապատված էր մեծ-մեծ գլաքարերով, որոնք, թվում էր, թե հենց նոր էին պոկվել լեռներից ու գլորվել ցած: Ծովածոցը ծածկում էին երկու ժայռոտ հրվանդան, որոնք վեր էին խոյանում կանաչին տվող ջրի մակերևույթից: Չուրն այստեղ այնքան էր զուլալ, որ արևի ճառագայթները թափանցում էին մինչև հատակը և լուսավորում ճերմակ կոպիճները: Հետո ես նկատեցի կիսով ավազի և ջրի մեջ մխրձված սև ժայռը, ճեղքերով ու փոսերով պատված, և մտածեցի գնալ կանգնել նրա ստվերում, որպեսզի պաշտպանվեմ արդեն անողոքաբար այրող արևից: Բայց անցնելով ժայռի հետևը, ես հանկարծ իմ առջևում տեսա էմիլիային, որը ամբողջովին մերկ պառկել էր մեջքով՝ առափնյա քարերի վրա:

Ճիշտն ասած, ես նրան սկզբում չճանաչեցի, որովհետև ծղոտյա մի մեծ գլխարկով դեմքը ծածկված էր, դեռ ավելին, առաջին րոպեին նույնիսկ ուզեցի հետ գնալ, մտածելով, որ, ըստ երևույթին, լողացող որևէ անձանոթ կին է: Սակայն հանկարծ աչքս ընկավ քարերի վրա մեկնած նրա թևին, որի վրայով հայացքս վայրկենապես սահեց ու հասավ մինչև ցուցամատը: Ես նրա ցուցամատին նկատեցի երկու փոքրիկ կաղին հիշեցնող ծիածանաքարով ոսկյա այն մատանին, որը

ընդամենը մի քանի օր առաջ էի նվիրել էմիլիային՝ իր ծննդյան օրվա առթիվ:

Ինչպես ասացի, էմիլիան ամբողջովին մերկ էր, իսկ շորերը դրված էին կողքին, քարի վրա: Դա խայտաբղետ կտորների մի փոքրիկ կույտ էր, որոնց նայելիս մարդ չէր հավատում, թե դրանք կարող էին ծածկել մի այդպիսի խոշոր մարմնի մերկություն: Եվ իսկապես էլ, երբ ես նայում էի մերկ էմիլիային, ամենից շատ ինձ զարմանք էր պատճառում նրա մերկության մեջ ոչ թե մարմնի այս կամ այն մասը, այլ այդ մարմինը ամբողջությամբ վերցրած, նրա մեծության ու հզորության համատեղությունը: Ես, իհարկե, գիտեի, որ էմիլիան ավելի խոշոր չէ, քան շատ ու շատ ուրիշ կանայք, բայց և այնպես այդ պահին նրա մերկ մարմինը իմ աչքին այնքան հսկայական երևաց, որ թվում էր, թե նա անծայրածիր երկնքից ու ծովից ինչ-որ անընդգրկելիություն է ստացել: Մեջքի վրա պառկած լինելու հետևանքով նրա ստինքները մի տեսակ փովել ու կորցրել էին իրենց որոշակի ձևը, այժմ դրանք թվում էին երկու ցածրիկ մկանուտ ու ձիգ գմբեթիկներ, որոնք իմ աչքին երևում էին մի տեսակ մեծ՝ իրենց շափերով, մեծ՝ իրենց ծավալով և մեծ՝ իրենց պտուկներով ու նրանց շուրջը գտնվող վարդագույն շրջանակներով: Մեծ ու հզոր էին թվում և ազդրերը, որոնք, հարմարորեն հանգչելով լողափի քարերին, էլ ավելի էին լայնացել, և փորը, որը թվում էր, թե իր կլորիկ մակերեսով կլանում է արևի ամբողջ լույսը, և երկար ու նրբակազմ ոտքերը, որոնք լողափի թեքության հետևանքով մարմնից փոքրինչ ցած էին ընկած, թեև ինձ թվում էր, թե սեփական ծանրությունն ու երկարությունն է նրանց ցած քաշում: Ես հանկարծ ինքս ինձ հարց տվի, թե արդյոք ո՞րտեղից իմ մեջ ծնունդ առավ նրա մարմնի մեծության ու հզորության այդքան սուր ու հուզող զգացումը: Եվ հենց այդտեղ հասկացա, որ դա ծնունդ առավ հանկարծ իմ մեջ արթնացած ցանկությունից: Ճիշտ է, դա սուր ու անդիմադրելի մի ցանկություն էր, բայց ոչ այնքան ֆիզիկական, որքան նրա հետ միանալու հոգևոր մի ցանկություն, միանալու ոչ թե մարմնի հետ, ոչ թե մարմնի մեջ, այլ մարմնի միջոցով: Մի խոսքով, ես քաղց էի զգում դեպի էմիլիան, բայց այդ քաղցին հա-

գուրդ տալը կախված էր ոչ թե ինձանից, այլ միայն նրանից, ինձ հագեցնելու նրա համաձայնությունից: Իսկ այդ համաձայնությունը, ես զգում էի, որ նա ինձ չի տալիս, մերժում է, թեև առաջին հայացքի խաբկանքով կարող էր անգամ թվալ, թե իր մերկությունը պառկելով իմ առաջ, էմիլիան առաջարկում է ինձ իր մարմինը:

Բայց ես չէի կարող անվերջ մնալ որպես այդ արգելված մերկության սոսկական հայեցող: Ես ահա, քայլս գցելով առաջ ու խզելով լուծությունը, պարզ ու հստակ արտասանեցի.
— էմիլիա:

Նա մեկը մյուսի հետևից երկու շատ արագ շարժում արեց. մի կողմ նետեց ծղոտյա գլխարկը, լապա ձեռքը գցեց ու կողքին դրած շորերի կուլտից վերցրեց բլուզը, կարծես ցանկանալով մերկությունը նրա օգնությամբ թաքցնել: Միաժամանակ արագ նստեց տեղում և, ծովելով դեպի հետ, սկսեց այս ու այն կողմ նայել՝ տեսնելու, թե ով էր ձայն տվողը: Բայց երբ իսկույն ավելացրի. «Ես եմ, Ռիկկարդոն», — նա վերջապես ինձ նկատեց և ձեռքից քարերի վրա գցեց վերցրած բլուզը: Հետո ամբողջովին շրջվեց իմ կողմը, որպեսզի ավելի լավ տեսնի ինձ: «Ուրեմն, — մտածեցի ես, — առաջին վայրկյանին նա վախեցավ, որ կարող է օտար մարդ լինել, բայց հետո, երբ տեսավ այդ ես եմ, որոշեց, որ մաշելու ոչ մի կարիք չկա, կարծես, իրենից բացի, ոչ ոք այդտեղ գոյություն էլ չուներ»: Ես իմ այս փաստորեն անհեթեթ մտքերը բերում եմ լոկ նրա համար, որպեսզի ավելի ճիշտ պատկերացում տամ այն ժամանակվա իմ հոգեվիճակի մասին: Իմ մտքով անգամ չանցավ, որ նա իր մերկությունը ինձանից շթաքցրեց լոկ այն պատճառով, որ ես ոչ թե օտար եմ, այլ իր ամուսինը: Ես համոզված էի, որ այլևս գոյություն չունեմ նրա համար, գոնե որպես տղամարդ, և նրա երկիմաստ շարժման մեջ, բնականաբար, տեսնում էի իմ այդ համոզմունքի մի ավելորդ հաստատումը ևս: Ես ցածր ձայնով ասացի նրան.

— Արդեն հինգ րոպեից ավել կլինի, ինչ ես այստեղ կանգնած քեզ եմ նայում... և գիտես, ինձ թվում էր, թե քեզ առաջին անգամ եմ տեսնում:

Նա ոչինչ չպատասխանեց, միայն է՛լ ավելի շրջվեց իմ

կողմը, որպեսզի ինձ լավ տեսնի. բայց միևնույն ժամանակ սառն ու անտարբեր հետաքրքրություններ ուղղեց իր սև ակնոցը:

Ես ավելացրի.

— Դու չե՞ս առարկի, եթե ես մնամ այստեղ, թե՞ ուզում ես, որ գնամ:

Էմիլիան, ոտից գլուխ նայելով ինձ, նորից փովեց քարերի վրա ու շատ հանգիստ ասաց.

— Ինձ համար միևնույն է, մնա ինչքան ուզում ես, եթե քեզ դուր է գալիս... Միայն թե, խնդրում եմ, արևի առաջ մի կանգնիր:

Իսկապես էլ ես նրա համար գոյություն չունեի կամ, ունենալու դեպքում էլ, ամենաշատը մի անթափանցելի առարկա էի, որը, կանգնելով արևի առաջ, կարող էր խանգարել և շթողնել, որ նրա ճառագայթները ընկնեն Էմիլիայի մերկ մարմնին: Նրա այդ անտարբերությունը իմ մեջ հիվանդագին մի շփոթմունք առաջացրեց, ես հանկարծ զգացի, թե ինչպես, կարծես սարսափից, բերանս միանգամից շորացավ, իսկ դեմքիս վրա, հակառակ իմ կամքին, հայտնվեց շփոթմունք և անվստահություն, որը դրսևորվեց ինչ-որ անբնական ու շինծու ուրախ արտահայտությամբ:

Ես ասացի.

— Այստեղ շատ լավ է... Ես էլ եմ ուզում մի քիչ պառկել արևին ու սևանալ,— և, աշխատելով որքան կարելի է անկաշկանդ լինել, նստեցի նրանից փոքր-ինչ հեռու և մեջքով հենվեցի մի ժայռաբեկորի:

Տիրեց տևական մի լռություն: Ինձ ողողում էին ոսկեզօծ լույսի փաղաքշորեն այրող ու կուրացուցիչ ալիքները, որոնք մեկը մյուսի հետևից հորդում էին ինձ վրա, և ես, փակելով աչքերս, ամբողջ իմ էությունս երանություն ու անդորր էի զգում: Բայց ինքս ինձ խաբել չկարողացա, չկարողացա հավատացնել ինձ, որ այստեղ եմ եկել արևը վայելելու, ես զգում էի, որ քանի դեռ Էմիլիան ինձ չի սիրում, երբեք չեմ կարող լիովին վայելել արևի լույսն ու ջերմությունը: Գրեթե բարձրաձայն մտածելով ասացի.

— Այս տեղը կարծես հատուկ սիրահարների համար են պատրաստել:

— Այո,— արձագանքեց նա երեսը ծածկող ծղոտե գրլխարկի տակից և մնաց բոլորովին անշարժ:

— Բայց, իհարկե, ոչ մեզ համար, որովհետև մենք այլևս չենք սիրում իրար:

Այս անգամ նա ոչինչ չասաց: Իսկ ես մնացի սևեռված նայելով նրան, զգալով, որ նրան նայելուց իմ մեջ նորից է բորբոքվում այն ցանկությունը, որը քիչ առաջ պղտորել էր իմ մտքերը, երբ ես, անցնելով ժայռի հետևը, առաջին անգամ նկատեցի նրան:

Ուժեղ զգացմունքները լավ են նրանով, որ իրենք իրենց, առանց մեր կամքի և գիտակցության, անցնում են գործողության: Հանկարծ, ինքս էլ չեմ կարող ասել, թե ինչպես այդ տեղի ունեցավ, ես զգացի, որ ոչ թե նստած եմ էմիլիայից հեռու, մեջքս ժայռաբեկորին հենած, այլ շոքած եմ ուղղակի նրա կողքին: էմիլիան արդեն անշարժ քնած էր, ես խոնարհվեցի նրա վրա և, չգիտեմ ինչպես, մի կողմ նետելով նրա դեմքը ծածկող ծղոտյա գլխարկը, ուզեցի համբուրել: Սակայն ոչ մի կերպ չէի կարողանում աչքերս կտրել նրա շրթունքներից. այդպես մարդ երբեմն որևէ մրգի է նայում մինչև ատամները նրա մեջ մխրձելը: էմիլիայի բերանը մեծ էր, իսկ շրթունքները շատ մսեղ, նրանց վրա շրթներկը շորացել ու ճաքճքել էր, թվում էր դա շորացել է ոչ թե արևից, այլ ներքին ինչ-որ ջերմությունից: Ես մտածեցի, որ այդ շրթունքները վաղուց է, ինչ ինձ չեն համբուրել, և որ եթե այդ համբույրը տեղի ունենար այժմ, կես-քուն ու կես-արթուն այս վիճակում, ապա նա կարող էր արբեցնել այնպես, ինչպես արբեցնում է հին ու թունդ գինին: Ինձ թվում էր, որ ավելի քան մի րոպե նայում էի նրա բերանին, հետո կամաց-կամաց գլուխս իջեցրի և շուրթերով հպվեցի նրան: Բայց համբուրեցի ոչ անմիջապես. մի պահ հապաղեցի, զգալով, որ նրա բերանը իմի կողքին է: Ես լսում էի նրա քթանցքներից ելնող թեթև ու հանգիստ շնչառությունը և զգում այն ջերմությունը, որը ելնում էր նրա բոցավառ շրթունքներից: Ես դեռ կանխավայելում էի այդ համբույրը, երբ շրթունքներս արդեն հանդիպեցին նրա շուրթերին: Դա ոչ արթնացրեց և ոչ էլ զարմանք պատճառեց էմիլիային: Ես շուրթերով սեղմվեցի նրան սկզբում շատ քնքշորեն, իսկ հետո ավելի

ուժեղ, բայց տեսնելով, որ էմիլիան բուռնովին չի շարժվում, սիրտ արի և համբուրեցի ավելի լիաշուրթ: Այս անգամ զգացի, որ նրա շրթունքները, ինչպես և ցանկանում էի, դանդաղ հետ գնացին, նման այն խեցիներին, որոնց փեղկերը բացվում են, երբ ներսից այդ փեղկերին հպվում է ծովային թարմ ու զովացուցիչ ջրով լվացված կենդանի ինչ-որ էակ: Կամաց-կամաց էմիլիայի շրթունքները սկսեցին բացվել ավելի և ավելի լայն, միաժամանակ զգացի, թե ինչպես նրա ձեռքը բարձրացավ ու գրկեց իմ վիզը...

Հանկարծ ես ուժեղ մի ցնցում զգացի, հետո վեր թռա և իսկույն սթափվեցի այն քնաբեր վիճակից, որի մեջ ես ընկել էի անսահման լուռության և այրող արևի հետևանքով: Իմ առջև, դարձյալ քարերի վրա, փոված, պառկած էր էմիլիան: Նրա դեմքը ծածկված էր ծղոտյա գլխարկով: Ես հասկացա, որ այդ համբույրը երազ էր կամ, ավելի ճիշտ, անսահման կարոտի հետևանքով առաջացած հիվանդագին մի երազանք, որի ժամանակ միշտ անցյալի ուրվականները գերադասվում են այսօրվա ողորմելի իրականությունից: Ես համբուրեցի նրան, նա նույնպես պատասխանեց համբույրով: Բայց ինչպես համբուրողը, այնպես էլ պատասխանողը ընդամենը ուրվականներ էին, որոնք կենդանություն էին առել էմիլիային տիրանալու իմ տենչանքից, նրանք լուկ երկու ստվերներ էին, որոնք ոչինչ ընդհանուր չունեին մեր անշարժ, այնքան իրար օտարացած մարմինների հետ: Ես նայեցի էմիլիային և հանկարծ ինքս ինձ հարցրի. «Իսկ եթե հիմա փորձես իսկապես համբուրել նրա՞ն»: Ես իսկույն ինձնից ստացա իմ պատասխանը. «Ոչ, դու այդ անելու համարձակություն չես ունենա... քեզ կաշկանդում է երկշոտությունը և այն գիտակցությունը, որ նա արհամարհում է քեզ»:

Եվ հանկարծ բարձրաձայն ասացի.

— էմիլի՛ա:

— Ի՞նչ է:

— Մի բոպե աչքս կպավ, և երազում տեսա, որ քեզ համբուրում եմ:

Նա ոչինչ չպատասխանեց: Սարսափած այդ լուռությունից, ես ուզեցի խոսակցության նյութը փոխել և վրա բերի առանց մտածելու.

— Բատտիստան որտե՞ղ է:

էմիլիան ծղոտյա գլխարկի տակից հանգիստ ձայնով պատասխանեց.

— Չգիտեմ որտեղ է... Ի դեպ, նա այսօր մեզ հետ չի նախաճաշելու... Նախաճաշելու է Ռայնգոլդի հետ, ռեստորանում:

Նախքան գիտակցելս, թե ինչ եմ ուզում, ես ասացի.

— էմիլիա, ես երեկ երեկոյան տեսա, թե ինչպես էր հյուրասրահում Բատտիստան քեզ համբուրում:

— Գիտեմ, որ տեսար... Ես քեզ նկատեցի:

Դա նրա սովորական ձայնն էր, որ փոքր-ինչ խլացել էր դեմքին իշած ծղոտյա գլխարկի տակ:

Ինձ բոլորովին ապշեցրեց այն անտարբեր ու հանգիստ վիճակը, որով նա ընդունեց իմ մերկացնող հայտարարությունը: Որոշ շափով ինձ շփոթմունք պատճառեց նաև այն, թե ես ինչպես արի այդ խոստովանությունը: Հստ երևույթին, ինձ թվում էր, թե շշմեցնող արևն ու ծովի լուսթյունը մեզ մոռացնել կտան մեր գժտությունը, կհաշտեցնեն մեզ, կօգնեն հասկանալու այդ բոլորի դատարկ ու անմիտ լինելը, և մեկընդմիշտ դրանք մոռացություն կմատնեն:

Ինքս ինձ վրա մեծ ճիգ գործադրելով, այնուամենայնիվ, ավելացրի.

— էմիլիա, ես ու դու պետք է խոսենք:

— Միայն թե ոչ հիմա... Ես ուզում եմ հանգիստ պառկել արևի տակ:

— Այն դեպքում այսօր կեսօրից հետո:

— Կավ... այսօր կեսօրից հետո:

Ես տեղիցս կանգնեցի և, առանց հետ նայելու, քայլեցի դեպի ամառանոց տանող արահետով:

Գլուխ տասնհինգերորդ

Նախաճաշելիս մենք գրեթե չէինք խոսում: Թվում էր, թե լուսթյունը ամառանոց է թափանցում կեսօրյա արևի այրող շողերի հետ: Մեծ-մեծ լուսամուտներից ներս հորդող երկնքի

ու ծովի փայլը մեզ կուրացնում ու բաժանում էր իրարից։ Ամբողջ այդ շողշողուն լազուրը կարծես խտացել ու դարձել էր անհուն խորություններում կուտակված ծովաջուր, իսկ մենք երկուսով նստել էինք այդ ջրի հատակին և, լուսավոր ու թրթրոուն ջրաշերտերով անջատված, ի վիճակի չէինք որևէ խոսք արտաբերելու։ Իսկ մյուս կողմից, ես անվայել էի համարում երեկոյից շուտ էմիլիայի հետ որևէ բացատրություն սկսել, քանի որ ինքս էի սահմանել այդ ժամանակը։ Կարող էր թվալ, թե նման հանգամանքներում, երկու միմյանց դեմ նստած մարդիկ, որոնց ինչ-որ շուծված, բայց երկուսին էլ խիստ հետաքրքրող մի կարևոր հարց է զբաղեցնում, պետք է որ, բացի դրանից, ուրիշ բանի մասին շատածեին էլ։ Մինչդեռ մեզ մոտ բանը, իհարկե, բոլորովին ուրիշ էր. իմ մտքերը զբաղեցված չէին ոչ Բատտիստայի համբույրով և ոչ էլ իմ և էմիլիայի միջև ստեղծված փոխհարաբերություններով։ Ես համոզված էի, որ այդ մասին չի մտածում նաև էմիլիան։ Թերևս ինչ-որ ձևով ինձ դեռ կաշկանդում էր ներքին ընդարմացման ու անտարբերության այն զգացումը, որը դեռ առավոտյան էր համակել ինձ և պատճառ հանդիսացավ, որ պեսզի հետաձգեմ էմիլիայի հետ ունենալիք իմ բացատրությունները։

Նախաճաշից հետո էմիլիան վեր կացավ և, ասելով, որ ուզում է հանգստանալ, դուրս գնաց։ Մնալով մենակ, ես երկար ժամանակ անշարժ նստած նայում էի լուսամուտից դուրս՝ հորիզոնի հեռվում երևացող լուսավոր ու շողշողուն գծին, որտեղ ծովի մուգ կապույտը միանում ու խառնվում էր անհուն երկնքի մեղմ լազուրի հետ։ Կարված թելի վրայով գնացող ճանճի նման հորիզոնի այդ գծի երկայնքով առաջ էր շարժվում մի փոքրիկ ու սև նավ։ Ես աչքերով հետեւում էի նրան և, ինքս էլ չգիտեմ ինչու, անվերջ անհեթեթորեն մտածում էի, թե արդյոք ինչ է կատարվում հիմա այդ նավի վրա։ Ես մտովի տեսնում էի ծովայիններին, որոնք փայլեցնում էին նավի պղնձյա մասերն ու լվանում տախտակամածը, նավի խոհարարին, որը նավախոհանոցում ամանեղենն էր լվանում, սպաներին, որոնք գուցե դեռ սեղան էին նստած, իսկ ներքևում՝ մեքենաների սրահում, տեսում էի մինչև գոտկատեղերը մերկ հնոցապանների, որոնք լիքը լցրած

Թիակներով քարածուխ էին նետում հնոցի մեջ: Դա փոքրիկ մի նավ էր, որը այդքան տարածության վրա թվում էր, թե ընդամենը մի սև կետ է, ոչինչ ավելի, մինչդեռ մոտիկից նայելիս դա բավական մեծ մի նավ էր, բեռնավորված մարդկանցով ու մարդկային ճակատագրերով: Ես մտածում էի նաև, որ այդ նավի ուղևորները երևի նույնպես իրենց հերթին նայում են Կապրիին, գուցե իրենցից անկախ նրանց հայացքները նույնպես կանգ են առնում առափնյա ժայռերի մեջ կորած սպիտակ այս կետի՝ ամառանոցի վրա, որտեղ ես եմ գտնվում, իսկ ինձ հետ նաև էմիլիան, իսկ նրանց մտքով չի էլ անցնում, որ մենք չենք սիրում իրար, որ էմիլիան արհամարհում է ինձ, իսկ ես չգիտեմ, թե ինչպես նորից նվաճեմ նրա սերն ու հարգանքը:

Զգալով, որ քունս արդեն սկսում է տանել, ես լարեցի ամբողջ իմ ուժն ու էներգիան և որոշեցի իրականացնել նախագծի պլանի առաջին մասը. հայտնել Ռայնգոլդին, որ «ամեն ինչի մասին արդեն մտածել եմ» ու հանգել այն եզրակացության, որ մտադիր չեմ շարունակել սցենարը գրելու աշխատանքը: Այս որոշումը ինձ վրա նույն ներգործությունն ունեցավ, ինչպիսի ներգործություն կարող էր ունենալ, եթե գլխիս մի դուլլ սառը ջուր լցնեին: Լրիվ սթափվելուց հետո ես վեր կացա ու դուրս գնացի ամառանոցից:

Կղզու շուրջը պտույտ տվող ճանապարհով կես ժամ արագ քայլելուց հետո ես արդեն մտնում էի հյուրանոցի նախասրահ: Խնդրելով, որ իմ այցելության մասին զեկուցեն, նստեցի բազկաթոռներից մեկի վրա: Ես զգում էի, որ միտքս արտասովոր կերպով պայծառացել է, թեև նկատում էի, որ այդ պայծառությունը մի տեսակ դողով ու ջղաձգություններով է համակված: Սակայն թեթևության անվերջ աճող զգացումը, որը գրեթե ուրախության էր հասնում այն գիտակցությունից, ինչ ուզում էի իրականացնել, ինձ թվում էր, որ, վերջապես կանգնել եմ ճիշտ ճանապարհի վրա: Մի քանի րոպեից հետո Ռայնգոլդը մտավ նախասրահ ու եկավ ինձ ընդառաջ: Նա անհանգիստ և նույնիսկ զարմացած տեսք ուներ: Ոչ սովորական ժամին իմ գալով պայմանավորված նրա զարմանքին խառնվել էր ինչ-որ մի երկյուղ, ըստ երեվույթին նրան թվում էր, թե ես որևէ տհաճ նորություն եմ

բերել իրեն հայտնելու: Քաղաքավարության համար ես հարցրի:

— Դուք, երևի, քնած էիք, Ռայնգոլդ... իսկ ես ձեզ արթնացրի:

— Ոչ, ոչ,— հավատացրեց նա ինձ,— քնած չէի, ես ճաշից հետո քնելու սովորություն չունեմ... Բայց եկեք այստեղի բարը գնանք, Մուլտենի:

Ես նրա հետևից մտա բար, որը այդ ժամին լրիվ դատարկ էր, Ռայնգոլդը, կարծես ցանկանալով ձգձգել զրույցը, որի բովանդակությունը ինքը նախազգում էր, ինձ հարցրեց, ինչ կուզեի խմել. սո՞ւրձ, թե՞ լիկյոր: Նա այդ հարցրեց, այնպիսի մի դժգոհ ու մտահոգ տեսքով, ինչպիսին ժլատը կունենար, եթե հարկադրված լիներ իր կամքին հակառակ և մեծ ծախսեր պահանջող որևէ հյուրասիրություն անել: Բայց ես հասկանում էի, որ դրա պատճառը բոլորովին ուրիշ է. նա կդերադասեր, որ այստեղ առհասարակ ոտք չդնելի: Ինչպես էլ ուզում է լինի, ես հրաժարվեցի, և պատշաճության համար ասված մի քանի խոսքից հետո, առանց երկարացնելու, անցա գլխավորին:

— Դուցե ձեզ զարմացնո՞ւմ է իմ այսքան շուտ գալը... Ես մի ամբողջ օր մտածելու ժամանակ ունեի... Բայց ինձ թվաց, որ միտք չունի սպասել մինչև վաղը... Ես բավական հանգամանորեն մտածեցի... և եկել եմ ձեզ հայտնելու իմ վճիռը:

— Եվ ո՞րն է այդ վճիռը:

— Այն, որ ես ձեզ հետ շեմ կարող աշխատել այդ սցենարի վրա... կարճ ասած, հրաժարվում եմ այդ աշխատանքից:

Ռայնգոլդն իմ այս հայտարարությունն ընդունեց առանց որևէ զարմանքի. ինչպես երևում էր, նա սպասում էր դրան: Բայց ինձ թվաց, որ, այնուամենայնիվ, իմ ասածները նրան զրգոեցին: Նա իսկույն վրդովմունքով վրա բերեց:

— Մուլտենի, մենք իրար հետ պետք է պարզ խոսենք:

— Ինձ թվում է, որ ավելի պարզ ես չէի կարող ասել, մի՞թե հասկանալի չէ. հրաժարվում եմ «Ողիսականի» վրա աշխատելուց:

— Իսկ ինչո՞ւ, ես կխնդրեի պատճառն ասելիք:

— Որովհետև համաձայն չեմ սյուժետի ձեր մեկնաբանության հետ:

— Այն դեպքում, — հանկարծ ասաց նա բոլորովին ուրիշ տոնով, — դուք համաձայն եք Բատտիստայի հետ:

Այդ անսպասելի մեղադրանքից, շփտեմ ինչու, ես էլ իմ հերթին վրդովվեցի: Ես չգիտեի, որ Ռայնգոլդի հետ համաձայն չլինելը նշանակում է համաձայնություն Բատտիստայի հետ: Եվ զայրույթով ասացի.

— Այստեղ ի՞նչ գործ ունի Բատտիստան... Ես համաձայն չեմ նաև Բատտիստայի հետ... Բայց անկեղծորեն կարող եմ ձեզ ասել, Ռայնգոլդ, եթե ես ստիպված լինեի ընտրություն կատարել ձեր երկուսի մեջ, ապա կգերադասեի Բատտիստային: Խնդրում եմ, ինձ ներեք, Ռայնգոլդ, բայց իմ կարծիքով «Ողիսականը» կամ պետք է ներկայացնել այն ձևով, ինչպես Հոմերոսն է գրել, կամ էլ պետք է ձեռք քաշել այդ մտքից:

— Ուրեմն, դուք մերկ կանանցով, Կինգ-կոնգ հրեշներով, պորտապարերով, կրծկալներով, պապիե-մաշեից վիշապներով, նորաձևությունների ցույցով այդ վուլգար դիմակահանդե՞սն եք գերադասում:

— Ես այդպիսի բան չեմ ասել, իմ ասածից երևում է, որ գերադասում եմ այն, ինչ Հոմերոսն է գրել:

— Բայց Հոմերոսի «Ողիսականը» հենց այն է, ինչի մասին ասում եմ ես ինքս, — ձգվելով առաջ, խոր համոզմունքով ասաց Ռայնգոլդը, — դա հենց իմ «Ողիսականն» է, Մուլտենի:

Ինքս էլ չեմ կարող ասել ինչու, ես հանկարծ Ռայնգոլդին վիրավորելու մի ցանկություն զգացի. նրա կեղծ, հանդիսավոր ժպիտը, նրա իշխանատենչությունն ու կամակորությունը, հոգեվերլուծության նրա անհեթեթ ու բթամիտ վկայակոչումները այդ րոպեին ինձ թվում էին անտանելի: Ես կատաղությամբ ասացի.

— Ոչ, Ռայնգոլդ, Հոմերոսի «Ողիսականը» ձերի հետ ընդհանուր ոչինչ չունի... Ես ձեզ ավելին կարող եմ ասել, եթե դուք ինքներդ եք ինձ հարկադրում այդ անել. Հոմերոսի «Ողիսականը» ինձ հիացմունք է պատճառում, իսկ ձերը, ընդհակառակը, իմ մեջ միայն նողկանք է առաջացնում:

— Մուլտենի,— այս անգամ Ռայնգուլդը, ինչպես երևում էր, զայրույթով էր լքվել:

— Այո, նողկանք է առաջացնում,— վրա բերի ես, այժմ արդեն էլ ավելի վրդովված:— Հոմերոսի հերոսին նսեմացնելու, ստորացնելու ձեր անփոփոխ ցանկությունը, որը բացատրվում է լոկ նրանով, որ մենք ի վիճակի չենք ներկայացնել նրան այն ձևով, ինչպես ինքը Հոմերոսն է ստեղծել, պոեմն անդամահատելու ձեր բոլոր ձգտումները իմ մեջ միայն գարշանք են առաջացնում, և ես ոչ մի գնով չեմ համարձայնի մասնակցություն ունենալ այդ գործում:

— Մուլտենի... Մի բոպե, Մուլտենի:

— Դուք կարդացե՞լ եք Ջեյմս Ջոյսի «Ուլիսսը»,— կատաղած ընդհատեցի ես նրան,— դուք գիտե՞ք ով է Ջոյսը:

— Ես կարդացել եմ այն ամենը, ինչ «Ողիսականին» է վերաբերում,— խիստ վիրավորված պատասխանեց Ռայնգուլդը,— իսկ դուք...

— Դե ուրեմն լսեք,— շարունակեցի ես զայրույթով լքված,— Ջոյսը նույնպես «Ողիսականը» մեկնաբանել է ժամանակակից ձևով... և պոեմի այժմեականացման կամ, ավելի ճիշտ, նրա այդ գոեհացման, անդամահատման, խեղաթյուրման հարցում շատ ավելի հեռուն գնաց, քան դուք, սիրելի Ռայնգուլդ... Նա Ուլիսսին դարձրեց կոտորավոր, օնանիստ, դատարկապորտ, իմպոտենտ, անընդունակ, նա Պենելոպեին դուրս բերեց փշացած պոռնիկ... էլի կղզին դարձրեց ինչ-որ թերթի խմբագրություն, դժոխք իջնելը դարձրեց կերուխումային ընկերոջ թաղում, Կիրկեի ապարանքը՝ պոռնկատուն, վերադարձը դեպի Իթակե փոխվեց վերադարձի դեպի տուն, և այն էլ խոր գիշերին, Դուբլինի փողոցներով, որտեղ նա, իհարկե, երբեմն կանգ է առնում դարպասների տակ, որպեսզի միզի... Բայց Ջոյսը գոնե այնքան խելամտություն է ցուցաբերել, որ ձեռք չի մեկնել Միջերկրականի կուլտուրային, արևին, երկնքին, ծովին, անտիկ աշխարհի անհայտ երկրներին... Նրա մոտ ոչ երկինք կա, ոչ արև, ոչ ծով... ամեն ինչ մողեռն է, այսինքն՝ ցած է իջեցված, գոեհացրած է, հասցված է մեր ամենօրյա ողորմելիության աստիճանին... Նրա մոտ ամեն ինչ տեղի է ունենում ժամանակակից ինչ-որ հյուսիսային քաղաքի ցեխոտ փողոցներում,

ննջարաններում, արտաքնոցներում... իսկ դուք նույնիսկ Ջոյսի այդ հետևողականութունն էլ շունեք... ահա թե ես ինչու եմ ձեր և Բատտիստայի մեջ ընտրություն կատարելիս նախապատվությունը տալիս նրան, շնայելով նրա այդ ամբողջ պապիե-մաշեներով կեղծիքներին... Այո, նախապատվությունը տալիս եմ Բատտիստային... Դուք ուզում էիք իմանալ, թե ես ինչու չեմ ուզում աշխատել այդ սցենարի վրա... Այժմ դուք այդ արդեն գիտեք:

Ես քրտինքի մեջ ողողված ընկա բազկաթոռին: Ռայնգոլդը նոթերը կիտած, խստորեն ու մոռյլ ինձ նայեց:

— Մի խոսքով, դուք կողմնակից եք Բատտիստային:

— Ոչ, ես Բատտիստային կողմնակից չեմ... Ես պարզապես դեմ եմ ձեզ:

— Դուք ոչ թե դեմ եք ինձ, — հանկարծ ձայնը բարձրացնելով ասաց Ռայնգոլդը, — այլ կողմնակից եք Բատտիստային:

Ես հանկարծ զգացի, թե ինչպես է արյունը ցամաքում իմ երեսին, այտերս ծածկելով մահվան դժգունությունամբ:

— Դրանով ի՞նչ եք ուզում ասել, — հարցրի ես, զայրույթս հազիվ զսպելով:

Ռայնգոլդը մեկնվեց առաջ և վտանգի դեմ դւնվող օձի նման ֆշշացնելով ասաց.

— Ուզում եմ ասել այն, ինչ ասացի... Բատտիստան այսօր ինձ հետ էր ճաշում: Նա ինձանից շթաքցրեց իր պլանները և այն, որ դուք իր հետ համաձայն եք... Դուք, Մուտենի, ոչ թե ինձ եք դեմ, այլ կողմնակից եք Բատտիստային, ինչ էլ որ նա ցանկանա... արվեստը ձեզ համար ոչ մի կարեւորություն չունի, ձեզ հետաքրքրողը փողն է... Միայն թե վճարեն... ինչի համար ուզում է լինի:

— Ռայնգոլդ, — հանկարծ բղավեցի ես ամբողջ ձայնով:

— Ես ձեզ արդեն հասկացա, սիրելի բարեկամս, — ձեռք շէր քաշում Ռայնգոլդը, — և առանց թաքցնելու էլ ձեր երեսին ասում եմ. միայն թե վճարեն... ինչի համար ուզում է լինի:

Այժմ մենք կանգնած էինք իրար դեմ-դիմաց, զայրույթից հազիվ շնչելով, ես թղթի նման ճերմակ, իսկ նա՝ ամբողջովին կարմրատակած:

— Ռայնգոլդ,— կրկնեցի ես նույն հատակ ու կատաղի ձայնով:

Սակայն իսկույն զգացի, որ այժմ իմ ձայնի մեջ ավելի շատ ինչ-որ մթին մի ցավ է հնչում, քան զայրույթ, որ այդ «Ռայնգոլդ» բառը ավելի շուտ աղաչանք էր արտահայտում, քան վիշավորված մարդու զայրույթ, որը պատրաստ է բառացի սպառնալիքներից գործի անցնելուն: Բայց միևնույն ժամանակ զգում էի նաև, որ հիմա ուր որ է ապտակս կիջնի ռեժիսորի երեսին: Սակայն չհասցրի այդ անել: Տարօրինակ է, ես Ռայնգոլդին համարում էի բուժ և աննրբանկատ մարդ, մինչդեռ նա իսկույն նկատեց իմ ձայնի մեջ հնչող ցավը և, տիրապետելով իրեն, փոքր-ինչ հետ քաշվեց և ցածր ու հաշտվողաբար մեղմ ասաց.

— Ներեցեք ինձ, Մոլտենի... Ես ասացի այն, ինչ շեմ մտածում...

Ես ջղաձգորեն գլուխս այնպես շարժեցի, որ կարծես ասացի. «Ներում եմ», բայց և նույն րոպեին զգացի, թե ինչպես են աչքերս լցվում արցունքներով: Վայրկենական շփոթմունքից հետո Ռայնգոլդն ասաց.

— Շատ լավ, ես հասկացա... դուք չեք ուզում մասնակցել այս սցենարի ստեղծմանը... իսկ Բատտիստային արդեն ասե՞լ եք այդ մասին:

— Ոչ:

— Չե՞ք ուզում ասել:

— Դուք ասացեք... ինձ թվում է, այլևս չեմ հանդիպի նրան:

Փոքր-ինչ լռելուց հետո ես ավելացրի.

— Խնդրում եմ նրան նաև ասեք, որ իր համար ուրիշ սցենարիստ գտնի... Պա՞րզ է, Ռայնգոլդ:

— Ինչպե՞ս,— զարմացած հարցրեց Ռայնգոլդը:

— Ես հրաժարվում եմ «Ողիսականի» վրա աշխատելուց, ինի դա ըստ ձեր մտահղացումների, թե Բատտիստայի, դուք լինեք, թե մի ուրիշ ռեժիսոր, միևնույն է... Հասկանալի՞ է, Ռայնգոլդ:

Վերջապես նա հասկացավ: Աչքերը մի տեսակ շողացին, բայց և այնպես զգուշորեն հարցրեց.

— Կարճ ասած, դուք չեք ուզում աշխատել իմ առաջար-

կած տարբերակի՞ վրա, թե՞ առհասարակ չեք ուզում մասնակցել այդ ֆիլմի ստեղծմանը:

Փոքր-ինչ մտածելուց հետո պատասխանեցի.

— Ես ձեզ արդեն ասացի, չեմ ուզում աշխատել ձեր սցենարի վրա... Բայց մյուս կողմից էլ զգում եմ, որ իմ հրաժարման այսպիսի պատճառաբանումը կարող է ձեզ վնասել Բատտիստայի առաջ... այդ իսկ տեսակետից եկեք այսպես անենք. ձեզ համար՝ ես չեմ ուզում աշխատել ձեր առաջարկած տարբերակի վրա... իսկ Բատտիստայի համար՝ պայմանավորվենք, որ ես հրաժարվում եմ առհասարակ այդ ֆիլմի վրա աշխատելուց, անկախ նրանից, թե սյուժեին ինչպիսի մեկնաբանություն է տրվում... Բատտիստային ասեք, որ ես ինձ վատ եմ զգում, որ խիստ հոգնած եմ, և ջղերս սուկալի քայքայված են... եղա՞մ:

Իմ այս առաջարկությունից Ռայնգոլդն իրեն շատ թեթեւացած զգաց: Բայց դա նրան շխանգարեց, որպեսզի նորից հարցնի.

— Իսկ Բատտիստան կհավատա՞:

— Կհավատա, հանգիստ եղեք... կտեսնենք, որ կհավատա:

Բավական երկար մի լռություն տիրեց: Մենք երկուսով էլ մի տեսակ անհարմար վիճակի մեջ էինք: Մենք դեռ գտնվում էինք փոքր-ինչ առաջ տեղի ունեցած վեճի ազդեցության տակ, մեզանից և ոչ մեկը չէր կարողանում ազատվել այդ թարմ տպավորությունից: Վերջապես Ռայնգոլդն ասաց.

— Այնուամենայնիվ, ես շատ ափսոսում եմ, Մուլտենի, որ դուք չեք ուզում մասնակցել այս ֆիլմի ստեղծմանը... գուցե, դեռ կարողանայինք իրար հասկանալ:

— Չեմ կարծում:

— Դուցե մեր միջև եղած տարաձայնությունը այնքան էլ լուրջ տարաձայնություն չէ:

Հաստատ և արդեն շատ հանգիստ ես ասացի.

— Ոչ, Ռայնգոլդ, մեր միջև եղած տարաձայնությունը շատ լուրջ է... Կարող է պատահել, որ դուք իսկապես էլ պոեմի ձեր այդ մեկնաբանությամբ իրավացի եք... Բայց ես խոր կերպով համոզված եմ, որ «Ողիսականը» այսօր ևս կարող է ներկայացվել այնպես, ինչպես գրել է Հոմերոսը...

— Ձեր ուզածը ձգտում է, Մուլտենի... Դուք ձգտում եք

ստեղծել մի աշխարհ, որ նման լինի Հոմերոսի պատկերածին... Դուք կուզեիք, որ այդ աշխարհը գոյություն ունենար... Բայց, դժբախտաբար, նա գոյություն չունի:

Ես հաշտվողաբար ասացի.

— Ընդունենք, որ դա իրոք այդպես է. ես ձգտում եմ ստեղծել մի աշխարհ, որը նման է Հոմերոսի պատկերած աշխարհին... Մինչդեռ, այ, դուք՝ ինքներդ այդ չեք անում:

— Ես էլ եմ ձգտում, Մուլտենի... և ով է այն մարդը, որ չի ձգտում... Սակայն երբ հարցը վերաբերում է ֆիլմ ստեղծելուն, միայն ձգտումը շատ քիչ է...

Նորից լռություն տիրեց: Ես նայում էի Ռայնգոլդին, և զգում, որ, լսելով իմ փաստարկները, այնուամենայնիվ, նա չի համոզվում: Հանկարծ ես նրան հարցրի. — դուք, անկասկած, հիշում եք, Ռայնգոլդ, Դանտեի մոտ այն տեղը, որը Ողիսևսին է վերաբերում:

— Այո, իհարկե, — պատասխանեց նա մի տեսակ զարմացած իմ տված հարցից, — թեև ոչ այնքան լավ, բայց, այնուամենայնիվ, հիշում եմ:

— Այն դեպքում թույլ կտա՞ք, արտասանեմ... Ես դա անգիր գիտեմ:

— Եթե դա ձեզ հաճույք է պատճառում, խնդրեմ:

Ես ստույգ ասել չեմ կարող, թե ինչու հանկարծ իմ մեջ ցանկություն առաջացավ արտասանել Դանտե: Ըստ երեվույթին, ինչպես հետագայում հասկացա, ինձ թվում էր, որ առանց վիրավորանքի Ռայնգոլդին որոշ բաներ հիշեցնելու լավագույն միջոցն այդ է:

Երբ ուժիսորը խոնջության ու ներողամտության մի արտահայտություն դեմքին ընկավ բազկաթոռին, ես վրա բերի.

— Այդ երգում Դանտեն Ողիսևսին պատմել է տալիս նրա և նրա ընկերների վախճանի մասին...

— Գիտեմ, Մուլտենի, գիտեմ... Խնդրեմ, արտասանեք: Ես մի պահ միտքս լարած ցած նայեցի և ապա սկսեցի.

Եվ հին բոցի եղջյուրը ելած...

Հետզհետե ես սկսեցի արտասանել ավելի հանգիստ ձայնով և որքան հնարավոր էր, առանց վերամբարձության: Ռայնգոլդը իր քաթանե գլխարկի հովարի տակից մի բոպե

զննեց ինձ ոտից գլուխ, ապա երեսն անելով ծովին, այլևս չշարժվեց տեղից: Ես հանդարտ ու հստակ շարունակեցի իմ արտասանությունը: Բայց հասնելով այն տեղին, որտեղ ասվում է.

Ով եղբայրներ,— ասացի,— դուք, որ անթիվ
Վտանգներով անցաք մինչև արևմուտք...

Ես հանկարծ զգացի, որ ինձանից բոլորովին անկախ, հուզմունքից ձայնս սկսեց դողդողալ: Ես մտածեցի, որ այս մի քանի տողերում դրված է ոչ միայն Ողիսևսի կերպարի իմ հասկացողությունը, այլև իմ և իմ կյանքի մասին ունեցած այն պատկերացումը, թե ինչպիսին նա պետք է լիներ, բայց, դժբախտաբար, չեղավ: Ես զգում էի, որ այդ հուզմունքը ծնունդ է առնում հիանալի գաղափարի հստակության և իմ ներքին անզորության միջև եղած անհամապատասխանությունից: Այնուամենայնիվ, հաղթահարելով հուզմունքս, մի կերպ ինձ տիրապետեցի և հասա մինչև վերջին տողը.

Մինչև ծովը կրկին ծածկվեց մեր վրա:

Վերջացնելուց անմիջապես հետո ոտքի ելա: Իր բազկաթոռից վերկացավ նաև Ռայնգոլդը:

— Խնդրում եմ ինձ ներեք, Մուլտենի,— անմիջապես սկսեց նա,— շատ ներեք... բայց ես ուզում եմ իմանալ, թե դուք ինչո՞ւ արտասանեցիք Դանտեից այդ հատվածը... Ի՞նչ նպատակով: Դա, անկասկած, շատ գեղեցիկ է, բայց ո՞րն էր նպատակը:

Ես պատասխանեցի.

— Սա այն Ողիսևսն է, Ռայնգոլդ, որի կերպարը կուզեի ստեղծել... Ես Ողիսևսին այդպես եմ պատկերացնում... Մինչև ձեզանից հեռանալը, Ռայնգոլդ, ուզեցի որքան կարելի է համոզիչ ու պարզ պատկերացում տալ նրա մասին... Ես մտածեցի, որ Դանտեից բերած հատվածը շատ ավելի լավ կարող է այդ անել, քան ես իմ խոսքերով:

— Դա, իհարկե, այդպես է... Բայց Դանտեն Դանտե է... Նա միջնադարի մարդ է... Իսկ դուք, Մուլտենի, ժամանակակից մարդ եք...

Այս անգամ ես ոչինչ չպատասխանեցի, միայն ձեռքս

մեկնեցի նրան: Ռայնգոլդը հասկացավ այդ և իսկույն վրա
բերեց.

— Բոլոր դեպքերում, Մուլտենի, շատ եմ ափսոսում,
որ ձեզ հետ չենք աշխատելու... Ես արդեն ընտելացել էի
ձեզ:

— Թող մնա մի ուրիշ անգամ,— պատասխանեցի ես,—
ես ինքս էլ կուզենայի ձեզ հետ աշխատել, Ռայնգոլդ:

— Իսկ ինչո՞ւ չեք աշխատում, Մուլտենի: Ի՞նչն է ձեզ
խանգարում:

— Ճակատագիրը,— ժպտալով պատասխանեցի ես և
ձեռքը սեղմելով շարժվեցի դեպի դուրս: Ռայնգոլդը մնաց
բարում, սեղանի մոտ կանգնած ու այնպես պարզած թևերով,
որ թվում էր, թե դեռ կրկնում է՝ «ինչո՞ւ»:

Ես արագ դուրս եկա հյուրանոցից:

Գլուխ քսաներորդ

Ես ամառանոց վերադարձա նույնքան շտապ, որքան շտապ
դուրս էի եկել այնտեղից: Անհամբերության և վրդովմունքի
զգացումը ինձ թույլ չէր տալիս հանգիստ կերպով կշռադա-
տել այն ամենը, ինչ կատարվել էր: Այրող արևի տակ վա-
զում էի ճանապարհի ցեմենտապատ եզրով և ոչինչ չէի
մտածում: Ես հասկանում էի, որ փշրել եմ այն անշարժ
իրադրությունը, որն այնքան տևական խոռվում էր իմ հան-
գիստը: Ես զգում էի, որ շուտով վերջապես կիմանամ, թե
ինչու էմիլիան այլևս ինձ չի սիրում: Իսկ ինչ էր լինելու
դրանից հետո, ես այդ մասին ոչ մի պատկերացում չունեի:
Խորհրդածությունները լինում են կամ գործողությունից առաջ,
կամ նրանից հետո: Այն, ինչը մեզ ղեկավարում է գործո-
ղության ընթացքում, դրանք խոհերն են, որոնք արդեն անցել
են և, մոռացվելով, մեր հոգում դարձել են լոկ կիրք: Ես գոր-
ծում էի, և այդ պատճառով էլ չէի մտածում: Ես գիտեի, որ
մտածելու եմ հետո, երբ գործողությունը արդեն կատարած,
վերջացրած լինեմ:

Հասնելով ամառանոց՝ վազելով բարձրացա պատշգամբ, տանող աստիճաններով և մտա հյուրասրահ: Ներսում ոչ ոք չկար: Բայց տեսնելով, որ բազկաթոռին ընկած է բացած մի ամսագիր, մոխրամանում շրթներիկ քսված սիգարետի մնացորդներ են, իսկ միացրած ռադիոընդունիչից պարային մեղմ երաժշտություն է լսվում, հասկացա, որ էմիլիան քիչ առաջ այդտեղ է եղել: Գուցե հետկեսօրյա արևի ցրիվ լույսի և մեղմ, հազիվ լսելի երաժշտության բարերար աղղեցության շնորհիվ էր, բայց ես հանկարծ զգացի, որ կատաղությունս անցավ, թեև նույնքան պարզ ու հստակ հասկանում էի, որն էր նրա առաջացման պատճառը: Ամենից շատ ինձ ապշեցրեց հյուրասրահի բնակրնտելացված տեսքը. խաղաղ, բարեհարմար, հանգստավետ: Թվում էր, թե ամիսներ շարունակ ամառանոցում ենք ապրել, և էմիլիան վարժվել է արդեն անվանել այն իր հիմնական կացարանը: Ռադիոընդունիչը, բազկաթոռին գցած ամսագիրը, մոխրամանը նետած սիգարետի մնացորդները, ինքս էլ չեմ կարող ասել ինչու, հիշողությանս մեջ վերակենդանացնում էին էմիլիայի դեպի տունն ունեցած կրքերը, ինձ հիշեցնում էին դեպի սեփական օջախն ունեցած նրա հերոսական, բնազդային և կանացի սերը: Ես հասկացա, որ շնայած այն ամենին, ինչ կատարվել էր, էմիլիան պատրաստվում է այստեղ ապրել դեռ շատ երկար, որ նա փաստորեն շատ գոհ է Կապրիում, Բատտիստայի տանը գտնվելու համար: Մինչդեռ ես եկել եմ նրան հայտնելու այստեղից մեր մեկնելու մասին:

Մտքերով տարված, մոտեցա էմիլիայի ննջարանին և բացեցի դուռը: Էմիլիան չկար: Բայց այստեղ նույնպես նկատեցի այնպիսի նշաններ, որոնք վկայում էին դեպի ընտանեկան օջախն ունեցած էմիլիայի հակումների մասին: Գիշերային շապիկը խնամքով դրված էր մահճակալի ոտքերի մոտ գտնվող բազկաթոռին. այդ նույն բազկաթոռի մոտ դրված էին նաև տնային կոշիկները: Հայելու առաջ գտնվող զարդասեղանին կարգով դասավորված էին օժանելիքների սրվակներ, կրեմի տուփեր և հարդարանքի այլ առարկաներ: Մահճակալի կողքի փոքրիկ պահարանի վրա մի գիրք կար, դա անգլերենի քերականությունն էր, որով վերջին ժամանակներս էմիլիան սկսել էր զբաղվել: Հենց այդտեղ էլ՝ գրքի

կողքին կար վարժությունների մի տետր, մատիտ և մի փոքրիկ թանաքաման: Բազմաթիվ ճամպրուկներից, որոնք մենք հետներս Հոռմից էինք վերցրել, և ոչ մեկի հետքը չէր երևում: Ես գրեթե մեքենայաբար բացեցի զգեստապահարանը: Էմիլիայի զգեստները, որոնք թվով այնքան էլ շատ չէին, կախիչների վրա խնամքով շարված էին մեկը մյուսի հետևից: Փայտյա ձողիկի վրա գցած էին մեծ ու փոքր թաշկինակներ, գլխաշորեր, գոտիներ, ժապավեններ: Ներքևում դրված էր մի զույգ կոշիկ: «Իհարկե, — մտածեցի ես, — էմիլիայի համար կարևոր չէ, թե ում է ինքը սիրում. Բատտիստայի՞ն, թե՞ ինձ: Նրա համար կարևորը սեփական տուն ունենալն է և այդ տանը երկար, հանգիստ և առանց որևէ հոգսի ապրելը»:

Ես ննջարանից դուրս եկա և միջանցքով քայլերս ուղղեցի դեպի խոհանոց, որը ամառանոցի հետևը կառուցած մի փոքրիկ տնակ էր: Խոհանոցի շեմքին ես լսեցի էմիլիայի ձայնը, որը խոհարարուհու հետ ինչ-որ բան էր խոսում: Ինքնաբերաբար կանգ առնելով բաց դռան հետևը, ես մի պահ ականջ դրի: Որքան հասկացա, էմիլիան կարգադրություններ էր անում, թե ինչ պատրաստել ընթրիքի համար:

— Սինյոր Ռիկկարդոն, — ասում էր էմիլիան, — սիրում է պարզ ուտելիքներ, առանց սոուսների և համեմունքների... մի խոսքով, խաշած կամ տապակած մսեղեն, ձկնեղեն... Դա ձեզ համար ավելի լավ է, Անյեզինա, քիչ գլխացավանք կլինի:

— Է, սինյորա, այդպիսի գլխացավանքն անպակաս է... Չկարծեք, թե այդ պարզ ուտելիքները իսկապես էլ այդքան պարզ են... Ուրեմն, ասում եք ինչ պատրաստե՞մ այսօրվա ընթրիքի համար:

Մի կարճ լռություն տիրեց: Ըստ երևույթին, էմիլիան մտածում էր: Հետո հարցրեց.

— Իսկ այս ժամին դեռ ձուկ կճարվի՞:

— Եթե գնամ հյուրանոցներին ձուկ մատակարարող ձրկնավաճառի մոտ, կճարվի:

— Այն դեպքում մի լավ մեծ ձուկ գնեցեք... Կիլոյից պակաս թող չլինի, ավելին կարելի է... Բայց աշխատեք, լավ ձուկ վերցնել, փշոտ չլինի... Լավ է ատամնաձուկ կամ, նույնիսկ, երկայնաձուկ լինի... Մի խոսքով, ինչ որ ճարվի... և

տապակեք... Բայց ոչ, ավելի լավ է, խաշած լինի... Դուք գիտե՞ք, ինչպես են մայրոնեզ պատրաստում, Անյեզինա:

— Հա, իհարկե, գիտեմ:

— Շատ լավ... Ուրեմն, եթե ձուկը խաշեք, մայրոնեզ էլ կպատրաստեք... հետո՝ սալաթ կամ որևէ խաշած բանջարեղեն... գազար, դդմիկ, լոբի... ինչ որ գտնվի... և մրգեր, մրգերը թող շատ լինեն... Հենց որ վերադառնաք գնումներ կատարելուց, մրգերը դրեք սառնարան, որպեսզի սեղան բերելիս թարմ լինեն...

— Իսկ նախընթրիքի համար ի՞նչ պատրաստենք:

— Ախ, հա, իհարկե, նախընթրիք էլ է պետք... եկեք այսօրվա համար մի հեշտ բան մտածենք... կգնեք խոզապուխտ, բայց փափուկներից, լեռնային ըլինի... և հետո էլ թուզ կգնեք... թուզ կա՞:

— Հա, թուզ կա:

Զգիտեմ ինչու, բայց երբ լսում էի այդ ընտանեկան, հանդիստ, նախապես ամեն ինչ հաշվի առնող զրույցը, հանկարծ հիշեցի իմ վերջին խոսքերը, որոնք ես փոխանակում էի Ռայնգոլդի հետ: Նա ինձ ասաց, որ ես երազում եմ ապրել մի այնպիսի աշխարհում, որը նման է «Ողիսականի» աշխարհին, և ես ասում էի, որ նա իրավացի է: Այդ ժամանակ Ռայնգոլդը հայտարարեց, որ իմ այդ երազանքը անիրագործելի է, քանի որ ժամանակակից աշխարհը «Ողիսականի» աշխարհը չէ: Եվ ես մտածեցի. «Այնուամենայնիվ, այդ նույն տեսարանը իր ամբողջ իրադրությունամբ կարող էր տեղի ունենալ նաև հազարավոր տարիներ առաջ, Հոմերոսի ժամանակ... Տանտիկինը, զրուցելով աղախնի հետ, բացատրում է, թե ինչ պետք է պատրաստել ընթրիքի համար»: Այդ մրտքի վրա հիշեցի հետկեսօրյան արևի մեղմ ու ցրիվ լույսը, որով լցված էր հյուրասրահը, և հանկարծ, կարծես կախարդանքով, ինձ թվաց, թե Բատտիստայի ամառանոցը Իթակեում գտնվող տունն է, իսկ էմիլիան՝ ինքը Պենելոպեն, որը զրուցում է իր սարկուհու հետ: Այո, ես իրավացի էի, այդ ամենը կարող էր լինել ճիշտ այնպես, ինչպես այն ժամանակ էր: Բայց, դժբախտաբար, ամեն ինչ ցավալիորեն ուրիշ էր: Ինքս ինձ վրա ճիգ՝ գործադրելով, խոհանոցի շեմքից ներս նայեցի և ձայն տվի.

— էմիլիա:

Նա շրջվեց և իսկույն հարցրեց.

— Ի՞նչ կա:

— Դու ինքդ էլ գիտես ինչ կա... Ես քեզ հետ խոսելիք ունեմ:

— Գնա հյուրասրահում սպասիր, հիմա կգամ... Ես Անյեզինայի հետ դեռ գործ ունեմ:

Ես գնացի հյուրասրահ, նստեցի բազկաթոռներից մեկին և սկսեցի սպասել: Այժմ արդեն զղջում էի իմ մտադրության համար. ամեն ինչից երևում էր, որ էմիլիան պատրաստվում է ամառանոցում երկար մնալ, մինչդեռ ես եկել էի, որպեսզի նրան հայտնեմ մեր մեկնելու իմ մտադրության մասին: Այդ ընթացքին մտաբերեցի, թե ինչպես ընդամենը մի քանի օր առաջ էմիլիան որոշել էր հեռանալ ինձանից: Եվ համեմատելով նրա այն ժամանակվա գրեթե հուսահատական տրամադրությունը այժմյան հանգիստ վիճակի հետ, ես մտածեցի, որ նա, ըստ երևույթին, վճռել է ապրել ինձ հետ, նույնիսկ արհամարհելով ինձ: Այլ խոսքերով ասած, այժմ նա ընդունում էր այն, ինչի դեմ այն ժամանակ բողոքի էր ելել: Սակայն այդ հանգամանքը ինձ համար շատ ավելի վիրավորական էր, քան ուղածդ բողոքը: Դա նշանակում էր, որ էմիլիան անձնատուր է եղել, որ նրա կամքը կոտրված է, և որ այժմ նա արհամարհում է ոչ միայն ինձ, այլև իրեն: Հենց լոկ այս միտքը բավական եղավ, որպեսզի ես իմ հոգուց վտարեմ զղջումի զգացումն ու հաստատ մնամ որոշմանս... Այո, մենք պետք է մեկնեինք, դա անհրաժեշտ էր և նրա, և ինձ համար, և այդ վճիռը նա պետք է իմանար:

Ես մի քիչ էլ սպասեցի: էմիլիան ներս մտավ, մոտեցավ ռադիոընդունիչին, անշատեց և նստեց:

— Դու ասացիր, որ ինձ հետ խոսելիք ունես:

Ես դրան հարցով պատասխանեցի:

— Դու ճամպրուկները նորի՞ց ես քանդել:

— Այո, ի՞նչ կա որ:

— Ցավում եմ, — ասացի ես, — բայց պետք է նորից հավաքես ու կապես... Մենք վաղն առավոտյան մեկնում ենք Հոոմ:

էմիլիան մի րոպե այնպես անշարժացավ ու մոլորված

կանգնեց, կարծես ասածս չհասկացավ: Հետո խստորեն հարցրեց.

— Էլ ի՞նչ է պատահել:

— Այն է պատահել, — պատասխանեցի ես, վեր կենալով բազկաթոռից ու գնալով դեպի միջանցքի վրա բացվող դուռը, որպեսզի ծածկեմ, — այն է պատահել, որ որոշել եմ հրաժարվել այդ սցենարի աշխատանքից... Ամեն ինչ գրողի ծոցն եմ ուղարկել... Վաղը վերադառնում ենք Հոռոմ:

Այդ նորությունը, ինչպես երևում էր, էմիլիային իրոք որ զայրույթ էր պատճառել: Նա հոնքերը կիտելով հարցրեց.

— Իսկ ինչո՞ւ ես որոշել հրաժարվել այդ աշխատանքից: Ես շատ շոր պատասխանեցի.

— Զարմանում եմ, որ դու կարող ես այդ հարցը տալ ինձ... ինձ թվում է, որ երեկ երեկոյան իմ տեսածներից հետո այլ կերպ վարվել չէի կարող:

Էմիլիան սառնությամբ իսկույն առարկեց.

— Երեկ երեկոյան դու բոլորովին ուրիշ կարծիքի էիր... չնայած այդ նույն բանը դու երեկ էլ էիր տեսել:

— Երեկ երեկոյան ես քեզ թողել էի, որ ինձ համոզես քո փաստարկներով... Բայց հետո հասկացա, որ դրանք չպետք է հաշվի առնեմ... Ես չգիտեմ, թե դու ինչու ես ուզում, որ աշխատեմ այդ սցենարի վրա և ոչ էլ ուզում եմ իմանալ... Ես գիտեմ միայն մի բան, որ և ինձ համար, և քեզ համար շատ ավելի լավ կլինի, եթե ես այդ շանեմ:

— Բատտիստան այդ գիտե՞, — հանկարծ հարցրեց էմիլիան:

— Զգիտե, — պատասխանեցի ես, — բայց Ռայնգոլդը գիտե... Ես հենց նրա մոտից եմ գալիս, ինչ որ պետքն էր, նրան եմ ասել:

— Շատ վատ ես արել:

— Իսկ ինչո՞ւ:

— Որովհետև, — ասաց նա դժգոհ ու անվստահ տոնով, — որովհետև մեզ այդ փողը պետք էր բնակարանի պարտքերը մարելու համար... Իսկ մյուս կողմից էլ, դու ինքդ էիր ասում, որ կապած պայմանագրից հրաժարվել նշանակում է փակել ուրիշ աշխատանք ստանալու ճանապարհները... վատ ես արել, դու այդպիսի բան չպետք է անեիր:

Ես իմ հերթին նույնպես կատաղեցի.

— Դու քեզ հաշի՞վ ես տալիս, թե ինչ ես ասում, — բղավեցի ես, — դու չե՞ս հասկանում, որ ես գտնվում եմ անտանելի վիճակում... որ ես չեմ կարող փող ընդունել մի մարդու ձեռքից, ով... ով գայթակղել է իմ կնոջը:

Էմիլիան ոչինչ չպատասխանեց: Ես շարունակեցի.

— Ես այդ սցենարից հրաժարվեցի, որովհետև ներկա պայմաններում դա ինձ համար խայտառակություն էր... Բայց ես հրաժարվեցի նաև քեզ համար, քո պատճառով, որպեսզի դու նորից ինձ հավատաս... Չգիտեմ ինչու, դու այժմ ինձ համարում ես մի մարդ, որն ընդունակ է աշխատել նույնիսկ նման պայմաններում... Բայց դու սխալվում ես... ես այդ մարդը չեմ:

Ես տեսա, թե ինչպես նրա աչքերում փայլատակեց կատաղությունը: Նա ինձ ասաց.

— Եթե դու այդ արել ես քեզ համար, քո գործն է, ես չգիտեմ... Բայց եթե ինձ համար ես արել, ապա դու դեռ ժամանակ ունես որոշումդ փոխելու... Քո արածը շատ անմիտ և վնասակար բան է, հավատացնում եմ քեզ... դա քեզ միայն կվնասի, ուրիշ ոչինչ:

— Ի՞նչ ես ուզում դրանով ասել:

— Այն, ինչ արդեն ասացի. դա ոչ մի լավ բանի չի հանգեցնի:

Իմ քունքերը սառեցին, զգացի, որ գուցե գցում եմ:

— Այսի՞նքն:

— Սկզբից դու ասացիր, թե ի՞նչ օգուտ է արդյոք ինձ տալու քո աշխատանքից հրաժարվելը:

Ես զգացի, որ հասել է վերջնական բացատրության ընթացքին: Էմիլիան ինքն էր այդ ինձ առաջարկում: Եվ հանկարծ ինձ համակեց վախի զգացումը: Բայց, շնայած դրան, ես ասացի.

— Դու մի անգամ ասացիր... որ ինձ արհամարհում ես... դու այսպես ասացիր... Ես չգիտեմ, թե ինչո՞ւ ես արհամարհում... Բայց գիտեմ, որ արհամարհում են այն մարդկանց, ովքեր ամոթալի և արհամարհանքի արժանի ինչ-որ բան են անում... Հենց այդ սցենարի աշխատանքը հետայսու շարունակելն է, որ կարող է դիտվել որպես ամոթալի մի գործ...

և իմ այս որոշումը քեզ կապացուցի, որ ես այն մարդը չեմ, ինչպիսին դու ես կարծում... ուրիշ ոչինչ:

Նա ինձ պատասխանեց մի այնպիսի հաղթական ու գոհ տոնով, որ նշանակում էր. ահա թե ինչպես վերջ ի վերջո ես քեզ թակարդը գցեցի.

— Բայց չէ որ քո այդ որոշումը ինձ ոչինչ չի ապացուցի... և հենց դրա համար է, որ ես քեզ խորհուրդ եմ տալիս փոխես որոշումդ:

— Ինչպե՞ս թե ոչինչ չի ապացուցի,— ես նստեցի տեղս և շփոթահար, մեքենայորեն բռնեցի բազկաթոռի թևատեղին դրած նրա ձեռքը:— Էմիլիա, և այդ դո՞ւ ես ասում:

Նա կոպտորեն հետ քաշեց ձեռքը:

— Խնդրում եմ, ինձ հանգիստ թող... ավելին, խնդրում եմ ինձ ձեռք չտաս... ինձ հպվելու ոչ մի փորձ այլևս չանես... Ես քեզ չեմ սիրում և, կարծում եմ, որ երբեք այլևս հնարավոր էլ չի լինի քեզ սիրել:

Ես նույնպես ձեռքս հետ տարա և գրգռված ասացի.

— Շատ լավ, շխտենք սիրո մասին, թող այդպես լինի... արի խոսենք քո... քո արհամարհանքի մասին... Եթե ես նույնիսկ հրաժարվեմ էլ այդ սցենարից, դու դարձյա՞լ ինձ կշարունակես ատել:

Էմիլիան հանկարծ տեղից վեր ցատկեց, կարծես ամբողջովին համբերությունը կորցրած, և խստորեն ասաց.

— Այո, կշարունակեմ... և խնդրում եմ, սրանից հետո ինձ հանգիստ թողնես:

— Բայց ինչո՞ւ ես ասում:

— Որովհետև այդպիսին ես,— հանկարծ բղավեց նա,— որովհետև դու այդպիսին ես ստեղծված և ինչքան էլ ուզում է ճգնես, միևնույն է, չես կարող փոխվել:

— Ախր ինչպե՞ս եմ ստեղծված:

— Ինչպես ես ստեղծված, ես չգիտեմ, երևի դու ինքդ այդ կիմանաս... Ես միայն գիտեմ, որ դու տղամարդ չես: Եվ քեզ տղամարդու նման չես պահում:

Ինձ մի անգամ ևս ապշեցրեց նրա խոսքերում հնչող զգացմունքի իսկական անկեղծության և գրեթե սովորական, մաշված արտահայտության միջև եղած հակադրությունը:

— Իսկ ի՞նչ է նշանակում տղամարդ լինել,— զայրույթին

խառնված հեզնանքով հարցրի ես — Քեզ արդյոք չի՞ թվում,
որ դա պարզապես ոչինչ չի նշանակում:

— Դու շատ լավ գիտես ինչ է նշանակում:

Էմիլիան այժմ արդեն լուսամուտի մոտ էր և, մեջքով
շրջված իմ կողմը, հետո խոսում էր, առանց ինձ նայելու: Ես
գլուխս սեղմեցի ձեռքերիս մեջ և մի պահ հուսահատորեն
նրան նայեցի: Նա մեջքն ինձ է շրջել ոչ միայն ֆիզիկապես,
այլև, կարելի էր ասել, ամբողջ հոգով ու էությամբ: Նա կամ
չի ուզում բացատրվել, կամ գուցե, հանկարծ մտածեցի ես,
չգիտե, թե ինչպես են բացատրվում: Անկասկած, ինչ-որ
հիմք կար, որի պատճառով նա ինձ արհամարհում էր, բայց
թե այդ հիմքը այնքան ակնհայտ չէր, որ մարդ կարողանար
իսկույն մատը դնել վրան: Այդ պատճառով էլ նա գերադա-
սում է դեպի ինձ տածած իր արհամարհանքը բացատրել իմ
ունեցած բնածին սրիկայությամբ, որը պայմանավորված չէ
որևէ պատճառով, հետևապես և անուղղելի է: Ես հանկարծ
մտաբերեցի Ողիսեսի և Պենելոպեի միջև գոյություն ունեցող
հարաբերությունների Ռայնգոլդի մեկնաբանությունը և, կար-
ծես վայրկենապես լուսավորվելով, ինքս ինձ հարցրի.
«Իսկ եթե էմիլիան այն տպավորությունն է ունեցել, թե վեր-
ջին այդ ամիսների ընթացքում ես իմացել եմ, որ Բատտիս-
տան սիրահետում է իրեն և աշխատել եմ այդ հանգամանքը
օգտագործել հանուն իմ շահերի՞», այսինքն՝ ոչ թե ըմբոս-
տացել եմ դրա դեմ, այլ, ընդհակառակը, խրախուսել եմ Բատ-
տիստայի արարքները»: Այդ մտքի վրա քիչ մնաց շունչս
կտրվեր: Այժմ ես հիշում էի առանձին դեպքեր, որոնք կա-
րող էին նման կասկածներ առաջացնել էմիլիայի մեջ: Վերց-
նենք թեկուզ այն երեկոյի իմ ուշանալը, երբ մենք առաջին
անգամ էինք հանդիպել Բատտիստայի հետ: Ճիշտ է, դրա
պատճառը իմ վերցրած տաքսիի վթարն էր, բայց չէ որ էմի-
լիան դա կարող էր դիտել որպես մի պատրվակ, որը ես հնա-
րել եմ լուրջ նրա համար, որպեսզի իրեն մենակ թողնեմ
պրոդյուսերի հետ: Կարծես թե հաստատելով իմ այդ մտքերը,
էմիլիան, երեսը առանց իմ կողմը շրջելու, հանկարծ ասաց.

— Օրինակ, իսկական տղամարդը երեկ երեկոյան իրեն
այնպես չէր պահի, ինչպես դու պահեցիր՝ այդ բոլորը տես-
նելուց հետո... Մինչդեռ դու շատ հանգիստ եկար ինձ մոտ՝

իմ կարծիքը հարցնելու և այնպես ձևացրիր, իբր ոչինչ չես տեսել... Գու հույս ունեիր, որ, միևնույն է, ես քեզ խորհուրդ կտամ շարունակել սցենարի աշխատանքը... և ես քեզ տվի այն խորհուրդը, որը դու ցանկանում էիր, ու դու ընդունեցիր... Իսկ այսօր, երբ ով գիտե, թե ինչ տեղի ունեցավ քո և այդ գերմանացու միջև, դու գալիս ես ինձ մոտ և հայտարարում, որ այդ աշխատանքը մերժում ես հանուն ինձ, որովհետև ես քեզ արհամարհում եմ, իսկ դու չես ուզում, որ ես քեզ արհամարհեմ... Բայց հիմա արդեն ես քեզ լավ եմ ճանաչում, ու, թերևս, ոչ թե դու ինքդ ես հրաժարվել այդ աշխատանքից, այլ նա է քեզ ստիպել, որպեսզի հրաժարվես... Ինչպես էլ ուզում է եղած լինի, այժմ արդեն շափազանց ուշ է այդ մասին խոսելը... Ես քո մասին արդեն ունեմ իմ որոշակի կարծիքը, և եթե դու աշխարհի բոլոր սցենարներն էլ մերժես հանուն ինձ, միևնույն է, ես այդ կարծիքը չեմ փոխի... Այնպես որ պատմություններ մի ստեղծի... մի հրաժարվիր աշխատանքից և մեկընդմիջտ ինձ հանգիստ թող:

Այսպիսով, մենք նորից վերադարձանք մեր խոսակցության սկիզբը: Ես մտածեցի. էմիլիան ինձ արհամարհում է, բայց հրաժարվում է ասել այդ արհամարհանքի պատճառը: Ինձ համար խորապես նողկալի էր ասել, թե որն է այդ պատճառը, և ոչ միայն այն տեսակետից, որ այդ պատճառը նողկալի էր, այլև այն, որ այդ ասելով, ես, ինչպես ինձ թվում էր, ինչ-որ ձևով թույլ էի տալիս նրա հիմնավոր լինելը: Այնուամենայնիվ, ես ուզում էի ամեն ինչ պարզել մինչև վերջ, ուրիշ ելք չկար: Եվ որքան կարող էի հանգիստ ասացի.

— Էմիլիա, դու ինձ արհամարհում ես, սակայն չես ուզում ասել պատճառը... Գուցե դու ինքդ էլ այդ չգիտես... բայց ես պետք է իմանամ, որպեսզի բացատրեմ քեզ, թե դու որքան ես անիրավացի, ես պետք է իմանամ, որպեսզի կարողանամ արդարանալ... իսկ այժմ լսիր, թե ինչ եմ ասում. եթե ես ասեմ իմ հանդեպ ունեցած քո արհամարհանքի պատճառը, դու խո՞սք ես տալիս ինձ ասել՝ ես իրավացի՞ եմ, թե ոչ...

Էմիլիան, որ մինչև հիմա դեռ կանգնած էր լուսամուտի

մոտ և մեջքով շրջված էր իմ կողմը, մի պահ ոչինչ չասաց։
Իսկ փոքր-ինչ հետո հոգնած ու վրդովված վրա բերեց.

— Ոչ մի բան էլ ես քեզ չեմ խոստանում... օ՛Ֆ, հան-
գիստ թող ինձ:

— Պատճառն այս է,— ասացի ես դանդաղ, գրեթե
վանկ-վանկ արտասանելով յուրաքանչյուր բառը,— հենվելով
սխալ փաստերի վրա, դու պատկերացրել ես, որ ես... որ ես
իմացել եմ Բատտիստայի մասին, բայց, ելնելով իմ անձնա-
կան շահերից, գերադասել եմ կույր ձևանալ, և ավելին, ուղ-
ղակի փորձել եմ քեզ հրել նրա գիրկը... Ճի՞շտ է:

Ես աչքերս բարձրացնելով, նայեցի էմիլիային, որը դեռ
մեջքով դեպի ինձ էր կանգնած, և սպասեցի, թե նա ինչ պա-
տասխան կտա: Բայց պատասխան չեղավ. էմիլիան նայում էր
լուսամուտից այն կողմ և լռում: Հանկարծ ես զգացի, թե
ինչպես կարմրեցի մինչև ականջներս. ամոթի վայրկենական
գիտակցությունը համակեց ինձ, և ես ամաշեցի իմ ասածից:
Ես հասկացա, որ հենց լոկ իմ ասելու փաստը չի կարող էմի-
լիայի կողմից շմեկնաբանվել որպես իմ հանդեպ տածած նրա
արհամարհանքի ապացույց, մի բան, որից ես իսկապես էլ
երկյուղ էի կրում: Եվ անմիջապես հուսահատորեն վրա բերի.

— Եթե իսկապես այդպիսին է եղել քո պատկերացումը,
էմիլիա, ես կարող եմ երդվել, որ դու սխալվում ես... Ես եր-
բեք ոչինչ Բատտիստայի մասին մինչև երեկ երեկոյան,
էմիլիա, չեմ իմացել... Իհարկե, դու ազատ ես քո կարծիք-
ների մեջ, ինձ հավատալը կամ չհավատալը քո գործն է...
Բայց եթե ինձ չես հավատում, դա նշանակում է, որ դու ամեն
գնով ուզում ես ինձ արհամարհել, չես ուզում համոզվել, որ
դու անիրավացի ես, չես ուզում ինձ արդարանալու հնարա-
վորությունն տալ:

Այս անգամ ևս էմիլիան ոչինչ չպատասխանեց: Բայց ես
զգացի, որ նշանին եմ կպել. ըստ երևույթին, նա իսկապես
էլ չգիտեր, թե ինչու է ինձ արհամարհում, համենայն դեպս,
գերադասում էր շիմանալ և շարունակում էր ինձ սրիկա հա-
մարել հենց այնպես, առանց պատճառի, առանց հաշվի առ-
նելու իմ էությունը: Ես զգացի, որ ասածներս չհամոզեցին:
Բայց նաև մտածեցի, որ միշտ չէ, երբ անմեղությունը կարո-

դանում է համոզեցուցիչ լինել: Հուսահատության հասած և մղված այնպիսի մի պատճառից, որն ավելի ուժեղ է, քան ինքը բանականությունը, ես խոսքերից Ֆիզիկական փատարկներին անցնելու անհրաժեշտությունը զգացի: Վեր կացա, մոտեցա էմիլիային, որը դեռ լուսամուտի մոտ ուղիղ կանգնած դուրս էր նայում և, բռնելով նրա թևը, ասացի.

— էմիլիա, ինչո՞ւ ես դու այդքան ինձ ատում... ինչո՞ւ ոչ մի բոպե այդ մասին չես մոռանում:

Ես նկատեցի, որ նա երեսը մի կողմ է շրջում, կարծես ցանկանալով թաքցնել ինձանից, բայց չէր ընդդիմանում, երբ թևը սեղմում էի, իսկ երբ ազդրով կպա նրա ազդրին, նա բոլորովին հետ չքաշվեց: Այդ ժամանակ, սիրտ անելով, ես գրկեցի նրա մեջքը: Վերջապես էմիլիան երեսով շրջվեց իմ կողմը, և ես տեսա, որ նրա երեսը ողողված է արցունքներով:

— Ես երբեք այդ քեզ չեմ ների,— ճշաց նա,— երբեք չեմ ների այն, որ դու կործանեցիր իմ սերը... Ես քեզ այնպե՛ս էի սիրում... Ոչ ոքի, բացի քեզանից, ես չեմ սիրել և այլևս չեմ էլ սիրի... Իսկ դու քո բնավորությամբ ամեն ինչ կործանեցիր... Մենք այնքա՛ն երջանիկ կարող էինք լինել միասին... Մինչդեռ ամեն ինչ հիմա դարձավ անհնարին... Ինչպե՞ս ես ուզում, որ ես մոռանամ այդ... Ես ինչպե՞ս կարող եմ չվրդովվել քեզ վրա:

Հանկարծ իմ մեջ ծնվեց մի հույս. այդ բոլորից հետո էմիլիան ասաց, որ ինձ սիրել է, որ սիրել է միայն ու միայն ինձ:

— Ինձ լսիր,— ասացի ես, քաշելով նրան դեպի ինձ,— հիմա դու կգնաս ճամպրուկները կհավաքես, կկապես և մենք վաղն առավոտյան կմեկնենք... Իսկ Հոռմում ես քեզ ամեն ինչ կբացատրեմ... Եվ հավատացած եմ, որ դու կհամոզվես:

Այս անգամ գրեթե կատաղի մի ուժով նա դուրս պրծավ իմ ձեռքերից:

— Ես չեմ գալիս,— բղավեց նա,— ի՞նչ եմ անելու Հոռմում... Հոռմում ես տանից հեռանալու եմ... և քանի որ մայրս չի ուզում, որ իր մոտ վերադառնամ, ապա ստիպված եմ լինելու ապրել վարձու սենյակում և նորից աշխատել

որպես մեքենագրուհի: Ոչ, ես ոչ մի տեղ էլ չեմ գնա... Ես մնում եմ այստեղ... Ինքդ գնա, եթե այդքան ուզում ես... Ես մնում եմ այստեղ... Բատտիստան ինձ ասաց, որ կարող եմ մնալ ինչքան սիրտս ուզում է... Ես մնում եմ այստեղ: Ես նույնպես կատաղեցի:

— Դու կմեկնես ինձ հետ... վաղն առավոտյան:

— Խեղճ մարդ, դու սխալվում ես, ես մնում եմ այստեղ:

— Այն դեպքում ես նույնպես մնում եմ... և այնպես կանեմ, որ Բատտիստան մեր երկուսին էլ դուրս վճնդի:

— Ոչ, դու այդ չես անի:

— Այո, կանեմ:

Հմիլիան մի պահ նայեց ինձ, ապա առանց որևէ խոսք արտասանելու դուրս գնաց հյուրասրահից: Հետո լավեց նրա սենյակի դռան ուժգին շրխկոցն ու բանալու պտույտի ձայնը:

Գլուխ քսանմեկերորդ

Եվ ահա այդպես, զայրույթի բոլորին արած իմ հայտարարութեամբ ես կապանք դրի ինքս ինձ վրա. «Ես կմնամ այստեղ»: Փաստորեն, ինչպես այդ հասկացա Հմիլիանի դուրս գնալուց անմիջապես հետո, ես չէի էլ կարող այլևս մնալ այդտեղ. միակ մարդը, որը պետք է անպայման հեռանար այդտեղից, դա հենց ես էի: Ռայնգոլդի հետ արդեն խզել էի իմ հարաբերությունները, այդ նույնը արել էի նաև Բատտիստայի հետ, իսկ այժմ էլ, ամենայն հավանականութեամբ, պետք է խզվեին իմ և Հմիլիանի միջև եղած հարաբերությունները: Մի խոսքով, ես լրիվ ավելորդ էի, և միակ բանը, որ ինձ մնում էր, դա իմ այստեղից հեռանալն էր: Բայց բղավելով Հմիլիանի վրա, ես ասացի, որ ինքս նույնպես կմնամ: Եվ իսկապես էլ, ոչ այն է դեռ շմարած վերջին հույսի պատճառով, ոչ այն է շար դիտավորությունից դրդված, ես զգում էի, որ ուզում եմ մնալ: Ուրիշ պայմաններում իմ այդ դրությունը, կարող էր նույնիսկ ծիծաղելի թվալ, բայց իմ այն ժամանակվա հուսահատական հոգեվիճակի պայմաններում դա պարզապես ծանր էր և անտանե-

լի: Ես նման էի այն ալպինիստին, որը վեր մագլցելու ժամանակ հասնելով անսահման վտանգավոր մի կետի, հանկարծ գիտակցում է, որ դա մի տեղ է, որտեղ նա ոչ կարող է կանգ առնել, ոչ շարժվել առաջ և ոչ էլ վերադառնալ դեպի հետ: Փոթորկված վայրկենական հուզմունքից, ես սկսեցի հյուրասրահում հետուառաջ քայլել, ինքս ինձ հարցնելով, թե ինչ եմ անում արդյոք: Ես հասկանում էի, որ այդ երեկո էմիլիայի և Բատտիստայի հետ շէի կարող սեղան նստել ու ձևացնել, թե իբրև ոչինչ չի եղել: Մի րոպե մտածեցի, որ գուցե գնամ Կասլրի ընթրելու և այնտեղից վերադառնամ ուշ երեկոյան: Սակայն այդ օրը շորս անգամ այդ նույն ճանապարհով, այրող արևի տակ, ամառանոցից քաղաք էի վազել ու վերադարձել և այժմ ինձ այնքան էի հոգնած զգում, որ այդ բոլորը նորից կատարելու ոչ մի ցանկություն չունեի: Նայեցի ժամացույցին, արդեն վեցն էր: Մինչև ընթրիք ամբողջ երկու ժամ ժամանակ կար: Ի՞նչ անել: Վերջապես որոշեցի. գնացի իմ սենյակը և դուռը կողպեցի ներսից:

Ես ծածկեցի փակոցափեղկերը և մութ խավարում փովեցի մահճակալիս: Իսկապես էլ, հոգնած էի, և հազիվ էի պառկել, երբ զգացի, որ անդամներս բնազդով ինչ-որ հարմար դիրք են փնտրում քնելու համար: Այդ րոպեին ես շնորհակալ էի իմ մարմնից, որն ավելի իմաստուն էր, քան միտքս, և, առանց ճիգեր գործադրելու, համր մի պատասխան տվեց ինձ այնքան տանջող «ի՞նչ անել» հարցին: Փոքրինչ հետո ես արդեն սուզված էի խոր քնի մեջ:

Ես քնեցի բավական երկար և առանց երազներ տեսնելու: Իսկ երբ արթնացա, սենյակում արդեն լրիվ մութ էր: Ինձ թվաց, որ ուշ գիշեր է: Ես տեղիցս ելա, մոտեցա լուսամուտին և լայնորեն բացեցի նրա փեղկերը. իսկապես էլ, բավական ուշ երեկո էր: Ես վառեցի լույսը, նայեցի ժամացույցին, արդեն ժամը իննն էր: Երեք ժամ քնել էի: Ընթրիքը, որքան գիտեի, լինում էր ժամը ութին կամ ամենաուշը ութնանց կեսին: Նորից իմ մտքի մեջ բարձրացավ նույն հարցը. «ի՞նչ անել»: Սակայն այս անգամ ես արդեն ինչպես պետքն էր հանգստացել էի, որի պատճառով էլ իսկույն գտնվեց նրա համարձակ ու պարզ պատասխանը. «Ես գտնվում եմ ամառանոցում և մարդկանցից թաքնվելու ոչ մի հիմք չու-

ներմ: Հիմա կգնամ, կներկայանամ ընթրիքի սեղանին, և թող լինի, ինչ ուզում է»: Ես իմ մեջ նույնիսկ մարտական տրամադրություն էի զգում և պատրաստ էի ոչ միայն Բատտիստայի հետ սպասվելիք ընդհարման ժամանակ դիմադրել նրան, այլև այնպես անել, ինչպես և սպառնացել էի էմիլիային, որ նա մեր երկուսին էլ՝ էմիլիային և ինձ, դուրս վռնդի իր ամառանոցից: Ես արագ-արագ ինձ կարգի բերի և դուրս եկա սենյակից:

Բայց հյուրասենյակում լրիվ ամայություն էր, թեև ամենօրյա սեղանը գտնվում էր սովորական անկյունում, որի վրա, ինչպես նկատեցի, դրված էր միայն մի հոգու ընթրիք: Հենց այդ նույն րոպեին ներս մտավ աղախինը և, կարծես հաստատելով իմ կասկածանքները, հայտարարեց, որ Բատտիստան ու էմիլիան գնացել են Կապրիում ընթրելու: Եթե ես ցանկություն ունեմ, կարող եմ ինքս էլ հետևել նրանց, որոնք լինելու են Բելլավիատա ռեստորանում: Իսկ եթե ոչ, կարող եմ ընթրել այստեղ, ընթրիքը արդեն կես ժամ է, ինչ պատրաստ է:

Ես կռահեցի, որ էմիլիայի ու Բատտիստայի առաջ ևս կանգնած է եղել նույն հարցը. «Ի՞նչ անել»: Եվ նրանք դա լուծել են վերին աստիճանի հեշտ. հեռացել են տնից, թողնելով ինձ դաշտի տերն ու տնօրենը: Սակայն այս անգամ ես չունեցա ոչ խանդի, ոչ վիրավորանքի և ոչ էլ հիասթափության զգացում: Ընդհակառակը, տխրությամբ մտածեցի, որ նրանք արել են այն միակ բանը, ինչ կարող էին անել, որ ես դեռ շնորհակալ պետք է լինեմ նրանցից՝ տհաճ հանդիպումից խուսափելու համար: Ես հասկացա նաև այն, որ դատարկության ու բացակայության այդ տակտիկայի նպատակը ինձ այդտեղից հեռացնելն էր. և եթե նրանք այդ տակտիկան կիրառեին հետևողականորեն նաև հետագա օրերի ընթացքում, ապա որոշակիորեն կհասնեին իրենց նպատակին: Բայց դա ապագային վերաբերող բան էր, որի մասին չեմ ոչինչ որոշակի ասել չէր կարելի: Ես աղախինն ասացի, որ ինձ համար ընթրիք բերի և նստեցի սեղանի մոտ:

Կերա շատ քիչ և դժկամությամբ: Ես ափսեի մեջ դարսած խոզապուխտից ընդամենը մի փոքրիկ կտորի համը տեսա և մի փոքրիկ կտոր էլ վերցրի այն ձկից, որ էմիլիան առնել

էր տվել երեքիս համար: Իմ ընթրիքը տեեց ընդամենը մի քանի րոպե: Հետո աղախնին ասացի, որ կարող է գնալ քնելու, քանի որ այլևս նրա ներկա գտնվելու անհրաժեշտությունը չկա, իսկ ինքս էլ դուրս եկա պատշգամբ: Պատշգամբի անկյուններից մեկում մի քանի բազկաթոռներ կային դրած: Ես վերցրի նրանցից մեկը, բացեցի և, դնելով բազրիքի մոտ, նստեցի երեսով դեպի ծովը, որը, մթությանը ձուլված, բոլորովին շէր երևում:

Երբ Ռայնգոլդի հետ հանդիպումս վերջացրած արդեն ամառանոց էի վերադառնում, ինքս ինձ խոսք տվի, որ էմիլիայի հետ զրուցելուց հետո կսկսեմ հանգիստ կերպով ամեն ինչի մասին մտածել: Այդ ժամանակ ես գիտակցում էի, որ դեռ չգիտեմ, թե ինչ պատճառով է էմիլիան դադարել ինձ սիրելուց: Բայց երբեք մտքովս չէր անցնում, թե նույնիսկ այդ բացատրությունից հետո էլ ինձ հայտնի չի լինելու այդ պատճառը: Ընդհակառակը, չգիտեմ ինչու, վստահ էի, որ դա պարզություն կտա այն ամենին, ինչ մինչև հիմա սքողված է եղել անհայտության սոսկալի խավարով: Այնպիսի մի պարզություն, որ ես կբացականչեմ. «Եվ եղած-չեղածը դա՞ է... և այդպիսի մի շնչին քանի համար դու այլևս ինձ չե՞ս սիրում»:

Սակայն տեղի ունեցավ այն, ինչ ես չէի սպասում. բացատրությունը եղավ կամ, համենայն դեպս, եղավ բացատրության նման մի այնպիսի բան, որ հնարավոր էր էմիլիայի և իմ միջև և, այնուամենայնիվ, ես այդ մասին ինչպես առաջ, այնպես էլ հիմա գիտեի: Դեռ ավելի վատ: Ես եկա այն եզրակացության, որ էմիլիայի իմ նկատմամբ տածած արհամարհանքի պատճառը կարելի է որոշել միայն մեր միջև եղած նախկին հարաբերությունը վերլուծելու միջոցով: Բայց նա այդ լսել անգամ չէր ուզում. փաստորեն նա ցանկանում էր շարունակել իմ հանդեպ ունեցած իր առանց պատճառի արհամարհանքը, զրկելով ինձ արդարանալու ամեն մի հնարավորությունից և խանգարելով վերադարձնել իր իսկ սերն ու հարգանքը:

Մի խոսքով, ես հասկացա, որ էմիլիայի մեջ արհամարհանքի զգացումը առաջ էր եկել շատ ավելի շուտ, քան իմ վերաբերմունքը կարող էր որևէ իրական կամ երևակայական

հիմք տալ: Այդ արհամարհանքը ծնունդ էր առել առանց որևէ էական պատճառի, մեր բնավորությունների շփումից ու տևական գոյակցությունից: Բնավորություններ, որոնք չէին ստուգվել, ինչպես փորձաքարի միջոցով ստուգում են ազնիվ մետաղի մաքրության չափը: Եվ իսկապես էլ, երբ համարձակություն ունեցա երթադրելու, որ նրա արհամարհանքը ծնունդ է առել Բատտիստայի հանդեպ ունեցած իմ վերաբերմունքի սխալ գնահատությունից, էմիլիան ոչ ընդունեց և ոչ էլ մերժեց այդ, այլ պարզապես լռության մատնեց: Ինչպես երևում է, անսպասելի վշտացած մտածեցի ես, էմիլիան իսկապես էլ այն կարծիքին է, որ ես ամեն ինչի ընդունակ եմ: Նա ինձ ոչինչ չհարցրեց, որպեսզի իմ ենթադրական պատասխանները էլ ավելի շուժեղացնեն իր արհամարհանքի զգացումը: Այլ խոսքերով ասած, դեպի ինձ ունեցած վերաբերմունքով էմիլիան ելնում էր իմ բնավորության գնահատությունից, առանց հաշվի առնելու իմ գործողությունները: Դրանք, դժբախտաբար, միայն հաստատում էին նրա այդ գնահատությունը: Բայց առանց այդ էլ նա, ամենայն հավանականությամբ, ինձ կվերաբերվեր նույն ձևով: Եվ իսկապես, ինձ համար որպես ապացույց, եթե իրոք դրա անհրաժեշտությունն ունի, կարող էր ծառայել էմիլիայի մի տեսակ անբացատրելի և տարօրինակ վերաբերմունքը: Նա կարող էր ինձ հետ մտերիմ ու մինչև վերջը անկեղծ զրույցի միջոցով ցրել այն դաժան թյուրիմացությունը, որին զարնվել ու փշրվել էր մեր սերը: Բայց նա այդ չէր անում և չէր անում այն պատճառով, որ, ինչպես քիչ փոքր բղավելով ասացի, չէր ուզում ճշմարտությունն իմանալ, ուզում էր նույն ձևով շարունակել իր արհամարհանքը:

Մինչև այդ ես դեռ փոված էի բազկաթոռի մեջ: Բայց մըտքերս այնպես սկսեցին ինձ հուզել, որ գրեթե մեքենայաբար տեղիցս ելա և հենվեցի պատշգամբի բազրիքին: Նայելով գիշերային խավարին և վայելելով նրա անդորրը, ես ըստ երեվույթին ուզում էի հանգստացնել ինձ: Բայց երբ այրվող երեսս բարձրացրի ծովից փշող մեղմ ու սառը հովի կողմը, իսկույն մտածեցի, որ արժանի չեմ այդպիսի թեթևության: Ես հասկացա, որ արհամարհվող մարդը ոչ կարող է և ոչ էլ պետք է հանգստություն գտնի այնքան ժամանակ, որքան

շարունակվում է այդ արհամարհանքը: Ինչպես մեղավորը
 ահեղ դատաստանի ժամանակ, նա, իհարկե, կարող է բա-
 ցականչել. «Լեռներ, ծածկեցեք ինձ, ծովեր, սուզեք ինձ ձեր
 հատակը»: Սակայն արհամարհանքը գնում է նրա հետևից,
 որտեղ էլ ուզում է նա թաքնված լինի, քանի որ նա արդեն
 մտել է մարդու հոգու մեջ և մարդու հետ էլ լինում է ամենու-
 րեք:

Ես նորից ինձ գցեցի բազկաթոռին և դողդողացող ձեռքով
 մի սիգարետ վառեցի: «Բայց և այնպես, արժանի՞ եմ ես
 արդյոք արհամարհանքի, թե ոչ, — մտածեցի ես և համոզված
 որոշեցի, որ արժանի չեմ, — չէ՞ որ, վերջին հաշվով, իմ
 խելքը մնում էր ինձ հետ: Դա նույնիսկ էմիլիան չի ժրխ-
 տում: Ես իմ խելքով կարող եմ հպարտանալ, դա միակ բանն
 էր, որով արդարանում էր իմ գոյությունը: Ուրեմն, ես պետք
 է մտածեի, անկախ նրանից, թե ինչն է իմ մտածմունքի
 առարկան: Ես պարտավոր էի արիաբար ի ցույց դնել իմ
 մտավոր կարողությունների ուժը, անկախ նրանից, թե ինչ
 գաղտնիք է գտնվում իմ առաջ: Եթե դադարեմ մտածելուց,
 ինձ մոտ կմնա միայն սոսկալի այն զգացումը, որ ես իս-
 կապես էլ արժանի եմ արհամարհանքի, թեև դրա պատճառը
 անհայտ է»:

Եվ ահա համառությամբ ու պայծառ մտքով սկսեցի
 խորհել: Ինչը, ուրեմն, կարող էր լինել իմ հանդեպ եղած
 արհամարհանքի պատճառը: Ես իսկույն մտաբերեցի Ռայն-
 գուլդի այն խոսքերը, որոնցով նա, ինքն այդ շնկատելով,
 բնորոշեց էմիլիայի հանդեպ ունեցած իմ դիրքը, մտածելով,
 որ այդ ասում է Ոդիսևսի և Պենելոպեի մասին... «Ոդիսևսը
 քաղաքակիրթ մարդ է, իսկ Պենելոպեն՝ պրիմիտիվ հասկա-
 ցողությունների տեր կին»: Մի խոսքով, Ռայնգուլդը, ինքն
 այդ շկամենալով, «Ոդիսականի» իր տարօրինակ մեկնաբա-
 նությամբ այն ժամանակ որոշակի ճգնաժամ առաջացրեց
 էմիլիայի հետ ունեցած իմ հարաբերությունների մեջ, իսկ
 այժմ, այդ նույն մեկնաբանությամբ, որը մի քիչ Աքիլլեսի
 սկզբում խոցող, ապա իր իսկ հասցրած վերքը բուժող գե-
 ղարդն էր հիշեցնում, աշխատում էր ինձ մխիթարել, անվա-
 նելով «քաղաքակիրթված» և ոչ թե «բարբարոս»: Ես հասկա-
 նում էի, որ դա կարող էր բավական լուրջ մխիթարանք լի-

նել, եթե միայն ընդունեի այդ: Փաստորեն ես հենց այն քաղաքակիրթ մարդն էի, որն, ընկնելով այնպիսի պրիմիտիվ իրադրության մեջ, որտեղ նրա պատիվն են ոտնահարում, հրաժարվում է դանակի օգնությանը դիմելուց: Քաղաքակիրթ մարդը մտածում է նույնիսկ այն ժամանակ, երբ կանգնած է լինում սրբության կամ սրբություն համարվող հասկացությունից առաջ: Բայց հաղիվ էի այդ մտածել, երբ իսկույն նկատեցի, որ նման, այսպես ասած, պատմական բացատրությունը չէր կարող բավարարել ինձ: Ես ամենեին համոզված չէի, որ իմ և էմիլիայի միջև եղած հարաբերությունները իսկապես նման են ռեժիսորի հնարած Ողիսևսի և Պենելոպեի հարաբերություններին: Այդպիսի փաստարկները պատմության բնագավառում արժեքավոր են, բայց ոչինչ նշանակել չեն կարող մարդկային գիտակցության խիստ մտերիմ և անձնական բնագավառի համար, որը չի գտնվում ոչ ժամանակի և ոչ էլ տարածության մեջ: Այդտեղ օրենքների թելադրողը միայն մեր մեջ գտնվող դեմ է:

Սակայն ի՞նչն է, այնուամենայնիվ, պատճառը, որ էմիլիան դադարեց ինձ սիրելուց, որ նա սկսեց ինձ արհամարհել: Եվ ամենից առաջ ի՞նչ անհրաժեշտությունից դրդված է, որ նա արհամարհում է ինձ: Ես հանկարծ հիշեցի էմիլիայի այն արտահայտությունը, երբ նա ասաց. «Որովհետև դու տղամարդ չես»: Ես հիշեցի, թե ինչպես ինձ խոցեց այդ մաշված արտահայտության և նրա արտաբերելու անկեղծ անմիջականության միջև եղած հակադրությունը: Ես մտածեցի, որ գուցե հենց այդ արտահայտության մեջ է էմիլիայի իմ հանդեպ ունեցած վերաբերմունքի բանալին: Եվ իսկապես էլ, այդ արտահայտության մեջ ազոտ արտացոլվում էր այն տղամարդու իդեալական կերպարը, որը էմիլիայի համար, իր իսկ խոսքերով ասած, իսկական տղամարդ էր, մի տղամարդ, որին, նրա կարծիքով, ես ոչ նման էի և ոչ էլ կարող էի նմանվել: Սակայն մյուս կողմից էլ, այդ արտահայտությունը իր մաշվածությամբ ենթադրել էր տալիս, որ իդեալական կերպարը էմիլիայի մոտ ստեղծվել է ոչ թե մարդու արժանիքները գիտակցորեն գնահատելու շնորհիվ, այլ այն միջավայրի պայմանականությունների ազդեցության տակ, որտեղ ինքը ապրել էր: Իսկ այդ միջավայրի մարդկանց

համար իսկական տղամարդը հենց ինքը Բատտիստան էր, որ կար, Բատտիստան իր անասնական ուժով և կյանքում հաջողակ լինելու իր ունակութուններով: Դրա իրոք այդպես լինելու ապացույցը էմիլիայի գրեթե հմայված այն հայացքն էր, որը նա նախորդ օրը սեղանի շուրջը նստած հաճախ գցում էր Բատտիստայի վրա, և այն, որ էմիլիան վերջ ի վերջո զիջեց Բատտիստայի ցանկութուններին, եթե անգամ այդ զիջումը տեղի ունեցավ հուսաբեկության պայմաններում: Կարճ ասած, էմիլիան ինձ արհամարհում էր և ուզում էր արհամարհել այն պատճառով, որ շնայած իր անմիջականությանն ու պարզությանը կամ, ավելի լավ կլինի ասել, հենց այդ անմիջականության ու պարզության հետևանքով, նա ամբողջովին թաղվել էր Բատտիստայի միջավայրին հատուկ ավանդական պատկերացումների մեջ: Դրանց էր վերաբերում նաև այն պատկերացումը, որ աղքատ մարդը չի կարող ապրել հարուստ մարդուց անկախ կամ, այլ խոսքերով ասած, չի կարող մարդ լինել: Ես որոշակի շփտեի, թե էմիլիան իսկապես՞ է արդյոք ինձ կասկածում Բատտիստայի նկրտումները խրախուսելու մեջ: Եթե դա իրոք այդպես էր, ապա նա, ամենայն հավանականությամբ, մտածում էր. «Ռիկկարդոն կախված է Բատտիստայից, նրան վճարողը Բատտիստան է, հաջորդ աշխատանքը նա հույս ունի ստանալ Բատտիստայից, Բատտիստան ինձ սիրահետում է, ուրեմն, Ռիկկարդոն ինձ հուշում է, որպեսզի ես Բատտիստայի սիրուհին դառնամ»:

Ես ապշեցի, թե ինչպես առաջ այդ մասին չէի մտածել: Իսկապես էլ շատ տարօրինակ էր, որ հենց ինքս «Ողիսականին» տված Բատտիստայի և Ռայնգոլդի այդ մեկնաբանությունների մեջ այնքան պարզորոշ տեսնելով երկու տարբեր աշխարհըմբռնում, ինձ հաշիվ չտվի, որ էմիլիան, կազմելով իմ մասին իրականութունից այնքան հեռու իր պատկերացումը, փաստորեն նույնն էր անում, ինչ որ անում էին պրոդյուսերն ու ռեժիսորը: Այստեղ միակ տարբերությունն այն էր, որ Ռայնգոլդն ու Բատտիստան նկատի ունեին Ողիսականին և Պենելոպեին, երկու երևակայական կերպարների, իսկ էմիլիան թույլ էր տալիս այդ ամոթալի երազը երկու իրական և կենդանի մարդկանց միջև, իր և իմ միջև: Այդպիսով, էմիլիայի բարոյական անկեղծության ու շփտակցված գոեհու-

թյան խառնուրդը նրա մեջ ծնել էր մի միտք, որը, ճիշտ է, թեև ինքը չէր ընդունում, բայց և չէր հերքում: Այդ միտքն այն էր, որ իբր ես նրան մղում եմ Բատտիստայի գիրկը:

«Մի րոպե ենթադրենք,— ասացի ես ինձ,— որ էմիլիան պետք է ընտրություն կատարի «Ողիսականին» տված Ռայնգոլդի, Բատտիստայի և իմ մեկնաբանությունների միջև: Նա, իհարկե, կհասկանա զուտ առևտրական բնույթի այն մոտիվները, որոնցից ելնելով, Բատտիստան պահանջում է, որպեսզի «Ողիսականը» դառնա միայն տեսարանային ֆիլմ: Նա կարող է նաև հավանություն տալ Ռայնգոլդի մտահայեցողական և հոգեբանական կոնցեպցիային: Սակայն կասկածից վեր է, որ իր ամբողջ բանականությամբ ու անմիջականությամբ հանդերձ նա ի վիճակի չի լինի բարձրանալու մինչև իմ տված մեկնաբանության մակարդակը կամ, ավելի ճիշտ կլինի ասել, մինչև Հոմերոսի և Դանտեի տեսակետը: Նա ի վիճակի չի լինի այդ անելու ոչ միայն այն պատճառով, որ կրթություն չունի, այլև այն, որ չի ապրում իդեալականի աշխարհում, որ նրա ապրած աշխարհը այդ բատտիստանների և ռայնգոլդների իրական աշխարհն է»: Այդպես էր շրջագիծը փակվում: էմիլիան իմ երազանքների կինն էր, բայց միևնույն ժամանակ նա մի կին էր, որը, հիմք ընդունելով ինչ-որ ողորմելի պատկերացումներ, դատապարտում էր ինձ և արհամարհում: Նա մի կողմից Պենելոպեն էր, որը տասը երկար տարիներ հավատարիմ է մնում իր բացակա ամուսնուն, մյուս կողմից մեքենագրուհին, որը շահախնդրություն էր կասկածում այնտեղ, որտեղ նա ամենևին չկար: Որպեսզի ես ունենամ այն էմիլիային, որին սիրում եմ, իսկ նա ինձ համարի այն Ռիկկարդոն, ինչպիսին իրականում կամ, ես պետք է նրան դուրս բերեի այն աշխարհից, որտեղ նա ապրում էր և տանեի մի պարզ ու մաքուր աշխարհ, ինչպիսին նա ինքն էր, մի աշխարհ, որտեղ դրամը չի շխի մարդու վրա, և լեզուն մնացած լինի անեղծ ու անապական. մի աշխարհ, որին, ինչպես Ռայնգոլդն էր ասում, ես կարող էի ձգտել, սակայն, որը իրականում գոյություն չուներ:

Բայց շնայած այդ ամենին, ես պետք է շարունակեի ապրել, այսինքն՝ պետք է պահպանեի գոյությունս և գործեի հենց այդ նույն Բատտիստայի և Ռայնգոլդի աշխարհում: Ինչ

պետք է անեի՞: Նախ և առաջ պետք է ազատվեի ոչ-լիար-
ժեքության այն տանջալից զգացումից, որն իմ մեջ ծնունդ
էր առել այն անիմաստ ու անհեթեթ ենթադրությունից, թե
իբր ես ի բնե արհամարհելի մարդ եմ: Որովհետև, ինչպես
նշեցի, հենց այդ միտքն էր, որ հիմնականում զգացվում էր
էմիլիայի դեպի ինձ ունեցած վերաբերմունքի մեջ. ինձ վե-
րագրվող բնածին ստորության միտքը, ստորությունը, որը
պայմանավորվում էր ոչ թե իմ գործողություններով, այլ իմ
էությունս: Ես համոզված էի, որ ոչ ոք հենց այնպես չի կարող
համարվել արհամարհված, անկախ նրանից, թե ինչ է անում
և ինչպես է վերաբերվում ուրիշներին: Սակայն իմ ոչ-լիար-
ժեքության զգացումից ազատվելու համար ես պետք է այդ
համոզելի նաև էմիլիային:

Ես վերհիշեցի Ողիսևսի կերպարի երեք տեսակ մեկնա-
բանությունները, որոնց մեջ տեսնում էի գոյության երեք
հնարավոր ձևեր: Դա Բատտիստայի պատկերած կերպարն
էր, Ռայնգոլդի ստեղծած կերպարը և, վերջապես, իմ առա-
ջարկածը, որը ես համարում էի միակ ճշմարիտը և, փաստո-
րեն, հենց այն կերպարը, ինչպիսին ինքը Հոմերոսն է ներ-
կայացրել: Ինչո՞ւ Բատտիստան, Ռայնգոլդը և ես այդքան
տարբեր էինք պատկերացնում Ողիսևսի կերպարը: Այն պարզ
պատճառով, որ մեր վարած կյանքը, մեր ունեցած իդեալնե-
րը բոլորովին տարբեր էին: Բատտիստայի ստեղծած կերպա-
րում, որը խիստ մակերեսային էր, գոեհիկ, հոետորական և
անբովանդակ, արտացոլվում էին պրոդյուսների իդեալները
կամ, ավելի ճիշտ կլինի ասել, նրա շահերը: Ավելի իրական
էր, թեև շափազանց սեղմած ու ճապաղեցրած, Ռայնգոլդի
պատկերած կերպարը, որը համապատասխանում էր այդ ու-
ժիտորի բարոյական ու ստեղծագործական շափանիշներին:
Եվ, վերջապես, իմ ներկայացրած կերպարը, որը, առանց
կասկածի, ամենավսեմ ու ամենաիրական, ամենապոետա-
կան և միևնույն ժամանակ ամենաճշմարիտ կերպարն էր,
որը ծնունդ էր առել դեպի կյանքն ունեցած իմ, թող որ ան-
զոր, բայց և անկեղծ ձգտումներից, կյանք, որին դրամը ոչ
ապականել էր և ոչ էլ զրկել բովանդակությունից, իջեցնելով
ու հասցնելով նրա էությունը լոկ ֆիզիոլոգիական ու նյութա-
կան գոյության աստիճանին: Որոշ իմաստով ինձ սփոփեց

այն հանգամանքը, որ իմ պատկերացրած կերպարը եղածների մեջ լավագույնն էր: Ես պետք է այդ կերպարին նմանվեմ, եթե անգամ ինձ շհաջողվեց հաղթանակով պսակել նրան սցենարի մեջ, եթե անգամ կյանքում նրան մարմնավորելը անհնարին է: Ես միայն այդ ձևով կարող եմ ապացուցել էմիլիային իմ իրավացի լինելը, միայն այդ ձևով կարող եմ նորից նվաճել նրա սերն ու հարգանքը: Բայց ինչպե՞ս այդ անել: Ես միայն մի հնարավոր միջոց էի տեսնում՝ էմիլիային սիրել է՛լ ավելի շատ, անվերջ և ամեն պատեհ առիթով, երբ այդ անհրաժեշտ է, ապացուցել նրան իմ սիրո մաքրութունն ու անշահախնդրութունը:

Այնուամենայնիվ, ես մտածեցի, որ առայժմ դեռ էմիլիային հարկադրելու կարիք չկա: Կմնամ մինչև վաղը և օրվա երկրորդ կեսի շոգենավով կմեկնեմ, առանց նրան տեսնելու կամ խոսելու որևէ փորձ անելու: Հետո Հոռմից կգրեմ մի շատ երկար նամակ, որի մեջ կասեմ ու կբացատրեմ այն ամենը, ինչ ի վիճակի չեղա ասելու այստեղ՝ մեր խոսակցության ժամանակ:

Այդ ըոպեին ականջիս հասան ինչ-որ խոսակցության ձայներ, որոնք գալիս էին դեպի պատշգամբ բերող փոքրիկ ճանապարհից: Ես իսկույն ճանաչեցի էմիլիայի և Բատտիստայի ձայները: Հետո անմիջապես ներս գնացի և, մտնելով սենյակս, փակվեցի ու մնացի այնտեղ: Բայց քունս չէր տանում: Ինձ թվում էր, թե ես սոսկալի տանջվում եմ այդ հեղձուկ սենյակում փակված, զգալով, որ նրանք ազատ զրուցում են և զբոսնում ամառանոցում՝ իմ շուրջը: Ես տառապում էի անքնությամբ, հատկապես վերջին ժամանակներս, այդ պատճառով էլ Հոռմից հետո վերցրել էի շատ ուժեղ և վայրկենապես ներգործող քնաբեր դեղ: Ընդունելով այդ դեղից կրկնակի դոզա, ես, զայրույթով լցված, առանց շորերս հանելու, փովեցի մահճակալին: Գրեթե անմիջապես քունս տարավ, ընդամենը մի քանի ըոպե միայն կարողացա լսել Բատտիստայի և էմիլիայի խոսակցության ձայները:

Գլուխ քսաներկուերորդ

Ես արթնացա բավական ուշ, համենայն դեպս այդպես կարելի էր դատել փակոցափեղկի ճեղքերից ներս թափանցող արևի շողերից: Որոշ ժամանակ սկսեցի ականջ դնել այն խորին լուռությանը, որն այնքան տարբերվում էր քաղաքայինից, ուր ինչքան էլ ուզում է կատարյալ լինի անդորրը, դարձյալ թվում է, թե լուռությունը ինչ-որ ձևով դեռ պահպանում է արդեն ահագած աղմուկի բեկորիկները: Ուրեմն, մինչ ես բոլորովին անշարժ պառկած էի մեջքիս և ականջ էի դնում այդ կուսական անդորրին, հանկարծ ինձ թվաց, թե ինչ-որ բան է պակասում. գուցե դա էլեկտրական պոմպերի այն համաշափու հանդարտ շխկշխկոցն էր, որ առավոտները արձակում են նրանք՝ ցիստեռներ ջուր լցնելիս, կամ հատակը մաքրող աղախնի էլեկտրական խողանակի ձայնը, որոնց աղմուկը կարծես ընդգծում է և ավելի անեզր ու խոր դարձնում այդ լուռությունը: Իմ շուրջը այնպիսի մի անդորր էր, որ թվում էր, թե ոչ մի կենդանի արարած չկա: Մի խոսքով, դա ոչ թե կյանքով լեցուն մի լուռություն էր, այլ մի լուռություն, որի մեջ կենդանությունն ինչպես անգամ չկար: Մի լուռություն, ինչպես ասացի ինքս ինձ, գտնելով, վերջապես, համապատասխան բանը, որտեղ միայն լքյալ մենությունն էր իշխում: Հազիվ էր այդ բանը անցել իմ մտքով, երբ իսկույն ցատկեցի մահճակալից և նետվեցի դեպի այն դուռը, որը տանում էր էմիլիայի սենյակը: Ես վայրկենապես հրեցի դուռը և առաջին բանը, որ իմ աչքին զարնեց, դա լայն, ճմրթված և դատարկ անկողնու գլխատեղում, բարձի վրա դրած մի նամակ էր:

Նամակը շատ կարճ էր. «Սիրելի Ռիկկարդո, տեսնելով, որ դու չես ուզում հեռանալ, հեռանում եմ ես ինքս: Մենակ ես, թերևս, այդ անելու քաջությունը չունենայի, օգտագործում եմ Բատտիստայի մեկնելու առիթը: Պատճառներից մեկն էլ այն է, որ վախենում եմ մենակ մնալուց. վերջին հաշվով ինչ էլ ուզում է լինի, Բատտիստայի ընկերակցությունը շատ ավելի գերադասելի է, քան միայնությունը: Սակայն Հոռոմում ես նրանից կհեռանամ և կապրեմ մենակ: Այնուամենայնիվ, եթե հանկարծ ականջովդ ընկնի, որ ես Բատտիստայի սիրուհին

եմ դարձել, չզարմանաս: Ես երկաթից չեմ, կնշանակի բարձր
 ելք չեմ ունեցել, և արիությունը լքել է ինձ: Մնաս բարով:
 Էմիլիա»:

Այս տողերը ընթերցելուց հետո ես նստեցի մահճակալի
 գլխատեղի մոտ և, նամակը ձեռքիս բռնած, սկեռուն հայաց-
 քով նայեցի առջևս: Լայնորեն բացված լուսամուտից տես-
 նում էի մի քանի սոճիներ, որոնց բների հետևում երևում էր
 ճաքճաքած պատը: Հետո հայացքս կտրեցի լուսամուտից և
 սկսեցի նայել շուրջս. դատարկ, ամայացած սենյակում քառ-
 սային դրություն էր. ոչ հագուստեղեն կար, ոչ կոշիկեղեն, ոչ
 հարդարանքի առարկաներ, միայն լրիվ ու կիսով չափ դուրս
 քաշած դատարկ դարակներ էին և լայնորեն բացված դռնե-
 րով զգեստապահարաններ, որոնց մեջ երևում էին միայն դա-
 տարկ կախիչները: Վերջին ժամանակներս հաճախ էի մտա-
 ծում, որ Էմիլիան կարող է բաժանվել ու հեռանալ ինձա-
 նից: Ես այդ մասին մտածում էի, ինչպես մտածում են մի
 որևէ սարսափելի և մեծ դժբախտության մասին, և այդ դժ-
 բախտությունը ահա վրա էր հասել: Ես այնպիսի մի համը
 ցավ էի զգում, որ թվում էր, թե ելնում է իմ էության ամե-
 նաբուն խորքից: Եթե արմատախիլ արած ծառը ընդունակ
 լիներ ցավ զգալու, ապա նա այդ կզգար իր այն արմատնե-
 րում, որոնց շնորհիվ նա կանգուն է մնում երկրի վրա: Ես
 փաստորեն նույնպես հանկարծակի տեղահան արած այդպի-
 սի մի ծառ էի, որի արմատները մերկացել էին, իսկ այն սի-
 րող հողը՝ Էմիլիան, որն իր սիրով սնում էր նրանց, արդեն
 հեռացել էր. իմ արմատները այլևս չէին կարող սուզվել նրա
 սիրո մեջ ու սնվել նրանով, շուտով նրանք աստիճանաբար
 պիտի շորանային. ես նույնիսկ զգում էի, որ արդեն շորա-
 նում են, և դա ինձ անասելի տառապանք էր պատճառում:

Վերջապես վեր կացա և վերադարձա իմ սենյակը: Այն-
 պես էի շշմել ու կորցրել ինձ, որ թվում էր, թե ինչ-որ բարձր
 տեղից վատ դիրքով ցած եմ ընկել: Ես մի բուխ ցավ էի զգում
 և սարսափով գիտակցում, որ այդ ցավը ուր որ է կուժեղանա
 ու կդառնա անտանելի, սակայն չգիտեի, թե երբ է վրա հաս-
 նելու այդ պահը: Հետևելով այդ ցավին, միևնույն ժամա-
 նակ աշխատում էի շմտածել դրա մասին. երկյուղելով, որ
 դա կարող է ավելի ուժգին տառապանք առաջացնել իմ մեջ:

Ես մեքենայաբար վերցրի լողազգեստս և կղզին գոտևորող արահետով դուրս եկա Կապրիի հրապարակը: Այդտեղ գնեցի մի լրագիր և նստեցի պատահած սրճարաններից մեկում: Ինձ թվում էր, այնպիսի վիճակում, ինչպիսին ես եմ, բացի իմ դրուժյունից, ուրիշ ոչնչի մասին մտածել չեմ կարող: Սակայն, ի զարմանս իմ, այդ լրագիրը սկզբից մինչև վերջը ընթերցեցի: Ահա հենց այսպես էլ ճանճն է. մտածեցի ես հանկարծ, որի գլուխը դաժան երեխան կտրում ու նետում է. նա որոշ ժամանակ, կարծես ոչինչ չզգալով, դեռ շարունակում է ման գալ, թաթերը իրար է քսում, մաքրում, ապա նոր միայն ընկնում է ու սատկում: Վերջապես զանգակատան ժամացույցի զանգերը հրապարակը լցրին կեսօրն ազդարարող իրենց դողանջով: Հենց այդ րոպեին Պիկկալա Մարինա լողափն էր գնում մի ավտոբուս: Ես նստեցի այդ ավտոբուսը:

Քիչ հետո արդեն տեղ հասա: Արևը ամեն ինչ ողողել էր իր շողերով: Ավտոբուսի կանգառից մեզի սուր հոտ էր գալիս: Այդտեղ կանգնած էին կառքեր, որոնց կառապանները իրար գլխի հավաքված հանգիստ զրուցում էին: Թեթև քայլերով իջա աստիճաններն ի վար դեպի լողարան: Նայելով ներքև, տեսա ճերմակին տվող կոպիճոտ, նեղլիկ լողափը և կապույտ ծովը, որ փովել էր խաղաղ ու անամպ երկնքի տակ: Անդորրված ու հորիզոնից հորիզոն տարածված ծովի ատլասե շողշողուն մակերեսին այստեղ ու այնտեղ սպիտակին էին տալիս ծուլորեն հայտնվող և նորից անհետացող թափանցիկ ու արևով ողողված կոհակները: Ես մտածեցի, որ ավելի լավ կլիներ այդ ժամին ծով մտնել մակույկով, թիավարուժյունը կարող էր մտքերս լրիվ ցրել, իսկ մյուս կողմից էլ բոլորովին մենակ կլինեի. լողափում, որտեղ արդեն լիքը մարդիկ էին, դա միանգամայն անհնար էր: Հասնելով լողարանին, ես ձայն տվի սպասարկողին և խնդրեցի, որ ինձ համար մի մակույկ կարգի բերի: Հետո մտա լողափին գտնվող խցիկներից մեկը, որպեսզի հանվեմ:

Ես դուրս եկա խցիկից և բոբիկ ոտքերով քայլեցի լողարանի աղերից քայքայված ու ծվատված տախտակների վրայով, գլուխս կախ և ուշադիր նայելով, որ ոտքերս փուշ չմտնի: Հունիսյան արևը կախվել էր իմ վերևում, ողողել էր ինձ իր շողերով և այրում էր մեջքս: Դա մի հաճելի զգացում

էր, որը ցավոք սրտի շէր համապատասխանում իմ ընկճված և մոլորուն հոգեկան վիճակին: Առանց աչքերս վեր բարձրացնելու նույն զգուշութեամբ նայելով ոտքերիս տակ, ես իջա դիք աստիճաններով և այրող կոպիճների վրայով գնացի դեպի ծովափ: Ընդամենը մի քանի քայլ էր մնացել ջրին հասնելի, երբ, աչքերս բարձրացնելով, իմ առջևում տեսա էմիլիային:

Լողարանի սպասարկողը, մի նիհարավուն, ջլուտ, արևից անսահմանորեն սևացած ծերունի էր, ծղոտյա լայնեզր գլխարկը աչքերին քաշած, կանգնել էր կիսով շափ ջուրն իջեցրած մակույկի մոտ: Էմիլիան նստել էր նավախելին, նրա հագին ինձ շատ ծանոթ կանաչ, փոքր-ինչ գույնը գցած այն լողազգեստն էր, որը բաղկացած էր երկու մասից՝ կիսավարտիքից ու կրծկալից: Նա նստել էր ոտքերը ամուր իրար սեղմած, հենված հետ տարած ձեռքերին, մերկ և նրբակերտ իրանը գոտկատեղում կոնքի համեմատութեամբ փոքր-ինչ ծռած, մի տեսակ անկայուն և կանացի նազանքով լցված դիրքով: Տեսնելով իմ զարմանքը, էմիլիան ժպտաց և այնքան սևեռուն նայեց ինձ, որ կարծես ուզում էր ասել. «Ես այստեղ եմ... բայց մի խոսիր... այնպես արա, որ իբր դու գիտեիր իմ այստեղ լինելու մասին»:

Ես ենթարկվեցի նրա այդ համր խնդրանքին և բոլորովին լուռ, ավելի շուտ մեռած, քան կենդանի, շփոթահար ու նվաղած սրտով, մեքենայաբար բռնեցի սպասարկողի ինձ մեկնած ձեռքից ու մտա մակույկ: Սպասարկողը մինչև ծնկները մտավ ջուրը, թիակները հագցրեց թիակալներին և մակույկը հրեց դեպի ծով: Ես նստեցի, թիակներն առա ձեռքս և, առանց գլուխս բարձրացնելու, այրող արևի տակ սկսեցի թիավարել մակույկը դեպի այն հրվանդանը, որի հետևում ծածկված է փոքրիկ ծովախորշը: Ես թիավարում էի ամբողջ ուժով, լուռ և առանց էմիլիային նայելու, և ընդամենը մի տասը րոպեից հետո արդեն հրվանդանի մոտ էի: Այնքան ժամանակ, քանի դեռ երևում էր լողափը իր խցիկներով ու լողացողներով, զգում էի, որ ի վիճակի չեմ որևէ խոսք փոխանակելու էմիլիայի հետ: Ես ուզում էի, որ մենք միայնակ լինենք, միայն էմիլիան ու ես, ինչպես ամառանոցում,

ինչպես միշտ, երբ ես ցանկություն էի ունենում նրան որևէ բան ասելու:

Մինչ թիավարում էի, հանկարծ զգացի, որ ինձ համակել է խորին թախծի զգացումը, որին խառնվել էր ամբողջովին նոր և տարօրինակ մի ուրախություն: Ես նկատեցի, որ լալիս եմ: Թիավարում էի և զգում, որ արցունքները այրում են իմ աչքերը, երեսս այրվում էր այտերիս վրայով ցած գլորվող արցունքի ամեն մի կաթիլից: Հասնելով հրվանդանին, սկսեցի թիավարել ավելի մեծ ուժով, որպեսզի կարողանամ հաղթահարել այդտեղի փոթորկուն ու փրփրաբաշ ջրերի հոսանքը: Իմ աջ կողմում ջրից ելել ու ցցվել էր շեշտ ու սև մի փոքրիկ ժայռ, իսկ ձախում բարձրանում էր լեռան պատածև կողը: Մակույկը վարեցի նրանց միջով և այնտեղ, որտեղ ջրի հոսանքը ավելի ալեկոծ էր, ամբողջ ուժով գործի դրի թիակները և անցա հրվանդանից: Փոքրիկ ժայռի այն մասը, որը գրեթե սուզված էր ջրի մեջ, աղից ամբողջովին սպիտակել էր, և ամեն անգամ, երբ ջուրը տատանումից հետ էր քաշվում, երևում էր արևի տակ փայլփլող ջրիմուռների կանաչ մորուքը: Հրվանդանից այն կողմ, լեռան պատանման կողի հետևում հայտնվեց գլաժայռերի վիթխարի մի ամֆիթատրոն: Գլաժայռերի միջև, այստեղ ու այնտեղ երեվում էին սպիտակին տվող կոպիճների փոքրիկ ու ամայի լողափեր: Այդտեղ ծովը նույնպես ամայի էր, ոչ մակույկ էր երևում, և ոչ էլ որևէ լողվոր: Զուրն այստեղ թանձր կապույտ ու մի տեսակ յուղային գույն ուներ, որը, ըստ երևույթին, վկայում էր նրա խիստ խորության մասին: Հեռվում երևում էին այլ հրվանդաններ, որոնք թատրոնի տարօրինակ կուլիսաների նման մեկը մյուսի հետևից մտնում էին անդորր և արեվաողող ծովը:

Ես դանդաղեցրի թիավարությունս և, գլուխս բարձրացնելով, նայեցի էմիլիային: Քանի դեռ մենք հրվանդանից չէինք անցել, նա լուռ էր, բայց երբ անցանք, իսկույն ժպտաց և մեղմաձայն հարցրեց.

— Ինչո՞ւ ես լալիս:

— Հալիս եմ քեզ տեսնելու ուրախությունից, — պատասխանեցի ես:

— Դու ուրա՞խ ես ինձ տեսնելուդ համար:

— Անշափ... Ես համոզված էի, որ դու արդեն գնացել ես... մինչդեռ դու այդ չես արել:

էմիլիան աչքերը կախեց, ապա ասաց.

— Ես որոշել էի գնալ... և այսօր առավոտյան Բատտիստայի հետ եղա նավահանգստում... Բայց վերջին րոպեին փոշմանեցի և որոշեցի մնալ:

— Իսկ ի՞նչ էիր անում մինչև հիմա:

— Մի քիչ նավահանգստում թափառեցի... Սրճարանում նստեցի... Հետո ֆունիկուլյորով բարձրացա Կապրի և զանգեցի ամառանոց... Ինձ ասացին, որ դու դուրս ես եկել... մրտածեցի, որ, ըստ երևույթին, գնացած կլինես Պիկկոլա Մարինա լողափ, և եկա այստեղ... Հանվեցի և սկսեցի քեզ սպասել... Երբ դու պատվիրեցիր մի նավակ կարգի բերեն, քեզ տեսա... Ես արևի տակ պառկած էի, դու անցար իմ կողքով, բայց ինձ չնկատեցիր... Ու մինչև քո հանվելը, բարձրացա ու նստեցի նավակի մեջ:

Երկար ժամանակ ես լուռ էի: Մենք արդեն մեր անցած հրվանդանի և դեպի ծովը ցցված ժայռի միջև գտնվող ճանապարհի կեսին էինք: Ես գիտեի, որ այդ ժայռի այն կողմը գտնվում է Կանաչ քարանձավը, որտեղ սկզբում մտադիր էի լողանալ: Վերջապես ես շատ կամաց հարցրի էմիլիային.

— Իսկ ինչո՞ւ Բատտիստայի հետ չգնացիր, ինչպես վրձոնել էիր: Ինչո՞ւ ես մնացել:

— Որովհետև այսօր, կրկին մտածելով այդ մասին, հասկացա, որ քո վերաբերյալ ես սխալվել եմ... և որ այդ բոլորը պարզապես թյուրիմացություն է եղել:

— Ի՞նչը քեզ ստիպեց այդ հասկանալ:

— Չգիտեմ... գուցե ամենից շատ քո ձայնը երեկ երեկոյան:

— Իսկ հիմա դու իրո՞ք համոզված ես, որ ես երբեք չեմ արել բոլոր այն վատ արարքները, որոնց մեջ դու մեղադրում էիր ինձ:

— Այո, համոզված եմ:

Ինձ մնում էր ևս մի վերջին հարցը տալ նրան, մի հարց, որը գուցե բոլոր հարցերից ամենակարևորն էր:

— Բայց դու, — ասացի ես, — դու չես հավատում, չէ՞, որ ես սրիկա եմ... որ ես այդպիսի գործեր կարող եմ անել... ող

իմ էությամբ ես արհամարհելի եմ... ասա, որ դու ինձ այդպիսին չես համարում, էմիլիա:

— Ես քեզ այդպիսին երբեք չեմ համարել... ինձ միայն թվացել է, որ դու քեզ լավ չես պահում, որի պատճառով էլ ես այլևս քեզ չէի հարգում... Սակայն այժմ զգում եմ, որ այդ բոլորը միայն թյուրիմացություն է եղել... Արի այլևս այդ մասին չխոսենք, ուզո՞ւմ ես:

Ես ոչինչ չասացի: Լուռ էր նաև էմիլիան: Ես սկսեցի թիավարել ավելի մեծ ուժով ու կրկնապատկված, ինչպես թվում էր ինձ, բերկրությամբ, որը ծագող արևի նման կամաց-կամաց բարձրանում էր, որպեսզի ջերմացնի իմ սառած ու անզգայացած հոգին: Այդ ընթացքում մենք հասանք Կանաչ քարանձավ: Մակույկին ես ուղղություն տվի դեպի նրա մուտքը, որը, ինչպես արդեն երևում էր, կանաչ ու սառը ջրի հայելանման մակերեսի վրա բարձրանում էր ինչպես մթին մի կամար:

Ես նորից հարցրի.

— Եվ դու ինձ սիրո՞ւմ ես:

էմիլիան տատանվեց, ապա ասաց.

— Ես քեզ միշտ էլ սիրել եմ... և միշտ էլ կսիրեմ:

Սակայն նա այդ ասաց այնպիսի մի տխրությամբ, որ ես նույնիսկ զարմացա:

Նրա խոսքերի մեջ եղած թախիժը ինձ անհանգստություն պատճառեց.

— Դու ինչո՞ւ ես այդքան վշտացած ասում:

— Չգիտեմ... գուցե այն պատճառով, որ շատ ավելի լավ կլիներ, եթե ոչ մի թյուրիմացություն մեզ երբեք բաժանած չլիներ իրարից, և մենք սիրեինք միմյանց ինչպես անցյալում:

— Այո, իհարկե, — ասացի ես, — բայց հիմա այդ բոլորը արդեն վերջացած է... Մենք այլևս այդ մասին չպետք է մտածենք... հիմա մենք պետք է միշտ սիրենք իրար:

Ինձ թվաց, թե նա գլխով համաձայնության նշան արեց, սակայն աչքերն առանց վեր բարձրացնելու և նույն ձևով փոքր-ինչ թախժոտ: Ես մի պահ ձեռքերս վերցրի թիակների վրայից և առաջ թեքվելով, վրա բերի.

— Հիմա մենք կգնանք Կարմիր քարանձավ... Դա Կանաչ քարանձավի հետևում գտնվող շատ խոր և ոչ մեծ մի ու-

րիշ քարանձավ է... Նրա խորքում, մթության մեջ, փոքրիկ լողափ կա... Գնանք այնտեղ իրար սիրելու, էմիլիա, ուզո՞ւմ ես:

Նա հայացքը բարձրացնելով, առանց որևէ խոսք ասելու, գլխով համաձայնության նշան արեց, ապա մի տեսակ հնազանդ ու, թերևս, ամաչկոտ նայեց երեսիս: Ես ամբողջ ուժով նորից սկսեցի շարժել թիակները:

Ահա և մենք քարանձավի ժայռոտ ու վիթխարի կամարի տակ ենք, որի վրա ուրախ անդրադառնում է ջրի ու արևի զմրուխտե ցուլքերից գոյացած խիտ ու երերուն ցանցը: Ավելի խորքում, այնտեղ, ուր ծովի համաչափորեն զարնվող ալիքների ձայնից խուլ թնդում է քարանձավի կամարը, ջուրը ամբողջովին մթին էր տալիս, իսկ նրա միջից դուրս ցցված ողորկ, սև ու շողշողացող ժայռակտորները թվում էին, թե ծովային կենդանիների մեջքեր են, որ երևում են: Ահա և երկու քարափների միջև ընկած լուսավոր անցքը, որը տանում է դեպի Կարմիր քարանձավ:

էմիլիան անշարժ նստած ինձ էր նայում: Նրա աչքերը հետևում էին իմ ամեն մի շարժումին, իսկ հայացքի մեջ զգայական ու զիջող մի մեղմություն կար, ինչպես այն կանանց մոտ, որոնք պատրաստ են տրվելու և սպասում են միայն մի նշանի: Մերթ մի, մերթ մյուս թիակը դեմ տալով անցքի ժայռապատերին ու հրելով առաջ, ես մակույկը տարաշթաքարե կամարի տակով, դուրս բերի բաց տարածություն և ուղղություն վերցրի դեպի Կարմիր քարանձավի խավարով սքողված մուտքը: Ես էմիլիային ասացի. «Գլուխդ քեզ քաշիր», — և թիակի ուժեղ մի հրումով ջրի հարթ մակերեսի վրայով նավակը սահեց դեպի քարանձավ:

Կարմիր քարանձավը բաժանվում է երկու մասի. առաջին մասը, որը նախասրահի է նման, երկրորդից անջատվում է կամարի ցածրացող մասով, որից այն կողմ քարանձավը ծովում է արմնկաձև ու ձգվում մինչև խորքում գտնվող լողափը: Երկրորդ մասը ամբողջովին սուզված է խավարի մեջ, և մարդու աչքերը պետք է սովորեն այդ մթությանը, որպեսզի հնարավոր լինի տեսնել ստորերկրյա այդ փոքրիկ լողափը, լուսավորված կարմրավուն ու տարօրինակ մի լույսով, որից էլ այդ քարանձավը ստացել է իր անունը:

Ես էմիլիային ասացի.

— Այս քարանձավում շատ մութ է... Բայց շուտով մեր աչքերը կվարժվեն, և մենք կսկսենք տեսնել:

Դեռ նախկին հրումից ստացած ուժով նավակը շարունակում էր խավարի մեջ սահել ցածրանիստ կամարների տակով: Ես այլևս ոչինչ չէի տեսնում: Վերջապես զգացի, թե ինչպես նավակի քիթը թափով կպավ լողափին ու թաց աղմուկով խրվեց նրա կոպիճների մեջ: Ես թիակները բաց թողի, նստած տեղիցս մի փոքր բարձրացա և, խավարի մեջ ձեռքս մեկնելով դեպի այն տեղը, ուր նավախելն էր, ասացի.

— Ձեռքդ տուր ինձ, օգնեմ իջնես:

էմիլիան ոչ մի պատասխան չտվեց: Ես զարմացած նորից կրկնեցի ասածս.

— էմիլիա, ձեռքդ տուր ինձ, — և կրկին խոնարհվելով դեպի նա, մեկնեցի ձեռքս: Տեսնելով, որ նա ոչ մի պատասխան չի տալիս, ես ավելի խոնարհվեցի նրա կողմը և, որպեսզի մթության մեջ ձեռքս երեսին չխրեմ, սկսեցի խարխափելով փնտրել նրան նավախելում, որտեղ գիտեի որ նստած է: Բայց ձեռքս միայն դատարկության հանդիպեց, ուրիշ ոչ ոք չկար: Այն տեղում, որտեղ, ինչպես ինձ թվում էր, պետք է էմիլիան լիներ նստած, իմ մատները կպան դատարկ նստատեղի ողորկ տախտակին: Հանկարծ իմ զարմանքին խառնվեց սարսափի մի զգացում:

— էմիլիա, — ճշացի ես, — էմիլիա:

Ինձ պատասխանեց միայն թույլ ու սառը արձագանքը: Կամ գոնե ինձ այդպես թվաց: Այդ ընթացքում իմ աչքերը արդեն ընտելացան մթին, և, վերջապես, թանձր խավարի մեջ ես կարողացա տեսնել ավեր մխրձված իմ նավակը, սև ու մանր կոպիճապատ լողափը և իմ գլխավերևում աղեղված շողշողուն ու թաց կամարը: Ես տեսա, որ նավակը բոլորովին դատարկ է, նրա նավախելում ոչ ոք չկա, որ դատարկ է նույնպես և լողափը, որ իմ շուրջը լրիվ ամայություն է, ու ես մենակ եմ:

Նայելով նավախելին, ես ասլշած ու հազիվ լսելի ձայնով շշնջացի. «էմիլիա»: Հետո նորից կրկնեցի. «էմիլիա, որտե՞ղ ես»: Եվ նույն այդ բոպեին ես ամեն ինչ հասկացա: Իջնելով նավակից, փռվեցի լողափին ու դեմքս թաղեցի

խոնավ և ավազախառը կոպիճների մեջ: Հստ երևույթին գիտակցությունս կորցրել էի և բոլորովին անշարժ ու գրեթե անզգա, ինչպես ինձ թվաց, բավական երկար մնացել էի այդպես պառկած:

Երկար ժամանակ անցնելուց հետո վեր կացա, մեքենայաբար նստեցի նավակ և դուրս եկա քարանձավից: Ելքի մոտ իմ աչքերին զարկեց արևի ուժեղ լույսը, որը անդրադարձել էր ծովի ջրերի մեջ: Ես նայեցի թևիս ժամացույցին. ժամը երկուսն էր: Քարանձավում մնացել էի մի ժամից ավելի: Հանկարծ հիշեցի, որ կեսօրը ուրվականների ժամն է: Այժմ ամեն ինչ հասկանալի էր. նա, ում հետ ես խոսել էի և ում առաջ թափել արցունքներս, եղել էր ուրվական:

Գլուխ քսաներեքերորդ

Ես վերադառնում էի դանդաղ, թիավարելս հաճախակի ընդհատելով, իսկ երբեմն էլ թիակները վեր էի ցցում և, անշարժ նստած, մոլոր ու ցրված հայացքս հառում էի ծովի լազուրյա շողշողուն մակերեսին: Ամեն ինչ պարզ էր. դա միայն զգայախաբություն է եղել, ճիշտ այնպես, ինչպես երկու օր առաջ ես տեսա արևի տակ փոված մերկ էմիլիային. այն ժամանակ ինձ նույնպես թվաց, որ խոնարհվեցի ու համբուրեցի նրան, մինչդեռ իրականում ես ոչ միայն չէի մոտեցել էմիլիային, այլև տեղիցս անգամ չէի շարժվել: Այդ զգայախաբությունը այս անգամ ավելի ստույգ էր և ավելի պարզորոշ, բայց, չնայած դրան, դա ընդամենը զգայախաբություն էր և ոչինչ ավելին: Իսկ որպես ապացույց, եթե ուրիշ ոչինչ չլիներ անգամ, բավական էր թեկուզ էմիլիայի ուրվականի հետ ունեցած իմ երկխոսությունը, որի ընթացքում ես նրան ասել տվի այն ամենը, ինչ կուզենայի, որ ասեր, իսկ էմիլիան իրեն պահեց հենց այնպես, ինչպես այդ ցանկանում էի ես ինքս: Ամեն ինչ ելնում էր ինձանից և վերադառնում ինձ մոտ: Ես ոչ միայն ամեն ինչ այնպես էի պատկերացնում, ինչպես կուզեի, որ այդ տեղի ունենար, այլև շնոր-

հիվ իմ հոգու մեջ լցված զգացումների ուժի, երևակայեցի, որ փաստորեն ամեն ինչ հենց այդպես էլ եղել է: Տարօրինակ է ասել, բայց ինձ ամենեին զարմանք չպատճառեց այդ զգայախաբուսթյունը, որը ոչ միայն հազվագեպ է պատահում, այլև գուցե նաև միակը լիներ: Կարծես դեռ շարունակելով այդ զգայախաբուսթյունը, ես իմ գիտակցության մեջ վերականգնում էի առանձին մանրամասներ և գրեթե երանությամբ կանգ առնում այդ մանրամասներից այնպիսիների վրա, որոնք ինձ բերկրություն ու սփոփանք էին պատճառում: Որքան էր գեղեցիկ էմիլիան իմ մակույկի նավախելին նստած, որը ոչ միայն այլևս չէր արհամարհում ինձ, այլև ամբողջությամբ համակված էր սիրով, որքան մեղմ ու քրնքո՛ւշ էին հնչում նրա խոսքերը, ինչպիսի՛ կրքոտությամբ էի ես հուզվել, երբ նրան հայտնեցի իմ մեջ փոթորկվող ցանկության մասին, իսկ նա գլխի թեթևակի շարժումով համաձայնության նշան արեց ինձ: Փաստորեն ես նման էի այն մարդուն, որը տեսնելով վերին աստիճանի հաճելի ու տպավորիչ մի երազ, քնից արթնանում է, բայց դեռ երկար ժամանակ շարունակում է երանությամբ վայելել այդ երազի առաջացրած զգացումները: Եվ հենց այդ էր պատճառը, որ ես բավական երկար չէի կարողանում ազատվել ինձ պատահած զգայախաբուսթյունից: Ինձ համար հաճելի էր հիշողությանս մեջ մտովի վերականգնել նրա թողած տպավորությունը. ի՞նչ կարևոր էր, թե դա ընդամենը զգայախաբուսթյուն է: Չէ՞ որ ես նույն զգացումներն էի ունենում, որոնցով սովորաբար հիշվում է իրականորեն գոյություն ունեցող որևէ դեպք:

Մինչ անսահման մեծ հաճույքով կանգ էի առնում ինձ հայտնված տեսիլքի ամեն մի մանրամասնության վրա, հանկարծ իմ մեջ միտք ծագեց նորից համեմատել Պիկկոլա Մարինայից նավակով իմ մեկնելու ժամանակը Կարմիր քարանձավից դուրս գալու ժամանակի հետ: Ինձ կրկին ապշեցրեց այն հանգամանքը, թե որքան երկար եմ մնացել քարանձավում՝ ստորերկրյա լողափին: Եթե հաշվենք, որ Պիկկոլա Մարինայից մինչև քարանձավ ես հասել եմ երեք քառորդ ժամում, ապա այնտեղ անց եմ կացրել մի ժամից ավելի: Ինչպես արդեն ասել եմ, ես դա վերագրեցի ուշագնացությանս, կամ, համենայն դեպս, մի այնպիսի վիճակի, որը

իր բնույթով նման է գիտակցությունը կորցնելուն: Բայց այժմ, քննության առնելով ինձ հետ պատահած զգայախաբությունը, որ մի կողմից այնքան բարդ էր, իսկ մյուս կողմից այնքան համապատասխան իմ ամենանվիրական ձրգտումներին, ես ինձ հարց տվի, թե արդյո՞ք այս բոլորը պարզապես երազ չէր: Արդյո՞ք լողարանից մենակ չեմ նստել նավակ, մենակ մտել քարանձավ և, պառկելով այնտեղի լողափին, քնել ու երազ տեսել, որ լողարանից ես մեկնել եմ էմիլիայի հետ, որը նստել էր իմ մակույկի նավախելին, զրուցել եմ նրա հետ, պատասխաններ ստացել, առաջարկել, որ սեր վայելենք և տարել քարանձավի խորքը: Հետո երազում տեսել եմ նաև, թե ինչպես ձեռքս մեկնեցի նրան, որպեսզի օգնեմ իջնի, բայց էմիլիային նավակում չգտնելով, սարսափեցի, մտածելով, որ ծովային զբոսանքի եմ դուրս եկել ուրվականի հետ և այդ գիտակցությունից ուշագնաց լինելով ընկել եմ ափին:

Այժմ այդ ենթադրությունը ինձ թվում էր ճշմարտանման: Բայց միայն այդքան և ոչ ավելին: Իմ գլխում ամեն ինչ մշուշվել ու խառնվել էր իրար, և չէի կարողանում տարբերել երազի և իրականության միջև ընկած սահմանագիծը: Ըստ երևույթին այդ սահմանագիծը հենց այն պահն էր, երբ պառկեցի ստորերկրյա լողափում և ինձ թվաց, թե այլևս հնարավոր չէ այդտեղից դուրս գալ: Սակայն փաստորեն ի՞նչ պատահեց, երբ պառկեցի քարանձավի խորքում գտնվող լողափին: Ես քնեցի և երազում տեսա, որ էմիլիան ինձ հե՞տ է, մսից ու արյունից իսկական էմիլիա՞ն: Թե՞ քնեցի և երազ տեսա, որ ինձ այցի է եկել էմիլիայի ուրվականը: Կամ գուցե քնեցի և երազում տեսա, որ քնել եմ և այդ երկու երազներից մեկը երազո՞ւմ եմ տեսնում: Չինական արկղիկների նման, որոնցից յուրաքանչյուրը իր մեջ պարունակում է մի ավելի փոքր արկղիկ, թվում էր, թե իրականությունը իր մեջ երազ է պարունակում, որը իր հերթին պարունակում է իրականություն, իսկ սա նորից մի երազ և այդպես անվերջ:

Ծովի մեջտեղում թիակները բազմիցս բարձրացնելով ջրից, ես դադարեցնում էի նավակավարի իմ աշխատանքը և ինքս ինձ հարցնում. երա՞զ էր արդյոք իմ տեսածը, թե՞ պարզապես զգայախաբություն, կամ գուցե իսկապե՞ս ինձ

այցելության էր եկել էմիլիայի ուրվականը, մի բան, որն այնքան արտասովոր էր և դժվար պատկերացնելի: Վերջապես եկա այն եզրակացության, որ ինձ համար անհնար է իմանալ դրա ճշմարտությունը և, ամենայն հավանականությամբ, այդ ճշմարտությունը երբեք էլ ինձ չի հաջողվի իմանալ:

Ես նորից սկսեցի գործի դնել թիակները և շուտով հասա լողարանին: Արագ-արագ հագնվեցի, բարձրացա դեպի կանգառ և ինձ գցեցի ավտոբուսներից մեկի մեջ, որը հենց այդ բոպեին շարժվում էր դեպի Կապրիի հրապարակ: Այժմ ես շտապում էի տուն գնալ: Չեմ կարող ասել ինչու, բայց համոզված էի, որ ամառանոցում կգտնեմ բոլոր այս առեղծվածների բանալին: Ես շտապում էի նաև այն պատճառով, որ մինչև նավի շարժվելը, որը մեկնելու էր վեցին, պետք է դեռ հասցնեի ոչ միայն իրերս հավաքել, այլև ընթրել: Ես ահագին ժամանակ էի կորցրել, իսկ տրամադրությանս տակ մնացածը շատ քիչ էր: Հրապարակից գրեթե վազքով գնացի կղզին գոտևորող արահետով: Քսան բոպեից հետո արդեն տանն էի:

Մտնելով այժմ արդեն դատարկ հյուրասրահը, ես նույնիսկ ժամանակ չգտա տրվելու լքված միայնության տխուր զգացումներին: Բացած սեղանի վրա, ափսեի կողքին դրված էր մի հեռագիր: Սրտումս ինչ-որ մթին մի անհանգստություն, ես, առանց որևէ բան հասկանալու, վերցրի այդ դեղին ծրարն ու իսկույն բացեցի: Բատտիստայի վայրկենապես աչքիս զարնող անունը խիստ զարմանք պատճառեց ինձ և, ինքս էլ չգիտեմ ինչու, գրեթե ներշնչեց բարեհաջող տեղեկության որոշակի մի հույս: Հետո սկսեցի կարդալ հեռագիրը. մի քանի խոսքով ինձ հաղորդում էին, որ տեղի ունեցած ճակատագրական վթարի հետևանքով էմիլիան վնասվել է և այժմ գտնվում է «վերին աստիճանի ծանր վիճակում»:

Սրանից հետո ինձ ասելու գրեթե այլևս ոչինչ չի մնում:

Միտք շունի պատմել, թե ես ինչպես հենց այդ նույն երեկոյան մեկնեցի Կապրիից: Հասնելով Նեապոլ, իմացա, որ իրականում էմիլիան ոչ թե ծանր վիճակում է, այլ Տերրաչինայի մոտերքը մահացել է ավտոմոբիլային վթարից: Նրա մահը շատ տարօրինակ էր եղել. էմիլիան սոսկալի շոգից ու հոգնածությունից ուժասպառ, ինչպես երևում է, ննջել է և գլուխը կախել կրծքին: Բատտիստան, ինչպես սովորաբար, մեքենան վարել է կատաղի արագությամբ: Հանկարծ կողքի փողոցից նրա առաջն է դուրս եկել եզներ լծած մի սայլ: Բատտիստան մեքենան միանգամից արգելակել է: Ապա մի քանի բերան սայլապանի հետ հայհոյանքներ փոխանակելուց հետո նորից շարունակել է իր ճանապարհը: Սակայն էմիլիան լռել է, իսկ գլուխը անընդհատ օրորվել ու մի կողմից մյուսն է ընկել: Բատտիստան սկսել է էմիլիայի հետ խոսել, բայց նա ոչ մի պատասխան չի տվել: Ուրաններից մեկում նա թեքվել ու ընկել է Բատտիստայի վրա: Բատտիստան մեքենան կանգնեցրել է և տեսել, որ էմիլիան մահացած է: Երբ Բատտիստան միանգամից արգելակել է մեքենան, որպեսզի անսպասելի կերպով առաջը դուրս եկած սայլին չխփի, էմիլիայի մարմինը եղել է հանգստի վիճակում, բոլոր մկանները թուլացած, ինչպես լինում է քնի ժամանակ: Մեքենայի հանկարծակի ցնցումից նրա գլուխը ուժգնորեն ընկել է մի կողմի վրա, որի հետևանքով ողնաշարը վայրկենապես ջարդվել է: Մահը վրա է հասել այնքան արագ, որ ինքը նույնիսկ չի էլ զգացել:

Սոսկալի շոգ էր, իսկ շոգը բթացնում է վիշտը, որը, ինչպես և ուրախությունը, իր կողքին ուրիշ զգացում չի հանդուրժում: Թաղման օրը հեղձուցիչ տոթ էր, երկինքը ծածկված էր ամպերով, օդը խոնավ էր ու կանգնած, քամու նշույլ անգամ չկար: Երեկոյան, երբ թաղումն արդեն վերջացած էր, մտնելով այժմ արդեն մեկընդմիջտ դատարկ ու այլևս պետք չեկող մեր բնակարանը և դուռը փակելով իմ հետևից, ես

նոր միայն զգացի, որ էմիլիան իսկապես մեռել է և որ երբեք այլևս ես նրան չեմ տեսնի: Բնակարանի բոլոր լուսամուտները լայնորեն բացված էին՝ գոնե օդի մի շնչին հոսանք ստեղծելու համար, բայց, շնայած դրան, միևնույն է, ես զգում էի, որ շնչահեղձ եմ լինում: Իրիկնային մթնշաղով պարուրված բնակարանի շողշողուն հատակի վրայով անընդհատ այս ու այն կողմ էի քայլում և անցնում սենյակից սենյակ: Հարևան տների լուսաողող պատուհանները, որտեղից երևում էին նաև սենյակներում գտնվող նրանց բնակիչները, իմ մեջ կատաղի մի զգացում էին առաջացնում: Նրանց լույսերը ինձ հիշեցնում էին մի այնպիսի աշխարհ, որտեղ մարդիկ ապրում էին խաղաղ, սիրում էին միմյանց, և ոչ մի թյուրիմացություն չէր մթագնում նրանց կյանքը, մի աշխարհ, որտեղից ինձ թվում էր, թե ես վտարված եմ հավիտենապես: Նորից այդ աշխարհը վերադառնալու համար ես պետք է բացատրվեի էմիլիայի հետ, համոզեի նրան, կրկին ստեղծագործեի սիրո մի հրաշք, իսկ դրա համար անհրաժեշտ է, որ սիրուց հրդեհվի ոչ միայն մեր սիրտը, այլև մենք նույնպես սիրով հրդեհենք ուրիշինը: Սակայն այդ այլևս հնարավոր չէր: Ինձ թվում էր, ես արդեն խելագարվում եմ, երբ սկսում եմ մտածել, որ էմիլիայի մահը, թերևս, իմ հանդեպ ունեցած նրա անբարյացակամության վերջին ու վճռական դրսևորումն է:

Սակայն, ինչպես էլ ուզում է լիներ, այնուամենայնիվ անհրաժեշտ էր ապրել: Հաջորդ օրը ես վերցրի ճամպրուկը, որը դեռ չէի բացել, բանալիով փակեցի տան դուռը, բայց այնպիսի մի զգացումով, որ կարծես դամբարան էի փակում: Այնուհետև, բանալին հանձնելով դռնապանին, նրան ասացի, որ մտադիր եմ ամառանոցից վերադառնալուց հետո բնակարանի հետ հաշիվներս մաքրել. ծախեմ, կորչի գնա: Ես նորից մեկնեցի Կապրի: Տարօրինակ է ասել, բայց աղոտ մի հույս էր ինձ ստիպում նորից վերադառնալ այն կողմերը,

ինձ թվում էր, թե որևէ կերպ ես էմիլիային կհանդիպեմ կամ նույն այն տեղում, որտեղ նա հայտնվել էր ինձ, կամ էլ մի ուրիշ վայրում: Եվ այն ժամանակ նորից նրան կբաշատրեմ, թե ինչու ամեն ինչ այսպես վերջացավ, նորից կհայտնեմ իմ սիրո մասին և կրկին նրանից կլսեմ, որ նա հասկանում ու սիրում է ինձ: Իմ այդ հույսը նման էր խելահեղության, և ես այդ զգում էի: Ես երբեք այնքան մոտիկ չեմ եղել բանականությունս կորցնելու վիճակին, որքան այդ օրերին էի, երբ մի կողմից նողկանքով էի լցված իրականության հանդեպ, իսկ մյուս կողմից կարոտով՝ դեպի զգայապատրանքը:

Ի բախտավորություն իմ, էմիլիան այլևս չհայտնվեց ինձ ոչ երազում և ոչ էլ հարթմնի: Համեմատելով վերջին անգամ էմիլիայի ինձ հայտնվելու ժամը նրա մահվան ժամի հետ, ես եզրակացրի, որ այդ երկու իրադարձությունները ժամանակի տեսակետից շեն համընկնում միմյանց հետ: Էմիլիան դեռ կենդանի էր եղել, երբ ինձ թվացել էր, թե նրան տեսնում եմ նավախելին նստած: Բայց ամենայն հավանականությամբ նա արդեն մեռած է եղել, երբ ես ուշագնաց պառկած էի կարմիր քարանձավի խորքում գտնվող փոքրիկ լողափին: Եվ այդպես, ոչինչ չէր համընկնում ոչ այն ժամանակ, երբ նա կենդանի էր, ոչ էլ նրա մեռնելուց հետո: Այդպիսով, ես երբեք չեմ էլ կարող իմանալ, թե ինչ էր այդ արդյոք՝ ինչ-որ տեսիլք, զգայախաբուսություն, երա՞զ, թե՞ զգացումների այլ խաբկանք: Այն թյուրիմացությունը, որը թունավորել էր մեր հարաբերությունները էմիլիայի կենդանության ժամանակ, շարունակվում էր նաև մահից հետո:

Մղված էմիլիայի և այն տեղերի կարոտից, ուր վերջին անգամ տեսել էի նրան, ես մի անգամ գնացի ամառանոցի ներքևում գտնվող այն լողափը, որտեղ էմիլիային հանդիպեցի մերկ վիճակում և պատկերացրի, թե իբր համբուրում եմ: Լողափը դափ-դատարկ էր: Գլաքարերի միջով շարժվելով առաջ և աչքերս բարձրացնելով դեպի ժպտուն ծովի լազուրյա անձայրածիր հեռուն, ես կրկին մտածեցի «Ողիսականի» մասին, կրկին հիշեցի Ողիսևսին ու Պենելոպեին և ինքս ինձ ասացի, որ նրանց նման այժմ էմիլիան նույնպես գտնվում է ծովային անսահման տարածությունների մեջ, հավիտենապես քարացած այն ձևով, ինչպիսին նա ուներ կենդանության

Ժամանակ: Այժմ արդեն ինձնից է կախված էմիլիային կրկին
գտնելը և ոչ թե ինչ-որ երազից կամ զգայապատրանքից,
ինձնից է կախված այն հարցը, թե կարո՞ղ եմ արդյոք նրան
գտնել և շարունակել մեր երկրային խոսակցությունը: Միայն
էմիլիան կարող էր այս ձևով հեռանալ ինձնից, ազատվել
իմ զգացմունքներից և խոնարհվել ինձ վրա որպես սփոփանքի
և գեղեցկության կերպար: Ես որոշեցի գրել այս հիշողություն-
ները, փայփայելով իմ մեջ այն հույսը, որ ցանկությունս
կիրականանա:

ԱԼԲԵՐՏՈ ՄՈՐԱՎԻԱՆ ԵՎ ՆՐԱ ՎԵՊԵՐԸ*

Երկրորդ համաշխարհային պատերազմից առաջ արդեն իտալացի գրող Ալբերտո Մորավիան հայտնի էր իր «Անտարբերները» (1928 թ.) և «Կեղծ հավակնություններ» (1935 թ.) վեպերով, սակայն «Հոմեոսի» վեպը (1947 թ.) և «Հոմեական պատմվածքներն» էին (1953 թ.), որ նրա անունը դուրս բերին համաշխարհային գրականության ասպարեզ:

«Հոմեոսին» վեպ-խոստովանություն է: Վեպի հերոսունհին՝ Ադրիանան, իր բարոյական անկման պատմությունն է անում և հեղինակը հերոսունհու ինքնախոստովանությունը վեր է ածում տիրող բարքերի անբարոյականության փայլուն մերկացման: «Չոչարան» ևս վեպ-խոստովանություն է: Այստեղ նույնպես ժողովրդի ծոցից ելած կինն է պատմում վեպի իրադարձությունները: Բայց այս վեպում արդեն հերոսունհին տրամագծորեն հակառակ էվոլյուցիա է վերապրում: Էջ առ էջ հոգեբանական սրաթափանցությամբ հեղինակը ցույց է տալիս իր հերոսունհու՝ Չեզիրայի վերածնունդը: Վեպի սկզբում եսասիրական մոլուցքով բռնված խանութպանունհին՝ վերջում, անցնելով երկրորդ համաշխարհային պատերազմի բոցերի միջով, դառնում է հասարակական հոգսերով ապրող քաղաքացի: Նա նույնիսկ սկսում է գիտակցել, որ այս կյանքի տերերը սրիկաներն ու ոճրագործներն են, իսկ ազնիվները կորչում են, և որ անհրաժեշտ է ազնիվ մարդկանց պայքարը շարիքի դեմ:

Գրողի էվոլյուցիայի համար բնորոշ է այն հանգամանքը, որ «Հոմեոսունհու» հերոսունհի Ադրիանան կարծես «Չոչարայում» պատերազմի հարվածների տակ երկտակվել է, ու ծնվել են Չեզիրայի և նրա դստեր՝ Ռոզետտայի կերպարները:

Եվ Չեզիրայի հոգեկան վերածնունդը, և Ռոզետտայի բարոյական խորտակման հասարակական դրդապատճառների գիտակցումը պայմանավորված է այն հանգամանքով, որ իտալական ժողովրդի ճգնաժամային տարիները վեպում իմաստավորված են ժողովրդական Դիմադրության շարժման հրացուլքով: Որքան խորն է հեղինակը գիտակցում երկրորդ համաշխարհային պատերազմի ժամանակ գլուխ բարձրացրած հակաֆաշիս-

* Ներկա հրատարակության համար որոշ կրճատումներով օգտագործվել են «Չոչարայի» 1962 թ. և «Արհամարհանքի» 1966 թ. հրատարակությունների առաջաբանները:

տական շարժման նշանակությունը իտալական ժողովրդի ազատագրման գործում, այնքան հեռասլաց է նրա քննադատությունը սոցիալական շարիքի այն արմատների հանդեպ, որոնք ազգային զարգացումը կաշկանդող ուժ են մնում նաև հետպատերազմյան տարիներին: Այդ առումով ողջ հետպատերազմյան տարիներին իտալական, ինչպես նաև ֆրանսիական նեոռեալիզմի գեղարվեստական մեծագույն նվաճումները թևավորվում են Դիմադրության շարժման հումանիստական գաղափարներով:

«Չոչարայում» իր արտահայտությունն է գտել նեոռեալիստական այդ մեծ և հզոր հոսանքի այն առաջադեմ թևի ներկայացուցիչներին հատուկ աշխարհըմբռնումը, ի տարբերություն սոցիալական հեղաշրջման անհրաժեշտությունը բացահայտ կերպով դնող արվեստագետների, որոնք «ներսից» են պայթեցնում իշխող հասարակական հարաբերությունների հակամարդկային և անբարոյական բնույթը:

«Չոչարայում» գեղարվեստական մարմնավորում է ստացել այն գաղափարը, որ երկրորդ համաշխարհային պատերազմը միայն ծայրահեղորեն սրեց, բայց չվերացրեց մարդկային և հակամարդկային սոցիալական կոնֆլիկտը՝ վերջնական լուծումը հետաձգելով վաղվա օրվան: Այդ առումով պատահական չէ, որ իր կուսական անարատությունը պատերազմի ամենածանր տարիներին բացահայտ թշնամիներից պահպանած Ռոզետտան բռնաբարման է ենթարկվում դաշնակիցների «փրկարար» ներխուժումից հետո:

Եվ այն հանգամանքը, որ Ռոզետտան, ի սարսափ իր մոր՝ Չեզիրայի, բռնաբարվելուց հետո ներքնապես անձնատուր է լինում բարոյական այլասերման, «ձգտելով շարունակել բռնությունը», ավելի ցցուն է դարձնում հեղինակի գաղափարական այն նպատակադրումը, ըստ որի մարդկային արժանապատվությունը անընկճելի է միայն այն դեպքում, երբ այն ներդաշնակված է իրականության մեջ առկա բարիքի և շարիքի ճանաչողությամբ և օժտված է վերջինիս դեմ ակտիվորեն պայքարելու ունակությամբ:

Չարին չհակառակելու քրիստոնեական դավանանքի պատճառով թևազրկված իտալական ժողովրդի հումանիզմը վերջին տարիներին արվեստի բոլոր ասպարեզներում դառնում է մարտունակ և ակտիվ: Անողորք դատապարտման է ենթարկվում պասսիվ հումանիզմը:

Այդ տեսակետից հատկանշական է, որ Չեզիրան հիանալով դստեր՝ Ռոզետտայի թե արտաքին կատարյալ գեղեցկությամբ և թե հոգեկան անարատությամբ, ցավով է գիտակցում, որ նրա կատարելությունը ջերմացում խնամքով փայփայած ծաղկի անբնական և դյուրաբեկ կատարելությունն է, անհոգության և կույր հավատի մի յուրահատուկ խառնուրդ, որ ի վիճակի չէ դիմանալու ճակատագրի նույնիսկ ամենանվազ հարվածներին:

Եվ այդպես էլ լինում է այն ժամանակ, երբ ինքը՝ Չեզիրան դիմա՛այում է պատերազմի ավերիչ ազդեցությանը, և նրա մեջ խոր արմատ նետած բարոյական նորմերը օգնում են նրան բարձր պահել մարդկային արժանապատվության զգացումը, նպաստելով նրա քաղաքացի դ...ա-

նալու բարդ պրոցեսին, այդ նույն ժամանակ Ռոզետտան վեպի վերջում կայծակնային արագությամբ բռնում է անբարոյականության ուղին: Տեսնելով այդ, ամոթի ծանր զգացումից Չեզիրան բարձրաձայն հեկեկում է:

Չեզիրայի այդ հեկեկանքով Մորավիան ըստ էության անարգանքի սյունին է գամում հետպատերազմյան Իտալիայում իշխող հանրակարգը:

Այդպես են իմաստավորված նաև Փաշիստական կամայականության գոհ և Չեզիրայի աչքերը աշխարհի վրա բացած Միկելե Ֆեստայի խոսքերը, այն մասին, որ բավական չէ, որ դաշնակիցները պատերազմում են գերմանացիներից պաշտպանվելու նպատակով, հարկավոր է, որ պատերազմից հետո ստեղծվի նոր աշխարհ, որը լինի ավելի արդարացի, ավելի ազատ, ավելի երջանիկ: «Եթե նրանց շահողներ ստեղծել այդ աշխարհը, ապա դա կնշանակեր, որ պատերազմը տանուլ է տված, եթե անգամ, իրականում, հաղթությունը իրենք տարած լինեին»:

Ի զարմանս Չեզիրայի, Միկելեն բանդիտներ էր համարում այն Մուսսոլինիին, որին Փաշիստները «սև քսանամյակի» համր տարիներին բոլոր խաչմերուկներում հանձար էին հորջորջում, և նրա մինիստրներին, որոնք մեծարվում էին, որպես երկրի խոշորագույն մարդիկ:

Ալբերտո Մորավիան մեծ վարպետությամբ օրգանապես համաձուլել է իր և իր հերոսուհու ապրումները: Նեոռեալիստական ոճի համար բնորոշ դիմումը «լիրիկական փաստաթղթին»՝ Չեզիրայի ինքնակենսագրությանը, որի մեջ այնքան բնականորեն ներառել է հեղինակի ինքնակենսագրականը, պայմանավորված է իտալական ժողովրդի պատմական զարգացման փաստով:

Եվ Չեզիրան, և հեղինակը, դուրս գալով անձուկ և նեղ շրջանակներից, առնչվում են ժողովրդական լայն զանգվածներին: Նրանց երկուսի զարթոնքն էլ երկարատև ձմեռնաքնից հետո իտալական ժողովրդի մտքի ազատագրումն է ազդարարում քարացած դավանանքների կարկամեցնող գերիշխանությունից և ավետում մոտալուտ գարնան զալուստը:

Ս. ՍԱՐՅԱՆ

*

* * *

Իտալիայի ամենանրբամիտ գրաքննադատներից մեկը մի առիթով նկատել է, որ Մորավիայի արձակը աչքի է ընկնում իր բնորոշ առանձնահատկությամբ. շատ հաճախ հեղինակին հետաքրքրում է ոչ այնքան որևէ մարդկային պրոբլեմ, որքան որոշակի թեզ կամ որոշակի թեմա, և նա մեկնաբանում է այդ թեման բարոյախոսական էսսեի ոգով:

Մորավիան մի գրող է, որը շափազանց սուր է որսացել ու պատկերել բուրժուական տրադիցիոն բարոյականության անկման պրոցեսը, իսկական էությունը այն անարխիստական մանրբուրժուական հայացքների, որոնք ոմանք համարձակվում են ներկայացնել որպես հակաֆաշիզմի առանձին ձև: Իսկ իրականում դա ամեն տեսակ բարոյականության անկում ու ոչնչացում է և հրաժարում հատկապես նոր բարոյականություն ստեղծելու փորձից:

Մորավիայի այն երկերում, որոսք մտահղացված ու գրված են Ֆաշիզմի անկումից հետո, որոշակի կերպով հնչում է մի լեյտամոտիվ, որը կոչ է՝ շտրվել էժանադին իլյուզիաներին և չկարծել, որ իբր Ֆաշիզմի առաջացրած բարոյական քայքայումը մեկընդմիջտ հաղթահարված է շնորհիվ այն բանի, որ Ֆաշիստական դիկտատուրայի քաղաքական ձևերը ոչնչացված են: Ավելին, Մորավիան իր դատապարտումների մեջ դառնում է էլ ավելի խիստ, քանի որ, որպես տաղանդավոր գրող, ինտուիտիվ կերպով նախագուշակում է, թե ինչպիսի նոր ուղիներով կգնա բարոյական անկման պրոցեսը: Նրա գրքերում երբեք չես հանդիպի նատուրալիստական նկարագրությունների, յուրաքանչյուր տեսարան գոյություն ունի ոչ թե ինքնին, այլ միշտ պատրվակ է ծառայում մարդու և հասարակության, զգացմունքի և բարոյականության քննադատական վերլուծության համար:

«Արհամարհանք» վեպում, Մորավիան իր հերոսի՝ Ռիկկարդոյի հոգու մեջ, ինչպես հերմետիկորեն փակ շշի մեջ, դրել է մանր և իսկապես էլ արհամարհանքի արժանի զգացմունքների թանձրուկ: Ընդամին, գրողը, ըստ երևույթին, ոչ թե հետևել է ռեալիստական դիմանկար ստեղծելու օրենքներին, այլ ավելի շատ էսսեի համար բնորոշ այն ստեղծագործական մաներային, որի հեղինակը ձգտում է, ինչ գնով էլ լինի, զարգացնել իր թեզը: Բայց անկասկած է նաև այն, որ Ռիկկարդոյի նման մակերեսային, անողնաշար տիպերը, որոնց համար համոզմունքները մոդայիկ հագուստի նման մի բան են, իսկապես որ եղել են: Իտալական իրականությունը անխնա մերկացրել է դրանց հենց հետպատերազմյան առաջին իսկ տարիներին: Եվ պետք է խոստովանել, որ Մորավիային հաջողվել է նման պերսոնաժի նկարագրությունը՝ հենց շնորհիվ նրա դեպի ծայրահեղություններն ունեցած մեծ հակումների:

Ռիկկարդոն շնորհալի մարդ է, նա զգում է դեկադենտական գաղափարների այլանդակությունը, որոնց հետ նա ընդհարվում է Ֆիլմի սցենարի վրա աշխատելիս, բայց նա օգտագործում է իր կարողությունները այնպես, ինչպես այդ հուշում է նրան իր թույլ բնավորությունը, նրա հիվանդագին եսասիրությունը: Նա հերոս չէ և նույնիսկ անտիհերոս չէ: Նա ընդամենը հարմարվողական է: Նրա կյանքը շատ դյուրին կանցներ և ընդհանրապես երջանիկ կդասավորեր: Բայց ամուսնական երկու տարուց հետո Ռիկկարդոյի կինը՝ էմիլիան, հասարակ մարդկանց հատուկ առողջ բանականությամբ ճանաչեց, թե իրականում ինչ է իրենից ներկայացնում Ռիկկարդոն: Եվ այն ժամանակ նախկին սերը իր տեղը զիջեց անկեղծ, խոր և վճռական արհամարհանքին:

Ռիկկարդոն չի ցանկանում ընդունել, որ էմիլիայի արհամարհանքը արդարացված է: Նա սկսում է փնտրել այդ արհամարհանքի պատճառները և չի կարողանում գտնել, որովհետև իր հիվանդագին եսասիրության պատճառով նրա բոլոր վերլուծությունները ոչնչի չեն հանգեցնում:

«Արհամարհանքը» ունի մի ուրիշ ավելի խոր իմաստ: Հեղինակը նկարագրում է կինեմատոգրաֆիայի աշխարհը, նրա այն ոլորտները,

որտեղ ամեն ինչ պատվում է մի միբաժի՝ դրամի շուրջը: Մորավիան գիտակցորեն, մտադրված կերպով է գալիս իր հերոսի կնոջը «սպանելու» անհրաժեշտության մտքին: Այդ մահը կարծես թե Ռիկկարդոյին տալիս է ճիշտ ճանապարհի վրա կանգնելու մի վերջին ու բացառիկ հնարավորություն: Բայց հենց այդ պահին հեղինակը արտասանում է ամենադաժան դատապարտության խոսքերը. նա ելնում է «բարոյական քավության» գաղափարի դեմ. այդ երեսպաշտ գաղափարի, որովհետև չկա այլևս նա, ով ինքը միայն կարող է դատել Ռիկկարդոյի անկեղծության մասին:

Մորավիայի գրքերը օգնում են իրականության ինչ-որ մի մասը հասկանալուն: Իսկ մի՞թե կարելի է ապրել առանց հասկանալու: Այդ իմաստով Մորավիայի գրքերը օգնում են ապրելուն:

ԱՆՏՈՆԵԼԼՈ ՏՐՈՄԲԱԴՈՐԻ

ԲՈՎԱՆԴԱԿՈՒԹՅՈՒՆ

Զոչարա	3
Արհամարհանք	413

ISBN 5—550—00337—6

Литературно-художественное издание

АЛЬБЕРТО МОРАВИА

Чочара

Презрение

Романы

Ереван, издательство «Советакан ցрох»

На армянском языке

Գրական-գեղարվեստական հրատարակություն

ԱԼԲԵՐՏՈ ՄՈՐԱՎԻԱ

Զոչարա

Արհամարհանք

Վեպեր

Խմբ. վարիչ՝ Վ. Հ. Բարսյան
 Խմբագիր՝ Է. Ռ. Մասունյան
 Գեղ. խմբագիր՝ Հ. Ս. Մալխասյան
 Նկարիչ՝ Կ. Կ. Մնացականյան
 Տեխ. խմբագիր՝ Ս. Գ. Շահվերդյան
 Վերստուգող սրբագրիչ՝ Ս. Մ. Բուլաթյան

ИБ № 6517

Հանձնված է շարվածքի 25. 01. 89; Ստորագրված է տպագրության 22. 04. 89; Ֆորմատ՝ 84×108¹/₃₂; Թուղթ՝ տպագր. № 2; Տառատեսակ՝ «Գրքի սովորական»; Տպագրություն՝ բարձր, 35,28 պայմ. տպ. մամ., 31,3 հրատ. մամ.; Տպաքանակ՝ 50 000; Պատվեր՝ 241; Գինը՝ 3 ռ. 50 կոպ.:

«Սովետական գրող» հրատարակչություն, Երևան—9, Տերյան 91:

Издательство «Советакан ցрох», Ереван-9, ул. Теряна, 91.

ՀՍՍՀ հրատարակչությունների, պոլիգրաֆիայի և գրքի առևտրի գործերի պետական կոմիտեի № 1 տպարան, Երևան—10, Ալավերդյան փող. 65:

Типография № 1 Госкомитета по делам издательств, полиграфии и книжной торговли Арм. ССР, Ереван, ул. Алавердяна, 65.